

劉賓客文集

上三十卷兩冊



劉賓客文集卷第一



正議大夫檢校禮部尚書兼太子賓客贈兵部尚書劉禹錫

問大鈞賦 砥石賦 楚望賦

傷往賦 其何小賦 謫九年賦


望賦 山陽城賦 秋聲賦

問大鈞賦

始余失臺即為刺史又貶州司馬俟罪朗州三見閨

用人咸謂數之極理當遷焉因作謫九年賦以自廣

是歲臘月詔追明年自闕下重領連山郡印綬人咸



曰美惡周必復第行無恆歲杪其復乎居五年不得
調歲二月有事于社前一日致齋孤居慮靜滯念歎
起伊人理之不可以曉也將質諸神乎謹貢誠馳精
敢問大鈞其夕有遇寤而次第其詞以為賦

圓方相函兮浩其無垠宵冥翕闢兮走三辰以騰振
孰主張是兮有工其神迎隨不見兮強名之曰大鈞
歌以臨下兮巍乎雄尊天為獨陽高不可問工居其
中與人差近身執其權心乎其運循名想象斯可以
訊曰嘻蒙之未生其猶泥耳爾落乎埏埴唯鈞所措忽

然為人為幸大矣工賦其形七情與俱嗇智不授畀
之以愚坦坦之衢萬人所趨蒙一布武化為畏途人
或譽平之百說徒虛人或排之半言有餘物壯則老
乃唯其常否終則傾亦不可長老先期而驟至今否
踰數而巨量雖一夫之不獲兮亦大化之攸病謹薦
誠上問兮俛伏以聽是夕寢熟夢遊乎無何有之鄉
抗陞級乎重霄兮異人間之景光中有威神中金甲
而煒煌頷之使前兮其音琅琅曰吾大化之一工也
居上臨下廉其不平汝今有辭吾一以聽播形肖貌

生類積億橐籥圜匡鎔鍊消息我之司智初不爾嗇
不守以愚覆為汝賊既賦汝形輔之聰明盍求世師
資適攸宜胡然抗志遐想前烈倚梯青冥舉足斯跌
韜爾智斧無為自伐鑿竅太繁天和乃洩利運前誘
多逆覆轍名腸內煎外火非熱今哀汝窮將厚汝愚
剔去剛健納之柔濡塞前竅之傷痍兮招太和而與
居貫以待人兮急以自拘道存壺與無示四隅軌物
之勢不作兮見傷之機自無汝不善用吾焉嗇乎且
夫貞而騰氣者臙臙健而垂精者昊昊我居其中猶

輪是蹈以不息為體以日新為道僕鱗蜚走灌莽苞
臬乃牙乃甲乃殞乃剖陽榮陰悴生濡死蕘各乘氣
化不以意造賦大運兮無有淋惡彼多方兮自生醜
好爾奚不德余以驟壯姑尤我以速老邪觀汝百為
又或不然赤子哇哇急其能言亦既名物幾時踟躕
春耕其丘投種之日釋耒而歎何時**粟實**望所未至
謂余舒舒欲其久留謂我瞥如我一子二誰之曲歟
彼薰葭之蒼蒼兮霜霰苦而中堅松竹之皴皴索籜
予不若樹筍之可憐納材葦而構明堂兮固容消而

力完揚且之暫兮不可以常然當錫爾以老成蒼眉
皓顛山立時行去敵氣與矜色兮噤危言以端誠俾
人望之侮黷不生爾之所得孰與壯多不善處老問
余而何受教而回遽遽形開嚮之威神孰為來哉乃
遽衣促盥端慮滌想委佩低簪持簿叩頤而言曰楚
臣天問不訓今臣過幸一獻三售始厚以愚終期以
壽忘上問之罪濯已然之咎心憎故術腹飽新授馳
神清玄拜手稽首兮

砥石賦 時在朗州

南方氣泄而雨滌地慝而傷物姬神噫濕渝色壞味
雖金之堅亦失恒性始余有佩刀甚良至是澀不可
拔剖其室乃出邈陽眇眇眩傳刃蒙脊鱗然如痛痂如
黑子如青蠅之惡銳氣中錮猶人被病然客有聞焉
裹密石以遺余沃之草腴雜以烏膏切剝下上真質
焯見躊躇四顧追余周爾謝客微子之貽幾喪吾寶
客曰吾聞諸梅福曰爵祿者天下之砥石也高皇帝
所以礪世磨鈍有是邪余退感其言作砥石賦
我有利金兮以利為佩遭土卑而慝作為雄銚為之

潛晦如景昏而蝕既兮與肌漆而為癘顧秋蓬之不
可刺兮尚可遊乎翫解之外利物蒙蔽材人惆悵俾
百汰之至精蟠一檢而多恙豈害氣之獨然兮將久
不試而然彼屠者之刃兮獵者之鋌不灌不淬兮揉
錯銜鈿日鼓月揮兮剗腹擊鮮皖燿燿耀以耀芒菊淫
夷而騰羶豈不涉暑而蒙冷兮鼎用之而成妍有容
自東遺余越砥圭形石質蒼色賦理刻其鱗皴滑以
漪瀧如衣澣垢如鼎出否霧盡披天萍開見水拭寒
熒以破皆擊清音而振耳故態復還寶心再起既賦

形而終用一蒙垢焉何恥威利鈍之有時兮寄雄心
于瞪視嗟乎石以砥焉化鈍為利法以砥焉化愚為
智武王得之商俗以厚高帝得之傑材以奏得既有
自失豈無因漢氏以還三光景分隨道闊狹用之得
人五百餘年唐風始振懸此大砥以礮兆民播生在
天成器在君天為物天君為人天安有執礪世之具
而患乎無賢歟

楚望賦

予既謫于武陵其地故郢之裔邑與夜郎諸夷錯雜

繫乎天者陰伏陽驕是已繫乎人者風巫氣窳是已
囂氣浮浮利于樓居城之麗譙實鄰所舍四垂無蔽
萬景全入因道其遠邇所得為楚望賦云

翼軫之野祝融司方陰迫而專專實生沴天濡而霽
土洩而泥氣罕泚清兮滯氛曠曠中人體支兮為瘡
為瘵以曠滌煩兮利居高于物外我卜我居于城之
隅宛在藩落麗譙渠渠四阿垂空洞戶發樞眸于不
運坐陵虛無歲更周流時極慘舒萬象起滅森來既
予櫺軒之外群山巖崿岡陵靡陀勢若相拱出雲見

恠窈蔚森聳露夕霞朝望如飛動蒼廡之下大江瀕
洞支流合輸泄入雲夢羲和望舒出沒兩涯涵泳之
族聳牙啟呀秋水灌盈漩石飄沙流枿軒昂舞于盤
渦逮及收潦澹如綠醪白石磷磷倒影羅生蘋末風
起有文無聲悠遠烟絲與空蒼然湘沅之春先令而
行臘月寒盡溫風發榮土膏如濡言鳥嚶嚶三星擘
其曉中植物颯以飄英雲歸高唐草蔽洞庭日與天
盡神將化并圓方相涵遊氣杳冥熙熙藹藹藻飾羣
形枿樹童丘積空凝青環洲曲塘含景曜明恢台之

氣發于春季涉夏如鑠逮秋愈熾土山焦熬止水漢
沸翔禽跼墮呀味垂翅曦赫歎蒸陽極反陰二儀交
精下上相歆雲興天際歛若車蓋凝矚未瞬彌漫霍
霹驚雷出火喬木糜碎殷地藝空萬夫皆廢懸雷綆
縫日中見昧移晷而收野無完塊少陰之中景物澄
鮮丹葉星房燭耀川原夕月既望曜于丹泉上鏡下
冰漭塵濯烟宿麗潛芒獨行高躔皓一氣之悠然潔
有形而溢清玄杳微明而斐奮想遊目於化先夜無
朕以徂征金霞暈乎海壖明星方揚鈞漢西懸瓊柄

如墮半沈層瀾鷄啁晰而晨鳴兮日荏苒以騰晶動
植瞭兮已分山川鬱乎不平復人寰之誼卑洵浩浩
以營營追向時之景光不可驟得以再更意華昏之
夢還猶彷彿而馳精日次于房天未降霜百卉猶澤
水泉收脉故道宣音削行為廣斥水禽嬉戲引吭伸
翻紛驚鳴而決起拾綵翠于沙礫時時北風振槁揚
埃蕭條遑聲與鴈俱來寒氛委積萬竅交激楚雲改
容飛雨凝滴灑林遍響浙瀝捎械飛電照雪以騰光
柔蔬傲霜而秀圻躔次殊氣川谷異宜民生其間俗

鬼言夷招三閭以成謠德伏波而構祠投粃救反片

以鼓檝秦鱸魴而如犧蟠木覩深孽杖憑之祈年去

痛蠲敬祗威擊鼓肆筵河旁水湄薦誠致祝卻略躩

踞躩踞刺龍動渚居蠡食大掩水物罟張餌啗不可

遁伏顯舉潛縋晝撞夜觸設機沈深如拾于陸彼遊

儵之瑣類咸跳脫於窘束雖三趾與六眸時或加乎

一目亦有輕舟軒輕泛浮控綸徃復馴鷗相逐莫夜

澄寂嘯歌群族僮音俚態幽怨委曲逗踈杵於江城

引哀猿于山木巢山之徒枰木開田灼龜伺澤兆食

而燔鬱攸起于巖阿騰絳氣而蔽天熏歇雨濡穎垂

林巔盜天和而藉地勢諒無勞而有年罷士閑人逸

為末作求金渚涖淘汰澆灑流注瀆沱繁光熠燿貪

賈來貿發於懷握無翼而飛潤于豐屋晒耕耘之悒

悒徒胼胝以自勸我處層軒日星回還閱天數而視

民風百態變見乎其間非耳剽以臆說兮固幽求而

縱觀觀物之餘遂觀我生何廣覆與厚載豈有形而

無情高莫高兮九閼遠莫遠兮故園舟有檝兮車有

轄江山坐兮不可越吾又安知其所如恍臨高以觀

物

傷往賦

人之所以取貴乎蜚走者情也而誕者以遺情為智
 豈至言邪予授室九年而鰥痛若人之天闕弗遂也
 作賦以傷之冀夫覽者有以增伉儷之重云
 歎獨處之邑邑兮憤伊人之我遺情可殺而猶毒境
 當歡而復悲人或朝歎而莫息夫何越月而逾時太
 極運乎三辰轉寒暑而下馳有歸於無兮盛復於衰
 猶昧爽之必莫又安得而怨咨我今怨夫若人兮曾

旭旦而潛暉飄零日反之夢

日及槿也朝生暮落一名王蒸爾雅

倏忽

蜉蝣之衣川走下而不還露迎暘而易晞恩已甚兮
 歎絕見無期兮永思我行其野農民桑者舉按來鱸
 亦在林下我觀于途禠販之夫同荷均挈荆釵布襦
 羽毛之蕃鱗介之微和鳴灌叢雙泳連漪薨薨伊蟲
 蠢蠢伊豸遊空穴深而兩相比何動類之萬殊必雄
 雌而與俱物莫失儼以孤處我方踽踽而焉如我復
 虛室目悽涼兮心伊鬱心伊鬱兮將語誰坐匡牀兮
 撫嬰兒何所丐沐兮何從仰飴襦袴在身兮昔園蹊

跌擊囊肘臂兮餘馥歲稔誠天性之潛感顧童心兮
如疑曉然有難繼之慕漠然減好弄之姿指遺挂兮
能認遡空闌兮欲歸我入寢宮痛人亡兮物改其容
寶瑟偃兮絃柱絕瑤臺傾兮鏡奩空寒鑪委仄虛幌
多風隙駒晨轉窓蟾夜通步搖昏兮網黏翡翠芳褥
掩兮塵化蛩蛩閱刀尺之餘澤見巾箱之故封玩服
儼兮猶具繁華謝兮焉從想翩躚於是非求倦宰與
冥蒙信奇術之可致嗟此生兮不逢徒注視以寐聽
恍神疲而目寤還抱影以獨出紛百哀而攻中系曰

龍門風霜苦別鶴哀鳴夜銜羽吳江波浪深雌劍一
去無遺音悲之來兮憤予心洵如行波游浸滛悵緣
情而莫極思執禮以自箴已焉哉苒苒生死悠悠古
今乘彼一氣兮聚散相尋或鼓而興或罷而沈以無
涯之情愛悼不駐之光陰諒自迷其有分徒終怨於
匪忱彼蒙莊兮何人予獨累歎而長吟

何卜賦

余既幼感~~命~~命之說兮身久放而愈疑心回~~其~~其莫
曉兮將取質夫~~秉~~龜楚人俗巫而好術兮叟有鬻卜

而來思乃招而祝之曰嘻人莫不塞有時而通伊我
考久而愈窮人莫不病有時而間伊我考久而滋蔓
吾聞人肖五行動止有則四時轉續變於所極一歲
之旱人斯具舟三月之熱人斯具裘極必反焉其猶
合符子首圓而足方子腹陰而背陽胡形象之有肖
而變化之殊常經曰剝極則贖居賁而未嘗剝者其
誰否極受泰居否而未嘗泰者又其誰鶴胡不截鳧
胡不禪夔何罰而蹠蹕炫何功而扶持紛紜恣睢交
作舛馳似予似奪似信似欺孰主張之問于子龜卜

者曰招我以粗問我以微有天下之是非有仁人之
是非在此為美考在彼為嗤或昔而成或今而虧君
問曷由主張其時時乎時乎去不可邀來不可逃淹
淹考孰捨孰操豕喙之毒豕鷄首之賤毛各於其時
而伯音霸其曹屠龍之伎非曰不偉時無所用莫若履
絺作備之工非曰可珍時有所用貴於斷輪絡首縻
足考驥不能踰跬前無所阻考跛鼃千里同涉于川
其時在風沿者之吉沂者之凶同藝于時其時在澤
伊種之利乃穆之厄故曰是邪非邪主者時邪諒泚

惡之同出兮顧所丁之若何夫如是得非我美失非
我恥其去曷思其來曷期姑蹈常而俟之夫何卜為
言訖執龜而起予退退而作何卜賦於是蹈道之心一
而俟時之志堅內視群疑猶冰釋然

謫九年賦

古稱思婦已歷九秋未必有是舉為深愁莫高者天
莫濬者泉推以極數無踰九馬伊我之謫至於數極
長沙之悲三倍其時廷尉不調行當跋而天有寒暑
閏餘三變朝有考績明幽三見顧堯之民兮亦昏墊

而有歎歎息兮倘佯登高高兮望蒼蒼突弁之夫我
來始黃合抱之木我來猶芒山增昔容水改故坊童
者鬱鬱而潤者洋洋天覆地生菊兮無傷彼族而居
鄉之投荒彼軒而遊昨日桁楊信及澤濡俄然復常
稽天道與人紀咸一備而一起去無久而不還焚無
久而不理何吾道之一寤兮貫九年而猶爾噫不可
得而知庸詎得而悲苟變化之莫及兮又安用夫肖
天地之形為

望賦

邈不語兮臨風境自外兮感從中晦明轉續兮八極
鴻濛上下交氣兮群生異容發孤照於寸眸驚遐情
乎太空物乘化兮多象人過時兮不同嗟乎有目者
必騁望以盡意當望者必緣情而感時有待者瞿瞿
忘懷者熙熙慮深者矻然若喪樂極者冲然無遠外
徙倚其如一中糾紛兮若斯望如何其望最樂晞慶
霄兮邈阿閣如雲兮天顏咫尺如草兮臣心踊躍扇
交翟兮蔽旌旗升龍兮蠖略日轉黃道天開碧落凝
瑞景於庭樹掬非烟于殿幕望如何其望且懽登灞

岸兮見長安紛擾擾兮紅塵合鬱蔥蔥兮佳氣盤池
象漢兮昭回城依斗兮闌干避御史之馳馬逐倖臣
之金丸望如何其望攸好宗萬靈兮越四隩漢帝仙
臺兮秦皇海嶠霓衣踴于河上馬跡窮乎越徼紫氣
度關而斐奮神光燭天而照耀睨眷眷以馳精倣專
專而觀妙望如何其望有形視蠢蠢兮窮冥冥楚塞
氛惡兮蕭闕燧明暈籠孤月角奮長庚沙多似雪磧
有疑城烟雲非女子之氣草木盡王者之兵審曳柴
之虛警破來馳騎之先聲信有得於風鳥示無言于旆

旌望如何其望且慕思意隔今年光度雕輦已辭兮
金屋何處長信草生兮長門日莫後翠華之儻來仰
玄天以自訴况復湘水無還漳河空注淚染枝葉香
餘紉素風蕭蕭兮北渚波烟漠漠兮西陵樹夫不歸
兮江上石子可見兮秦原墓拍琴翻朔塞之音挾瑟
指邯鄲之路望如何其望最傷侯環玦兮思帝鄉龍
門不見兮雲霧蒼蒼喬木何許兮山高水長春之氣
兮靦萬族獨含嘯兮千里目秋之景兮懸清光偏結
情兮九回腸羨環拱於白榆惜馳暉於落棠諒衝斗

兮誰見伊戴盆兮何望聲平豈止蘇武在胡管寧浮海
送飛鴻之滅沒附陰火之光彩鶴頌長引烏頭未改
恨已極兮平原空起反何時兮東山在永望如何傷懷
孔多降將有依風之感宮人成憶月之歌歌曰張衡
側身愁思久王粲登樓日回首不作渭濱垂釣臣羞
為洛陽拜塵友

山陽城賦

山陽故城遺趾數雉四百之運終於此墟喬孫作賦
蓋閔漢也詞曰

我止行車實涕于山陽之墟是何蒼莽與慘悴舂陵
之氣兮焉如歸昌運於四百辭至尊而伍匹夫有利
器而倒持兮曾何芒刃之足舒懿王迹之聲基登坤
維之再敷邈汜陽與鄗上悅蛇變而龍攄痛人止而
事替終此地焉忽諸嗟乎積是為治積非成虐文景
之欲處身以約播其德才迄武乃獲桓靈之欲縱心
于昏熟其妖焰逮獻而焚彼伊周不世兮奸雄乘釁
而騰振物象灌以易位被虛號而陽尊終世殫而事
去胡竊揖讓以為文嗚呼維神器之至重兮蓋如山

之不騫使人得譬乎逐鹿固健步者所先諒人事之
云爾孰云當塗之兆也自天亂曰久矣莫可追此彼
墟兮噫嘻獨遺武兮貽後王之元龜此

秋聲賦

相國中山公賦秋聲以屬天官太常伯唱和俱絕然
皆得時道行之餘興猶有光陰之歎况伊鬱老病者
乎吟之斐然以寄孤憤此
碧天如水兮窅窅悠悠百蟲迎莫兮萬葉吟秋欲辭
林而蕭颯潛命侶以啁啾送將歸兮臨水非吾土兮

登樓晚枝多露蟬之思夕夢趨寒蠶之愁至若松竹
含韻梧楸蚤脫驚綺䟽之曉吹墮碧砌之涼月念塞
外之征行顧閨中之騷屑夜蛩鳴兮機杼促翔鴈叫
兮音書絕遠杵續兮何泠泠虛窻靜兮空切切如吟
如嘯非竹非絲當自然之宮徵動終歲之別離廢井
臺臺合荒園露滋草蒼蒼兮人寂寂樹槭槭兮蟲唧唧
則有安石風流巨源多可平六符而佐主施九流而
自我猶復感陰蟲之鳴軒歎涼葉之初墮異宋王之
悲傷覺潘郎之公麼嗟乎驥伏櫪而已老鷹在韝而
有情聆朔風而心動眄天籟而神驚力將瘳兮足受
絀猶奮迅于秋聲

劉賓客文集卷第二 碑上

代郡開國公王氏先廟碑

彭陽侯令狐氏先廟碑

高陵縣令劉君遺愛碑

故吏部侍郎奚公神道碑

代郡開國公王氏先廟碑

唐制五等有爵服而無山川登于三事得立四廟備物崇祀以交神明敬先報本以輔孝治有國之令典也維長慶三年前相國王公始卜廟于西京原崇業里公時鎮劔南東川上章曰臣涯官秩印綬品俱第三請如式以奉宗廟制曰可是歲仲冬申命長男孟堅

祔其主於三室明年公入為御史大夫復以十二月
躬行烝祭間歲公出梁州就拜司空禮崇異數廟加
祀室大和二年增新室既成祔顯考于尊位告饗由
禮觀之者以為世程第一室曰上儀同幽州別駕府
君諱元政以妣博陵崔氏配第二室曰湖州安吉縣
令贈尚書刑部員外郎府君諱實以妣贈扶風縣太
君馬氏配第三室曰朝散大夫青州司馬贈戶部侍
郎府君諱祚以妣贈武威郡太夫人賈氏配第四室
曰溫州刺史贈太尉府君諱冕以妣贈魯國太夫人

博陵崔氏配初周靈王太子晉遇浮丘公化為神僊
時人號曰王家其後遂以命氏顯于秦者曰翦三世
將秦師子孫分居晉代間東漢有徵君霸霸孫甲亦
號徵君徙居祁縣為著姓故至于今為太原人自漢
涉魏蓋以熾昌凡十葉至後魏度支尚書廣陽侯回
廣陽有二子神念神感神念南奔梁神感北仕齊惟
儀同府君廣陽侯五代孫也唐興于太原實從義旗
佐成王業故有開府儀同之寵惟刑部府君以功臣
子理二邑不躋貴仕故有錫羨後大之祥惟戶部府

一本饒作院無
縣字

君幼孤以孝聞於鄉曲未冠以文售於有司由前進
士補延州臨安縣主簿會詔徵賢良策在甲科授瀛
州饒陽縣尉歲滿遷渭南天后在神都而東畿差重
遂由渭南轉河陽適逢建萬象神宮旬內吏分董其
役因上書切諫繇是名益聞開元初以大理司直馳
軺車聯轡大獄閩鼎朔漠所至決平蚤以藥棘傷生
晚成劇恙樂就夷曠故不至大官惟太尉府君生於
治平時以文學自奮年十有五貢然從秋賦明年春
升名于司徒又一年玄宗御層樓發德音懸文詞政

術科以置髦士府君策最高授太常寺太祝未幾復
以能通道德南華冲虛三真經進蓋屋尉天寶中歷
右拾遺左補闕禮部司駕二貞外郎屬幽陵亂華遣兵
南服因佐閩粵改檢校比部郎中行軍司馬時中原
甫寧江南為吉地二千石多用名德乃以府君牧温
州朝廷虛公卿以俟高第及聞訃永嘉人輒舂罷社
縉紳間以不淑相弔焉雖位負于道而邁德垂矩後
之人得以纘承在揚之其儲休啟祐有自云爾生三
子皆聰明絕人長曰治以神童仕至檢校禮部郎中

治一本作沼

次日潔以奇文仕至國子司業今代郡公寶季子也
蚤在文士籍射策連中咸世其家貞元中德宗聞其
名自藍田尉召入禁中視草厥後三典書命再參內
廷憲宗器之付以國柄翊贊有道雖冊免常居大僚
今年自梁州請覲上思用舊臣為羽儀遂領太常其
公府如故以一心事六君顯官重務靡不揚歷且夫
起諸生至三公而心愈卑道益廣出授黃鉞以伯諸
侯入服華章以謁家廟追崇極大位血食備多室享
全榮而奉昭薦嗚呼公侯之孝歟宜書廟器以視喬

公之三鼎其辭曰

閱宇神庭邃清而嚴上公之儀四室耽耽犧以潔牲
粢以大糝交神尚敬合魄尚氣子姪宗工駿奔奉事
副筭侈袂儼恪居次孝孫兢兢執爵而升以裸以濡
以伏以興水陸其來羶薌畢登列于園方其器增增
乃禴乃嘗敬而追遠二昭二穆孝以尊本瞻瞻几幄
踳踳堂梱禮成起慕涕落玄袞濡露踐霜誰無永懷
不如達者哀與榮偕逢時奮庸誰不得位不如仁人
以道為貴惟公之達芳名以顯親惟公之仁芳德以

澡身六朝之清臣一代之全人宜其世家翼翼振振
罔不肅祇于廟之門

彭陽侯令狐氏先廟碑

今上元年七月十三日汴州刺史宣武軍節度副大
使知節度事汴宋亳等州觀察處置使銀青光祿大
夫檢校禮部尚書兼御史大夫上柱國彭陽縣開國
伯令狐公西嚮拜章上言守臣楚蒙被恩澤列為先
侯得立家廟以奉宗祀制書下其奏于有司於是善
相考祥得地于京師通濟里居無何新廟成公以守

藩故申命季弟監察御史定卜牲練日越八月丁亥
祔饗三室塙墉以尚幽設幄以迎精禮無尤違神用
寧謚第一室曰秦州上邽縣尉諱濬以妣太原王氏
配第二室曰綿州昌明縣令贈吏部尚書諱崇亮以
妣贈太原郡夫人河東柳氏配第三室曰太原府功
曹參軍贈太子太保諱承簡以妣贈魏國太夫人富
春孫氏配明年十月公由浚郊以介圭入覲真拜戶
部尚書進爵為魯侯既辭戎旃得以列侯謁三廟是
歲南至上不視朝又得以時展祭先期致齋栗然以

敬既齊盡志歆然永思奉其百順陳以其物始躋而
處處恭終獻而汎濶既卒事顧麗牲之石宜有刊**紀**乃
俾家老授其謀于所知云令狐晉邑也晉大夫魏顥
以輔氏之功始封焉其易名曰文國語所謂令狐文
于是已其先周文王之昭畢公高之裔畢萬為晉卿
始封于魏自萬至顥蓋四世其後三十七世藍田侯
蚪仕拓跋魏為燉煌郡太守子孫因家遂占數為郡
人藍田之孫熙在隋為納言惟上邽府君納言之玄
孫道克肖而位不至惟尚書府君西州之右族光未

耀而德已基惟太保府君志為君子儒以經明居上
第調補陽安縣主簿歷正平尉汾州司法叅軍陝州
大都督府兵曹終于太原府首掾始以顥經進既仕
旁通百家愛穀梁子清而婉左丘明國語辨而工司
馬遷史記文而不華咸手筆朱墨究其微旨愷悌以
肥家信誼以急人德克齒耄獨享天爵故休祐集于
身後徽章流乎佳城凡以子貴承澤降命書告第者
始贈尚書祠部郎中再贈禮部尚書三加右僕射四
為令稱一作四進太保五為上公先夫人亦四徙封密印纍纍邦

族聳慕生三子皆才彭陽公為嗣次子從端實肅給
今為檢校膳部郎中參河東軍事季子前所謂監察
御史今主柱下方書溫敏而有文綽綽然真令兄弟
惟彭陽以詞筆取科名累參侍從由博士主尚書牋
奏典內外書命遂登樞衡言文章者以為冠擁節總
戎率身和衆留惠于盟津變風于浚都言方略者以
為能夫浚師嘆喏難治乘釁竊發寢成習俗莅止五
載飲和革心東馬來朝熊羆隕涕問公還期觴必祝
之留為常伯旋命居守汴人聞公之東近而愈懷翹

翹瞿瞿盡西其首言遺愛者可紀焉貴而率禮老而
能慕怵惕乎霜露齋莊乎廟祧睦其仲季施及鄉黨

言孝悌者歸厚焉勒銘于碑以代藥文曰

已公孤之孝莫如備物顯顯新廟四阿三室時惟仲月

卜用柔日醴醎芬芬牲牲博脯籩在堂簫管在庭

孝孫烝烝躬若奉盈低簪委紳薦俎登鉶盼嚮交感

涕流緣纓禮以備儀誠以致美祖考來格錫之丕祉

工祝告訖退循軒庇乃授風人作詩以紀猗歟彭陽

之寵光佐憲皇穆穆皇皇西省東臺迭為侍郎國之

大政咨爾平章敬宗凝旒俾鎮雖丘入為地官令守
東州周彭陽之忠厚宜介福以壽東郊既釐可復朝右
縣縣其胄系于周舊由我顯起必昌其後大和紀元
作廟之首刻碑廟門龍集己酉
高陵令劉君遺愛碑
縣內之大夫鮮有遺愛在其去者士蓋邑居多豪政出
權道近非有卓然異績結于人心浹于骨髓安能久而
愈思大和四年高陵人李士清等六十三人思前令
劉君之德詣縣請金石刻縣令以狀申府府以狀考

于明法吏吏上言謹按寶應詔書凡以政績將立碑
者其具所紀之文上尚書考功有司考其詞宜有紀
者乃奏明年八月庚午詔曰可令書其章明有以結
人心者揭于道周云涇水東行注白渠醜而為三以
沃關中故秦人常得善歲按水部式決洩有時畎澮
有度居上游者不得擁泉而顯其腴每歲少尹一人
行視之以誅不式兵興以還寢失根本涇陽人果擁
而顯之公取全流浸原為畦私開四竇澤不及下涇
田獨肥它邑為枯地力既移地征如初人或赴訴泣

迎尹馬而占淫之腹皆權倖家榮勢足以破理訴者
覆得罪繇是咋舌不敢言吞寃銜忍家視孫子長慶
三年高陵令劉君勵精吏治視人之瘼如燠疽在身
不忘決去乃循故事考式文暨前後詔條又以新意
請更水道入于我里請杜私竇使無棄流請遵田令
使無越制別白纖悉列上便宜掾吏依違不決居二
歲距寶曆元年端士鄭暉為京兆秋九月始具以聞
事下丞相御史御史屬元谷實司察視持詔書詣渠
上盡得利病還奏青規中上以谷奉使有狀乃俾太

常撰日京兆下其符司錄姚康士嘗掾李紹實成之
縣主簿談孺直實董之冬十月百衆雲奔憤與喜并
口謔手運不屑鑿鼓揆功什七八而涇陽人以竒計
賂術士上言曰曰白渠下高祖故墅在焉子孫當恭敬
不宜以畚鍤近阡陌上聞命京兆立止絕君馳詣府
控告具發其以賂致前事又謁丞相請以顙血汚車
茵丞相彭原公歛容謝曰明府真愛人陛下視元元
無所恠第未周知情偽耳即入言上前翌日果有詔
許訖後仲冬新渠成涉季冬二日新堰成駛流渾渾

如脉宣氣萬荒漚冒迎耜澤澤音釋開塞方寸皆如詔
條有秋之期投鍾前定孺直告已事君率其寮躬勞
俸之烝徒謹呼奮襁襖而舞咸曰吞恨六十年明府
雪之擿奸犯豪卒就施為嗚呼成功之難也如是請
名渠曰劉公而名堰曰彭城按股引而東千七百步
其廣四尋而深半之兩涯夾植杞柳萬本下垂根以
作固上生材以備用仍歲旱沴而渠下田獨有秋渠
成之明年涇陽三原二邑中又攤其衝為七堰以折
水勢使下流不厚君詣京兆索音言之府命從事蘇持

至水濱盡撤不當攤者繇是邑人享其長利生子以
劉名之君諱仁師字行輿彭城人武德名臣刑部尚
書德威之五代孫大曆中詩人商之猶子少好文學
亦以籌畫干東諸侯遂參幕府歷尹劇縣皆以能事
見陟率不時而遷既有績于高陵轉昭應令俄兼檢
校水曹外郎充渠堰副使且錫朱衣銀章計相愛其
能表為檢校屯田郎中兼侍御史幹池鹽監于蒲錫紫
衣金章歲餘以課就加司勳正郎中執法理人為循
吏理財為能臣一出於清白故也先是高陵人蒙被

憲風而惜其捨去發於胸懷播為聲詩今采其旨而
變其詞志于石文曰
噫淫水之逶迤溉我公兮及我私水無心兮人多僻
錮上游兮乾我澤時逢理兮官得材墨綬紫兮劉君
來能愛人兮恤其隱心既公兮言既盡縣申府兮府
聞天積憤刷兮沉疴痊劃新渠兮百畝流行龍蛇兮
止膏油遵水式兮復田制無荒區兮有良歲嗟劉君
兮去翱翔遺我福兮牽我腸紀成功兮鐫美石求永信
詞兮昭懿績

唐故朝議郎守尚書吏部侍郎上柱國賜
紫金魚袋贈司空奚公神道碑

嗚呼有唐清臣尚書吏部侍郎奚公貞元十五年十
月甲子薨于位詔贈禮部尚書太常考行謚曰某是
歲臘月丁酉葬于萬年縣之某原後三十有四年子
為諸侯為大夫門戶有煇於是門下生琢石紀德揭
于阡云公諱陟字般衡其先在夏為車正以功封
于薛下故以降為譙郡人或因仕適楚復之秦今為
京兆人隋唐之際再世以明經為博士家有賜書曾

祖簡亦以文學為太子司議郎大父乾繹仕至光州
刺史烈考諱某有道而尚晦終徐州司功參軍贈和
州刺史由于貴也天以大運生萬物而以正氣鍾賢
人至和來宅其德乃具公實有焉幼而擢陵茗之秀
長而成清廟之器羣倫月旦咸以第一流處之及從
鄉賦暨升名太常果居上第明年詔郡國徵賢良設
四科以盡材公居文詞清麗之日授弘文館校書郎
時德宗新即位聲怛虜庭西戎畏威底貢內附詔諫
議大夫崔河圖持節即虜帳以報之使臣欲盛其賓

寮以自大遂嘿表公為介換大理評事除書到門公
方為人子不敢許以遠稱病弗果行歸寧壽春養志
盡敬丞相楊炎勇于用才擢公為左拾遺奉安輿而
西未幾再集茶蓼居後喪將闋是歲建中四年京師
急變黃屋順動狩于巴梁公徒行間道以歸王所既
中月而詔授起居郎充翰林學士創鉅愈遲病不拜
職改太子司議郎從大駕回入尚書為司金元士且
參權莞之務有頃持懿冊宣恩於薊門將行錫銀朱
於青蒲上復命稱旨轉吏部外郎是嘗在南宮為眉

目在選士為司命公執直筆閱簿書紛拏盤錯一瞬而剖時文昌缺左右丞都曹差重遂轉左司郎中尋遷中書舍人執事者繫公識精以斟酌大政非獨用文飾也會江淮間民被水禍上愍焉特命公宣撫之許以便宜及物赤車所至如東風變枯條其利病復奏咸可轉刑部侍郎時主計臣延齡以險刻貴倖而與京兆尹相惡以危事中之尹坐譴已又逮繫其吏峻繩之事下司寇主奏議者欲文致而甘心焉公侃然持平控彼嶽嶽君子聞之善其知道不私刑嘗既

清以餘刃兼領選事居一年授權知吏部侍郎又一年即真是秩言能審官者本朝有裴馬盧李四君子物論以公媿焉時得疾發癰有國醫方直禁中上促遣如第且敕之曰某賢臣也悉術以治之及有司以不起聞上震悼加等公娶琅邪王氏石泉公之曾孫友壻皆一時彥士長子某蚤不祿第二子敬則歷太僕少卿今為濮州刺史兼御史中丞賜金紫以連最就加貴秩俾視九卿第三子敬玄以詞藝似續登文科歷左補闕今為尚書刑部郎中第四子昊舉進士

最小子某咸砥礪纂修宜為名公家子其邁德垂裕
之光乎公少以名器自任及顯達急於推賢視其所
舉在西省薦權丞相由右史掌訓詞在中銓表揚僕
射由地曹即綜吏部二公後為天下偉人凡執文章
權衡以揣量多士一入中禁考策詞三在天官第章
句披沙剖璞由我而顯者落落然居多推是風鑒移
於大治則鎔範之內無非祥金嗟乎天不遐其福而
孤民望使由庚之什不作於貞元中惜也初公既齊
終詔贈大宗伯後以第三子在即位被霈澤再追襲

至司空故昔之葬儀用常伯而今之碑制用三公云
銘曰

仁麟智龍為瑞一辰未若君子瑞於人倫惟唐德宗
道類漢宣責實繩下風稜言言公丁斯時籍在雋賢
從難表節執羈而還帝曰汝器黃流瑟然可為大僚
左右化源乃飾王度乃馳輜軒既執刑柄亦操吏權
陽和熙熙貯在顏間守法持正疑如秋山火不侵玉
偉臣畏服鳳鳴祥烟梟噪佐銓帝方倚用天不假年
公寐無寤其名愈遠門人達者赤烏玄衣公居甚卑

其德愈尊兩子朝服駢驅朱輪佳城何在冑貴之里
螭首龜趺德輝是紀嗚呼後人下拜於此

劉賓客文集卷第二

劉賓客文集卷第三 碑中

唐故福建都團練觀察使薛公神道碑

許州文宣王新廟碑

唐故兼御史中丞贈太師崔公神道碑

唐故宣歙池都團練觀察使王公神道碑

唐故邠寧節度使史公神道碑

唐故福建等州都團練觀察處置使福州

刺史兼御史中丞贈左散騎常侍薛公神

道碑

薛在三代為侯國介于鄒魯間傳世三十有一為齊
所并其公子犇楚錫土田于沛漢末避仇之成都曹
魏平蜀徙家汾陰遂為河東臨晉人自奚仲為夏車
服大夫距今數千年乘軒服冕舄奕冠世言氏族者
署為關內甲姓天意若曰始有功于車服錫爾子孫
世世有之公諱謩字某曾祖寶胤以名家子且有學
行歷尚書郎鄴州司馬邠州刺史王父繪有雋材刺
三郡金密縣皆以治聞累績至銀青光祿大夫封龍
門侯烈考承矩以文亡害仕至大理丞公幼承前人

之覆露補崇文生歲滿得調主簿書于亳之譙苦二
邑又尉于東畿之河清貞元中上方與丞相調兵食
思得通吏治而習邊事者計相以公為對乃授監察
御史襄行充京兆水運使局居鴈門主穀糶具舟楫
募勇壯且便弓矢者為榜夫千有餘人隸尺籍伍符
制如舟師詔以中貴人護之聲震塞上每發粟沂河
北行涉戎落以饋緣邊諸軍及乘障者雖河塞回遠
必克期如合符一歲中省費萬計累加侍御史內供
奉賜飛魚袋有司條白其勞入拜殿內史未幾淮海

節將以戎倅缺聞事下丞相御史擇可者僉曰公政事已試遂授檢校戶部外郎兼御史淮南軍司馬尋轉駕部郎中錫以金紫過府遷申命真相趙國公帶中書侍郎代之公主行臺留務趙公文首及境視置郵供帳及郊視將迎部伍下車視簾幃器備乃曰信竒才也此不足以展驥朝廷知之擢為泗濱守既報政就加御史中丞俄遷福建都團練觀察使閩有負海之饒其民悍而俗鬼居洞砦音寨家桴筏者與華言不通公兼戎索以治之五州民咸說元和十年某月

某月薨于位年六十七贈左散騎常侍夫人趙郡李氏無兒蚤世繼夫人隴西李氏檢校禮部尚書河東節度使說之女生子凝為嗣季子茂弘以諸侯禮儀返葬故里蛾眉原從周也後二十有三年元日開成凝為平盧從事謹按令甲礮碑石來乞詞以垂於悠久初公治粟于朔陲愚方冠憲文冠察行馬外事聆風相厚謂可妻也以元女歸之明年愚入尚書為郎職隸計司因白計相召公來會府行有日矣遇內禪惟新愚以緣坐左貶間關外役竟不克面然而公之

德善灌注心耳孝弟為根柢誠明枝葉之直方為天
質禮讓緣飾之所至藹然繇此道也公初下世故人
丞相李太師誌其墓其略曰弘深莊重幹敏絕人此
與遊者傳信之詞也豈誣也哉故作銘曰

河汾翰淪鼎氣歊雲散為昌光凝為賢人常侍之生
其宗孔碩從祖昆弟詵詵三百文館入仕幽龍未光
尺木為階欵然欲翔司會知材績宣朔方邊師萬喉
俟我羸糧沂于黃河路出戎疆募乃勇士阜衣挽航
膺索臂孤穹廬在傍虜聞公名憚不敢攘安北以南

列城相望率有儲衛皆成金湯入居殿中分巡輦下
淮海軍大往為司馬軍中之治可移諸民乃牧于泗
乃廉于閩閩悍而囂夷風脆急思信綏之安然如蟄
閩方不泚天奪其福公薨于寢玄頽以復天王廢朝
贈之金貂莓莓晉原鬱矣中條大墓舊阡松楸蕭蕭
笳鼓以歸德音孔昭

許州文宣王新廟碑

歲在丙辰元日開成許州牧尚書杜公作文宣王廟
暨學舍于兌隅葺故而鼎新也前年公受社與鉞且

董淮揚汝南之師八月上丁釋菜於宣父之室陋宇
荒階不足回旋已事而歎乃詢黃髮有鄉先生前致
辭曰自盜起幽陵許為兵衝連戰交捭率無寧歲耳
說鉦鼓不聞弦歌目不知書不害為智爾來生聚教
養起居祖習壹出於軍容今幸天子憐許民為擇賢
侯此人人思治之時也公曰諾吾當先後之於是元
年修戎律以通衆志次年成郡政以蠲民瘼季年崇
教本以厚民風我言既從乃卜新宮漢水之瀕城池
在東登登其杵坎坎其斧繩之墨之鑿杓枝梧載登

載塗黜馬陵虛寢廟弘敞齋宮嚴闕軒墀廂廡儼雅
清潔門庭墻仞望之生敬外飾觚稜中設黼幄嚮明
當宇用王禮也堯頭禹身華冠象佩之容取之自鄒
魯及門覩與偶形畫像之儀取之自太學尊彝籩豆
青黃規矩之器秉周禮也犧牲制幣薦獻陞降之節
遵國章也藏經于重檐歛器于庋櫝講筵有位鼓篋
有室授經有博士督課有助教指蹤有役夫灑埽有
廟幹公又割隙地為廣圃蒔其柔蔬而常菹旨蓄之
禦備捨已俸為子錢榷其孳贏而鹽酪釭膏之用給

濟濟莘莘化行風驅家慕恭儉戶知敬讓父誨其子
兄規其弟不遊學堂與撻市同繇是縻勇爵戴鷩冠
者徃徃弭雄姿而觀習禮矜甲冑者知根於忠信服
縵胡者不敢侮逢掖教化之移人也如置郵焉冬十
一月許人以新儒宮成來告且乞詞欲行乎遠也公
名綜字永裕故丞相岐國公之孫岐公弼諧三帝碩
學冠天下嘗著書二百餘篇言禮樂刑政古今損益
統名曰通典藏在石室副行人間今孝孫聿脩之刑
乎事業播于聲詩懿哉能世其家也禹錫昔年秦岐

公門下生四參公府近年牧汝州道許昌躬閱其政
故不得讓遂銘于麗牲之碑銘曰

許介分韓魏四征之地兵興已還其闕嘖嘖亦有儒宮

軌于兵間賢侯戾止思樂泮水俾人向學王化之始
便地爰相新規鬱起廟貌斯嚴堂皇有煒秩秩禮物
祀祀宵子入于門墻如造闕里春誦夏弦載颺淑聲
風於閭閻浹於郊坰途讓班白家尊父兄與化而遷
其猶性成昔之委巷相詬交侮今逢親戚不道媒語
昔之連營誇力使酒今遇賓客斂容拱手魯有泮林

烏華其音許崇學教民說其教錫于圭石以志新廟

唐故朝散大夫檢校尚書吏部郎中兼御

史中丞賜紫金魚袋清河縣開國男贈太

師崔公神道碑

太師名倬字某清河東武城人太公望既封於營丘
子伋嗣侯伋之孫曰穆伯食邑于崔遂以為氏後十
四世至秦末東萊侯意如東萊之子伯基始居清河
又十五葉生琰為魏名臣又九葉生休仕後魏為七
兵尚書七兵之弟曰寅為樂安太守公即樂安八代

孫始以門子補鄭州參軍力行好學於子道以孝聞
處伯仲間以友聞讀易至編絕以精義聞至德中戎
羯猾夏王師出征公少有奇志思因時以自奮乃作
伐鯨鯢賦上獻既聞灑笑果罷之會第五丞相以善
言利得幸盡付利權始有鹽鐵使之目慎選察屬表
公為介轉臨晉縣丞處繁應猝鉞刃不頓府罷再遷
至太子司議郎韓晉公時為戶部侍郎掌邦賦急于
用材薦公為監察御史主河東租庸之務尋轉侍御
史充京東平糴使建中初德宗始親萬機儲精治本

有漢宣與我共理之歎謂大臣求可當良二千石者
遂以公帶本官權知袁州刺史期月有成詔書顯揚
就加真秩益以金紫居無何韓晉公為丞相制國用
思公前績乃傳召之抵京師授檢校戶部郎中兼侍
御史幹池鹽監于蒲修牢盆謹衡石煎和既精飴散乃
盈商通而荐至吏懼而循法民不絀網而國用益饒
歲杪會其所入羸羨什伯詔下褒其能轉吏部正郎
兼御史中丞且加五等之爵方倚以重任天富其材
而不遐其福享齡六十有五貞元七年某月某日遘

疾終于治所上聞悼之因降愍冊贈鄭州刺史賚錢
三百萬以備飾終之禮明年某月某日返葬于成周
之偃師從世墓也累贈至太師夫人隴西李氏汾州
司倉參軍咸一之女生才子六人長曰邠及公時已
為左拾遺後至太常次日鄴至太府卿次日鄴至外
臺尚書次日邠今為廷尉次日鄴至執金吾季曰鄴
今為太常卿同中書門下平章事惟夫人姑減冠族
以蘋蘩組紉輔佐君子為令妻積三十餘年以慈儉
忠厚訓誡諸子為賢母二十有三年當永貞初順宗

踐祚澤流自葉長子邠時為詞臣草冊書以文當進
階遂上疏乞移榮于親優詔允之特封清河郡太君
士林聳慕皆自痛其不及邠為太常鄴為太農咸白
髮貴緩以奉膳羞諸季各以簪裾給事左右愉愉然
先意無違言世榮者舉無與比以子貴累封贈至涼
國太夫人元和八年三月十六日捐館舍壽七十有
九是歲十月某日合祔惟太常及尚書暨今相國皆
自中書舍人為禮部侍郎凡五貢賢能書得士百四
十有八人言兄弟者許為人瑞崔氏之門六人皆入
文昌宮其間三人歷八侍郎統而論之三大卿兩連
率二翰林學士一執金吾言冠冕者許為世雄與姑
臧李范陽盧世為婚媾入于姻黨無第二流言門閥
者許為時表太常二子亦以才能同入尚書璜為吏
部郎瓘為司勳即其它支孫未登金閨籍者詵詵然
魚貫而進文業甚似而孝謹不衰猗歟君子之澤其
所從來遠而有光乎開成已未歲七月甲辰相君受
詔于明庭始操國柄仲月奉嘗事于家禮成起慕悄
然永懷曰古者卿大夫廟有鼎墓有碑皆銘之以紀

一本作誠

先德也今備位宰相敢不敬前人之耿光乃俾家老
條白事功咨于學古者徵其詞尚信也又命宗祝卜
柔日告於廟盡敬也儀甚備而敬有餘斯所謂達禮
之君子遂刊勒如式揭于道周銘曰

奕奕四姓崔為之冠瞻其門墻倬若雲漢善積家肥
子孫多材如彼榱棟必生徂徠太公之後彌二千祀
炯如貫珠焯見圖史顯允太師丕承德基構于其堂
亦既陞茨生逢艱虞戎夏交師獻賦伐叛忠存乎詞
兵興事叢飛輓四馳歷踐劇職視也如夷乃主平糴

乃分竹使治粟為邦其道一致蒲實近地鹽為利泓
使車來思剗弊立程吏廢商通歲倍其贏奏課連最
德音褒明就加執法好爵兼榮天賦之才不與壽并
生樹德本沒揚淑聲上聞軫懷侑樂為傳贈禋之禮
侔於公卿萬石貽訓根於孝友太丘種德乃稔身後
家有令子妻為壽母三十餘年人倫之首六子來侍
如龍如虎衆婦來饋維筐及筥佩玉鳴環交響庭戶
申申秩秩歡不踰矩昔為甲族今為興門天爵人爵
蔚然兩尊先德蔭之默如重雲孕和含粹濯潤本根

景慶之原圖書之川陽陵帝壇旁礪回環世安其神
世嗣其賢聆德風者拜于碑前

唐故宣歙池等州都團練觀察處置使宣
州刺史兼御史中丞贈左散騎常侍王公
神道碑

常侍諱質字華卿始得姓自周靈王太子晉賓天而
僊時人曰王子因去姬為王氏自秦漢以還世多顯
名由今而上十有一代名傑仕元魏為并州刺史子
孫因家遂為太原祁人并州六代孫名通字仲淹在

隋朝諸儒唯通能明王道隱居白牛谿游其門皆天
下雋傑著書行於世既沒謚曰文中子文中生福祚
為蔡州上蔡主簿上蔡生勉舉進士徵賢良皆上第
仕至河中府寶鼎令寶鼎即公之曾祖也祖諱怡渝
州司戶參軍考諱潛揚州天長縣丞贈尚書吏部郎
中公其季子也始文中先生有重名于隋末其弟績
亦以有道顯於國初自號東臯子文章高逸傳乎人
間議者謂兄以^文中立言弟遊方外遂性二百年間
君子稱之雖四夷亦聞其名字公雅有遠志常自忖

度我大名之後不宜無見焉遂力學厚自淬琢於春
秋得其公是於禮得之約僑居淝水上躬督穡事善
積於已而淮楚間群彥^多與之游公歎然自少無進
取意與游者激之曰卿文儒家子篤志如是盍求發
聞^去聲俾家聲不頽今夫以文學芒洋當世者誰如華
卿庸自棄耶入謀于閨門咸以外言為是因決策而
西^上在貢士籍天和內充不以時尚屑意角逐攻取初
無此心如榷楠生于深林未始自貴而度材者一眄
歆然在懷故以不爭而速售既登第東諸侯交辟之
從主者書記于嶺南授正字叅謀于淮右進協律郎
其後佐許下暨梓潼南梁率為上介官至兼監察御
史司憲聞其賢徵入南臺轉殿內歷侍御史改尚書
戶部外郎復為知已所薦遷檢校司封郎中攝御史
中丞紫衣金章充山南西道節度副使入為尚書戶
部郎中以方雅特立除諫議大夫會宋丞相坐狷直
為飛語所陷抱不測之罪大僚進言無益公率諫官
數輩日晏伏閣上為不時開便殿公於旅進中獨感
激雪涕居多由是上怒稍解得從輕比公終以言責

為憂求為魏州刺史宰相惜去又重違誠請增之以
兼御史中丞用示異於人也大凡以智謀而進者有
時而衰以朴厚而知者無迹而固公雅為今揚州牧
贊皇公所知人不見其迹方其貌略贊皇入相擢為
左曹給事中凡有大官缺必寵薦居數月遷河南尹
又未幾鎮宛陵是三者中外所注意不旬歲而周歷
之時論不以為黨河南帝之別京其治尚體度風采
而別白區處之宣城國之興壞其治在東吏惠下蘇
罷羸警剝輕而勞徠澄汰之公兩得其道不由一檢

率身以儉而素風存任人以誠而羣務舉遇中貴人
以禮而故態革內潔其志下盡其忠外無以撓於理
三者具求政之有裨曷由哉在鎮三載開成元年十
二月八日薨于位享年六十三監軍使上言有詔軫
悼不視朝贈左散騎常侍明年八月十一日葬于河
南府永寧縣洛川鄉史原從舊阡也初公娶于滎陽
鄭氏生三女而沒今蓋祔焉一子曰慶存方亂矣猶
子前太原府叅軍扶執宗長書來請曰扶也蚤孤荷
世父常侍之覆露今其嗣幼未任克家姑封琴書司

管鑰以俟其長竊懼世父之德音不斂思有以垂于
後者以誠告于從叔大司農復命曰俞謹礱貞石以
乞詞無忽余昔為郎與常侍同列已熟其行實及讀
墓誌即今丞相益州牧趙郡李公之文自稱為忘形
友其在宣州李公再入相議以第一官處之牢讓不
取羔鴈所禮則河東裴夷直天水趙哲隴西李行方
吳郡陸紹梁國劉蕢博陵崔珣人咸曰得士夫揚州
少與也而見器益州寡合也而見親六從事才不一
也而畢樂用是足以觀德庸可勿紀焉銘曰

隋有文中紹敷微言當時偉人咸出其門粹氣紆餘
鍾于後昆常侍恂恂文中來孫發源高麓中沫詠後大
蘭牙茁然秀出叢蒼善不近名其聲曰彰行勇於退
其道愈光哲者知之寘于周行以正持憲以文為郎
以和佐戎以惠臨邦以直司諫以公駁政守于三川
頑民底定乃鎮于宣先馳淑聲邑中婆婆瞻我旆旌
問誰詢謀濟濟君子問誰出內潔潔廉士道本乎心
暢于四支治本乎正形于百為黠吏斂手齊民揚眉
江淮藪空夜析弗施公卧于齋邦民悽悽公衣升屋

邦民行哭牙璋斯來柳萋言旋棠樹未老周人慕焉
熊耳之陽泱泱洛川佳城在茲既固且安松楸颯然
石馬矯然過者必敬宛陵之所

唐故邠寧慶等州節度觀察處置使朝散
大夫檢校戶部尚書兼御史大夫賜紫金
魚袋贈右僕射史公神道碑

僕射名孝章字得仁本北方之強世雄朔野其後因
仕中國遂為靈武建康人曾祖道德贈右散騎常侍
封懷澤郡王祖周浴銀青光祿大夫檢校太常卿兼

御史中丞北海郡王贈太子太保考憲成蚤以武勇
絕人積功至魏博節度使終于河中晉絳慈隰等州
節度觀察使檢校司徒兼侍中河中尹贈太保其薨
也大臣中書令晉國公裴氏為之碑其名益顯公即
侍中之元子母曰冀國夫人李氏幼而聰寤父母賢
而加愛焉及長好學遷善秀出儕輩下諸兒號為
書生元和中太尉愬為魏帥下令掄材於轅門取大
將家翹秀者為子弟軍列於諸校之上公獨昌言願
效文職太尉深竒之遂假魏州大都督府叅軍長慶

二年常山衆叛害其帥沂國公田司徒于帳下沂公
發跡于魏人猶懷之詔命其子布以尚書授鉞統魏
兵問罪于北疆且報家禍布既啟行士氣不振渙然
內潰獨與冗從之旅偃旗而歸百憤攻中卒自引決
先侍中時為中軍都知兵馬使兼御史中丞全師在
野闕然推戴之請為假侯以鎮定中貴人飛驛上聞
穆宗夜召翰林學士草詔書以真侯命之實有魏土
從衆而合權也是歲公自攝官轉本府士曹叅軍兼
監察御史賜朱衣銀印推恩以及子也一旦跪於父

母前進苦言曰臣竊惟大河之北地雄兵精而天下
賢士心悔之目曰河朔間視猶夷狄何也蓋有土者
多乘兵機際會非以義取今臣家父侯母封化為貴
門君恩至矣非痛折節礪行彰信于朝廷無以弭讖
者之譏寤明君之意節著于外福延于家乘時蹈機
禍不旋踵言訖泣下數行父俞母贊天性交感三心
既叶萬衆潛化天子聞而嘉之曰彼真有子乃授檢
校太子左諭德兼侍御史充節度副使累遷至散騎
常侍兼御史大夫賜金印紫綬既貳軍政事如命卿

地張損益得以叅決潛革故態人知嚮方大和二年
滄景節度使李全略卒其子同捷竊據故地詔下以
文誥弗革遂用大刑先侍中表請率先諸侯使元子
以督戰制曰可公承君父之命乃捐其軀一舉而下
平原壓滄壘由是加工部尚書及王師凱旋上表願
一識承明廬詔允之遂赴北闕下得覲於便殿上曰
嚮吾始征滄州議者皆曰彼魏之姻也慮陰為寇謀
吾發使數輩以偵之其還也僉曰爾父瀝款於賓筵
爾毋抗詞於簾下願絕姻以立效其經始啟發出於

爾心今滄海底定策勲之日宜貴爾三族命爾父為
侍中遷鎮于近地加爾禮部尚書析相衛澶三州為
鎮以居之俾爾一門大榮以誇天下公拜稽首謝父
遷讓已爵禮無違者翌日詔下于明庭人咸曰史氏
之寵光古^世無有也牙旗碧幢方指東道侍中以帳下
生變聞秦極而否當歌而哭迎柩于路仰天長號因
葬于洛陽之邙山冀國夫人拊馬寢苫枕塊以所仇
同天為大酷未幾詔舉金革之義起為右金吾將軍
累表陳乞有司以違命督之與疾即路閭歲擢授廊

坊丹延等州節度觀察處置等使居四年遷鎮于滑
一歲入為右領軍衛大將軍旋改右金吾大將軍又
授鉞于邠土孟秋至治所首冬遘疾拜章入覲不克
展和鸞帷革之儀薨于靖恭里之私第享年三十九
當開成三年十月二十日上聞而悼之不視朝一日
贈尚書右僕射明年二月歸葬于洛都夫人琅邪王
氏祔焉繼室深澤縣君博陵崔氏有一子曰煥生七
年而孤僕射之喪自復魄至葬當門戶備祭祀建碑
表皆縣君之能且命其家老具事功來請曰嫠不恤

家而憂幼嗣不知其先人之官業乞詞以傳于後也
君子以為知禮謹書之銘曰
斗極之下崆峒播氣鍾于侍中孔武且貴奉上致命
宜昌後嗣僕射承之良方不墜耳煩鉦鼓心說文字
虎穴之中生此騏驎大和紀元滄景不度子弄父兵
跳浪海壖有隣陰交蝟起鷄連詔下薄伐良隅騷然
時惟侍中寶統魏師蓄銳未發衆心危疑僕射為子
陳謀盡詞興言涕零有感尊慈絕姻效節精貫神祇
滄波底寧王師裒之乃遷元侯來鎮近畿乃昨元子

別建旌麾一門四節焜燿當時倏忽變生魏郊紛披
喬木雖大盲風不知干雲之臺列缺焚之哀哀孝嗣
丁此大酷迎護幃輅葬于東洛訴天觸地血染線服
禮有金革詔書敦促不遂枕戈驟膺推轂雕陰白馬
暨于邠谷雖榮三鎮不荷百祿綺紈之間珪組纒纒
如彼晨葩日中而萎有妻名家有子穉齒行號執禮
歸窆嵩里洛水之陽循却之趾昭尊穆敬幽顯同理
舊松新栢亦象橋梓刻石紀功垂千萬祀

唐于五月十五日改校
次公記

劉賓客文集卷第三

劉賓客文集卷第四 碑下 釋門銘記附

曹溪第六祖大鑿禪師第二碑

佛衣銘并引

唐故衡嶽律大師湘潭唐興寺儼公碑

牛頭山第一祖融大師新塔記

袁州萍鄉縣楊岐山故廣禪師碑

夔州始興寺移鐵像記

毗盧遮那佛華藏世界圖讚

成都府新修福成寺記

大唐曹溪第六祖大鑿禪師第二碑

元和十一年某月日詔書追褒曹溪第六祖能公謚曰大鑿實廣州牧馬惣以疏聞繇是可其奏尚道以尊名同歸善善不隔異教一字之褒華夷孔懷得其所故也馬公敬其事且謹始以垂後遂咨於文雄今柳州刺史河東柳君為前碑後三年有僧道琳率以其徒由曹溪來且曰願立第二碑學者志也維如來滅後中五百歲而摩騰竺法蘭以經來華人始聞其言猶夫重昏之見智爽後五百歲而達摩以法來華

人始傳其心猶夫昧旦之覩白日自達摩六傳至大鑿如貫意珠有先後而無同異世之言真宗者所謂頓門初達摩與佛衣俱來得道傳付以為真印至大鑿置而不傳豈以是為筌蹄邪芻狗邪將人人之莫已若而不若置之邪吾不得而知也按大鑿生新州三十出家四十七年而沒百有六年而謚始自蘄之東山從第五師得授記以歸高宗使中貴人再徵不奉詔第以言為貢上敬行之銘曰

至人之生無有種類同人者形出人者智蠢蠢南裔

降生傑異父乾母坤獨肖元氣一言頓悟不踐初地
五師相承授以寶器宴坐曹溪世號南宗學徒爰來
如水之東飲以妙藥差其瘖聾詔不能致許為法雄
去佛日遠羣言積億著空執有各走其域我立真筌
揭起南國無修而修無得而得能使學者還其天識
如黑而迷仰見斗極得之自然竟不可傳口傳手付
則礙于有留衣空堂得者天授

佛衣銘 并引

吾既為僧琳撰曹溪第二碑且思所以辯六祖置衣
不傳之旨作佛衣銘曰

佛言不行佛衣乃爭忽近貴遠古今常情尼父之生
土無一里夢奠之後履存千祀惟昔有梁如象之狂
達摩救世來為醫王以言不痊因物乃遷如執符節
行乎復闕民不知官望車而畏俗不知佛得衣為貴
壞世^色之衣道不在茲由之信道所以為寶六祖未彰
其出也微既還狼荒憬俗嗤嗤不有信器衆生曷歸
是開便門非止傳衣初必有終傳豈無已物必歸盡
衣胡久恃先終知終用乃不窮我道無朽衣於何有

其用已陳孰非芻狗

吳開對門唐故衡嶽大師湘潭唐興寺儼公碑

佛法在九州間隨其方而化中夏之人汨於榮破榮
莫若妙覺故言禪寂者宗嵩山北方之人銳以武攝
武莫若示現故言神通者宗清涼南方之人剽而輕
制輕莫若威儀故言律藏者宗衡山是三名山為莊
嚴國必有達者與山比崇南嶽律門以津公為上首
津之後雲峰證公承之證之後湘潭儼公承之星月
麗天珠璣同貫由其門者為正法焉公號智儼曹氏

子世為柳之右姓兆形在孕母不嗜葷成童在侶獨
不嗜戲其夙植因厚者歟生九年樂為僧父不能奪
其志抱經笥入岫嶁山從名師執業凡進品受具聞
經傳印皆當時大長老我入明門不住諸乘我行覺
路徑入智地居室方丈名聞大千護法大臣多所賓
禮嗣曹王舉之鎮湖南請為人師自是登壇蒞事三
十有八載由我得度者萬有餘人人持寶衣解瓔珞
為禮公色受之謂門弟子曰彼以有相求我我以有
為應之凡建寶幢修廢寺飾大像皆極其工應物故

一本作顛頂

也元和十三年九月二十七日中夜具湯沐剃頭頂
與門人告別即寂而視身與色無有壞相嗚呼豈生
能全吾真故死不速朽將有願力邪余不得而知也
問年八十二問臘六十一葬于寺東北隅傳律弟子
中巽道準傳經弟子圓皎貞璩與其徒圓靜文外惠
榮明素存政等欲其師之道光且遠故咨余乞詞以
乃作長句偈以銘之曰

祝融靈山禹所治非夫有道不可止中有毗尼出塵
士以津視儼猶孫子登壇人師四十祀南方學徒宗
奧昔幼無童心在兒齒識滅形全異凡死長沙潭西
幾五里陶侃故居石頭寺門前一帶湘江水吁嗟律
席之名兮與湘流而不已

牛頭山第一祖融大師新塔記

初摩訶迦葉授佛心印得其人而傳之至師于比丘
凡二十五葉而達摩得焉東來中華華人奉之為第
一祖又三傳至雙峰信公雙峰廣其道而岐之一為
東山宗能秀寂其後也一為牛頭宗巖持威鶴林徑
山其後也分慈氏之一支為如來之別子咸有祖稱

粲然貫珠大師號法融姓常氏延陵人少為儒博極
群書既而歎曰此仁誼言耳吾志求出世間法遂入
句曲依僧旻改蓬掖而緇之徙居是山宴坐石室以
慧力感通故旱麓泉涌以神功示現故皓雪蓮生巨
蛇摧伏羣鹿聽法貞觀中雙峰過江望牛頭頓錫曰
此山有道氣宜有得之者乃來果與大師相遇性合
神授至於無言同躋智地密付真印揭立江左名聞
九圍學徒百千如水歸海由其門而為天人師者皆
脉分焉顯慶二年報身示滅道在後覺神依故山戒

香不絕龕坐未飾夫豈不思乎蓋神期冥數必有所
待大和三年潤州牧浙江西道觀察使檢校禮部尚
書趙郡李公在鎮三閩百為大僦尚理信古儒玄交
脩始下令禁桑門販佛以眩人者而於真實相深達
焉常謂大師像設宜從本教言自我啟因自我成乃
召主吏籍我月入得緡錢二十萬俾秣陵令如符經
營之三月甲子新塔成事嚴而工人盡甄誠達而山
神來護願力既從衆心知歸撞鐘告白龍象大會諸
天聲香之蘊如見如聞即相生敬明幽同感尚書欲

傳信于後遠命愚志之夫上士解空而離相中士著
空而嫉有不因相何以示覺不由有何以悟無彼達
真諦而得中道者當知為而不有賢乎以不修為無
為也

袁州萍鄉縣楊岐山故廣禪師碑
天生人而不能使情欲有節君牧人而不能去威勢
以理至有乘天工之隙以補其化釋王者之位以遷
其人則素王立中區之教懋建大中慈氏起西方之
教習登正覺至哉乾坤定位而聖人之道參行乎其

中亦猶水火異氣成味也同德輪轅異象致遠也同
功然則儒以中道御群生罕言性命故世衰而寢息
佛以大悲救諸苦廣啟因業故劫濁而益尊自白馬
東來而人知像教佛衣始傳而人知心法弘以權實
示其攝修味真實者即清淨以觀空存相好者怖威
神而遷善厚於求者植因以覲福濯於苦者證業以
銷冤革盜心於冥昧之間泯愛緣於死生之際陰助
教化總持人天所謂生成之外別有陶冶刑政不及
曲為調柔其方可言其旨不可得而言也惟四海之

大群倫之富必有以得其門而會其宗者為世導師
焉禪師諱乘廣其生容州姓張氏七歲尚儒以俎豆
為戲十三慕道遵壞削之儀至衡陽依天柱想公以
啟初地至洛陽依**荷**澤會公以契真乘洪鐘蘊聲扣
之斯應陽燧合焰晞之乃明始由見性終得自在常
謂機有淺深法無高下分二宗者眾生存頓漸之見
說三乘者如來開方便之門名自外得故生分別道
由內證則無異同遂以攝化為心經行不倦愍彼南
裔不聞佛經由是結廬此心山心與境寂應念以起教

隨方而立因居涉旬而善根者知歸逮周月而帶縛
者漸悟以日倍日以年倍時瘖矇洞開荒憬潛革邑
中長者十方善眾咸發信願大其藩垣法堂四阿股
引僧舍身心恒寂象馬交馳墮其去來皆得利益踰
嶺之北涉湘而南仰茲高山知道有所在此地緣盡
儵然化俱神歸佛境悲結人世自跌坐而滅至于茶
毗三百有六旬矣爪髮加長容澤差衰真子號呼圍
繞薪火得舍利如珠璣者數十百焉於戲肖圓方之
形故寂滅以示盡入菩提之位故殊相以現靈亦猶

鳳毛成字麟角生肉必有以異不知其然於是服勤
聞法之上首曰甄升乃率其徒圓寂道弘如亮如海
等相與拭淚具役建塔于禪室之右端從衆也初廣
公始生之辰歲在丁巳當玄宗之中元生三十而受
其更臘五十二而終終之夕歲直戊寅當德宗之後
元三月既望之又十日也後九年其門人還源以為
崇塔以存神與建銘以垂休皆憑像寄懷不可以闕
一謬謂余為習于文者故鬻足千里以誠相攻大懼
其先師德音與時寢遠且曰白月中黑東川無還颺

于金石傳信百劫彼墮淚之感豈儒家者流專之敬
酬斯言銘示真俗文曰

如來說法徧滿大千得勝義者強名為禪至道不二
至言無辯心法東行群迷丕變七葉無嗣四魔潜扇
佛衣生塵佛法如線吾師覺者冥極道樞承受密印
端如貫珠一室寥然高山之隅為法來者千百人俱
齋民啜啜戶有屏渠攝以方便家藏佛書願力既普
度門斯盛合為一乘散為萬行即動求靜故能常定
絕緣離覺乃得究竟生非我樂死非我病現滅者身

常圓者性本無言說付囑其誰等空無得後覺得之
像閔虛塔迹留仁祠十方四輩瞻禮于斯

夔州始興寺移鐵像記

佛薪盡於乾竺而象教東行是法平等故所至為淨
土是身應供故隨念如降生先是魚復人有以利金
為彌勒像者重千鈞睟容瑞相人天兩足晁氏卒事
而它工未備故寓于西偏不知其幾年矣寺僧法照
瞻禮發信赤喙白足入諸大城乃至聚落無空過者
積十餘年得信財無量繇是購工以嘗巧募徒而畢

力四輩增增工度以肱中樞外脉陰轉陽動欵如地
湧炭如山行大匠無言尊容嚮明青蓮承跣金獸捧
持藻井花鬘葱籠四垂邑人膜拜如佛出世法照以
願力能就泣于佛前因持片石乞詞以示後按此寺
始于宇文周初瀕江埤庫皇唐神龍中為水所壞有
波那賴耶國僧廣照浮海而至頓錫不去遂移于今
道場所山曰磨刀嶺曰虎岡其經始與克修皆蕃僧
是力後之有志者豈無人哉法照夔人姓穆氏年十
有五出家依江陵名僧受具肇自貞元二十年甲申

歸此寺願崇建有為凡修大殿立菩薩大弟子侍佛
左右逮長慶癸卯有成其善植德本者歟

毗盧遮那佛華藏世界圖讚

佛說華嚴經直入妙覺不由出諸乘非大圓智不能信
解德宗朝有龍象觀公能於是經了第一義居上都
雲華寺名聞十方沙門嗣肇是其上足以經中九會
纂成華藏俾人瞻禮即色生敬因請余讚之即說讚
曰

清淨不染花中蓮捧持世界百億千躑出香海浩無
邊風輪負之晝夜旋大雄九會化諸天釋梵八部來
森然從昏至覺不依緣初初極極性自圓寫之綃素
色相全是色非色言非言

成都府新修福成寺記

益城右門街大遼坦然西馳曰石笋街街之北有仁
祠形焉直啟曰福成寺寺之殿臺與城之樓交錯相
輝繡于碧霄望之如崑閬間物大和四年蜀帥非將
材不修邊備南詔君長謀得內空乘隙全入闕于城
下或縱火以駭衆此寺乃焚高門修廊委為寒燼如

是者再歲帝念坤維丞相復來山川如迎父老相識
環視故地寺為焦墟載興起廢之歎爰有植因之願
乃命主俸吏以吾緡錢三十萬為經營之基自公來
思蜀號無事時康歲稔人樂檀施公言既先應如決
川乃傾囊楮乃出懷袖勝因化愚慧力攝慳男奔女
驟急於徵令匠者度材以指衆徒藝者運思以役衆
技斤鋸磨礮丁丁登登陶者儲材精巧者效能效自
火宅復為金繩沿故鼎新因毀成妍華夷縱觀萬目
同聳既告訖役公來慶成雲鮮日潤輝映前後於是
都人舞抃而謠曰

昔公去此福成以燬今公重還福成復完民安軍治
亦如此寺庸可勿紀乎公實聞斯言遂折簡見命謹
月而日之時大和某年某月日大檀越具官封爵段
氏其它發大願者程功董事者自中貴人及賓寮將
吏若僧徒偕籍之而刻于石

劉賓客文集卷第四

十六日次公校讀於旣生齋
時兩大降
山田沾足

劉賓客文集卷第五

論上

辯迹論一首

明贄論一首

華佗論一首

天論上一首

天論中一首

天論下一首

辯迹論

客有能通本朝之雅故者曰時之汚崇視輔臣之用
否房與杜迹何觀焉建官取士之制地征口賦之令
禮樂刑法之章因隋而已矣二公奚施為焉余愀然曰
三王之道猶夫循環非必變焉焉審所當救而已隋之
過豈制置名數之間邪顧名與事乖耳因之何害焉

夫上材之道非務所舉必的然可使戶曉為迹也吾
觀梁公之迹章章如懸寓矣曷然哉請借一以明之
史不云乎初太宗怒渾戎之橫于塞也度諸將不足
以必取當宁而歎曰得李靖為帥快哉靖時告老且
病矣梁公虛其心以起之靖忘老與病一舉虜其君
郡縣其地而還夫非伐國之難能起靖之難能也靖
非不克之為慮居功之為慮也古之為將度柄輕不
足以遂事重則嫌生焉是以有辭第以見志有多產
以取信有子質以滅貳有嬖監以虞謗其多患也如

是若靖者名既成位既崇重失畏偏其患又甚焉微
梁公之能盡材能捍患能去忌能照私彼姑藉舊勞
居素貴足矣惡乎起哉夫豈感空言而起邪心相見
久矣夫豈飾小信而要邪道相籠久矣其後敬玄擅
能失材臣而敗隨之林甫自便進蕃將而亂隨之由
是而言固相萬矣子方規規然窺上材以戶曉之迹
此吾之所不取也若杜萊公者在相位日淺將史失
其傳然以梁公之鑒裁自天策府遂以王佐材許之則
是又能以道籠房公者矣房之許與迹孰甚焉客無

以應而作子劉子曰觀書者當觀其意慕賢者當慕其心循迹而求雖博寡要信矣

明贄論

古之人動必有以將意故贄之道自天子達焉夫芬芳在上臭達于下而溫粹無擇有似乎聖人者鬯也故用於天子清越而瑕不自揜潔白而物莫能汚內堅剛而外溫潤有似乎君子者玉也故用於諸侯執之不鳴刑之不嗥似死義乳必能跪似知禮者羔也故鄉執焉在人之上而有先後行列者鴈也故大夫

執焉耿介而一志者雉也故士執焉視其所執而知其任是故食愈重而志愈卑位彌尊而道彌廣耿介之志唯士得以行之何也務細而所試者寡齒卑而所蔽者衆言未足以動聽故必激發以取異行未足以應遠故必砥礪以沽聞借今由士為大夫捨雉而執鴈其志也隨之故耿介之名不施於大夫矣况其上乎然則為士也不思雉之介為鄉也能思羔之禮歟今夫或者不明分推理而觀之則曰此居下而嗜直者是必得志而稔其訐矣彼當介而務弘者是必

處高而肥其德矣曾不知訐當其分則地易而自遷
弘非其所則志遠而無制矣於戲責士以鄉大夫之
善猶諭君以士之行耳予以執贄之道得其分苟推
分明矣求刑賞之僭濫得乎

華佗論

史稱華佗以特能厭事為曹公所怒苟文若請曰佗
術實工人命繫焉宜議能以宥曹公曰憂天下無此
鼠輩邪遂考竟佗至死蒼舒病且死見賢扁醫不能生
始有悔之之歎嗟乎以操之明略見幾然猶輕殺材

能如是文若之智力地望以的然之理攻之然猶不
能返其志執柄者之志真可畏諸亦可慎諸原夫史
氏之書于冊也是使後之人寬能者之刑納賢者之
諭而懲暴者之輕殺故自特能至有悔悉書焉後之
惑者復用是為口實悲哉夫賢能不能無過苟寘于
理矣或必有寬之之請彼壬人皆曰憂天下無材邪
曾不知悔之日方痛材之不可多也或必有惜之之
歎彼壬人皆曰譬彼死矣將若何曾不知悔之日方
痛生之不可再也可不謂大哀乎夫以佗之不宜殺

昭昭然不足待言也。獨病夫史書之義，是將推此而廣耳。吾觀自曹魏以來，執死生之柄者，用一恚而殺材能衆矣。又烏用書佗之事為？嗚呼！前事之不忘，期有勸且懲也。而暴者復籍口以快意，孫權則曰：「曹孟德殺孔文舉矣。」孤於虞翻何如？而孔融亦以應泰山殺孝廉。自譬仲謀近霸者，文舉有高名，猶以可懲為故事。矧它人哉！

天說

柳宗元

韓愈謂柳子曰：「若知天之說乎？吾為子言天之說。今

夫人有疾痛倦辱飢寒甚者，因仰而呼天曰：「殘民者，昌佑民者，殃又仰而呼天曰：「何為使至此極戾也？若是者，舉不能知天。夫果蔬飲食既壞，蟲生之；人之血氣敗逆，壅底為癰瘍疣贅癩痔，蟲生之；木朽而蝎中，草腐而螢飛，是豈不以壞而後出邪？物壞，蟲由之生；元氣陰陽之壞，人由之生；蟲之生而物益壞，食齧之，攻穴之，蟲之禍物也；滋甚，其能去之者，有功於物者也；蕃而息之者，物之讎也。人之壞元氣陰陽也，亦滋甚。墾原田，伐山林，鑿泉以井，飲窳墓以送死，而又穴

為堰澗築為墻垣城郭臺榭觀游䟽為川瀆溝洫陂池燧木以燔革金以鎔陶甄琢磨悴然使天地萬物不得其情倖：衝：攻殘敗撓而未嘗息其為禍元氣陰陽也不甚於蟲之所為乎吾意有能殘斯人使日薄歲削禍元氣陰陽者滋少是則有功於天地者也蓄而息之者天地之讎也今夫人舉不能知天故為是呼且怨也吾意天聞其呼且怨則有功者受賞必大矣其禍焉者受罰亦大矣子以吾言為何如柳子曰子誠有激而為是邪則信辯且美矣吾能終其

說彼上而玄者世謂之天下而黃者世謂之地渾然而中處者世謂之元氣寒而暑者世謂之陰陽是雖大無異果蓏癰痔草木也假而有能去其攻穴者是物也其能有報乎蓄而息之者其能有怒乎天地大果蓏也元氣大癰痔也陰陽大草木也其烏能賞功而罰禍乎功者自功禍者自禍欲望其賞罰者大謬呼而怨欲望其哀且仁者愈大謬子而信子之仁義以遊其內生而死爾烏置存亡得喪於果蓏癰痔草木邪

天論上

世之言天者二道焉拘於昭昭者則曰天與人實影
響禍必以罪降福必以善來窮阨而呼必可聞隱痛
而祈必可答如有物的然以宰者故陰騭之說勝焉
泥於冥冥者則曰天與人實刺音異霆震于畜木未
嘗在罪春滋乎堇荼未嘗擇善跖躄焉而遂孔顏焉
而厄是茫乎無有宰者故自然之說勝焉余之友河
東解人柳子厚作天說以折韓退之之言文信美矣
蓋有激而云非所以盡天人之際故余作天論以極

其辯云大凡入形器者皆有能有不能天有形之大
者也人動物之尤者也天之能人固不能也人之能
天亦有所不能也故余曰天與人交相勝耳其說曰
天之道在生植其用在強弱人之道在法制其用在
是非陽而阜生陰而肅殺水火傷物木堅金利壯而
武健老而耗眊氣雄相君力雄相長天之能也陽而
執樹陰而擎斂防害用濡禁焚用光斬材竅堅液礦
砥銛義制強許禮分長幼右賢尚功建極閑邪人之
能也人能勝乎天者法也法大行則是為公是非為

公非天下之人蹈道必賞違之必罰當其賞雖三旌之貴萬鍾之祿處之咸曰宜何也為善而然也當其罰雖族屬之夷刀鋸之慘處之咸曰宜何也為惡而然也故其人曰天何預乃事邪唯告虔報本肆類授時之禮曰天而已矣福兮可以善取禍兮可以惡召奚預乎天邪法小弛則是非駁賞不必盡善罰不必盡惡或賢而尊顯時以不肖參焉或過而僂辱時以不辜參焉故其人曰彼宜然而信然理也彼不當然而固然豈理邪天也福或可以詐取而禍亦可以苟

免人道駁故天命之說亦駁為法大弛則是非易位賞怕在倭而罰怕在直義不足以制其強刑不足以勝其非人之能勝天之具盡喪矣夫實已喪而名徒存彼昧者方挈：然提無實之名欲抗乎言天者斯數窮矣故曰天之所以能者生萬物也人之所能者治萬物也法大行則其人曰天何預人邪我蹈道而已法大弛則其人曰道竟何為邪任人而已法小弛則天人之論駁為今以一己之窮通而欲質天之有無惑矣余曰天恒執其所能以臨乎下非有預乎治亂

云爾人恒執其所能以仰乎天非有預乎寒暑云爾
生乎治者人道明咸知其所自故德與怨不歸乎天
生乎亂者人道昧不可知故由人者舉歸乎天非天
預乎人爾

天論中

或曰子之言天與人交相勝其理微庸使戶曉盍取
諸譬焉劉子曰若知旅乎夫旅者羣適乎莽蒼求休
乎茂木飲乎水泉必強有力者先焉否則雖聖且賢
莫能競也斯非天勝乎群**吹**乎邑郭求蔭于華榭飽

于籓牢必聖且賢者先焉否則強有力莫能競也斯
非人勝乎苟道乎虞芮雖莽蒼猶郭邑然苟由乎匡
宋雖郭邑猶莽蒼然是一日之途天與人交相勝矣
吾固曰是非存焉雖在野人理勝也是非亡焉雖在
邦天理勝也然則天非預勝乎人者也何哉人不宰
則歸乎天也人誠務勝乎天者也何哉天無私故人
可務乎勝也吾於一日之途而明乎天人取諸近也
已或者曰若是則天之不相**預**乎人也信矣古之人曷
引天為答曰若知操舟乎夫舟行乎濼淄伊洛者疾

徐存乎人。次舍存乎人。風之怒號不能鼓為濤也。流之泝洄不能峭為魁也。適有迅而安亦人也。適有覆而膠亦人也。舟中之人未嘗有言天者。何哉。理明故也。彼行乎江河淮海者。疾徐不可得而知也。次舍不可得而必也。鳴條之風可以沃日。車蓋之雲可以見怪。恬然濟亦天也。黥然沈亦天也。貼危而僅存亦天也。舟中之人未嘗有言人者。何哉。理昧故也。問者曰。吾見其駢焉而濟者。風水等耳。而有沈有不沈。非天曷司歟。荅曰。水與舟二物也。夫物之合并必有數存。

乎其間焉。數存然後勢形乎其間焉。一以沈一以濟。適當其數乘其勢耳。彼勢之附乎物而生。猶影響也。本乎徐者其勢緩。故人得以曉也。本乎疾者其勢遽。故難得以曉也。彼江海之覆猶伊淄之覆也。勢有疾徐。故有不曉耳。問者曰。子之言數存而勢生。非天也。天果狹於勢邪。荅曰。天形怕圓而色怕青。周回可以度得。晝夜可以表候。非數之存乎。怕高而不卑。怕動而不已。非勢之乘乎。今夫蒼：然者一受其形于高。大而不能自還於卑。小一乘其氣于動。用而不能自。

休於俄頃又惡能逃乎數而越乎勢邪吾固曰萬物之所以為無窮者交相勝而已矣還相用而已矣天與人萬物之尤者耳問者曰天果以有形而不能逃乎數彼無形者子安所寓其數邪荅曰若所謂無形者非空乎空者形之希微者也為體也不妨乎物而為用也恒資乎有必依於物而後形焉今為室廬而高厚之形藏乎內也為器用而規矩之形起乎內也音之作也有大小而響不能踰表之立也有曲直而影不能踰非空之數歟夫目之視非能有光也必因

乎日月火炎而後光存焉所謂晦而幽者目有所不能燭耳彼狸狽犬鼠之目庸謂晦為幽邪吾固曰以目而視得形之粗者也以智而視得形之微者也鳥有天地之內有無形者邪古所謂無形蓋無常形耳必因物而後見耳鳥能逃乎數邪

天論下

或曰古之言天之曆象有宣夜渾天周髀之書言天之高遠卓詭有鄒子今子之言有自乎荅曰吾非斯人之徒也大凡入乎數者由小而推大必合由人而

推天亦合以理揆之萬物一貫也今夫人之有顏目
耳鼻齒毛頤口百骸之粹美者也然而其本在乎腎
腸心腹天之有三光懸寓萬象之神明者也然而其
本在乎山川五行濁為清母重為輕始兩位既儀還
相為庸噓為雨露噫為雷風乘氣而生羣分彙從植
類曰生按尚書傳云海隅動類曰蟲保蟲之長為智
最大能執人理與天交勝用天之利立人之紀紀綱
或壞復歸其始堯舜之書首曰稽古不曰稽天幽厲
之詩首曰上帝不言人事在舜之庭元凱舉焉曰舜

用之不曰天授在殷中宗襲亂而興心知說賢乃曰
帝賚堯民之餘難以神誣商俗已訛引天而啟由是
而言天預人乎

劉賓客文集卷第六 論中

因論七篇

劉子問居作因論或問其旨曷歸歟對曰因之為言有所自也夫造端乎無形垂訓於至當其立言之徒放詞乎無方措旨於至適其寓言之徒蒙之智不逮于是造形而有感因感而有詞匪立匪寓以因為目因論之旨也云爾

鑒藥

訊毗

嘆牛

傲舟

原力

說驥

述病

鑒藥

劉子間居有負薪之憂食精良弗知其旨血氣交冷
煬然焚如客有謂予子病之積日矣乃令我里有方
士淪跡於醫厲者造焉而美肥輒者造焉而善馳矧
常病也將子詣諸予然之之醫所切脉觀色聆聲參
合而後言曰子之病其興居之節舛衣食之齊去乖
所由致也今夫歲鮮能安穀府鮮能母氣徒為美疹
之囊橐耳我能攻之乃出藥一九可兼方寸以授予
曰服是足以淪昏煩而鉏蘊結銷蠱慝而歸耗氣然
中有毒須其疾瘳而止過當則傷和是以微其齊也

予受藥以餌過信而腿能輕痺能和涉旬而苛癢絕
焉抑搔罷焉踰月而視分纖聽察微蹈危如平嗜糲
如精或聞而慶予且闕言曰子之獲是藥幾神乎誠
難遭已顧醫之態多晉術以自貴遺患以要財盍重
求之所至益深矣予昧者也泥通方而徂既效猜至
誠而惑勦說卒行其言逮再餌半旬厥毒果肆岑
周體如疝作焉悟而走諸醫大吒曰吾固知夫子
未達也促和蠲毒者投之濱於殆而有喜異日進和
藥乃復初劉子慨然曰善哉醫乎用毒以攻疹用和

以安神易則兩躡明矣苟循往以御變昧於節宣奚
獨吾儕小人理身之弊而已

訊毗

劉子如京師過徐之右鄙其道旁午有毗增：扶班
白挈羈角齋生器荷農用摩肩而西僕夫告予曰斯
宋人梁人毫人穎人之逋者今復矣予愕而訊云予
聞隴西公暢轂之止方踰月矣今爾曹之來也欣欣
然似恐後者其間有勞侏之簿歟蠲復之條歟振贍
之格歟碩鼠亡歟瘼狗遂歟曰皆未聞也且夫浚都

吾政之上游也自巨盜間釁而武臣顛焉牧守由將
校以授皆虎而冠子男由胥徒以出皆鶴而軒故其
上也子視卒而芥視民其下也鷙其理而蟬其賦民
弗堪命是軼于它土然咸重遷也非貼危擠壑不能
違之曩者雖歸歟成謠而故態相沿莫我敢復今聞
吾帥故為丞相也能清靜畫一必能以仁蘇我矣其
佐嘗宰京邑也能誅鉏豪右必能以法衛我矣奉斯
二必而來歸惡待事實之及也予因浩歎曰行積於
彼而化行於此實未至而聲先馳聲之感人若是之速

歟然而民知至至矣政在終也嘗試論聲實之先
後曰民黜政頗須理而後勸斯實聲先聲後也民離政
亂須感而後化斯聲先實後也立實以致聲則難在
經始由聲以循實則難在克終操其柄者能審是理
俾先後終始之不失斯誘民孔易也

歎牛

劉子行其野有隻牽跛牛于蹊偶問焉何形之瑰歟
何足之病歟今覿觫然將安之歟叟攬摩而對云瑰
其形飯之至也病其足役之過也請為君畢詞焉我

僦車以自給嘗驅是牛引千鈞北登太行南並商嶺
掣以回之叱以聳之雖涉淖躋高轂如蓬而輒不償
及今廢矣顧其足雖傷而膚尚脂以畜豢之則無用
以庖視之則有羸伊禁為莫敢尸也甫聞邦君饗士
卜剛日矣是往也當要平售於宰夫余尸之曰以叟
言之則利以牛言之則悲若之何予方窶且無長物
願解裘以贖將置諸豐草之鄉可乎叟鞞然而哈曰
我之沽是屈指計其直可以持醪而鬻肥飴子而衣
妻若是之逸也奚事裘為且昔之厚其生非愛之也

利其力今之致其死非惡之也利其財子惡乎落吾
事劉子度是叟不可用詞屈乃以杖叩牛角而嘆曰
所求盡矣所利移矣是以負能霸吳屬鏤賜斯既帝
秦五刑具長平威振杜郵死咳下敵擒鍾室誅皆用
盡身賤功成禍歸可不悲哉可不悲哉嗚呼執不匱
之用而應夫無方使時宜之莫吾害也苟拘於形器
用極則憂明已

傲舟

劉子浮于汴涉淮而東亦既釋紼纒榜人告予曰方

今湍悍而舟監宜謹其具以虞焉予聞言若厲繇是
初以室之灰以瑾之麩以乾之僕^息怠而躬行夕惕而
晝勤景霾晶而莫進風異響而適止兢^止然累辰是
用獲濟偃檣弭櫂次于淮陰於是舟之工咸沛然自
暇自逸或遊肆而觴矣或拊橋而歌矣隸也休役以
尚寢矣吾曹無虞以宴息矣逮夜分而窾隙潛澍渙
然陰潰至乎淹篲濡薦方卒愕傳呼跣跳登壚僅以
身脫目未及瞬而棲傾軸墊抵于泥沙力莫能支也
劉子缺然自視而言曰曷予兢惕也汨洪漣而無害

今予宴安也蹈常流而致危畏之途果無常所哉不生於所畏而生於所易也是以越子鄰行吳君忽晉宣尸居魏臣怠白公厲劍子西晒李園養士春申易至于覆國夷族可不儆哉嗚呼禍福之胚胎也其動甚微倚伏之矛盾也其理甚明因而後儆斯弗及已

原力

劉子于邁舟次泗濱維絳邇之于傳：吏適傳呼曰乘驛者方來誰何之則曰力人也雅以力聞於吳楚間中貴人器之謂宜為爪士獻言于上有旨趣如京

師頃其至則伋焉五輦咸碩其體毅其容動晴曄如曳趾岌如顧瞻遲回飲啜有聲泗濱守任由將授也說而勞之饗以太牢飲以百壺酒酣氣振求試自矜傍如無人中若有馮有盪舟如沿者扶鼎如飛者綯鍵如麻者開兩弧而脉不僨者履巨石而齋如流者異哉果以力駭世而聞于上也異日話於儒家者流有客俳然自奮曰斯誠力矣上之不過誇胡人而戲角抵次之不過倖期門而振袍服我之力異然以道用之可以格三苗而賓左衽以威用之可以係六羸

而斷右臂由是而言彼力也長雄於匹夫然猶驛其
駢餼其食我力也無敵於天下亦當蒲其輪鶴其書
矣予詰之曰彼之力用於形者也子之力用於心者
也形近而易見心遠而難明理乎而言則子之力大
矣時乎而言則彼之力大矣且夫小大迭用曷常哉
彼固有小矣子固有大矣予所不能齊也客於邑岳
涕洟劉子解之曰屠羊於肆適味於衆口也攻玉于
山俟知於獨見也貪日得則鼓刀利要歲計而韞積
多客聞之破涕曰吾方俟多於歲計也歲歟歲歟其

我與歟

說驥

伯氏佐戎于朔陲獲良馬以遺予予不知其良也秣
之稊秕飲之污池廐櫪也上痺而下蒸羈絡也綴索
而續韋其易之如此予方病且窶求沽于肆三之馭
亦不知其良也評其價六十緡將劑矣有裴氏子羸
其二以求之謂善價也卒與裴氏裴所善李生雅挾
相術於馬也尤工覩之周體怡然視聽然笑既而拊
隨之且曰久矣吾之不覩於是也是何柔心勁骨竒

精妍態宛如鏘如曄如翔如之備邪今夫之德也全
然矣顧其維駒歲銳于內且秣之垂方是用不說乎
常目須其齒備而氣振平聲則衆美灼見上可以獻帝
闕次可以鬻千金裴也聞言竦焉遂倣其僕蠲其皂
筐其惡蚤其澠糴以美薦秣以薌粒起之居之澡之
拒音震之無分陰之怠斯以馬養養馬之至分也居無
何果以驥德聞客有唁予以喪其寶且譏其所買也
微予灑然曰始予有是馬也予常馬畜之今予易是
馬也彼寶馬畜之寶與常在所遇耳且夫昔之翹陸

也謂將蹄將鬣抵以槌策不知其籟雲耳昔之嘔呼
也謂為疝為癘投以藥石不知其噴玉耳夫如是則
雖曠日歷月將頓踣是以曾何寶之有焉繇是而言
方之於士則八十其緡也不猶踰於五殺皮乎客謬
而竦予遂言曰馬之德也存乎形者也可以目取然
猶為之若此矧德蘊于心者乎斯從古之歎予不敢
歎

述病

劉子嘗涉暑而征熱攻于膝以致病其僕也告痛亦

莫能興逮浹日子有瘳醫診之曰疾幸間矣顧熱疹而未平有遺類焉宜謹於攝衛衛之乖方則病復矣所苦既微而怠其說倦眠于衾而興焉倦隱于几而步焉面不能罷頰髮不能指櫛口不能忘味心不能無思如是未移日而疾也瘳疎錦如復瘳于躬進藥求汗凡三渙然後日能視視既分則嚮時之僕已睨然執枵圈待予于前矣予訝而曰曩吾與若也病偕呻也諄也若酷而吾微藥也餌也吾殷而若薄何患之同而痊之異哉僕諄、而荅云己之被病也兀然

而無知有間也亦兀然而無知髮蓬如而忘乎亂面黔如而忘乎垢洎疾之殺也雖飲食是念無滑甘之思日致復初亦不知也予喟然歎曰始予有斯僕也命之理畦則蔬荒主庖則味乖顛廐則馬瘠常謂其無適能適乃今以兀然而賢我遠甚利與鈍果相長哉僕更矣劉子遂言曰樂於用則豫章貴厚其生則社稷賢唯理所之曾何膠於域哉

劉賓客文集卷第七 論下

辯易九六論

與董生言易

辯易九六論

乾之爻皆九而坤六何也世之儒曰吾聞諸孔穎達云陽尊得兼乎陰陰不得兼乎陽也它日予與董生言及易生曰吾聞諸畢中和云舉老而稱也請徵諸揲著夫端策者一變而遇少與歸奇而為五再變而遇少與歸奇而為四三變如之是老陽之數分措于指間者十有三策焉其餘三十有六四四而運得九

是已故易繫注云乾一爻三十六策也一變而遇多與歸奇而為九再變而遇多與歸奇而為八三變如之是老陰之數分措于指間者二十有五策為其餘二十有四四四而運得六是已故易繫注云坤一爻二十四策也借如一變而遇少再變三變而遇多是少陽之數分措于指間者二十有一策其餘二十有八四四而運得七一變而遇多再變三變而遇少是少陰之數分措于指間者十有七策其餘三十有二四四而運得八故九與六為老老為變爻七與八為

少少為定位故曰舉老而稱亦曰尚變而稱且夫筮為乾者常遇七斯乾矣常遇九斯得坤矣筮為坤者常遇八斯坤矣常遇六斯得乾矣在左氏國語有之晉公子親筮之曰尚有晉國得貞屯悔豫皆八八非變爻故不曰有所之按坎二世而為屯之六二為世爻震一世而為豫之初六為世爻屯之二豫之初皆少陰不變斯非八乎卦由老數而舉曰六筮由著數故斥曰八在左氏春秋傳有之曰穆姜薨于東宮始往而筮之遇艮之八史曰是謂艮之隨夫艮三

艮上之隨三震下唯二不動斯遇八也餘五位皆九
六故反為筮法以少為卦主變者五而定者一故以
八為占艮之六二曰艮其腓不拯其隨其心不快史
以為東宮實幽也遇此為不利故從變爻而占苟以
說于姜也何則卦以少為主若定者五而變者一即
宜曰之某卦觀之否師之臨類是也變與定均即決
以內外今變者五定者一宜從少占懼不吉而更之
故曰是謂艮之隨是謂之云者苟以說也故穆姜終
死于東宮與艮會耳而杜元凱於此注以為雜用三

易故有遇八之云非臻極之理也劉子曰余與董生
言凡六之義信與理會為不誣矣余又於左氏二書
參焉若合形影然而世人徃々攘臂于其間曰生之
名孰與穎達著邪而材孰與元凱賢邪歷載曠日未
嘗有聞人明是說者雖余憤然用口舌爭特貌從者
什一二焉嗟乎由數立文所如皆合昭々乎若觀三
辰其不晦也如此然猶貴聽而賤視斷斷反然莫
可更也矧無形之理不可見之道邪余獨悲而志之
以俟夫後覺初董生言本畢中和中和本其師々之

學本一行云

第一指 餘一益三餘二益二 第二指 餘一益二餘二益一 第三指 與第二指同

一本作第天

右揲著數 卦從下起指亦自下始第一指法地故益成 偶第二法天故益成奇第三人極法天故同

第一指 遇一益三并掛一為五遇三遇二並謂之少與一同 第二指 遇一益二并掛一為四 第三指 遇一益二并掛一為四

右三指俱遇少通計十三策其餘三十六策四

四運之得九為老陽故易繫云乾之策二百一

十有六注云陽爻九一爻三十六策六爻二百一十有六

第一指 遇四益四與掛一為九 第二指 遇四益三與掛一為八遇三亦同 第三指 遇四益三與掛一為八遇三亦同

右三指俱遇多通計二十五策其餘二十四策

四三運之得六為老陰故易繫云坤之策百四

十有四謂陰爻六一爻二十四策六爻一百四

十有四

第一指 遇一益三并掛一為五 第二指 遇四益三并掛一為八 第三指 遇四益三并掛一為八

右初指少第二第三指多以少為主通計二十

一策其餘二十八策四三運之得七為少陽

第一指 遇四益四并掛一為九 第二指 遇一益二并掛一為四 第三指 遇一益二并掛一為四

右初指多第二第三指以多為主通計一十七

策其餘三十二策四二而運得八為少陰

第一指 遇少謂一二也並止於五 第二指 遇多謂三四也並止於八 第三指 又遇少謂二也並止於四

右初指少第二指多第三指又少以多為主通計一十七策其餘三十二策四二而運得八為少陰

第一指 遇多謂四也止於九 第二指 又遇多謂三也止於八 第三指 遇少謂一二也止於四

右初指第二指多第三指獨少以少為主通計二十一策其餘二十八策四二運之得七為少陽

第一指 遇少止於五 第二指 又遇少止於四 第三指 遇多止於八

右初指二指並少三指獨多以多為主通計一十七策其餘三十二策四二運之得八為少陰
穆姜薨于東宮始往而筮之遇艮之八史曰是謂艮之隨夫艮三艮上下之隨三震上下唯六二爻不動餘五畫變者遇九六也二不動者遇八也

晉公子親筮之曰尚有晉國得貞屯悔豫皆八夫屯三震下六位畫不遇六九故不動既無所之即以世爻為占按屯是坎宮二世卦故以一為占則遇八夫

豫 坤下 震上 是震宮一世卦以初六為占亦遇八韋昭

於此注云內曰貞外曰悔震下坎上為屯坤下震上

為豫言得此兩卦震在屯為貞在豫為悔八謂震兩

陰爻在貞在悔皆不動所以筮史占之謂閉而不通

者爻無為也乾之策二百一十有六 謂陽爻九一爻

當二百一十六言三 坤之策一百四十有四 謂陰爻

十六者舉老陽也 坤之策一百四十有四 謂陰爻

二十四策六爻當百四十有 四言二十四者舉老陰也

凡三百有六十當碁之曰 二篇之策萬有一千五

百二十當萬物之數六十四卦都三百六十四爻陰

陽相半各一百九十二爻

陽爻一爻三十六策合為六千九百一十二陰爻一

爻二十四策合為四千六百八

右六九之數

一行大衍論云三變皆剛太陽之象也三變皆柔太

陰之象也一剛二柔少陽之象也一柔二剛少陰之

象也少陽之剛有始有 壯 有究少陰之柔有始有 壯

有究因綜四象之變而成八象焉八象之位而八卦

之本列矣注云太陽始動施于太陰而生震象之七

謂少陽之七再動于壯而生坎象之七謂再索而三
為震初九謂三索而太陰始動施于太
動于究而生艮象之七謂三索而太陰始動施于太
陽而生巽象之八謂少陰之八再動于壯而生離象
之八謂再索而三動于究而生兌象之八謂三索而
是以九六七八分為八象

右大衍論

國語又云董因迎公于河公問焉曰吾其濟乎對曰
臣筮之得泰之八曰是謂天地配亨小往大來今及
之矣何不濟之有韋昭云泰三至五震象為侯陰爻

不動其數皆八與貞屯悔豫義同劉子曰昭此說用
互體有震按董因之言天地配亨是六五帝乙歸妹
以祉元吉之爻夫泰乾坤體全內外位正內為身外
為事卜得國事也以外卦為占六五居尊位故統論
卦下辭曰小往大來爻遇歸妹故曰天地配亨何必
取互體也

右與董生言易

劉賓客文集卷第八記上

天平軍節度使廳壁記

汴州刺史廳壁記

國學新修五經壁記

汴州鄭門新亭記

鄭州刺史東廳壁記

管城新驛記

和州刺史廳壁記

山南西道節度使廳壁記

山南西道新修驛路記

天平軍節度使廳壁記

元和十四年春二月王師平河南負固之地十有二
州憲宗視地圖戶版俾參其地三月有詔其以曹濮

隸鄆為一隅按部三郡統兵三萬乃新其軍錫號天
平蓋承天威以平暴悖志動揚休在稱為雄新邦始
徠汚俗猶用朝廷革之以漸故命功臣或辦吏以帥
為太和三年冬天平監軍使以故侯病聞上方注意
治本乃以牙璋玉節鼎右僕射官稱賜東都留守令
狐公曰予擇文武惟汝兼前年鎮汴州有顯庸往年
弼憲宗有素貴徒得君重剛吾四支公西拜稽首登
車有耀不踰旬抵治所夾清河而域之惟鄆州在春
秋為須句之國涉漢為濟東蓋禹貢兗州之域宣精

在上奎為文宿畫野在下魯為儒鄉故其人知書風
俗信厚天寶末大憝起於幽都虜將因兵鋒取其地
右勇左德積六十年公之來思如古醫之治劇病宣
洩頤養氣還神漫大凡抗詔條國式於身以先之示
菲約以裕人信賞罰以格物力日完人風自移涉
月報政踰年鼎治牙門之容暨而恭壘門之容化
化而和里中之容閭闔而遂勞者以安去者以歸分
星不搖田祖降福凡革前非罷供第無名錢歲鉅萬
菽粟如之錦繒且千兩去苛法急徵毀家償租之令

故流庸自占四萬室衆無吁咨和氣乃來三田仍稔
草木咸瑞豈偶爾哉初斯堂西墉有刺史記而元戎
雄尊之位虛其左方豈有待邪公命愚志之俾來者
仰公知變風之自大和五年夏四月二十六日記

汴州刺史廳壁記

本朝以浚儀為汴州刺史治所自隋醜新渠吸黃河
而東行州含其樞為天下劇內屏王室東雄諸侯居
無事時常帶廉察使兵興已還益以節旄用人得否
繫國輕重長慶四年詔書命河南尹敦煌令狐公來

蒞來刺錫之介圭使印兵符汴人交賀者醜騰貴惟
是邦始都于魏惠王始郡于宇文周星躔回環天駟
垂光地為四戰故其俗右武人具五都故其氣習豪
公自為宰相時已熟四方之利病凡所戾止參然前
知既視事三日挹群吏與之言曰吾食止圭田吾用
止公入凡它給過制傷廉浼潔者悉罷之壹歸乎公
截凡曲防苛禁不情乖體者悉剋之壹出乎令典凡
闕征船算奪時專利者悉更之壹遵乎詔條然後刑
麗事而詳賞以時而均興學以勸執示寬以化勇居

數月而汴州人恂恂然無復故態明年大成議者若
曰奕奕浚都國之咽喉咀清嚙和旁暢四支東夏黜
馬由我以肥是浚之治非所澤于所履而已初公七
代祖在隋為納言大業中持節居此亦魏刺史距今
餘二百年公實能似既拜闕發魚書合左右契由阼
階躋遐踵前式歆然如聞其馨香肅然如覩其形容
信乎君子之澤遠而有光輝也它日命遊梁客志之
書于廳事謹按前賢之在此堂者張平原首之陸氏
撰節度使記揭于東壁詳矣今公命為刺史記書于

右端謹月而日之以公為冠大和元年夏五月某日
記

國學新修五經壁本記

初大曆中名儒張參為國子司業始定五經書于論
堂東西廂之壁辯齊魯之音取其宜考古今之文取
其正繇是諸生之師心曲學偏聽臆說咸束之而歸
于大同揭：高懸積六十歲崩剝污蠹泮然不鮮今
天子尚文章尊典籍於苑囿不加尺椽而成均以治
學上言遽賜千萬時祭酒皐實尸之博士公肅實佐

之國庠重嚴過者必式遂以羨羸再新壁書懲前土
塗不克以壽乃析堅木負墉而比守之其制如版牘而
高廣其平如粉澤而潔滑背施陰闔使衆如一附離
之際無迹而尋堂皇靚深兩廡相照申命國子能通
法書者分章揆日遜其業而繕寫為筆削既成讐校
既精白黑彬斑瞭然飛動以蒙來求煥若星辰以敬
來趨肅如神明以疑來質決若著蔡由京師而風天
下覃及九譯咸知宗師非止服逢者掖者鑽仰而已
於是孝官某等暨生徒凡四百二十有八人請金石

刻且歌之曰

我有學宇既傾而成之我有壁經既昧而明之孰規
摹之孰發揮之祭酒維齊博士維韋俾我學徒弦歌
以時切二祀二不教不嬉庶乎道人來采我詩時余
為禮部郎凡睿宗之事得以闕決故書之以移史官
宜附于藝文志

汴州鄭門新亭記

亭于西門尊闕路也實相公以心規群僚以辭叶而
百工以樂成斧斤無聲丹素有嚴主人肅容落以金

石走鄭之門嶽為右垣黃河一支滉漾北軒前瞻東
顧覺動軌直含景生姿邈空欲翔汴城具八方之人
殊形詭言而耳目一說初公來臨擁節及門馭吏曰
此鄭州門公心非之若曰野哉居無何即舊號而更
之曰鄭門故事王人大僚之去來元侯前驅翊門而
旋率立馬塵空中挹策為禮公心不然之乃下亭令
于執事按亭東西函丈者三之有竒而朝北五之有
羸樂縣宴豆前後以位棊闔對明弭掀順時修梁衡
建中虛上荷圓脊方廉高卑中經簾鑪茵帝文梳曉

榻儲以應猝周用而宜乃命尹閣視亭長抱閤視掌
固啓閉拚除是謹是攷錫命賜昨勞迎贈餞我當躬
行汝先汝蠲挾膳提醪生芻縞衣我察^察展事靡問文
武汝唯汝從凡入而修容凡出而修^揚輒褻威儀勿
籍勿訶繇是貴人稱諸朝群吏詠於家行者誇于道
與人同其安者人人^譯其聲而吟之始乎譏而^遂成
乎寵鴻欲無文字不可也公遂條白其所以然^遂命
學古者書之公姓令狐氏以文章典內外書命以暮
明登左右相以飛語策免以思材復徵自有浚師無

如今治文武兩熾其古之大臣歟

鄭州刺史東廳壁記

古諸侯之居公私皆曰寢其它室曰便坐今凡視事之所皆曰廳其它室以辨方為稱今年鄭州刺史楊君作東廳既成而落之且以書抵余為記按國章以甲乙第方域大凡環天子之居為雄州鄭實邇王畿故望雄視其版多貴人且當大遠故務劇君侯始來三日司稅掾舉七縣董祖之吏累百君曰此百勝也悉罷之用戶符而輸入益辦司貢掾舉梨林之征請

戶曉君曰盡弛之勿籍用平賈而果益精里無吏迹民去痼疾授牘占租如臨詛盟土毛人力日夕相長故周歲而完為比年而愈肥雖軍興餽輓旁午大將牙旗徃復相踵而里中清夷雞犬音和人既寧而物有餘政既成而日多暇園視舊宇宜有以更之且書得時亦以謹始因列名氏授受月而日之庶乎繼踐于茲者知貫珠之首其山望澤浸土風眊俗與前賢之耿光備于正位有天寶中詞人杜顒之文在大和四年某月日

管城新驛記

大和二年閏三月滎陽守歸厚上言臣治所直天下
大達肘武牢而咽東夏誰何宜謹啓閉宜度先是驛
于城中驛遽不時四門牡鍵通夕弗禁請更于外隧
永永便安制曰可守臣奉詔無徵命無奪時糜羨財
募游手逮八月既望新驛成鄭人晉說琢石而紀曰
在允之方面玄負陽門銜周道牆蔭行粟境勝于外
也遠購名材旁延世工暨塗宣哲瓊甃剛滑術精于
內也遽廬有甲乙牀帳有冬夏庭容牙節燕卧囊橐
示禮而不恩也內庖外廩高倉遽庫積薪就陽時易
就燥有素而不愆也主吏有第役夫有區師行者有
饗亭孳行者有別邸周以高墉乃樓其門勞迎展謁
潔之敬餞別起登臨之恩溱洧波瀾嵩丘雲煙四時
萬象來貺于我走轂奔蹄迺征急宣入而忘勞出必
屢顧其傳舍之尤乎太守姓楊氏字貞一華陰弘農
人鄭為雒州非聞人大吏不得在其選夫驛之宜選
于外也前此千石嘗言之而重改作若貞一可謂果
於從政而決行其言惜乎未施於大也

和州刺史廳壁記

歷陽古揚州之邑於天文直南斗魁下在春秋實句
吳之封後為楚所取秦并天下以隸九江而^吳為九
江治所晉平吳復隸淮南至永興初自析為郡益之
以烏江宋臺建目為南豫州又益之以龍亢梁之亡
北齊圖霸功擁貞陽侯以歸王僧辯來迎會于茲地
二國和協故更名和州陳隋間無所革國朝因隋武
德中更龍亢為含山初開元詔書以口筭第郡縣為
三品是為下州元和中復命有司參校之遂進品第

一按見戶萬八千有奇輸緡錢十六萬歲貢織紵二
筐吳牛蘇二釣糝鱻九甕茅蒐七千兩鎮曰梁山浸
曰歷湖田藝四穀黍全六擾廬有昔酒庖有腹魚神
仙故事在郊在藪玄元有臺彭鏗有洞名山曰雞籠
名塢曰濡湏異有血閭祥有沸井城高而堅亞父所
營州師五百環峙于東南瀕江劃中流為水疆揭旗
樹纛十有六戎自孫權距陳出入六代常為宿兵之
地多以材能人處之本朝混一號為善部然用人差
輕非復曩時之比也始余以尚書郎得譴刺連山今

也自由巴東來牧考前二邦之籍與版圖總什五六而地征三之究其所從來生植有本女工尚完堅一經一緯無文章交錯之奇男夫尚墾闢功苦戀本無即山近鹽監之逸市無嗤眩工無彫形無游人異物以遷其志副徵令者率非外求凡百為一出於農桑故也繇是而言瘠天下者其在多巧乎寶曆元年六月二十一日刺史中山劉某記

山南西道節度使廳壁記

文皇帝初元始畫天下為十道古故荆梁之地舉曰山

南厥後析為東西天漢之邦實居右部按梁州為都督會治所領十有五州縣道帝蠻夷山川扼隴蜀故二千石有採訪防禦之名兵興多故其任益重澄清節鉞二柄兼委建中末德宗南巡狩偃翠華而徘徊蕭勺之音洽于巴漢戡難清宮六龍言旋迺下詔復除征繇并州為府等威班制與歧益同地既尊大用人隨異故自興元至大和五十年間以勲庸佩相印者三以暮明歷真相者九由台席授鉞未幾復入相者再焉磊落震耀冠于天下去年夏四月今丞相趙郡公

徵還泰階遂命左僕射燉煌公往踐其武鄉之也九相
及公而十為初公自河陽節度使入操國柄其後鎮
宣武以禮悛獷悍治天下以清去培克居大鹵以蕪
仁蘇荐饑今來是都躡二三大君子之躅道同氣協
無所改更如鼓如琴布指成韻羗夷砥平旱麓發生
人無左言樂有夏聲俗既富庶居多閒暇園視府局
素闕者補之先是公堂嘗為行殿人不敢斥別營侯
居應門有閱祭戟未具公乃條白上言詔下有司可
其奏軍門肅清方有眉目趨而入者聳然生敬為惟

梁山國也其節用虎出揚其威入貯宜潔舊處及陋
黷其雄稜公遂分宅之別齋且據便地署曰節室卜
剛日乃遷焉敬君命而壹民心軍中增氣而知禮戟
衣既垂師節既嚴流眄屋壁見前修之名氏列于坐
右第以梁州刺史鼎興元尹記與今稱謂不合因發
函進牘于不佞且曰我已飾東壁以新志累子於是
按南梁故事起自始登齋壇之後為記云時開成二
年歲在丁巳春二月某日記

山南西道新修驛路記

開成四年梁州牧缺上玩其印疑旒深思曰伊爾卿
族歸氏以文儒再世居喉舌今天官貳卿融能嗣其
耿光嘗自內庭歷南臺尹轂下政事以試可為元侯
乃付印綬進秩大宗伯兼御史大夫玉節獸符鎮于
媯墟公拜手稽首曰臣融敢揚王休于天漢之域既
蒞止咨于群執事求急病者先之咸曰華陽黑水昔
稱醜地近者嘗為王所百態丕變人風邑屋與山水
俱一都之會目為善部矣唯驛遽之途歎危隘束其
醜尚存使如周道在公願指耳於是因年有秋因府

無事軍逸農隙人思賈餘乃懸壑山刊木之傭募其
力揆鑽鑿撞秘之用疋其工具舁輦畚鍤之器磨其
要磬鼓以程之楔醪以犒之說使之令既下奮行之
徒至集我之提封踞右扶風觸劔閣千一百里自散
關抵褒城次舍十有五牙門將賈黯董之自褒而南
逾利州至于劔門次舍十有七同節度副使石文穎
董之兩將受命分曹星馳並山當蹊頑石萬狀坳者
埕者兀者銛者磊落傾歌波翻獸躡熾炭以烘之嚴
醢以沃之潰為埃煤一篲可埽棧閣盤虛下臨咸呀

層崖峭絕柵木亘鐵因而廣之限以鈎欄狹逕深陁
銜尾相接從而拓之方駕從容急宣之騎宵夜不惑
却曲稜層一朝垣夷興役得時國人不知繇是駛聘行
者忘其勞吉行者徐其驅孳行者家以安貨行者肩
不病徒行者足不重乘行者蹄可利公談私詠溢于
人聽伊彼金其牛而誘之以利曷若我子其民而來
之以義乎既訖後南梁人書事于牘請紀之以附于
史官地里志

劉賓客文集卷第八

廿百十後次公校

劉賓客文集卷第九記下

夔州刺史廳壁記

連州刺史廳壁記

機汲記

洗心亭記

復荆門縣記

武陵北亭記

夔州刺史廳壁記

夔在春秋為子國楚并為楚九縣之一秦為魚復漢
為固陵蜀為巴東梁為信州初城于瀼西後周大總
管龍門公拓王述登白帝歎曰此竒勢可居遂移府
于今治所是歲建德五年隋初楊素以越公領總管

又張大之唐興武德二年詔書其以信州為夔州七年增名都督府督黔巫一十九郡開元中猶領七州天寶初罷州置郡號雲安至德二年命嗣道王鍊為太守賜之旌節統硤中五郡軍事乾元初復為州偃節于有司第以防禦使為稱尋罷以支郡隸江陵按版圖方輸不足當通邑而今秩與上郡齒特以帶蠻夷故也故相國安陽公乾曜嘗參軍事修圖經言風俗甚備今以郡國更名之所以然著于壁云凡各殊必以國事建必以年謹始也長慶二年五月一日刺

史中山劉某記

連州刺史廳壁記

此郡於天文與荊州同星分田壤制與番禺相犬牙觀民風與長沙同祖習故嘗隸三府中而別合乃今最久而安得人統也按宋高祖世始析柳之桂陽為小桂郡後以州統縣更名如今其制誼也郡從嶺州從山而縣從其郡邑東之望曰順山由順以降無名而相歆者以萬數回環鬱遶迭高爭秀西北朝拱于九疑城下之浸曰湟水由湟之外支流而合輸以百

數淪漣汨瀟擘山為渠東南入于海山秀而高靈液
滲漉故石鍾乳為天下甲歲貢三百銖原鮮而臚卉
物柔澤故紵蕉為三服貴歲貢十笥林富桂檜土宜
陶甃故侯居以壯聞石侔琅玕水孕金碧故境物以
麗聞環峯密林激清儲陰海風毆溫交戰不勝觸石
轉柯化為涼颼城壓赭岡踞高負陽土伯噓濕抵堅
而散襲山逗谷化為鮮雲故罕羅嘔泄之患亟有華
皓之齒信荒服之善部而矣裔之涼墟也永貞元年
余始以尚書外郎坐黨累出補茲郡居無何吏議以

是遷也不足庚其責故道貶為朗州司馬後十年詔
書徵還抵京師俄復前命佩故印綬而南曩之騎竹
馬北向相俛者咸仕^任郡縣中講來迎下車之日私喑
且笑既視事得前二千石名姓于壁端宰臣王峻倖
卿劉晃儒官嚴士元聞人韓泰僉拜焉或久於其治
功利存乎人民或不之厥官翹顛載于歌謠余不佞
從群公之後肇武德距于今凡五十有七人所舉者
四君子猶振裘之於領袖焉元和十一年七月二十
四日刺史中山劉某記

機汲記

瀕江之俗不飲於鑿而皆飲之流予謫居之明年主人授館于百雉之內江水浩浩周墉間之一旦有工爰來思以技自賈且曰觀今之室廬及江之涯間不容畝顧積塊峙焉而前耳請用機以汲俾轟然之狀莫我遏已予方異其說且命之飭力為工也儲思環視相面勢而經營之由是比竹以為畚箕于流中中植數尺之臬輦石以壯其趾如建標為索綯以為繩縻于標垂上屬數仞之端亘空以峻其勢如張弦焉鍛鐵

為器外廡如鼎耳內鍵如樂鼓牝牡相函轉於兩端走于索上且受汲具及泉而修綆下縋盈器而圓軸上引其徃有建瓴之駛其來有推轂之易瓶繡不羸如搏而升枝長瀾出高岸拂林杪踰峻防剗蟠木以承澍貫修筠以達脉走下潺湲聲寒空中通洞環折唯用所在周除而沃盥以蠲入爨而錡釜以盈飴餼之餘移用于湯沐凍澣之末泄注于圃畦雖漢湧于庭莫尚其需洽也昔予嘗登陴攔然念懸流之莫可遽挹方勉保庸督城獲輶而挈之至于裂肩龜手然

猶家人視水如酒醪之貴今也一任人之智又從而信
之機發于冥、而形利用於用物浩漾東流赴海為期幹
而遷焉逐我頤指鄉之所謂阻且艱者莫能高其高
而深其深也觀夫流水之應物植木之善建繩以柔
而有立金以剛而無固軸卷而能舒竹圓而能通合
而同功斯所以然也今之工咸盜其古先工王之遺法
故能成之不能知所以為我成也智盡于一端功止于
一名而已噫彼經始者其取諸小過歟

洗心亭記

天下聞寺數十輩而吉祥尤章、蹲名山俯大江荆
吳雲水交錯如繡始予以不到為恨今方弭所恨而
充所望焉既周覽讚嘆於竹石間最竒處得新亭形
焉如巧人畫鼇背上物即之四顧遠邇細大離然陳
乎前引人目去求瞬不得徵其經始曰僧義然嘯侶
為工即山求材槃高孕虛萬景空來詞人處之思出
常格禪子處之遇境而寂憂人處之百慮冰息鳥思
猿清繞梁歷榱月來松間彫鏤軒墀石列筍簾藤蟠
蛟螭修竹萬竿夏含涼颺斯亭之實錄云爾然上人

舉如意挹我曰既志之盍名之以行乎遠夫余始以
是亭園視無不適始適乎目而方寸為清故名洗心
長慶四年九月二十三日劉某記

荆門縣記

直故郢北走之道其聚邑曰荆門揭起重關殿于樂
都名視縣內之制居殷形束之要故吏師重焉通外
民之底貢會南藩之述職故賓禮蕃焉其肇允經營
實王孫昌夔居荆以表之命行名建而締構之弗暇
無幾何有由勇爵而授赤社于茲者徼馳名於省嗇

謂相沿為非智因請罷去其號發踐更以董之有司
不能端究事本循空言而可其奏繇是分地征以歸
它邑野之人有回遠之歎廢文吏而顛成督行之旅
有誰何之難是利不及下也黎民病之自鄙而南斯
為畫疆抵郡之路貫其七舍持瑞節而銜急宣之使
蓋陰相交遂使服縵胡者備問俗之對執刀匕者申
餼牽之禮是敬之不及賓也君子病之如是幾二十
歲距永貞元年江陵尹裴公政成上游德及矜人大
建長利俾無遺害乃外濟群欲內張全摹周圖經制

條白于狀昌言既從公議攸同志勞之徒樂用之工
載大其門載高其墉徑術脉分闕閭架空然後折便
地以肥之建其官以司之糜羨財以償其力役汰冗
食以資其秩稍田里不聞於徵令縣官無減於歲入
越某月既成而落之官修其方人樂其居將迎犒飫
之儀展廢置符繻之事舉戎夫有伍公吏有職由彙
而分率無踰閑入其封者可以知教元和元年四海
會同天子命公師長南宮三年公以介圭入覲途出
斯邑之人之華皓幼童咸頌于道周距躍而謠曰起

我堙廢而完之徠我蕩析而安之昔室于墟風搖雨
濡自公優柔鄂閑盈兮昔飲于滄夏涸冬枯自公感
通感沸生兮淑旂之華兮四牡之駢徯公之還兮觴
以祝之郤略踰蹇百形一音公為駐錯衡而勞之有
以文從公者紀事于牘且曰民可懷也蓋命夫學舊
史之事以志焉公不得讓而從之走是以有授簡之
辱初公以縣之之便聞于上也禹錫方以卽位貼職
于計曹章下之日得以省事逮今以遷人獲宥于善
部工休之日得以踐履故於拜命無牢讓於傳信無

愧詞以為古之創物建庸宜于人民而得其時者則
必譔其事功為後代法雅有營謝美召伯也傳稱城
沂賢為教也賦水泉原隰之狀志慮事命日之規當
書而詠之細亦弗可畧也是用謹其本始而存乎篇
俾後之視今者知楚郊之令典云新也蓋命夫
武陵北亭記
郡北有短亭繇舊也亭孤其名地蔽其勝前此二千
石全然見之建言而莫踐去之日率遺恨為七年冬
詔書以竹使符授尚書水曹外郎竇公常曰命爾為

武陵守莅止三月以碩畫佐元侯平裔夷降渠魁又
三月以順令率蒸民增水坊表火道是歲大穰明年
政成農緣畝以勇勸工執技以思賈因民之餘力乘
日之多暇乃顧其屬曰郊道有侯亭示賓以不恩也
雖聞茲地韜美未發豈有待邪自吾之治于斯也購
徒充材大起堙廢未嘗植私庭礮燕寢後必先公人
不余瑕調賦幸均矣城池幸完矣而重泱辰之後掠苟
簡之問卒使勝躅冒沒猶璞而不攻懼換符之日遠
復齋恨無乃遺誚於來者乎言得其宜智愚同贊於

是撤故材以移用相便地而居要去凡木以顯珍茂
汰污池以通淪漣自天而勝者列於騁望由我而美
者生於頤指箕張筵楹股引房櫳斧斤息響風物異
態大道出乎左藩澄湖浸乎前垠仙舟祖軼絲是區
處九月壬午工告休亭長受成赤車威遲于以落之
肅賓而入園視有適沈水北澳陽山南麓點焉蘧
雄殿郊隅前軒舒陽朱檻環之舞衣回旋樂簾參差
北廡延陰外阿旁注芊眠清泚羅入洞戶初筵脩平
彫俎靜嘉林風天籟與金奏合亦既醉止州從事舉

白而言曰室成于私古有發焉矧成于公庸敢無詞
觀乎棼楣有嚴丹雘相宣象公之文律曄然而光也
望之弘深即之垣夷象公之酒德温然而達也庭芳
萬本跗萼交映如公之家肥熾而昌也門闢戶闔連
機弛張似公之政經便而通也因高而基因下而池
躋其高可以廣吾視泳其清可以濯吾纓俯于達惟
行旅謳吟是采瞰于野惟稼穡艱難是知雲山多狀
昏旦異候百壺先韋之餞迎退食私辰之宴嬉觀民
風於嘯詠之際展宸戀於天雲之末動合于誼匪唯

馮憂公曰夫言之必可書者公言也從事不以私視
予余從而讓之是自還也其可乎迺授簡于放臣俾
書以示後後之思公者雖灌叢萋草尚勿翦拜矧暈
飛之革然不刻之隱然歟

劉賓客文集卷第九

廿三日未刻校是日熱甚交夏至節次

劉賓客文集卷第十書

上杜司徒書

獻權舍人書

為京兆李尹答于襄州第一書

為京兆李尹答于襄州第二書

答饒州元使君書 答容州竇中丞書

答柳子厚書 與柳子厚書

答道州薛郎中論方書書

與刑部韓侍郎書 與道州薛郎中論書儀書

上杜司徒書 時元和元年

月日故吏守朗州司馬員外置同正員劉某謹齋沐
致誠命僕夫持書敢獻于司徒相公閣下昔稱韓非
善著書而說難孤憤尤為激切故司馬子長深悲之
為著于篇顯白其事夫以非之書可謂善言人情使
逢時遇合之士觀之固無以異於它書矣而獨深悲
之者豈非遭罹世故益感其言之至邪小人受性顛
蒙涉道未至末學見淺少年氣粗常謂盡誠可以絕
嫌猜狗公可以弭讒想謂慎獨防微為近隘謂艱貞
用晦為廢忠芻狗已陳刻舟徒識罟獲隨足悵然無

一本作惑

一本作迺

一本作從

知事去凝想時、自笑然後知韓非之善說司馬子
長之深悲跡符理會千古相見雖歆勿悲可乎大凡
怕人之所以靈於庶類以其能群以勝物也烈士之
所以異於怕人以其伏節以死誼也然則交相喪者
世與道難合并者機與時是以有死誼之心而卒不獲
其所者世人悲之獲其所矣而一旦如不得終焉者
君子悲之世人之悲中其不遇無成而虧故其感也
近君子之悲中其不幸既得而喪故其感也深其悲
則同其所以為悲則異若小人者其不幸歟間者昧

一本作誼

於藩身惟致危地始以飛謗生釁終成公議抵刑自
朔之間再投裔土外黷相公知人之鑑內貽慈親非
疾之憂常恐恩義兩乖家國同負寒心銷志以生為
慙雖欲漉血以自明籲天以自訴適足來衆多之誚
豈復有特達見知者邪遂用詛盟於心不復自白以
內咎為弭謗之具以吞聲為窒隙之媒庶乎日月至
焉而是非乃辨會友人江陵法曹掾韓愈以不幸相
悲且曰相國扶風公之遇子也厚非獨余知之天下
之人皆知之矣余聞初子之橫為口語所中獨相國

深明之及不得已而退則為之流涕以訣又不得已
而譴則為之擇地以居求之於今難與侔矣抑余又
聞曩子之介于司徒府奉誠敬於山園上公亟稱于
人以為不懈于位今則有脩儀以贊其詔相者有備
物以贊其容衛者七月禮畢一朝慶行誥言敷之授
以顯秩子獨足趾一跌而前勞併捐祝網之辰動絃
踈目可封之代乃為窮人斯常情之所悲矧知子之
厚者夫踣者思起必譁而求極疾者思愈必呻而求
醫子宜譁於有力而呻於有術如何以箝口自絕為

一本作荆

一本作與

智以甘心受誣為賢，嘆然自咎，求知於默。彼李斯逐
鳥而為上卿，鄒陽囚鳥而為上客。二子者，豈默以求
知者邪？若可訴而不言，則陷於畏，可言而不辨，則隣
於怨。畏與怨，君子之所不處，子其處之哉？韓生之言
未及竟，而小人不知感從中來，始赧然以愧，又缺然
以慄，終悄悄以悲。斯歎，斯憤，必有泄，故見乎
詞。敢聞左右投所閔也。嗟夫人之至信者，心目也。天
性者，父子也不惑者，聖賢也。然而於竊鉄而知心目
之可亂，于撥蜂而知父子之可間，於拾煤而知聖賢

一本作金

之可疑，况乎道謝孔顏，恩異天性，是非之際，愛惡相
攻，爭先利途，虞相軋，則釁起，希合貴意，雖無嫌而謗
生。魯酒致邯鄲之圍，飛鳶生博者之禍，伯仁之殺，由
偶對伯奢之冤，以器聲動，罹險中皆出意表，雖欲周
防，亦難曲施，加以吠聲者多，辨寔者寡，飛語一發，臚
言四馳，萌芽始奮，枝葉俄茂，方謂語怪終成禍梯，鳴
呼人必求知，不能自達，何投分效節，有積塵之難，何
譖行愛弛，有決防之易，何將進之日必自見，其可而
後親，何將退之時乃人言其否，而遂棄良田，邪人必

一本作之

一本作由

微邪謀必陰、則難明微則易信罔極大甚古今同途是以前脩鑒其若此姑以推心取信不以循迹生嫌由是求忠臣於孝子求良婦於罵已食盡子節也推其忍可以疑心放麤違命也推其仁可以屬國若謂其孝於親未必能忠專於夫未必能貞忍於子未必能忍於其它仁於獸未必能仁於其類則是天下之人盡不可信而盡可誣固不然也凡人之行已必恒於所安苟非狂易不能甚異小人自居門下僅踰十年未嘗信宿而不待待坐率性所履固無遁逃言行

之間足見真態伏惟推心以明其迹追往以鑒于今苟謂其嘗掩人以自售矣嘗近名以冒進矣嘗欺謾於言說矣嘗沓貪于求取矣嘗狎比其瑣細矣嘗媒孽其僚友矣嘗矯激以買直矣嘗詰講講以取容矣嘗漏言於咨諏矣嘗敗務于以簿書矣有一于此雖人謂其賢我得而刑也豈止于棄乎苟或反是雖人謂其盜我得而任也庸可而棄乎由是而言小人之善否不在衆人所以受譴已還行及半歲當食而歎聞弦尚驚不以衆人之善言為是非唯以相公之意為衡

準自遼間左右亟蒙簡書慰誨勤之窮頓增感伏想
仁念必思有以拯之况礼道貴終人情尚旧嘗盡其
力必加以仁於犬馬之微有惟盖之報顧異於是豈
無庶幾儻浮言可以事久而明衆嗤可以時久而息
弘我大信以祛群疑使榮之微志無已矣之歎覲乎
異日得夷平民然後裹足西向謝恩有所復以塵纓
鰲貌称故吏於相門此言朝遂可以夕死何則復于
变者其義重拯于危者其感深睽而後合示終不可
睽也否而後恭示終不及否也獲室於已喪得途於
既迷與夫平居不為艱故所激者其味異矣伏以大
君繼明元宰柄用鴻鈞播平分之氣懸象廓無私之
照渙汗大號與人惟新昭田汪濊旁下郡國投荒為
民者咸釋桎梏遂還里閭繫於稍食犹在羈絆伏讀
赦令許移近郊今武陵距京師贏二千者無幾小人
祖先壤樹在京索間瘠田可耕陋室未毀濡露增感
臨風永壤伏希閱其至誠而少加推恕命東曹補吏
置籍於滎陽伍中得奉安輿而西拜先人松楸誓當
齋志沒苗盡力於井臼之間斯遂心之願也如或官

謗未塞私歆未從雖為裔民乃有善地則北距澧浦
資宿春而可行無道途之勤蠲僕賃之費重以鎮南
用和輔理扇仁風於上游霽嚴施惠得以自遂斯便
家之願也伏惟降意詳察擇可行者處之乞恩於指
顧之間為惠有生成之重雖百穀之仰膏雨豈喻其
急為嗟哉小生仕逢聖日豈曰不辰知有相居豈曰
不遇而乘運鍾否俾躬罹災同生無手足之助終歲
有病貧之厄孰不求達而獨招嫌孰不求安而獨乘
次賦命如此雖悔可追湘沅之濱寒暑一候陽鴈纔

一本作債

到華言罕聞猿哀鳥思喞嚙異莫夜之後併來愁
腸懷鄉倦越吟之苦舉目多似人之喜俯視遺骸仰
安高堂悲愁喘慄常集方寸盡意之具固不在言身
遠與寡捨茲何託是以因言以見意特曰以求哀敢
希末光下燭幽蟄孤志多感重恩難忘顧瞻門館慙
戀交會伏紙流涕不知所云禹錫惶悚再拜
禹錫在兒童時已蒙見器終荷薦寵始見知名衆之
指目忝閣下門客俱無以報稱故厚自淬琢靡遺分

陰乃今道未施於人呀蓄者志見志之具匪文謂何
是用顛且懇且於其間思有所寓非驚馬好其章句沈
溺於浮華時態俗衆尚病其未能也故拙於用譽直繩朗
鑒樂所趨也故銳於求益今謹錄近所論撰凡十數
篇蘄端較是非敢閱于左右猶夫礦朴納于鑄範嘗
聞昔宋廣平之沈下僚也蘇公味道時為繡衣直指
使者廣平授以梅花賦蘇盛稱之自是方列于聞人
之目是知英賢卓犖可外文字然犹用片言借說于
先達之口席其勢而後驤首當時矧碌者疇能自

一本多其字

異今閣下之名之位過於蘇公之曩日而鄙生所賦
或鉅於梅花則沈泥干霄懸在指顧間其詞汰而喻
僭誠躋礼也緊游藩之久覲尚旧而霽嚴禹錫惶悚
再拜

為京兆李尹答于襄州第一書

閣下以大墓世在三原而去河南益遠尚繫於數百
年之外於義不安遂奮然移群從率先行古占數為
京兆人且命使者脩敬於鄙薄缺然不敢當此之重
洪惟閣下世雄朔易四姓之冠其宗勲有八柱之貴

其**碩**德有三老之重因都入雒錫之土田自生齒已
上列于候籍與夫其先嘗為編戶民者大殊謹按永
徽格貫在兩都者無害為本部官蓋神州赤縣尊有
所厭非它土之**此**寔待罪輦轂下閣下宣風江漢為
諸候師介圭入覲必參大政其展禮措事宜為群倫
所觀非據之榮赧然汗下不宣寔再拜

第二書

實白前辱閣下書厚自枉屈執州人之禮兼示移群
從書明所以去河南從京兆為望之旨于古**儀**為得

然而通行之自久或獻疑為是以前書不敢不逡巡
牢讓亦有以發閣下之雄辨使矚然為**世**程者今月
某日函使至果貽理言大明時人之所以失而我獨障
頽波而逢其原既一辭不獲命又學淺不堪徃復敢
不敬從前史稱以大將軍而有揖客豈不為重循汲
直之言則有以略其禮而增高者今鄙人之不讓適
有以增閣下之重耳寔曰
答饒州元使君書
傳使至蒙致書一函**辱**示政事與治兵之要明禮以

及用通經以知權視陰陽慘舒之節取震觀澤濡之象知天而不泥於神怪知人而不遺於委瑣先鄉社之治以決于牽郡首隊伍之法以及于成師猶言數者起一而至萬操律者本黃鍾以極八音誠通人之說章々必可行者也鄙生涉吏日淺嘗耳剝老成人之言熟矣今研覈覆至論淵乎有味非游言架空之後喜未嘗不至抃也故揚權所見以累下執事云蓋豐荒異政繫乎時也夷夏殊法牽乎俗也因時在乎善相因俗在乎便安不知發叙敘重輕之道雖歲有順成

覈一作覆

猶水旱也不知日月樂成之義雖俗方阜安猶蕩析也徙木之信必行則民不惑此政之先也置水之清必勵則人知敬此政之本也鈛笏之機或行則姦不敢欺此政之助也則有以其弛張雄雌唯變所適古之賢而治者稱謂各異非至當有二也顧遭時不同耳夫民足則懷安々則自重而畏法乏則思濫々則迫利而輕禁故文景之民厚其生為吏者率仁以恕顯武宣之民亟於役為吏者率以武健稱其寬猛迭用猶質文循環必稽其弊而矯之是宜審其救奪耳

太史公云身脩者官未嘗亂也然則脩身而不能及治者有矣未有不自已而能及民者今之號為有志於治者咸能知民困於杼軸罷于征徭則曰司牧之道莫先於簡廉奉法而已其或材拘於局促智限於罷懦不能斟酌盈虛使人不倦以不知事為簡以清一身為廉以守旧弊為奉法是心清於棖闌之內而柄移於胥吏之手歲登事簡偷可理也歲札理叢則潰然攜矣故曰身脩而不及理者有矣若執事之言政詣理切情斥去迂緩簡而通和而毅其脩整非止

乎一身必將及物也其程督非務乎一切必將經遠也坊民之理甚周而不至皎察字民之方甚裕而不使侵蟬詳知革故之有悔審料民之多撓厚發姦之賞峻欺下之誅調賦之權不關於猾吏逋亡之責不遷於豐室因有年之利以補敗汰不急之用以嗇財為邦之要深切著明若此其悉也推是言按是理而篤行之烏有不及治邪古稱言之必可行非樂垂空文耳有人民社稷固可踐其言也瀕江之郡饒為大履番君之故地漸甌越之遺俗餘干音翰有畝鍾之地武林

有千章之材其民牟利鬪力狃於輕悍故用暴虐聞
重以山茂擯苦金豐鏹銑齊民往投鎡鑿而即鑿
鑄損絲泉而工率擷乘時詭求其息倍称間聞主分
土者盡籠其利而幹之坐簿書舛錯為中執法所劾
事下三府以受賕論其刑甚握于今列郡不寒而慄
彼邦人聆其風聲固曰彼浚民者上罪之若此其念
民也至矣今二千石以前失職非其罪執事者即人
心而用之彼邦人是必翹然須其至而安矣以思治
之民遇習治之守歆不至於富庶得乎昌黎韓宣英

好實蹈中之士也前為司封郎以餘刃剗劇于計曹
號無通事能承其家法而紹明之庭堅仲容之族也
坐事為彼郡司馬更閏餘者再焉是必能知風俗之
良窳采察之善否盍嘗問焉足為群疑之寶龜也至
於否減文律戢玩之戒均權以制動函隸以稔勇平
居使不墮萃聚使不譁坐作疾徐心和氣振誠纖悉
於所示也故置之以須執事異日承進律之命握獸
符而駕寅車然後貢其瞽言重曉左右耳

健步劉子良至猥奉書教以愚為希儒之徒重言一
發華衮非貴世之服儒衣冠道古語居學官者為不
解矣求其知所以然者幾何人借曰有之未必不詬
病耳今夫挾弓注矢邈空而發者人自以為皆羿可
矣移之於澤宮則噤而不敢言何哉有的不可欺故
也今夫儒者函矢相攻蝸蟾相喧不啻於毅弓射空
矢者熟為其的哉異日兄道大行則言益重使儒者
之的懸於舌端不得讓也由是知辱教之喜可勝既
乎間承得一二易生列侍絳帳荒服之外持經鼎來

爭捐珠璣以易編簡不疾而速其君子之德風欬而
裔憬俗已丕變矣顧其風候非民和可移地泄怕燠
冬無嚴氣其在嗇神以佐藥兼味以禦稜所謂養賢
以及萬民頤之時義不可不順苟以有待及物為心
則養已與養民非二道也矧群情之顯乎禹錫再
拜

荅柳子厚書

禹錫白零陵守以函置足下書爰來屑末三幅小章
書僅千言申、慶、茂勉甚悉相思之苦懷膠結贅

聚至是泮然以銷所不如晤言者無幾書境獲新文
二篇且戲余曰將子為巨衡以揣其鈞石銖黍余吟
而繹之顧其詞甚約而味齋然以長氣為幹文為支
跨躒古今鼓行乘空附離不以鑿抽咀嚼不有文字
端而曼若而腴信然以生癰然以清余之衡誠懸于
心其揣也如是子之戲余果何如哉夫矢發乎羿彀
而中微存乎它人子無曰必我之師而能我衡苟然
則譽羿者皆羿也可乎索居三歲理言蕪而不治臨
書耗不具禹錫白

與柳子厚書

間蒞書得箏郭師墓志一篇以為其工獨得於天姿
使木聲絲聲均其所自出抑折愉繹學者無能如繁
休伯之言孽訪車子不能曲盡如此能令鄙夫冲然
南望如聞善音如見其師尋文寤事神騫心得倘佯
伊鬱久而不能平嗟夫郭師與不可傳者死矣弦張
柱差楚宜枵然貌存中有至音含糊弗聞噫人亡而
器存布方冊者是已余之伊鬱也豈獨為號師發邪
想足下因僕書重有槩耳不宣禹錫白

答道州薛侍郎論方書書

禹錫再拜初兄出中臺守江華人咸曰函牛之鼎以
之烹小鮮惜乎餘地澶漫而無庸也愚獨心有槩焉
以為君子受乾陽健行之氣不可以息苟吾位不足
以充吾道是宜寄餘術百藝以洩神用其無暇日與
得位同久欲以是理求有得於兄而未有路會崔生
來辱書教果惠以所著竒方十通商古今之宜而去
其并猥以一物足以了病者居多非累試輒效不在
是族或取諸屑近亦以擲拾慮怕人多怠忽不省必

建言顯白揚其功于已然其它立論率以弭病於將
然為先而攻治為後言君臣必以時言宣補必以性
言砭火必本其輸榮言被攘必因其風俗齊和之宜
炮剔之良暴炙有陰陽之候煎烹有少多之取撓獻
反勞以制駛露置以養潔味有所走薰有所歸存諸
熾悉易則生患非博極遐覽之士孰能知其所從來
哉愚少多病猶省為童兒時夙具襦袴保姆抱之以
如醫巫家鍼烙灌餌啞然啼號巫姬輒陽滿志引
手直求真竟未知何等方何等藥餌及壯見里中兒年

齒比者必晚然武健可愛羞已之不如遂從世醫號
富於術者借其書伏讀之得小品方於群方為最古
又得藥對知本草之所自出考素問識榮衛經絡百
骸九竅之相成學切脈以探表候而天機昏淺布指
於位不能分累菽之重輕第知息至而已然於藥石
不為惜矣爾來垂三十年其術足以自衛或行乎門
內疾輒良已家之嬰兒未嘗詣醫門求治者頃因欲
編次已試者為一家方書願力不足今兄能我先所
以辱貺之喜信踰拱璧有以賞音適道耳常思世人

居平不讀一方病則委千金於庸夫之手至于甚殆
而曰不幸豈真不幸邪甚者或乘少壯之氣笑人言
醫以為非急昌言曰飴口飽腹藥其如我何可承之
氣有時而既於禱神佞佛遂甘心焉兄以愚言覆觀
之其人固比肩耳前蒙示藥焙法謹如教地之慝果
不能傷雖音胡水瀉喜速朽者率久居而無害萬
物不可以無法謂生不由養致其誣乎山川匪遐事
使之遠形不接而論者莫賢乎書臨紙悵悵不宣禹
錫再拜

與刑部韓侍郎書

退之從丞相平戎還以功為第一官然猶議者嗛然如未遷陟此非特用文章學問有以當衆心也乃在恢廓器度以推賢盡材為孜孜故人心樂其道行必及物故耳前日赦書下郡國有棄過之目以大國材富而失職者多千鈞之機固省度而釋豈鼯鼠所宜承當然譬諸蟄蟲坯戶而俯者與夫槁死無以異矣春雷一振必歆然翹首與生為後况有吹律者召東風以薰之其化也益速雷且奮矣其知風之自乎

既得位當行之無忽禹錫再拜

荅道州薛郎中論書儀書

吾兄不知愚無似猥以書見攻其非且曰我與子中外屬當為伯仲其抵我書執礼太卑按旧儀凡兄弟之齒有唯無伏它以是為衰其於匹敵即前云願後云白而已大曆初李贇皇賈常侍犹守之無渝二公何人也我與子何人也烏有從末俗以姑息為礼而不虞識者所窺邪其音有云爾愚得書退而思惟愀然自賀曰在怕人為宜而在愚為過豈不能幸欤故盡

言於兄期有以相暢耳夫禮之文為著定宜尊宜卑
猶四方上下左右前後稱謂一立古先聖賢所不敢
移管敬仲不敢當命卿之饗虞人不敢承士之招先
禮而後身也汲黯不為大將軍而虧九鄉王祥不為
錄尚書而屈三公先道而後時也是則非據之榮雖
君命有所不受非道之利雖衆尚有所不為兄長於
大曆初嘗接前輩游故其風采去承平時不甚相遠
愚長於貞元中所與游皆後來諸生^然於稠人廣
坐時聞老成之人說灌注耳目斑々然不絕如綫其

後為御史四方諸侯悉以書來賀校其禮皆^駁不同
唯洪州牧李常侍巽潭州牧楊中丞憑始言執事其
它如儀而同在憲司者咸以二牧^{不為}遜愚時與其僚
柳宗元昌言於衆曰監察八品也當衣碧言執事為
宜不當經怪衆咸听然而昭復謂愚云子奚不碧其
服邪其不堪執事色^也深不可以言解及謫官十年居
僻陋不聞世論所以書相問訊皆昵親密友不容變
更而時態高下無從知耳前年祇召^抵京師偶故人
席夔談因及是事乃知與十年前大殊至有同姓屬

尊致書於屬卑而貴者其紙尾言起居新婦夔獨竊
笑之而已犹然不敢顯言詆之今有人謂東為西者
一言發則凡人嗤為騃且狂苟不衆非之則東西易
位久矣尊卑失其儀恬而不怪安得使人如東西不
敢易之哉曾子有云君子之愛人也以德細民之愛
人也以姑息謂古人悉朴且賢則斯言不當發於洙
泗間耳蓋三代之尚未嘗無弊由野以至僿豈一日
之為漸靡使之然也嫉其弊而救之以歸于中道以
俟乎薦紳先生德與位并者揭然建明之斯易也語

曰俟自直之箭則百代無一矢俟自圓之木則千歲
無一輪執矯揉之器者視之灌叢無非良材耳竊觀
今之人於文章無不慕古甚者或失於野於書疏之
獨陋古而汨於浮二者同出于詬而背馳非不能盡
如古也蓋為古文者得名聲為今書者無悔吝如水
走為閑

劉賓客文集卷第十

劉賓客文集卷第十一 表淮南杜相公佑脩凡十首

讓同平章事表一首 謝平章事表一首

謝手詔表 詔後敕新批 謝貸錢物表

請赴行營表一首 謝兵馬使朱鄭等官表 一首

賀復吳少誠官爵表一首 賀除虔王表一首

慰義陽公主薨表一首 慰王太慰薨表一首

讓同平章事表

臣某言高品吳千金至奉制加臣銀青光祿大夫同
中書門下平章事兼徐泗濠等州節度觀察處置等

使餘如故者初受恩榮若登霄漢退思塵忝如履春
冰臣誠惶誠恐頓首頓首臣聞以德詔官以勞定賞
苟或虛授人無勸心臣自守方隅累更時歲荷唐虞
宣力之寄乏齊魯報政之能愧無可稱以答高位豈
意聖慈弘獎天澤薦加以燹焚之崇名被庸虛之陋
質惧速官謗有玷大猷伏以宰相之職安危是注其
在當否繫于慘舒惟以材陞例無平進卒不失德則
副蒼生之心苟非其人或致外夷之哂臣雖愚昧嘗
覽前言豈敢冒榮遂安竊位輒思事理冀盡芻蕘若

以汴河要津漕運所切徐方倣擾師旅未寧謹當上
稟獻謀下貞戎律克期而進屈指可平勵衆之先是
臣之志既行其事必在正名所加節制安敢飾讓至
於銀青貴服金鉉重名勲績無聞豈宜濫及伏乞賜
寢前命俯亮愚衷微臣遂知止之宜聖朝無不稱之
服名器斯慎退讓有聞遐迩聆風孰不知勸其新授
官告謹重封進無任懇禱屏營之至

謝平章事表

臣某言伏蒙獎拔超踐鈞衡慮玷大猷昧死陳讓再

奉嚴旨不令固辭恩厚命輕位高責重中謝臣聞天
下安危注意將相處論道具瞻之地當總戎作鎮之
權雖協慶而求無聞秉鉞之寄登壇以拜不兼調鼎
之榮授受惟艱伊昔猶爾况臣庸瑣何以克堪陛下
玄造曲成大明私照俾掌戎律復參廟謨寵光之崇
在臣已極毫髮之效於國何施謹當罄竭微誠奉遵
至教伏天威以懾不類順敷聖澤以遂群生上分旰食
之憂下塞素餐之責力誠不足心寔念茲伏乞皇明
俯賜昭鑒臣恪居官次遐守藩維不獲伏謝彤庭陳

露丹慊心存闕下同犬馬之戀恩身在淮濱仰雲天
而結思無任懇悃屏營之至

謝手詔表 詔後批云朕自書

臣某言中使闡忠信至奉宣聖旨存問兼賜臣手詔
拜捧紫泥跪伸金簡承旨見聖神之略感恩知身命
之輕中謝臣素乏異能幸逢昌運猥當旌鉞之寄未
靖氛榮分台鼎之名何階啓沃竊位斯久速尤是
虞豈謂玄化曲成鴻私荐及特紆睿思親灑仙毫降
自九重餐然五色初喜麗天之象遠燭輝光旋驚垂

露之蹤曲覃霈澤鳶鳳騫翔而變態煙雲舒卷以呈
姿賦彩飛文聳神蕩目恭惟國宝何幸家藏感極涕
零莫知上荅應緣軍旅庶務謹具別狀奏聞無任欣
戴屏營之至

謝貸錢物表

臣某言中使南宮懷珍至奉宣聖旨存問兼賜臣墨
詔天光下濟敵澤曲流銜恩未酬居寵弥惧中謝臣
受任斯極微功莫施昨以封略未寧干戈猶動壽春
固壘以備盜淮甸興師以扞姦經費所資數盈鉅萬

餽餉時久供億力殫慮始圖終不敢緘默輒陳管見
上黷宸聰伏蒙聖慈特遂誠請遠承如綍之旨特假
聚人之財軍須不愆士氣弥振糗糧既備永無半菽
之虞襦袴足頒遠超挾纊之感是為說使咸願先登
臣忝總戎倍百欣荷伏以上分國用俯濟軍興候清
煙塵謹備償納

請赴行營表

臣某言臣自守淮濱已周星紀虔奉朝典粗安遐方
素效未聞新恩荐及身曳兩綬寄深一隅蚊蚋負山

力誠不足鷹鷂逐鳥志則有餘臣再授兵符夙參軍
幕被堅執銳雖未經於我戎行制勝伐謀亦嘗習于事
業自忝藩翰屬時清平無施汗馬之勞但詠橐弓之
什今則幸遇殊獎委之專征以身率先是臣素志况
聞徐州士衆本無叛心倉卒之間危疑至此臣請自
臨疆場親領紀綱裂帛繫書諭其禍福推牛饗士養
以威聲冀宣皇風煦茲蠢類以忠義感脇從之伍以
含弘安反側之徒革面悛心期乎不日其揚州留務
請令行軍司馬路應權知伏乞聖慈俯賜昭鑒

謝兵馬使朱鄭等官表

初除侍御史續
除中丞異姓王

臣某言奏事官常溫特蒙聖恩重賜朱鄭等官告宸
象昭回煥然下燭榮分右職光賁遐藩中謝臣伏以
朱鄭朴忠為心沈毅見色當建封禦侮之寄見張愔
提孩之年昨者隸職徐州分鎮蘄縣繹騷之際梗亮
弥彰歷險而來寔繁其旅詳探本末有足褒稱輒具
奏聞恐煩獎勸伏蒙殿鑒俯亮微誠優詔先行已階
直指之列殊私荐至超陞獨坐之崇戶領三千爵踰
五等恩生非次感異常倫棘門有光武旅增氣遂使

感激之士希勇爵以捐軀猖狂之徒聆聖澤而悛性
風行草偃其勢必然臣忝總戎麾倍百欣荷

賀復吳少誠官爵表

臣某言中使宋惟澄至奉宣聖旨存門兼賜臣墨詔
及昭示洗雪吳少誠等事天地弘覆燾之恩雷雨施
渙汗之澤瑕累咸滌危疑獲安中謝臣伏以少誠擅
興兵戈事生註誤自王師致討天威下臨曾無悖辭
亟聞引咎初懷疑懼雖擁衆以偷生旋感聖神屢拜
章而請命陛下仁深解網慮軫納隍念餽餉飛輓之

勤閔戰爭暴露之苦舉茲宥過之典副彼效順之誠
一方承再造之思九有覩惟新之化敷鴻霈而覃及
蠢類鼓仁風而臻于太和罷拆銷鋒自茲而始臣謬
膺重寄虔守遐藩不獲稱慶瑤堦瑞陳露丹懇仰瞻宸
極倍百常情無任慶抃屏營之至

賀徐虔王等表

臣某言中使李國真至奉宣聖旨存問兼賜臣墨詔
鴻澤浹下大明燭幽曉諭便藩慰安稠疊中謝臣伏
觀天書恭承睿旨弘愛人屈已之道酌因時適變之

宜擇賢王作鎮徐方俾張愔便主留^晉務上則成邦家
盤石之固下則副士衆拜章之請戚藩之寄斯重舊
勲之祀獲全丕變猖狂之徒咸躋仁壽之域既弘在
宥坐見止戈率土人臣孰不欣說臣素乏方略謬荷
寵光猥塵將相之名無施分寸之績遭逢若此報效
茂聞官謗已興渥刑宜及陛下恩深覆載道務含弘
恤公私餽餉之勤念吏士鋒鏑之苦特紆神笑昭發
德音危疑獲安制置惟固好生宥過誠陛下開網之
仁尸位無功重微臣素餐之責周章跼蹐胡顏自安

一本空一格

但以遐守藩條恪居官次不獲仰謝雲陛陳露血誠
未遂周任知止之言敢逃臧文竊位之咎無任戰越
之至

慰義陽公主薨表

臣某言伏承義陽公主薨伏惟聖懷傷悼增切伏以
公主妍姿令則冠絕天人稟教皇宮已挺柔嘉之德
降嬪卿族益彰貞粹之儀方期作範壺闈長榮邸第
豈意遘茲短曆奄謝昌辰伏慮陛下軫念未捐深慈
莫遣有虧常膳罷設宮懸臣子之情不任惕恋况聖

凡禮異邦家制殊伏願道齊彭殤理達脩短割肌膚
之愛慰寰海之心率土人臣孰不相慰無任懇悃屏
營之至

慰王太尉薨表

臣某言伏承成德軍節度使太尉兼中書令王武俊
今月某日薨沒伏以武俊生逢昌時天授忠節奮揚
義勇茂建勲庸秩冠朝端參燮和于台鉉姻連戚里
承嘉慶於雲霄榮掩華夷事高今昔方膺作翰之寄
遽迫歸泉之期鼎臣云亡梁木斯壞伏惟陛下君臣

義重存沒感深臨冊槩以興懷聽鼓鼙而軫念臣恪
居官守奉慰無階悲慟之誠有加常品謹遣某官某
乙奉表陳慰以聞

劉賓客文集卷第十一

劉賓客文集卷第十二

表章二為淮南杜相公佑脩凡十一首

謝冬衣表一首

謝濠泗兩州割屬淮南表一首

謝曆日面脂口脂表一首

謝墨詔表一首

論廢楚州營田表一首

請朝覲表一首

謝春衣表一首

謝賜門戟表一首

謝男師損等官表一首

謝端午日賜物表一首

謝墨詔表一首

謝冬衣表

臣某言中使王國清至伏奉聖旨慰勞臣及將佐官吏僧道耆壽百姓等并賜臣墨詔及冬衣兩副大將衣四副者大明昭回遠燭下土殊錫稠疊延及偏裨慶抃失圖捧戴相賀云云臣謬承委寄獲守藩條瑄瑄屢移塵露無補陛下至仁天覆玄化風薰頒以兼衣賁茲瑣質降自天府光于轅門緘滕既開觀綵章之盛飾蹈舞而服發溫煥于祁寒愧塵補袞之名更荷解衣之賜恩波下浹將校同霑共戴殊榮咸思竭節生成是荷兩露難酬無任懇悃慙荷之至

謝濠泗兩州割屬淮南表

臣某言伏奉十一月二十九日詔書其濠泗兩州令臣依前收管臣謬承寵光作鎮淮海位均九伯權總十連內省無堪常恐不逮豈謂恩私曲被封略有加慙無報政之勤重受分憂之寄伏以兵戈方息閭里未安謹當奉宣皇風慰彼黔首且責成於牧宰期不失于澄清伏惟聖明俯賜昭鑒無任感戴屏營之至

謝曆日面脂口脂表

臣某言中使霍子璘至奉宣聖旨存問臣及將佐官

吏僧道耆壽百姓等兼賜臣墨詔及貞元十七年新曆一軸臘日面脂口脂紅雪紫雪并金花銀合二合稜合二皇明遠燭^思殊錫荐臻抃舞失容捧戴無措伏惟皇帝陛下立極御人順時布政禮崇大蜡澤浹遐藩臣叨榮日深竊位時久謬回宸眷猥降玉人天書下臨觀三光之照耀玉曆爰授知四氣之環周雕奩既開珍藥斯見膏凝雪瑩含液騰芳頓光蒲柳之容永去癘疢之患命輕恩重上谷何階無任感抃屏營之至

謝墨詔表

臣某言中使陳日華至奉宣聖旨存問兼賜臣墨詔又以臣所奏羅珣及裴靖政理有方今各賜手詔激賞者恩降重霄澤流下土義存獎勸榮冠等夷臣昨以羅珣裴靖勵精吏理効用著明人咸說安俗致殷阜恐湏甄錄以勸在官輒獻封章具陳成績伏蒙睿鑒俯亮愚衷載嘉理行之尤光示絲綸之旨^深守道者益以固志懷慝者由是悛心激俗化人于茲為大臣謬司廉問職在澄清幸遇旌善之時獲免蔽賢之責

無任欣感之至

論廢楚州營田表

臣某言中使曹進玉至奉宣聖旨存問兼賜臣墨詔以楚州營田廢置事令臣商量奏來者跪奉天書恭承勅旨道存致用義在隨時云云伏以本置營田是求足食今則徒有糜費解逢順成刈獲所收無裨於國用種糧每闕常假于供司較其利害宜廢已久比來循守旧制不敢輕有上陳皇明鑒微特革斯弊取其田蓄授彼黎蒸仍俾薄租誠為至當但以田數雖

廣地力各殊須量沃瘠用立程度臣已追里正臣與商量利便謹具別狀奏聞伏惟聖慮俯賜詳擇無任震越屏營之至

請朝覲表

臣某言臣聞臣之事君有犯無隱懇誠所至敢不罄陳伏惟聖明俯賜矜察云云臣代受國恩天承門蔭脫巾筮仕敢期榮名陳力效官靡樹聲績始因孤直驟歷清班復加朝獎作藩外府遠違輦下十有四年恪守淮濱逮今一紀犬馬懷恋寢興匪遑蒲柳易衰

遲莫俄及竊位時久妨賢愧深况歷官已來四十八
考祇奉朝謁時纔二周服勤郡符荏苒垂老屏營魏
闕之思夢想承明之游如迫餒寒不忘衣食伏惟獻
鑒俯亮愚衷蚤賜擇人與臣交代授受之際冀無可
虞然後脂車奔赴京輦微願斯畢雖死猶生臣頃以
戎務方殷猥加宰輔今既事罷寔慙此名為有藩鎮
同時未敢輕上印綬伏以聖朝赫々左右唯賢漢愧
得人周慙多士臣才略既短齒髮又衰柄用之地甘
心自絕所冀退歸旧里沐浴皇風絕鍾鳴漏盡之訕
展維桑與梓之敬匪惟名噐不假寔貴骸骨可全知
止之心神祇所鑒無任懇悃怔營之至

謝春衣表

臣某言中使陳日華至伏奉聖旨慰勞臣及將佐官
吏僧道耆壽百姓等并賜臣墨詔及春衣兩副大將
衣四副王人捧詔御府降衣寵光不隔于遐藩慶賜
猥霑于裨將臣素乏噐能謬膺驅使每慙效薄常惧
食浮陛下覃以至仁均其厚施宰元和而布澤順時
律以頒衣出自禁中賁于臣下執領禮而抃舞失次

被纒柔而頽眇增輝舉動骸容既安且吉在身不称
恐招鵜翼之訊居位無功叨受鶴紋之賜下延將校
同荷生成

謝賜門戟表

臣某言臣得進奏官裴邁狀報今月九日軍器使梁樂
延壽奉宣進止付所司准省牒賜臣門戟十二竿者
恩降雲天榮加門戶承旨慶抃省躬慙惶伏以礼著等
威朝有命數是昭懋賞必在疇庸臣謬荷寵光素無
績效旌旄之寄已忝外藩榮戟爰列更光私第賁于

振闡慶及子孫觀茲盛儀寔愧虛受無任欣戴屏營
之至

謝男師損等官表

伏見今月一日制授臣長男師損秘書省著作郎次
男式方太常寺主簿又得進奏官裴邁狀報伏承聖
恩特降中使送官告到臣宅分付師損者寵渥非常
授任不次驚躍無措覩惧失容云云臣謬分重寄獲
守外藩受恩既深無績可紀男師損等器惟凡品教
關義方蚤沐敷慈已階官次每懷塵忝常誠滿盈豈

謂鴻霈曲覃大明私照寬臣尸素之責念臣葵霍之
誠下延胤息叨踐班級天書出禁中貴臨門榮冠等
夷慶流宗族况著作乃論撰之地唯才^款是居太常
寔禮樂之司非儒者勿履願茲庸昧忽此超昇內省
慙惶若墜冰谷伏以聖朝立制建官惟賢名寔無垂
輪轅盡適微臣父子獨為幸人非據踰涯自中徂外
虛受丘山之賜寔增負乘之憂進退彷徨不知所據
無任戰汗屏營之至

謝端午日賜物表

臣某言中使劉光弼至奉宣聖旨慰勞臣及將佐官
吏僧道耆壽百姓等兼賜臣墨詔并衣一副金花銀
器三事綵絲一軸大將衣四副綵絲五軸寵光薦至
慶賜曲霑抃舞失容捧戴無力伏以朱明仲月端午
佳辰萬國被薰風之和九天垂湛露之澤臣幸逢休
運獲守外藩叨承馭慈猥受榮賚敷詔而煥窺宸象
振衣而頓失炎威色綵表祥載光於佩服珍器充玩
盡飾於圓方恩輝既盈喜惧交集下延禪將共荷鴻
私無任感戴之至

謝墨詔表

臣某言中使陳日華至奉宣聖旨慰勞臣及將佐官吏僧道耆壽百姓等兼賜臣墨詔恩降紫泥澤流下土跪奉自天之命遙馳捧日之心云云伏以皇帝陛下凝旒穆清軫念黎獻已洽雍熙之化尚存宵旰之勤遠降王人特迂宸翰慰安稠疊曉諭便蕃任重力微不知上荅應緣戎旅庶務謹具別狀奏聞伏乞皇明俯賜昭鑒無任感戴屏營之至

劉賓客文集卷第十二

劉賓客文集卷第十三表章三

為杜司徒讓度支等使表

為杜司徒謝追贈表

為杜司徒讓立去思碑表

為李尹賀獻懿二祖表

為京兆常尹賀兩止表

為常尹賀祈晴獲應表

為常尹謝許折糴表

為常尹賀元日祥雪表

為韋尹賀春雪表

為京兆李尹賀雨表

為李中丞謝紫雲等表

為李中丞謝鍾馗等表

為杜相公謝鍾馗等表

為武中丞謝新茶表

為武中丞謝春衣表

為武中丞再謝新茶表

為武中丞謝新橘表

為武中丞謝柑子表

為武中丞謝冬衣表

杜司徒讓度支鹽鐵等使表

臣某言伏奉制書授臣檢校司徒同中書門下平章
事充度支及諸道鹽鐵轉運等使者臣久塵高位尸
素已多更受新恩滿盈為惧云云伏惟皇帝陛下紹
登宝位光纂鴻猷擢用之間華夷聳聽况利權所在
宜適變通國計是資須明輕重當至化鼎新之日是
微臣遲莫之年將何以上副宸衷下成庶務進退惟

谷水炭在懷輒罄愚誠冀回天監陳力無補庶遵周
任之言循涯若驚敢飾范宣之讓慙惶跼踖倍萬常
情謹奉表陳讓以聞

杜司徒謝追贈表

臣某言伏奉制書褒贈臣亡父先臣某官尚書左僕
射者時逢霈澤禮極徽章云云臣家受國恩至臣累
葉常懼不克負荷以忝前人豈意多幸遭逢猥居高
位陛下應乾御極作解庇人恩浹寰區禮成宗廟垂
仁布德自葉流根紫書忽降于重霄密印榮加于厚

夜星霜增感蒸嘗有輝非臣殞越所能上報無任感
咽屏營之至

杜司徒讓淮南立去思碑表

臣某言伏見淮南節度使王鏐所奏當道將吏僧道
耆壽等請為臣立去思碑伏奉聖旨允其所奏臣內
惟菲薄聲績無聞祇荷恩私慙懼交至云云臣伏蒙
先朝過獎累典方隅頃鎮江都十有四載數周星紀
水旱備經境接淮瀆兵戈時起至于邑里粗免流離
非臣所能悉稟聖化在唐堯可封之日奚假吏師當

一本作請刊樂
史一本作典

漢宣責寔之時皆承詔旨王齔與臣交代輒有上聞
况以去思為名慙無可紀之績伏以建碑有制甲令
垂文苟非至公翻益貽誚臣伏覽故事宋璟自廣州
都督入為尚書南海之人請為刊石璟自遜讓至于
再三雖勒其文竟從降制著在國史典垂為美談璟非
苟榮人益見德臣才誠不逮心寔慕之伏乞聖慈賜
寢前命臣情非飾讓義在徇公云

京兆李尹賀遷獻懿二祖表寔

臣某言伏見詔書以今月某日奉遷獻祖懿祖神主

祔于德明興聖皇帝庙盛礼云畢宗祧永安云伏
以太祖景皇帝膺期撫運啓封于唐為百代不遷之
宗開三靈眷命之兆頃以本朝初建清廟備儀二祖
冠西室之先景皇闕東向之位諸儒獻議歷載未行
陛下濬發獻謨旁延正論爰詔多士會於中臺酌三
礼之前文參百王之故事講貫斯定詢謀僉同撰日
展儀考祥視履配貴神於遠祖正尊位于始封庙貌
有嚴禘嘗允穆示人以孝得礼之中既觀秩々之容
必降穰々之福臣職居内史屬忝本枝躬導盛儀獲

申誠敬無任感說屏營之至

京兆常尹賀雨止表

夏卿

臣某言今月某日中使吳文政奉宣聖旨緣今年雨多恐傷苗稼諸有靈跡處並宜祈禱者臣檢謹尋祀典方議徧祠惟德動天倏已澄霽伏以至教惠農兆人務本今歲宿麥茂于常年爰自季春遂逢多雨蓋陰陽常數有以推遷而隴畝之間未聞傷敗陛下勞謙思切覆育恩深或慮成災先期軫念昭薦未陳于方社獻誠已格于上玄文明煥開陰曠潛掃有年之

慶寔兆於茲辰先天不違**覆**超於前代臣謬司京邑虔撫蒸黎欣抃之誠倍百群品無任踴躍屏營之至

京兆常尹賀祈晴獲應表

臣某言今月十七日中使某奉宣聖旨以霖雨未晴諸有靈跡處並令祈禱者臣當時于興聖寺竹林神親自祈祝兼差官城外分路徧祠伏以神祇效靈景物澄霽兆庶覩動天之德大田俟多稼之期臣謬荷恩輝忝司京邑抃說之至寔倍常情

京兆常尹謝許折糴表

臣某言伏奉詔旨以臣所請畿內折糴宜令度支計
會定數奏來者天慈廣被人瘼是求臣自理京邑不
先威刑唯務便安所期富庶每因賜對常奉德音府
縣之間巨細令奏伏以聖明在上風雨應時順成之
年穀糴常賤若無輕重之法必利兼并之家輒敢上
聞請行折糴天光下燭人隱無遺幽宣付所司久臣所
奏事閱理本惠及生靈臣忝尹京倍百欣荷無任歡
躍屏營之至

京兆常尹賀元日祥雪表

臣某言伏以去冬已來久無雨雪臣每于內殿親奉
德音以宿麥未滋為虞以兆人生疾為念聖情所屬
神理潛通獻歲發春佳雪肇降當夷夏會同之日觀
天人合應之徵迎喜氣於三元決歡心于萬國癘疢
永息豐阜可期臣以疾疹未平步趨有阻伏蒙恩貸
已具奏聞謹於光宅寺中管當本務不獲隨例稱慶
明庭既覩嘉祥益彰聖德無任欣躍屏營之至

京兆常尹賀春雪表

臣某言伏奉詔旨充某郡王禮命賜使謝恩之日親承

德音以春初已來兩雪猶少慮妨農事有軫睿慈今
當下嫁之辰克致上玄之感雲生河漢及佳期而降
祥雪滿寰區應豐年而呈瑞臣官當撫字職在肅雍
慶抃之誠寔倍常品

京兆李尹賀兩表

臣某言伏奉進旨以時雨愆候有妨耕農應諸有靈
跡處並令祈請者德音才發膏雨驟飛滂霈已周動
植咸說云伏以久愆時澤上軫聖慈爰命禱祈俾
申誠敬神應如響天且不違未異雲漢之詩已致桑

林之雨臣謬司京邑虔撫黎蒸親豐年之可期同比
屋而稱慶無任欣抃之至

李中丞謝賜紫雪面脂等表

汶

臣某言中使某乙至奉宣聖旨賜臣紫雪紅雪面脂
口脂各一合澡豆乙袋特降王人俯臨私第銜恩慶
抃省已慙惶云臣謬荷寵私素無績效空變星霜
之候猥霑慶賜之恩跪捧雕奩榮觀珍藥功能去疾
永絕中癘疵澤可飾容頓光於蒲柳生成是荷雨露
難酬無任感戴

李中丞謝鍾馗曆日表

臣某言中使某乙至奉宣聖旨賜臣畫鍾馗一新曆日一軸恩降雲霄光生里巷雖當歲莫如照陽和云伏以將慶新年聿循故事績其神象表去癘之方頌以曆書敬授時之始微臣何幸天意不遺無任感戴屏營之至

杜相公謝鍾馗曆日表

臣某言高品某乙至奉宣聖旨賜臣鍾馗一新曆日一軸星紀方回雖逢歲盡恩輝忽降已覺春來云云

伏以圖寫威神驅徐群癘頌行律曆敬授四時施張有嚴既增門戶之貴動用協吉常為掌握之珍瞻仰披尋皆知聖澤無任欣戴之至貞元二十一年十二月日武中丞謝新茶表元衡天香散靈云云臣某言中使竇國安奉宣聖旨賜臣新茶一斤猥降王人光臨私室恭承慶賜跪啓緘封云云伏以方隅入貢採擷至珍自遠爰來以新為貴捧而觀妙飲以滌煩顧蘭露而慙芳豈枯漿而齊味既榮凡口倍切

丹心無任歡躍感恩之至貞元二十年三月日
臣某言中使某乙奉宣聖旨賜臣春衣一副王人臨
第御府降衣抃舞失容捧戴無措云云伏以律當春
莫慶洽時邕萬物被薰風之和九天垂湛靈之澤臣
受任非次速尤是虞方懷匪服之憂更荷解衣之賜
恩加畫飾拖朱紫而為榮受非以庸顧形影而增愧
丹誠徒罄玄造難酬無任踴躍屏營之至
武中丞再謝新茶表

臣某言中使某乙奉宣聖旨賜臣新茶一斤猥沐深
恩再霑殊錫承旨慶抃省躬慙惶伏以貢自外方珍
殊衆品效參藥石芳越椒蘭出自僊厨俯頒私室義
同推食空荷於曲成責在素餐實慙於虛受
武中丞謝新橘表
臣某言中使某乙奉宣聖旨賜臣新橘若干顆特
降恩光猥頒慶賜珍踰百果榮比兼金伏以丹實初
成苞貢爰至芬馨味重方列于御筵雨露恩深忽霑
於賤品感同推食事等絕甘豈唯適口為珍實冀捐

軀上卷

武中丞謝柑子表

臣某言中使某乙至奉宣聖旨賜臣柑子若干顆特
降殊私再頒名果自遠稱貴以新為榮伏以方貢外
來人間未覩黃苞輝穎彫姐增華芬芳初佐於大庖
慶賜遂沾于凡口甘踰并實剖食既同于楚謠寒比
蔗漿折醒何慙于漢史感恩思效倍百常情
臣某言中使某乙至奉宣聖旨賜臣冬衣一副恩降

重霄榮加陋質承旨慶抃省躬慙惶臣受任已來微
效莫著每更時律慙曠官常豈謂玄造曲成鴻私荐
及念茲戒寒之候錫以禦冬**衣**抃舞失容顧盼增飾
鶴紋是錫遠慙晋代之賢鵜翼不濡實惧曹風之刺
無任感戴屏營之至

劉賓客文集卷第十三

劉賓客文集卷第十四 表章四 牋附

為竇中丞謝上表 謝中使送上表

賀收蔡州表 賀赦表

賀赦牋 賀雪鎮州表

賀平淄青表 夔州謝上表

賀冊皇太子表 慰國哀表

賀龍飛表 賀皇太子表

賀赦表 賀冊太皇太后表

賀冊皇太后表 和州謝上表

賀改元赦表

護州論利害表二首

賀正為容州竇中丞謝上表

羣時在朗州相逢因以見託

臣某言伏奉某月日制書授臣容州刺史兼御史中丞充本管經畧招討等使臣發開州日已差某官某乙奉表陳謝伏以道途遐阻水陸縈紆臣以今月某日到本任上訖謹宣聖旨慰諭遠人臣本書生素無吏術頃因多幸賁自丘園累沐聖慈驂居清賈識昧通變動乖事宜愧無善狀以塞公責伏惟獻聖文武皇帝陛下凝旒穆清洞照衆海推共理之義分寄股

一本作展

肱念蒸人之勤溥霑遐邇察臣前任事寔恕臣本性朴愚賜以恩輝拔于廢棄遠辭偏郡重委方隅捧印綬以為榮望闕庭而增恋雖到官之始惠未及人而率下之誠務先克己凡施政教皆稟詔條參以土宜遂其物性可行必守有弊必除使蠻夷生梗之風慕臣子盡忠之道力誠不足心寔在茲伏乞聖明俯賜昭鑒無任感戴屏營之至元和八年云云

謝中使送上表

臣某言中使吐突仕曉至奉宣聖旨慰諭并送臣至

本任者深山遠郡忽降玉人跪受恩榮仰瞻宸極伏
以發自巴峽至于南荒涉水陸湍險之途當炎夏鬱
蒸之候山川縈轉晨夜奔馳幸無它疾得至本管九
重結戀遙傾捧日之心萬里獲安皆荷自天之祐無
任感戴屏營之至

賀收蔡州表

臣某言伏見詔書以唐州節度使李愬生擒逆賊吳
元濟獻俘文武百寮于興安門列班賀稱者天威遠
被元惡就誅一方既平萬國咸慶伏惟獻聖文武皇

帝陛下德超遂古道合上玄臨御已來天人協贊削
平吳蜀掃蕩塞垣車書大同夷狄來貢蕞爾元濟敢
懷野心輒聚犬羊苟偷時月陛下聖謨獨運獻感潛
通天助神兵人生勇氣既擒兇逆遂正刑書伏三紀
之逋誅成九衢之壯觀宗社昭告華夷式瞻行弔伐
而在禮無違烜威聲而何城不克楚氛改色淮水安
流漢上疲人盡霑雨露汝南遺老重覩昇平凡在具
臣孰不欣抃臣久辭朝列恭守遐藩不獲稱慶闕庭
陳露丹慊悃仰瞻宸極倍萬群情無任踴躍慶快之至

元和十二年十二月二十三日

賀赦表 **連州**

一本多連州二字

一本作被

臣某言伏奉今月一日制書大赦天下者聖德廣運
浹于華夷天光下臨照**被**幽蟄伏惟獻聖文武皇帝
陛下神扶宝祚天贊鴻猷意有所之事無不克當准
右凱旋之後是域中慶幸之時順陽和以發生施霈
澤于寰海網開三面危疑者許以自新耳達四聰瑕
累者期于**再**錄用求碩畫於庶位慮遺材于放臣旌忠
烈之家賞勲庸之胤仁及枯骨無隔于寇戎榮加顯

一本作再錄為是

親普霑於存沒恤刑已責實廩蠲徭頒錫彰有容之
詩崇儒協宗子之望岳瀆咸秩耆艾飲和大僚承任
子之恩武旅荷賜金之寵斯皆禹湯文武之遺美高
祖太宗之耿光集于聖朝然後大備德音所至和氣
隨之歡謔上徹於九天福祚永延于億載能使遠夷
屈膝鄰豈惟小醜革心率土人臣不勝大慶臣久辭關
下恪守海隅犬馬之誠倍百常品無任抃躍屏營之
至

賀赦牋

使持節連州諸軍事守連州刺史劉某惶恐叩頭伏
見今月一日制書大赦天下者伏以獻歲布和皇恩
遠降乾坤交泰寰海廓清伏惟皇太子殿下道冠元
良德兼忠孝承顏拜慶榮耀古今某職守有限不獲
隨例稱賀宮庭無任欣說之至元和十三年正月二
十九日

賀雪鎮州表

臣某言伏見四月二十七日德音以王承宗效順著
明復其官爵所獻二郡別置藩垣聖德動天鴻恩及
物瑕累咸滌蒸黎永安伏惟獻聖文武皇帝陛下自
承宝座克振皇綱既以四海為家每念一夫不獲昨
因大慶爰降殊私廣宥過之科開自新之路綸言一
發神聖潛通遂令迷^註誤之徒頓釋^失憂危之慮命胤子
以入侍獻名都以效誠臣心既明天網為解因^析四
郡別為一方惟懷永圖盡去前弊大河以北化為禮
樂之鄉率土之濱重見昇平之日臣恪居官次遐守
嶺隅不獲稱慶闕庭無任踴躍屏營之至

賀平淄青表

臣某言伏見制旨魏博節度使所奏逆賊李師道并
勇二人並梟斬訖以二月十六日御宣政殿受賀者
聖德玄運兵威神速旬月之內鯨鯢就誅秦嶽既寧
登封有日伏惟獻聖文武皇帝陛下有征必克舉意
無違天地協神笑之期雷霆助成師之氣蠢爾孽孽
敢生野心蕭斧一臨妖氛自滅皆由聖慈廣被叡畧
潛通獻俘者盡許生還得地者復令安堵感我仁化激
其深秉凡是脅從盡思效節五紀巢穴一朝蕩夷遂
使齊魯之鄉復歸仁壽之域投書既至傳首繼來備

一本作協

文物於明庭告殊勲於清廟百辟陳賀萬方會同從
此止戈所以為武西周士庶方觀飲至之容東嶽煙雲
已望告成之禮臣恪居遠服嘗忝班行慶快之誠倍
萬群品無任踴躍屏營之至元和十四年三月二十

四日

夔州謝上表

臣某言伏奉某月日制書授臣使持節都督夔州諸
軍事守夔州刺史跪受天詔神魂震驚伏惟文武孝
德皇帝陛下垂衣穆清敵鑑旁達三統交泰百神降

祥浹于華夷盡致仁壽臣家本儒素業在藝文貞元
年中三忝科第德宗皇帝記其姓名知無黨援擢為
御史在臺三載例遷省官權臣奏用分判錢穀竟坐
連累貶在遐藩先朝追還方念淹滯又遭讒嫉出牧
遠州家禍所鍾沈伏草土禮經有制羸疾僅存甘於
畎畝以藥^藥皇化伏遇陛下大明御宇照燭無私念以
殘生舉其彝典獲居善部伏感天恩慈臣即以今月
二日到任上訖^水千里巴山萬重空懷向日之心
未有朝天之路無任感恩戀闕之至長慶二年正月

五日

賀冊皇太子表

臣某言伏見制書以十二月二十日冊皇太子盛禮
斯畢德音遐宣萬國以貞庶類咸說伏惟文武孝德
皇帝陛下體元立極垂訓御時既闡王猷思安國本
前星位定拱宸極以昭彰蒼震氣宣與天地而長久
禮光七鬯澤被華夷宗祏有無疆之休生靈懷莫大
之慶臣恪居官次遐守巴南不獲稱賀闕庭無任踴
躍屏營之至長慶三年正月日

慰國哀表

臣某言上天降禍大行皇帝奄棄萬國奉諱號擗糜
潰五情伏惟皇帝陛下孝思至性攀號罔極臣恭守
所部不獲陪位西宮伏增感慕之至謹奉表陳慰以

一本作兩悲誤

聞長慶四年二月日

賀龍飛表

臣某言伏見詔書正月二十六日皇帝陛下嗣登宝
位萬國同歡日月繼明乾坤交泰伏惟皇帝陛下欽
承顧命惟懷永圖以大孝奉宗祧以至仁蕪品物洞

照寰海統和神人聖祚延長從今無極群生鼓舞自
此大寧臣守遐藩恪居官次不獲奔馳拜舞稱賀闕
庭無任抃躍屏營之至長慶四年二月日

賀皇太子牋

使持節都督夔州刺史劉某叩頭伏惟皇太子殿下
祇膺詔用光啓儲闈展至性于二朝承本技於百代

一本作三

宗祐永固神人以和四嶽仰維嵩之高百川承少海
之潤某限以職守不獲隨例稱慶宮庭無任抃躍之
至

賀赦表

臣某言伏見今月三日制書大赦天下者大明初昇萬物咸覩渙汗一發神人以和伏惟皇帝陛下天資敵聖神啓昌期端拱受萬國之朝承顏奉兩宮之慶初嗣大位克揚孝心三光協明和氣來應臣伏讀赦令首于奉園陵盡誠敬親九族蘇兆人次及定章程止進獻已通責滌夙瑕內照于九重則歸嬪嬙放鷹犬外明于四目則求隱士開直声柔遠以仁則還其係虜賞延以禮則澤及後昆菲食遵夏禹之規弋綈

法漢文之儉墜典成舉旧章再明昇平之期正在今日發號之始疾于春風殊私所及霈若時雨臣幸逢昌運歷事五朝出守遐藩僅垂二紀欣承霽雨作解之澤不勝犬馬恋主之誠瞻望帝鄉無任屏營懇悃之至長慶四年三月二十七日

賀冊太皇太后表

臣某言伏見制書以二月十八日冊立太皇太后徽章克備慶賜遠行榮冠古今澤周寰海伏惟皇帝陛下續承列聖歡奉兩宮太皇太后含飴保和重光疊

慶漢儀盛於長信周祚興於太任方之聖朝彼有慙
德臣遠守巴峽不獲稱賀闕庭無任抃躍屏營之至
長慶四年三月日

賀冊皇太后表

臣某言伏見制書以二月二十五日冊立皇太后盛
禮畢陳德音遠被一人有慶萬國同歡伏惟皇太后
稟靈作合誕聖表祥徽號極域中之尊慈仁為天下
之母陛下君臨有國子道無違長樂宮中永獻南山
之壽濯龍門上再揚東漢之風率土臣子不勝歡抃

臣遠守荒服不獲稱慶闕庭無任踴躍屏營之至

和州謝上表

臣某言伏奉制書授臣使持節和州諸軍事守和州
刺史臣自理巴賓不聞善最恩私忽降慶抃失容伏
惟皇帝陛下丕承寶祚光闡鴻猷有漢武天人之姿
稟周成敵哲之德發言合古舉意通神委用得人動
植咸說理平之速從古無倫微臣何幸獲覩昌運臣
業在詞蚤李歲策名德宗尚文擢為御史出入中外
歷事五朝累承恩光三換符竹在分憂之寄祿秩非

輕而素蓄所長效用無日臣聞一物失所前王軫懷
今逢聖朝豈患無位臣即以今月二十六日到所任
上訖伏以地在江淮俗參吳楚災旱之後緩撫誠難
謹當奉宣皇恩慰彼黎庶久於其道冀使知方伏乞聖
慈俯賜昭鑒臣遠守藩服不獲拜舞闕庭無任懇悃
屏營之至謹差當州軍事衙官章興奉表陳謝以聞
長慶四年十月二十六日

一本作典

賀改元赦表

臣某言伏見今月七日制書大赦天下者帝遊出震

聖澤如春神人以和天地交泰伏惟皇帝陛下丕承
鴻業光闡獻圖吉日展嚴配之儀告天陳太平之盛九
廟成禮百神降祥盥輅旋衡風雲改色殊私廣被再
弘莫大之恩寶曆惟新更啓無疆之祚兩宮承慶四
海永寧率土臣于上千萬壽臣恪居官次不獲稱賀
闕庭無任屏營之至謹差當州軍事衙官試慈州吉
昌府別將徐倫奉表陳賀以聞寶曆元年二月十六

日

夔州論利害表

臣某言伏準元和十二年四月十八日敕諸州刺史如有利害可言者不限時節任自上表聞奏者臣伏見貞觀中詔許群臣各上書言利便馬周時一布衣遂因中郎將常何獻策二十餘事太宗深奇之盡行其言擢周為御史至龍朔中壁州刺史鄧弘慶進平索看精四字堪為酒令高宗嘉之亦行其言遷弘慶為郎州刺史則知苟有所見雖布衣之賤遠守之微亦可施用况臣蚤受國恩德宗廟忝為御史逮今歷事四朝頗領藩條當陛下至明之時是微臣竭節之

日伏以守在遐郡不敢廣有所陳謹準敕上利害及當州公務各具別狀以聞伏乞聖慈俯賜昭鑒無任感激屏營之至謹差當州軍事衙官守易州安義府別將員外置同正員雲騎尉馮隨謹奉表以聞長慶三年十一月七日

論利害表

臣某言伏準今年正月五日德音宜令諸道觀察使刺史各具當處利害附驛以聞者伏惟皇帝陛下勲哲自天續成列聖善述先志發揚德音率土人臣不

一本作覽

勝慶幸臣虔奉詔旨宣示蒸黎伏以華夏不同土宜
各異詳求利病謹具奏聞伏乞聖慈俯賜昭鑒臣伏
鑒國史竊見開元十八年朝集使至京玄宗臨軒親
問利害時宣州刺史裴耀卿上便宜事論轉輸甚詳
竟不行下至二十一年耀卿為京兆尹再以前事奏
論方見允納比及三年漕運七百萬石省脚三十餘
萬貫當耀卿前見不納必有人非之及後數年方展
其效臣僻守遠郡敢望言行祇奉詔書或冀萬一伏
惟明主擇之無任懇悃屏營之至長慶四年五月十

四日

劉賓客文集卷第十五 表章五 牋附

為裴相公賀冊魯王表

為裴相公讓官第一表并批荅

第二表并批荅 第三表并批荅

蘇州謝上表 蘇州謝賑貸表

蘇州賀冊皇太子表 賀冊皇太子牋

為裴相公賀冊魯王表

臣某言伏見制書以今日冊魯王禮畢皇家有慶
寶祚無疆既榮本枝克固盤石伏惟皇帝陛下德符

列聖道冠前王孝敬承兩宮之歡虔恭奉九廟之祀
先崇大禮慶浹天人次念建封事兼國家伏以魯王
夙承敵訓特稟天姿爰擇吉辰光膺寵冊既示之以
君親之道又錫之以禮義之邦寰海聞風室家相慶
臣自嬰疾疹已歷旬時不獲展禮明庭拜舞稱賀

為裴相公讓官第一表 并批荅

臣某言臣去冬得疾近日加劇西夕之景豈能久留
及其未亂披露誠懇臣犬馬之齒六十有七壽雖不
長亦不為短位忝公台近五十年皆由際會非以才

進常懼官謗以招國刑今被病得死保其始終為幸
甚厚豈復咨嗟呀恨者遇聖明之君不得佐成太平
之化自量氣力忽恐奄然則有微素無階上達伏惟
聖慈昭鑒憐而察之伏以三公非曠職之地宰相非
臥理之官伏枕之初已有陳乞請罷真食兼辭貴階伏
蒙優詔纔遂一事頻降中使慰勉再三專令御醫旦
夕診視苟安名器不竟經時主恩則深公議不可伏
思陛下臨御之始宰臣四人逮今零落忽已一半臣
且危懼餘年幾何唯易直外鎮獨得無恙竊惟此理

權位難居伏乞賜臣停官許在家養疾就閒辭祿或
冀有瘳害盈福謙固是神理儻天眷綢厚念以伏事
多年臣之所陳未蒙便遂則國朝勲旧以疾辭位者
皆得致仕官使其家居足以頤養既有成例著于旧
章伏望天恩特賜哀允
望省表具知夫爵位崇高以酬勲德君臣協契諒在
始終斯乃前王之令圖有國之彛典也况卿輔相
憲祖逮于朕躬履歷四朝夷險一致服事君之大
節推濟物之深誠道光朝倫行滿天下倚注之意

豈同它人屬朕纂曆御乾興師伐叛騷動累歲端
憂靡遑及河朔載寧郊丘畢事方欲咨詢元老康
靖生靈不虞寒暑所侵勤勞遇疾雖國醫診視中
使省臨憂屬之誠頃刻在念忽覽章奏退讓官榮
雖知止之心則思避寵而謀猷之骸斯乃為時寢
食之間勉加頤養其所陳乞非朕意焉

第二表 并批答

臣某言臣所獻章表發于至誠伏奉批答未蒙允許
外負公責內迫私情祈於必遂敢守難奪臣束髮已

一本作書號

來號為強力及其晚節亦未甚哀一朝被病遂至繇
懈臣自思省得其端倪非因飲食不節無有霧露
之犯蓋由才微而任重功薄而賞厚竊位既久妨賢
則多以積年之過幸致今日之沈疾不能酌損所以
生災悟雖已晚情寔非矯伏惟陛下念其委使之久
察其危苦之詞持降深恩救臣不逮無冒榮之咎得
遂性之宜物議不形病心自泰忍死俟命披肝再陳
伏乞聖慈俯賜容納無任迫切懇_禱之至

省表具知卿勲績崇高誠節忠蓋秉心一德宣力
四朝訐謨緝熙弼予于理勤勞事國啓沃匪躬功
格道光常所嘉尚所疾未廖勉於善養勿藥之喜
佇即痊平台衮之司倚卿為重乃累陳退讓殊謂
不然宜体朕懷即斷來表

第三表 并批荅

臣某言得疾踰年在假三月再有陳請未蒙允從慮
其奄忽銜愧入地伏惟聖慈哀而信之臣聞君之使
臣在知其心而聽其言不以容尸祿為惠也臣之事
君在無隱情而盡忠節不以受非據為榮也然後上

下交感終始可詠臣伏事陛下五年于茲葵藿微誠
已蒙識察桑榆莫景所冀哀憐豈令危懼之時更懼
滿盈之禍雖有藥石安能調和聖日難逢生涯漸短
體羸無拜舞之心望在有涕戀之悲臣伏覽國史備
見前事太宗朝李靖高宗朝劉仁軌皆自宰臣乞骸
致政其後知猶可用復起于家進退之間曲盡情禮
君臣之際良史美談伏望陛下悉臣至誠念臣羸病
許遂願養以保餘年俟其有瘳或冀萬一無任懇款
遑迫之至

省表具悉謝病之制雖起于昔賢盡瘁之祠亦標
於古典况卿有功于國作相累朝自匡輔耿躬又
勤勞數載豈可以微疾去位以重望辭榮章疏徒
來延遲弥切至如太宗朝許李靖致政高宗遂仁
軌乞骸朕非不知事則有異何者時當明聖在上
理道已成宰臣優游固得自便今則生物尚困庶
工未脩言念勲賢方深倚注惟此故事恐難遽行
卿宜體是誠懷力更願養必有多福以扶大忠無
至確然復陳章表

蘇州謝上表

臣某言伏奉制書授臣使持節蘇州諸軍事守蘇州刺史始從郎署出領郡章承命若驚省躬增感伏惟皇帝陛下受上玄之眷佑揚列聖之耿光大康黎元慎擇牧守德音每發品物咸蘇臣本書生素無黨援謬以薄伎三登文科德宗皇帝擢為御史在臺三載例轉省官永貞之初權臣領務遂奏錄用蓋聞虛名唯守職業寔無朋附竟坐飛語貶在遐藩憲宗皇帝後知事情卻授刺史凡歷外任二十餘年伏遇陛下

一本作集供御

應運重光物無廢滯收拾耆旧塵忝班行既幸逢時常思展效在集賢院四換星霜集供進新書御二千餘卷儒臣之分甘老於典墳優詔忽臨又委之符竹分憂誠重戀闕滋深后室之書空留筆劄札金閨之籍已去姓名本末可明申雪無路豈意聖慈弘納不隔卑微面辭之日特許升殿天顏咫尺臣礼兢惶不敢盡言空懷誠懇謝恩承而出生光于九陌之間受訓而行布政於五湖之外臣即以今月六日到任上訖伏以水災之後物力索空臣謹宣皇風慰彼黎庶臣聞有味之

物蠹蟲必生有才之人讒言必至事理如此古今同途了然辨之唯在明聖伏惟陛下察臣此言則天下之人無不幸甚江海遠地孤危小臣雖雨露之恩幽遐必被而犬馬之戀親近為榮大和六年二月六日

蘇州謝賑賜表

臣某言伏奉去年二月十五日敕蘇州宜賜米一十二萬石委刺史據戶均給者恩降九天澤流萬姓伏以臣當州去年災沴尤甚水潦雖退流庸尚多臣前月到任奉宣聖旨闔境老幼無不涕零詢訪里閭備

知凋瘵方具事寔便欲奏論聖慈憂人照燭幽遠持有賑卹救其災荒蒼生荷再造之恩儉歲同有年之慶臣忝為長吏倍萬常情無任感激抃躍之至大和六年三月二十四日

蘇州賀冊皇太子表

臣某言伏奉制書以今月十日冊皇太子德音遐布盛禮畢陳國本永安人心同慶伏惟皇帝陛下以繼天之聖有知子之明義兼君親禮重宗祏龍樓肇建展嘉禮于三朝鳳曆延長固本枝於萬葉臣守在遐

郡不獲稱慶闕庭無任踴躍屏營之至大和七年八月十七日

蘇州賀冊皇太子表

朝議大夫使持節蘇州諸軍事守蘇州刺史上柱國劉某叩頭叩頭伏惟皇太子殿下允膺上嗣光啟東朝蒼震發前星之輝黃離表重輪之瑞位居守噐禮重承祧萬國以貞九圖咸說某限以守郡不獲稱慶宮庭

劉賓客文集卷第十五

六月二十三日校閱

劉賓客文集 下

劉賓客文集卷第十六 表章六



蘇州謝恩賜加章服表命蘇州賀皇帝疾愈表

汝州謝上表

賀臬斬鄭注表

賀赦表

慰淄王薨表

謝分司東都表

蘇州謝恩賜加章服表

臣某言伏奉去年十一月二十七日詔書加臣賜紫

金魚袋餘如故者恩降重霄榮霑陋質虛黷陟明之
典恐興彼已之詩寵過若驚喜深生懼中謝臣起自
書生業文入仕德宗朝為御史以孤直在臺順宗朝
為郎官以緣累出省憲宗皇帝後知其寃特降敕書
追赴京國緣有虛稱恐居清班務進者爭先上封者
潛毀巧言易信孤憤難申俄復一麾外轉三郡伏遇
陛下膺期御宇大振滯淹哀臣宿舊猥見收拾職兼
書殿官忝儀曹微勞未宣薄命多故又離省署重領
郡符延英面辭親承教誨銜命即路星言載馳到任

泛

之初便逢災疫奉宣聖澤恭守詔條上稟獻謀下求
人瘼才術雖短憂勞則深幸免流離漸臻完復皆承
聖化所及遂使人心獲安豈由微臣薄劣能致臣素
乏親黨家本孤貧年衰無酒食之娛性拙無博奕之
藝首領大郡又逢時災晝夜苦心寢食忘味曾經誣
毀每事防虞唯託神明更無媒援豈期片善上達宸
聰回日月之重光燭江湖之下國綵綸褒異苦節既
彰印綬煒煌老容如少望雲天而拜舞豈盡丹誠視
環玦以裴回空嗟白首無任感激屏營之至大和七

年十二月十六日

蘇州賀皇帝疾愈表

臣某言臣得本道觀察使報伏承聖躬痊愈已於紫宸殿視朝者一人有慶萬國同歡伏惟皇帝陛下外親萬務內奉三宮常懷宵旰之勤遂失寢興之適上玄降祐列聖表靈百神奔走以來扶四海精誠而致感勿藥有喜如山永安宗廟保無疆之休寰瀛申莫大之慶臣恪居官次遐守江干不獲稱賀闕庭無任踴躍屏營之至

汝州謝上表

臣某言伏奉去年七月十四日詔書授臣使待節汝州諸軍事守汝州刺史兼御史中丞充本道防禦使餘如故者臣久居遠服戀闕常深忽降深恩近鄉為貴承旨慶抃省躬慙惶臣某誠歡誠喜頓首頓首伏惟皇帝陛下垂衣穆清之中旁照寰瀛之內車書所及動植咸安臣昨離班行遠守江徼延英辭日親奉德音知臣所部災荒許臣到任條奏共承獻旨宣示群黎減其征徭頒以賑賜伏蒙聖澤救此天災疲羸

再蘇幼艾同感二年連遭水潦百姓幸免流離交割之時戶口增長雖才術不足於事未周而憂勞則深為衆所悉臣本業儒素頗登文科時命遭回再領軍郡即以今月二十七日到任上訖謹當奉宣皇化慰彼蒼生臨汝水之波朝宗尚阻望秦城之日回照何時無任感激屏營之至謹差防禦押衙常禮簡奉表陳謝

同州謝上表

臣某言伏奉去年十月二十三日制書授臣使持節同州諸軍事守同州刺史兼御史中丞充本州防禦長春宮等使恩降九重榮忝三輔承旨慶抃省躬慙惶臣某伏惟皇帝陛下丕承列聖光闡鴻猷氛祲掃除乾坤交泰臣幸逢昌運累沐殊私空荷生成之恩寧酬雨露之澤即以今月二日到本州上訖謹宣敷旨安慰蒸黎伏以本州四年已來連遭旱損閭閻凋瘵遠近共知臣頃任蘇州之年亦遭大水之後而辭之日親奉德音至於撫綏皆承聖教二年之後百姓獲安今本部災荒物力困涸忝為長吏敢不竭誠即

頌
須條疏續具聞奏臣恪居官次幸接王畿不獲拜舞
彤庭陳露丹慊犬馬懷戀寢興匪寧瞻魏闕之容朝
天尚阻望長安之路近日為榮無任感激屏營之至
謹差防禦知衙官試殿中監楊克又奉表陳謝大和
九年十二月二十一日
批答省表具知卿任居三輔職奉六條累聞問俗
之勞載覽勤人之志言惟顧行深慰朕懷勉弘故
經以副憂寄所謝知

賀臬斬鄭注表

臣某言伏奉前月二十五日詔書示逆賊鄭注已梟
首訖氛妖殄滅華夏又安伏以逆賊鄭注本出細微
潛懷梟獍之心兼結兇狂之黨人倫共棄神理不容
陛下叡略感通天人合應重臣協力禁旅齊心指頌
之間猖狂自潰乾坤交泰日月增明凡在人臣不勝
慶快臣恪居官次不獲稱賀闕庭無任欣歡抃躍之
至大和九年十二月二日

賀德音表

臣某言伏見今月十六日德音布告遐邇天道下濟

人情大安伏惟皇帝陛下凝旒思理垂意擇材以日月無私之光照寰區有截之內貴使下情盡達寧虞厚貌潛謀一昨李訓鄭注等敢有逆心兼連兇黨陛下叡謀神斷左右協同頃刻之間掃除已定重臣畢力禁旅竭忠氛祲廓清華夷咸說言念正刑之外或有誑誤之徒再發德音廣宣聖澤當星紀回天之日迎陽和煦物之光懷危疑者如山之安欲告訐者望風知懼非同謀者一切不問未結正者三省從寬含生之倫普天同感臣恪居官次不獲稱慶闕庭云云

謹差防禦知衙官朝議郎權知容州都督府司馬孫惕奉表

賀赦表

臣某言伏奉今月一日制書改大和十年為開成元年大赦天下者雷雨作解人神說隨澤及八荒網開三面臣某誠歡誠喜頓首頓首伏惟皇帝陛下上承乾綱下立人極用含弘光大之澤副夷夏會同之心獻歲改元惟新景祚先明首罪次及羣妖迷敵情以曉萬方施鴻霈以蘇廢物恆辜宥過已責弛征郡縣

之舊弊悉除賦稅之新規咸備停藩方節獻之禮以
惠疲人回權管餘羨之財以資京邑命使展澄清之
志察言求讜直之材弓旌賁於丘園粟帛頒於耆艾
爰以初吉御宇明庭德音一發於九天和氣驟周于
四海開物成務實表於建元應天順人永延於億載
臣幸居近輔先受殊恩不獲稱慶闕庭陪榮班次衆
星列位常拱北辰之光新歲拜章遙獻南山之壽無
任抃躍屏營之至

謝恩賜粟麥表

臣某言伏奉今月一日制書以臣當州連年歉旱特
放開成元年夏青苗錢拜賜斛斛六萬石仰長史逐
急濟用不得非時量有抽歛於百姓者恩降九天澤
周萬姓優詔纔下羣情頓安臣某誠歡誠喜頓首頓
首伏以災沴流行陰陽常數物力既竭人心匪遑送輒
敢奏聞本求貸借皇恩廣被玄造曲成既免在田之
征仍頒發廩之賜臣謹宣赦文節目彰示兆人鼓舞
歡謠自中徂外臣初到所部便遇儉時今蒙聖慈特
有賑恤主恩及物已為壽域之人衆意感天必自豐

年之應臣恪居官業不獲拜舞闕庭無任感激之至

慰淄王薨表

臣某言臣得進奏官楊惕狀報淄王薨輟朝三日伏
惟皇帝陛下德邁前王情深近屬憫杖葉之謝諫諫切
宸衷割肌膚之愛何堪聖念萬方知化九族歸仁凡
受國恩伏深悽惻臣限以藩守不獲奉慰闕庭無任
屏營之至

謝恩放先貸斛斗表

臣某言臣奉五月二十九日敕牒據度支所奏諸道

節度觀察使及州府借使使省司錢物斛斗等數內當
州欠三萬六千二十三貫石並放免者殊私忽降逋
責滌除藩方永安逋通減威說臣某誠歡誠喜頓首頓
首伏以關輔之間頻年歉旱田租既湏矜放公用又
不支持承前長吏例有借便以救一時之急皆成績
欠之名既未支填常懷憂懼聖恩周洽洞見物情爰
命有司使之條奏去其舊弊衆已獲安嚴立新規人
知所指臣恪居官次不獲拜舞闕庭無任抃躍屏營
之至

謝分司表

臣某言伏奉今月十九日制書授臣太子賓客分司東都者寵命自天戰越無地臣發迹書生以文為業出身入仕四十餘年頃自集賢學士出守吳郡而辭之日親承德音念百姓水潦之餘示微臣政理之法臣祇膺聖旨夙夜竭誠閭里獲安流庸盡復猥蒙朝獎錫以金章及遷同州又遇歉旱悉心綏撫幸免流離今荷天慈憫臣耆舊列名賓護之職分局河洛之都老馬霜束帛之恩枯株蒙雨露之澤獲居榮秩以

畢餘年顧此微軀實為厚幸伏以臣始為御史逮事德宗今忝官察寮幸逢聖日舉四海之內賢能則多求六朝之臣零落將盡雖迫桑榆之景猶傾葵藿之心臣無任感恩惕抃之至

劉賓客文集卷第十七狀

為淮南杜相公論新羅請廣利方狀

為京兆常尹降誕日進衣狀

為京兆李尹降誕日進衣狀

為京兆常尹進野豬狀

為杜相公自淮南追入長安至長樂驛謝賜酒

為杜相公謝就宅賜食狀

為東都韋留守謝賜食狀

為裴相公進東封圖狀
舉崔監察羣自代狀

舉開州柳使君公綽自代狀

舉姜補闕倫自代狀 蘇州舉揚子常中代丞自

蘇州上後謝宰相狀 蘇州加章服謝宰相狀

汝州上後謝宰相狀 汝州舉杭州裴大夫自

汝州進鷹狀 同州舉蕭諫議自代狀

上宰相賀德音狀 上宰相賀改元赦書狀

薦處士嚴必狀 薦處士王龜狀

為淮南杜相公論新羅請廣利方狀

淮南節度觀察處置等使救賜貞元廣利方五卷右

卷之七

臣得新羅賀正使朴如言狀稱請前件方一部將歸

本國者伏以纂集神效出自聖衷藥必易求疾無隱

狀搜方仗之祕要拯生靈之夭瘥坐比華胥咸躋仁

壽遂令絕域逖聽風聲美茲豐功爰有誠請臣以其

久稱藩附素混車書航海獻琛既已通於華禮釋疴

蠲癘豈獨隔于外區正當四海為家冀覩十全之效

臣即欲寫付未敢自專謹錄奏聞

為京兆韋尹降誕日進衣狀

衣一副四事黃折造衫一領白吳綾汗衫一領白花

羅半臂一領白花羅袴一腰右伏以正陽令月誕聖
嘉辰運協千年慶流萬國凡在臣子合有獻陳敢傾
就日之心願奉如山之壽輕瀆宸宸無任兢惶

為京兆李尹降誕日進衣狀

衣一副四事右伏以水德方清真龍下降天長地久
瞻北極以常尊獻壽稱觴配南山而永固臣地居宗
屬職忝尹京慶賀之誠倍萬常品前件衣服謹詣銀
臺門奉進輕瀆宸宸伏用兢惶貞元十九年四月十
九日

為京兆韋尹進野猪狀

右伏以收穫之餘田獵有獲異於芻豢著在方書既
堪充庖輒敢上獻前件野猪謹隨狀進謹奏

為杜相公自淮南追入長安至長樂驛謝
賜酒食狀

具官臣某右臣今日至長樂驛高品某奉宣聖旨賜
臣酒食者伏以恩降王人榮分御膳未展儀於雙闕
先受賜於八珍品越膾膳味兼醪醴頓驚凡口倍益
歡心無任欣躍

為杜相公謝就宅賜食狀

具官臣某右高品某奉宣聖旨賜臣食者出自太官
飫於私第光榮曲被猥承推食之恩駑蹇未施益重
素餐之責舉其七筋若負丘山無任戰荷踴躍之至

為東都韋留守謝賜食狀

具官臣某右臣今日發至長樂驛中使某奉宣聖旨
賜臣食者伏以味兼海陸品溢圓方降自御廚光臨
傳舍臣初辭魏闕倍懷犬馬之誠猥受珍羞更切稻
梁之感無任欣躍

為裴相公進東封圖狀

集賢殿御書院開元東封圖一面右臣謹按開元十
三年玄宗皇帝以天下太平登封東岳聲明文物振
耀古今伏惟陛下至承耿光再闡鴻業祖宗盛事紹
復有期臣所以寫成此圖輒敢上獻至於續畫躬自
指揮徵史氏之文纂禮容之要山川氣象悉擬真形
羽衛威儀咸稽故實所冀獻情一覽遐想玄蹤臣叨
榮過深抱疾已久望陛下告成之日心必前知嗟老
臣將謝之年身恐不見疾羸之際感激倍深前件圖

謹差某官某謹詣光順門上進謹奏

舉崔監察羣自代狀

御史臺宣歙池等州都團練判官監察御史裏行崔
群右臣蒙恩授監察御史伏準建中元年正月五日
制常參官上後三日舉一人自代者伏以前件官在
諸生中號為國器執繫維外府人咸惜之臣既深知敢
舉自代貞元十九年閏十月日

舉開州柳使君公綽自代狀

尚書屯田某官等守開州刺史柳公綽右臣蒙恩授

尚書屯田員外郎伏準建中元年正月五日制常參
官上後三日舉一人自代者伏以前件官以賢良方
正再敷王庭在流輩間號為端士昨除遠郡人皆惜
之臣初蒙授官得以論薦多士之內非無其人竊惟
用材宜自遠始謹具如前謹錄奏聞伏聽敕旨貞元
二十一年四月八日

舉姜補闕倫自代狀

東都尚書省前左補闕姜倫右臣蒙恩授尚書主客
郎中分司東都伏準建中元年正月五日敕常參官

上後三日舉一人自代者臣伏詳詔旨欲達聰旁求發揚幽遠故人得言所知不當循其階次也臣伏以前件官有儒學士行蒙以諫官徵會其年老被疾不堪上道有司按視如狀不復逼迫至今家居而篤志無倦臣謹舉為郎吏分司別都庶優賢振滯兩得其道大和元年六月十四日

蘇州舉韋中丞自代狀

蘇州狀上中書門下諸道鹽鐵轉運江淮留後朝議郎守太僕少卿兼御史中丞上柱國賜紫金魚袋韋

應物右臣蒙恩授蘇州刺史伏準建中元年正月五日制刺史上後舉一人自代者前件官歷掌劇務皆有美名執心不回臨事能斷今領職雖重本官尚輕伏以當州口賦首出諸郡况經災沴切在撫綏尚省無能輒敢公舉司權筦之利誠藉時才流豈弟之風實惟邦本非敢臆說以塞詔書今具聞奏大和六年十二月九日

蘇州上後謝宰相狀

朝議大夫使持節蘇州諸軍事守蘇州刺史上柱國

劉某右某今月六日到州上訖某山東一書生潦倒
踈闊在少壯日猶不逮人况今衰遲智力愈短相公
哀憐不遇擢授名邦實荷弘獎慙非器使伏以當州
繇大變之後物力蕭然肌寒殞仆相枕于野誓當悉
心條理續具奏論才術素空憂勞方始懼無聞問忝
負恩知不任瞻望懇迫之至

蘇州加章服謝宰相狀

右某素乏吏才謬居劇郡以無庸之器當難治之時
恭守詔條勤求人瘼伏以聖德柔遠皇明燭幽凡有

上陳皆可其奏遂令管見得及疲黎自承雨露之恩
非有循良之政猥蒙朝獎特降命書韓顧逢掖之腐儒
被華章之貴服有黷陟明之典誠招彼己之譏限以
守官不獲拜謝瞻望榮感心魂載馳大和七年十二
月日

汝州上後謝宰相狀

朝議大夫使持節汝州諸軍事守汝州刺史兼御史
中丞充本州防禦使上柱國賜紫金魚袋劉某右某
自領吳郡仍歲天災上稟詔條下求人瘼地包藪澤

俗尚剽輕悉心撫綏用法擒擿事繁才短常積憂虞
忽蒙天恩稍移近郡家本榮上籍占洛陽病辭江干
老見鄉樹榮感之至實倍常情印綬所拘不獲拜謝
瞻望德宇精誠並馳無任感戀之至

汝州舉裴大夫自代狀

正議大夫使持節杭州諸軍事守杭州刺史上柱國
賜紫金魚袋裴弘泰右臣蒙恩授汝州刺史兼御史
中丞充本州防禦使伏準建中元年正月五日敕諸
州刺史上後舉一人自代者伏以前件官前為九卿

出領兩鎮頃因微累遂有左遷今授遠州物情未塞
臣前任鄰接具知公才舊屈未伸輒舉自代云云

汝州進鷹狀

汝州防禦使當使進奉籠母鷹六聯右伏以前件鷹
等學習應期馴養斯至獻於常貢有異衆禽受紕之
時志已存於雲外下鞫之際思用展於韜前既懷百
中之能願獻三驅之禮謹差防禦押衙景再休隨狀
奉進以聞大和九年九月十一日

同州舉蕭諫議自代狀

同州防禦使前諫議大夫蕭俶右臣蒙恩授同州刺史兼御史中丞充本州防禦長春宮等使伏準貞元二年正月二十四日敕上後三日舉一人自代者伏以前件官生於貴族伏膺儒門縉紳之間號為端士前昨蒙朝獎冠于諫垣時方被病不果上道長告已滿塊然家居今聞疾瘳可以錄用臣與俶久同班列知其材能為官擇人敢舉自代大和九年十二月四日

上宰相賀德音狀

同州狀上中書門下今月十六日德音右被刑部牒

宣示德音伏以聖澤滋浚新恩廣被言念正刑之外或有誑誤之徒爰降殊私特弘在宥瑕累咸滌危疑獲安此皆廟筭弼諧致君及物事光前史功格上玄某限以守官不獲隨例拜賀無任抃躍之至大和九年十二月二十三日

上宰相賀改元赦書狀

同州狀上中書門下改元赦書右伏奉今月一日制書改大和十年為開成元年大赦天下者伏以律首三元禮崇四始順陽和發生之德敷大號渙汗之恩

宥過恤刑弛征已貴貴盡去人瘼通知物情德音朝發
于九天和氣夕周於四海此皆相公弼諧之道燮贊
之功進熟於密勿之間發揚成滂沛之澤某恪守官
業印綬所拘不獲隨例拜賀

薦處士嚴恣狀

處士嚴恣右左庶子損之之孫國子司業士元之子
舊名保嗣亦有官班頃者李賓客渤常與之游辟為
桂州支使其後寄家汝海專靜自居某嘗典汝州與
語甚熟歷代史及國朝故事悉能該通操心甚危觀

跡相副未逢知己已過壯年汨沒風塵有足悲者伏
見赦文節目委州郡長吏搜訪隱淪夫舉無他唯善
所在每覽珠英卷後列學士姓名有常州人符鳳白
衣在選取其藝業不棄遠人某忝被儒官得以薦士
亦非出位冀不廢言儻弘文集賢史氏之館採其實
學有勸諸生伏以桂州辟之于前某薦之於後豈必
有土長吏然後事行伏惟試味斯言降意詳擇謹狀

薦處士王龜狀

處士王龜古者選公族大夫必以博惠者教之文敏

者道之果敢者諗之鎮靜者循之攷：於此者蓋膏
梁之性難正而懼公侯之胤不能嗣其耿光可以深
惜然則成宣之後而老為大夫非恥乎此智武子誠
文子既冠而見之詞也是知古之取士不專寒族必
參用世胄以廣得人之路今見處士王龜即居守之
第三子也天性貞靜操心甚危不由門資誓志自立
樂處士之號不汨綺襦之間自到洛都便居山寺耽
玩墳籍放情煙霞曾邀與語如鋸木屑信有稟受居
然出羣以比在京師甚足知者諫院有狀名流亟言

某流滯周南靜閱時輩身雖不用心甚愛才况遇相
公持衡敢有所啓誠懸之下輕重難欺伏惟深賜詳
擇知卿族之內有遺逸焉謹狀正議大夫檢校禮部
尚書兼太子賓客分司東都劉某狀

劉賓客文集卷第十八啓

上杜司徒啓

上淮南李相公啓

上門下武相公啓

上中書李相公啓

謝門下武相公啓

謝中書張相公啓

賀門下裴相公啓

上門下裴相公啓

賀門下李相公啓

自西川入為
大夫拜相

上僕射李相公啓

謝裴相公啓

謝竇相公啓

上杜司徒啓

時謫朗州

某啓一自謫居七悲秋氣越聲長苦聽者誰哀湯網
雖踈久而猶註失意多病哀不待年心如寒灰頭有
白髮惕厲之日利於退藏是以彌年不敢奏記近本
州徐使君至奉手筆一函稱謂不移問訊如劇重復
點竄一無容言忽疑此身猶在門下收紙長想欣然
感生尋省遭罹萬重不幸方寸之地自不能言求人
見諒豈復容易伏蒙遠示且曰浮謗漸消况承慶宥
期以振刷方今聖賢合德朝野多歡澤柔異類仁及
行葦萬族咸說獨為窮人四時平分未變寒谷自同

類牽復又已三年側聞衆情或似哀歎某材略無取
廢錮是宜若非舊恩孰肯留念六翮方鍛思重託於
扶搖孤桐半焦冀見收于煨燼伏紙流涕不知所言
謹啟

上淮南李相公啓

某啓某間以昧於周身措足危地駭機一發浮謗如
川巧言竒中別白無路祝網之日漏恩者三咋舌覲
魂分終裔壤豈意天未勦絕仁人登庸施一陽於剝
極之際援衆溺于坎深之下南箕播物不勝曷言危

心鍛翻繇是自保陰施之德已然乃聞受恩同人盟
以死答私感竊抃積于窮年化權禮絕孤去莫展今
幸伍中牽復司存宇下伏慮因是記其姓名謹獻詩
二篇敢聞左右古之所以導下情而通比興者必文
其言以表之雖昨謠俚音可儷風什伏惟降意詳擇
斯大幸也謹因揚子程留後行謹奉啓不宣謹啓

上門下武相公啓

某啓去年本州吏人自蜀還伏奉示問兼^賜衣服繒絲
等雲水路遙緘滕貺厚恭承惠下之旨重以念舊之

懷熙如陽和列在緡簡苦心多感危涕自零驚神驛
思若待頽杖伏以聖上注意理本銳求國禎^積念外臺
報政之功追宣室前席之事重下丹詔再升黃樞群
情合符和氣來應八柄所在三人同心協台坐之精
膺^應傑材之數談笑於規隨之際從容於陶冶之間物
皆由儀人識所措某久罹憲網兀若枯株當萬類咸
說之辰抱窮途終慟之苦清朝無絳灌之列至理絕
椒蘭之嫌此時不遇可以言命嗟乎一身主祀萬里
望粉榆之鄉高堂有親九年居蠻貊之地從坐之典

固有等差同類之中又尋牽復頃在臺日獲奉準繩
指吏途於按讞道文律於章奏藻鑿之下難逃陋容
炎涼載移足見真態自違間左右沈淪遐荒歲月滋
深艱貞彌厲緬思受譴之始宀人不知屬山園事繁
孱懦力竭本使有內嬖之吏供司有恃寵之臣言涉
猜嫌動礙闕束城社之勢函矢紛然彌縫其間崎嶇
備盡始慮罪因事闕寧虞謗逐跡生智乏周身又誰
咎也伏以趙國公頃承一顧之重高邑公夙荷見知
之深雖提挈不忘而顯白無自蓋以永貞之際皆在

外方雖得傳聞莫詳本末特哀黨錮亟形話言自前
歲振淹命行中止或聞輿論亦愍重傷伏遇相公秉
鈞輒已自賀儻重言一發清議攸同使聖朝無錮人
大治無廢物自新之路既廣好生之德遠彰障蟄應
南山之雷窮鱗得西江之水指顧之內生成可期伏
惟發膚寸之陰成彌天之澤回一瞬之念致再造之
恩誠無補于多事之時庶有助於陰施之德無任懇
悃之至謹啟

上中書李相公啓

某啓去年國子主簿楊歸厚致書相慶伏承相公言
及廢銅愍色甚深哀仲翔之久謫恕元直之方寸思
振淹之道廣錫類之仁遠聆一言如受華袞伏自不
窺牆仞九年于茲高卑邈殊禮數懸絕雖身居廢地
而心恃至公伏以相公久以訥謨參於宥密材既為
時而出道以得君而擢令發於流水之源化行猶偃
草之易習強仇者自納于軌物困杼軸者咸躋於仁
壽六轡在手平衡居心運思於陶冶之間宣猷于魚
水之際然能軫念廢物遠哀窮途嗟哉小生有足悲

者內無手足之助外乏強近之親為學苦心本求榮
養得罪由已翻乃貽憂捫躬自劾愧入肌骨禍起飛
語刑極淪胥心因病怯氣以愁耗近者否運將泰仁
人持衡伏惟推曾閔之懷憐烏鳥之志處夔龍之位
傷屈賈之心沛然垂光照振幽蟄言出口吻澤濡寰
區昔者行葦勿傷枯骼猶掩哀老以出弊愍窮而開
懷無情異類尚或嬰慮顧惟江干逐客曾是相府故
人言念材能誠無所取譬諸飛走庸或知恩嗚呼以
不駐之光陰抱無涯之憂悔當可封之至理為永廢

之窮人尚聞弦尚驚危心不定垂耳斯久長鳴孔悲腸
回淚盡言不宣意謹啟

謝門下武相公啟

某啟某一坐飛語廢錮十年昨蒙徵還重罹不幸詔
命始下周章失圖吞聲咋舌顛白無路豈謂烏鳥微
志惻于溪仁恤然動拯溺之懷煦然存道舊之旨言
念穀觥慰安蒼黃推以恕心期於造膝重言一發敵
聽克從回陽曜於肅殺之辰沃天波于躡蹙之際俾
移善地獲奉安輿率土知孝治之源羣生識人倫之

厚感召和氣發揚皇風豈惟匹夫獨受其賜某即以
今月十一日到州上訖守在要荒拘於印綬巾鞬詣
謝有志莫從誠知微生不足酬德捐軀之外無地寄
言效節蕭屏虔然心禱無任懇悃屏營之至謹勒軍
事衙官左威衛慈州吉昌府別將員外置同正員常
懇奉啟起居不宣謹啟

謝中書張相公啟

某啟某智乏周身動必招悔一坐飛語如衝駭機昨
者詔書始下驚懼失次叫閤無路擠壑是虞草木賤

軀誠不足惜烏鳥微志實有可哀伏蒙聖慈遽寢前
命移蒞善部邦載形綸言凡在人臣皆感至德凡為人
子同荷至仁豈唯鱣生獨受其賜伏以相公心符上
德道冠如仁一夫不獲戚見于色密旨未下歎形於
言竟回三舍之光能拔九泉之厄袁公之平楚獄不
忍錮人晏子之哀越石乃伸知己所以慶垂胤祚言
成春秋神理孔昭報應斯必身侔蟬翼何以受恩死
輕鴻毛固得其所卑守有限拜謝末由無任感激兢
惶之至謹勒軍事衙官守左威衛慈州吉昌府別將

員外置同正員常懇奉啟起居不宣謹啟

賀門下裴相公啟

某啟伏以相公含道傑出降神挺生坐籌以弼敵謨
秉鉞以行天討風雲助氣川岳效靈制勝於尊俎之
間指蹤于鞬縹之末繡斧既定袞衣以歸君心如魚
水人望如風草一德交暢浹萬邦和平運神思於洪鑪
納生靈於壽域文武丕績冠於古今某恪守遐荒不
獲隨例拜賀瞻望踴躍無任

上門下裴相公啟

某啟曩者淮右逋誅即戎歲久天子齋戒以命元臣
登壇之日上畧前定從九天而下縱以神兵分六符
之光埽其長彗授鉞于西顛之半策勲於北陸之初
功成偃節復執大柄君臣相遇播於樂章山河啓封
載在盟府上方注意人益具瞻因魚水之協符極夔
龍之事業時屬四始恩覃萬方致君及物其德兩大
古先~~峻~~賢所未備者我從容而保之殆非人事抑有
幽贊夫異同之論我以獨見剖之文武之道我以命^上
材統之崇高之位我以大功居之造物之權我以虛

心運之然持盈之術古所難也實在陰施及物厚其
德基以左右功庸而百祿是荷人所欽戴久而愈宜
昔袁太尉不忍銅人而楚獄衰息一言之慶子孫丕
承以今日將明之材行前修博施之義筆端膚寸澤
及九垓猶夫疾耕必有滯穗某頃墮危厄嘗受厚恩
詛盟于心要之自效^劫常懼廢死荒服永辜願言敢因
賀牋一寄丹懇顧非竒理不足以縈于冲襟然則利
於行者固在乎常談而卓詭孤特之言未必利於行
也伏惟以愚言與賢者參之謹啓

賀門下李相公啟

自西川入為大夫拜相

某啟伏以聖君當功成愷樂之日而求賢愈切思治益深是上玄垂休欲速致太平之明效以相公事業而逢此時天下之人視仁壽之域其猶尋尺故命書所至德風隨之微材片善咸自磨拂况同主國柄如吹埴篔簹含生之倫唯所措置日月亭午物無邪陰聖賢合德人識正道雖居畎畝足以詠歌某遐守要荒不獲隨例拜賀私感竊抃實倍怛情

上僕射李相公啟

某啟州吏還伏蒙擺落常態手筆具書言及貞元中登朝人逮今無十輩及發中書相公一函具道閣下亟言曩遊顏間頗有哀色夫溝中之木與犧象同體**追**琢不至坐成枯薪朱而藍之猶足為器苟液楠曲戾不足枉斧斤願為庭燎以照嘉客謹啟

謝裴相公啟

某啟某遭不幸歲將二紀雖累更符竹而未出網羅親知見憐或有論薦如陷還瀆動而愈沈甘心終否無路自奮豈意天未勒絕仁人持衡紆神慮於多方

起埋沈於久廢居剝極之際一陽復生出坎澁之中
平路資始通籍卽位分曹樂都喬木展舊國之思行
雲有故山之戀姻族相賀壺觴盈門官無責詞始自
今日禽魚之志誓以死生草木之年惜其晬晚章程
有守拜謝無由瞻望巖廊虔然心禱謹啓

謝竇相公啟

某啓其一辭朝列二十三年雖轉郡符未離謫籍卑
濕生疾衰遲鮮歡望故國而未歸如痿人之念起昨
蒙罷免甘守丘園相公不棄舊遊特哀久廢每奉華

翰賜之衷言果蒙新恩重忝清貫薦延有漸拯拔多
方六律變幽谷之寒一九銷彌年之疹鍛翮將舉危
心獲安布武夷途自此而始分曹有繫拜謝無由瞻
望德藩坐馳精爽無任感激之至謹啟

劉賓客文集卷第十九

集紀

唐故相國李公集紀

唐故中書侍郎平章事韋公集紀

唐故相國贈司空令狐公集紀

唐故尚書主客員外郎盧公集紀

唐故衡州刺史呂君集紀

唐故尚書禮部員外郎柳君集紀

董氏武陵集紀

澈上人文集紀

唐故相國李公集紀

天以正氣付偉人必飾之使光耀于世粹和細縕積於中鏗鏘發越形乎文外文之細大視道之行止故得其位者文非空言咸繫于訄謨宥密庸可不紀惟唐以神武定天下羣慝既讐驟示以文韶英之音與鉦鼓相襲故起文章為大臣者魏文貞以諫諍顯馬高唐以智畧奮岑江陵以潤色聞無草昧汗馬之勞而任遇在功臣上唐之貴文至矣哉後王纂承多以國

柄付文士元和初憲宗遵聖祖故事視有宰相器者貯之內庭繇是釋筆硯而操化權者十八九公實得時而光馬公諱絳字深之趙郡人在貢士中傑然有奇表既登太常第又以詞賦陞甲科授秘書省校書郎歲滿從調有司設甲乙問以觀決斷復居高品補渭南尉擢拜監察御史未幾以本官充翰林學士居中轉尚書主客員外郎歷司勳郎中知制誥遷中書舍人風儀峻整敷奏讜切言事感動上輒目送之一旦召至浴堂門與語半日曰將移用于大位宜稔熟

民聽隱遂出為戶部侍郎遷中書侍郎同平章事毅然
有直聲及冊免而問望益大周旋公卿間五為尚書
歷御史大夫左僕射一以三公領太常刺近輔居保
釐登齋壇皆再為大和三年以司空鎮南鄭居二歲
坐氣剛玉折海內冤惜之後三年嗣子前京兆府尹
曹掾珍次子前監察御史裏行頊等泣持遺草請編
之肇自從試有司至于宰天下詞賦詔誥封章啓事
諤詩贈餞金石颺功凡四百餘篇勒成二十卷上所
以知君臣啟沃之際下所以備風雅詩聲之義洪鍾

一本尹下有

駭聽瑤瑟清鬪其在翰苑及登台庭極言大事誠貫
理直感通神祇龍鱗收怒天日回照古所謂一言興
邦者信哉始愚與公為布衣游及仕畿服幸公同邑
其後雖翔泳勢異而不以名數革初心今考其文至
論事䟽感人肺肝毛髮皆聳嗚呼其盛唐之遺直歟

唐故中書侍郎平章事韋公集紀

漢庭以賢良文學徵有道之士公孫弘條對第一席
其勢鼓行人間取丞相且侯使漢有得人之聲伊弘
發也皇唐文物與漢同風故天后朝燕國張公說以

詞標文苑徵玄宗朝曲江張公九齡以道侔伊呂徵
德宗朝天水姜公公輔杜陵常公執誼河東裴公均
以賢良方正徵憲宗朝河南元公稹京兆常公淳以
才識兼茂徵隴西牛公僧孺李公宗閔以能直言極
諫徵咸用對策甲於天下繼為有聲宰相古今相望
落：然如騎星辰與夫起版築飯牛者異矣公本名
淳舉進士登賢良第既仕方更名處厚字德載漢丞相
扶陽侯之裔孫後周逍遙公賈之八代孫江陵節度
參謀監察御史裏行贈右僕射某之元子生而聰明

絕人在提孩發言成詩未幾能賦受經於先君僕射
學文於伯舅許公孟容及壯通六經旁貫百氏咨天
人之際遂探曆數明天官窮性命之源以至于佛書
尤邃初為集賢殿校書郎宰相李趙公監修國史引
直東觀就改咸陽尉遷右拾遺轉左補闕世稱有史
才而能諫諍入尚書為郎歷禮部考功皆人望所在
上方用威武以讐不庭宿兵寔久韋丞相貫之酌人
情上言不合意用免因歷詆所善公在伍紙中出為開
州刺史居三年執友崔敦詩為相徵拜戶部郎中至

闕下旬歲間以本官知制誥穆宗新即位注意近臣
召入翰林充侍講學士初授諫議大夫續換中書舍
人侍游蓬萊池延問大義退而進六經法言二十編篇
優詔答之賜以金紫尋遷權知兵部侍郎知制誥翰
林侍講史館修撰長慶四年春敬宗踐祚以公用經
術左右先帝五年稔聞其德尤所欽倚內署故事與
外廷不同凡言翰林學士必草詔書有侍講者專備
顧問雖官為中書舍人或他官知制誥第用其班次
耳不竄言於訓詞至是上器公且有以寵之乃使內

謁者申命去侍講之稱慮未諭于百執事居數日降
命書重舉舊官以明新意尋真拜夏官貳卿由是內
庭詞臣無出其右者凡密旨必承乎權輿故號承旨
學士上富春秋未親庶政或有凝滯視公如著龜寶
曆季年宮壺間一夕生變人情大駭雖鼎臣無所關
決唯內署得參焉群議闕友胡貢然俟公一言而定數
難續服再維乾綱今上總明策勲第一擢拜中書侍
郎同中書門下平章事以高材遇英主功顯人伏言
無不從筆端膚寸澤及天下盡罷冗食請歸才人事

先有司物止常貢城社無託巖廊益尊感恩盡瘁不
嗇神用大和二年十二月上前言事未及畢詞疾作
暴憤以朝服委地同列白奏搢笏扶持之不能起上
命中貴人左右翼負歸于中書如大醉狀上震驚咨
嗟徵醫賜藥旁午疊委會莫有興至第詰旦以不起
聞贈祿加常禮後十年嗣子蕃以太子舍人直弘文
館編次遺文七十通銜哀貢誠乞詞以冠其首謹按
公未為近臣已前所著詞賦讚論記述銘志皆文士
之詞也以才麗為主自入為學士至宰相以往所執

筆皆經綸制置財成潤色之詞也以識度為宗觀其
發德音福生人沛然如時雨褒元老諭功臣穆然如
景風命相之冊和而莊命將之誥昭而毅薦賢能其
氣似孔文舉論經學其博似劉子駿發十難以推言
利者其辯似管夷吾噫逢時得君奮智謀以取高位
而令名隨之豈不偉哉初蕃既纂修父書咨于先執
李習之請文為領袖許而未就一旦習之憮然謂蕃
曰翺昔與韓吏部退之為文章盟主同時倫輩惟柳
儀曹宗元劉賓客夢得耳韓柳之逝久矣今翺又被

病慮不能自述有孤前言齋恨無已將子薦誠于劉君乎無何習之夢奠于襄州蕃具道其語余感相國之平昔且嘉蕃之虔虔孝敬庶幾能世其家故不讓云

唐故相國贈司空令狐公集紀

起文章而陟大位丹青景化焜燿藩方如非煙祥風緣飾萬物而與令名相終始者有唐文臣令狐公實當之公名楚字殼士燠煌人今占數于長安右部天授神敏性能無師始學語言乃協宮徵故五歲已為

詩成章既冠參貢士果有名字時司空杜公以重德知貢舉擢居甲科琅邪王拱識公於童非雅器重之至是拱自虞部正郎領桂州銑於辟賢以酬不次之遇先拜章而後告公既而授試弘文館校書郎公為人子重難遠行稟命而去居一歲竟迫方寸而歸家在并汾間急於祿養捧從事檄于并州凡更三牧官至監察御史元和初憲宗聞其名徵拜右拾遺歷太常博士入尚書為禮部員外郎性至孝既孤以善居喪聞中月除刑部員外時帝女下嫁相禮闕官公以

本官攝博士當問名之答上親臨帳幄簾內以窺之
禮容甚偉聲氣朗徹上目送良久謂左右曰是官可
用記其姓名未幾改職方知制誥詞鋒犀利絕人遠
甚適有旨選司言高第者視草內庭宰臣以公為首
遂轉本司郎中充翰林學士滿歲遷中書舍人專掌
內制武帳通奏栢梁陪燕嘉猷高韻冠于一時會淮
右稽誅上遣丞相即戎以督戰公草詔書詞有涉嫌
者相府上言有命中書參詳竄定因罷內職歸閣中
而君心眷然將有大用且出入以試之乃牧華州兼

御史中丞錫以金紫居鎮七月遷大夫充河陽三城
懷州節度使又七月急召抵京師拜中書侍郎同中
書門下平章事天下然後知上心倚以為相非一朝
也是歲元和十四年秋明年正月憲宗晏駕惜其在
位日淺遭時大變穆宗踐阼轉門下侍郎平章事萬
幾百度別有所付第以舊相署位充山陵使七月禮
畢部下吏有以賊狀聞者朝典用贖率之義是以左
授宣歙池等州都團練觀察處置使兼御史大夫恩
顧一異媒孽隨生旋又貶衡州刺史移郢州轉太子

賓客分司東都尋起為陝統觀察使或有上封者稱
前以奉陵寢不檢下獲譴今陵土猶濕未宜遽用次
陝一日重為賓客分司長慶四年改河南尹其秋授
檢校禮部尚書兼汴州刺史充宣武軍節度管內觀
察處置等使汴州為四戰之地擇帥先有功峻刑右
武疑似沈命號為危邦者積年公始以清儉自律以
恩信待人以夷坦去羣疑以禮讓汰慘急自上化下
速於置郵泮林革音無復故態璽書勞之就加大司
馬文宗纂服三年冬上表以大臣未識天子願朝正

月制曰可操節入覲遷戶部尚書俄為東都留守又
轉檢校尚書右僕射兼鄆州刺史天平軍節度使後
以王業之始實為北京移鎮太原從人望也以吏部
尚書徵續換太常卿真拜尚書左僕射太和九年冬
十一月京師有急兵起上方御正殿即日還宮是夕
召公決事禁中以見賢遍反事傳古義為對其詞謹切
無所顧望上心嘉之居一二日守本官兼諸道鹽鐵
轉運使以幹利權既非素尚乞乞牢讓故復為檢校
左僕射興元尹山南西道節度觀察使兼御史大夫

開成二年十一月十二日薨于漢中官舍享年七十
齊終之前一日自修遺表初述感恩陳力之大義中
及朝廷刑政之或闕意切言盡神識不昏上深悼之
形于愍冊未登三事故以贈之歸全之夕有大星殞
于正寢之上光燭於庭天意若曰既稟之而生亦有
涯而落其文章貴壽之氣焰歟初憲宗覽國書見五
王復辟之際狄梁公實尸之公為台臣獨召便殿問
曰仁傑有後乎公以其支孫試校書郎兼暮為對即
日拜左拾遺公遂草制他日相銜者因扶其詞以為

非春秋諱魯之旨穆宗新即位謙讓不自決遂有衡
州之貶公議寬之嗟乎天之于賦予也甚畱而難周
公獨富文華于良時歷名卿至元老蓋忠廉孝友愛
才與物合是粹美以將之和可謂全德矣既免喪嗣
子左補闕絢集公之文成一百三十卷因長子太子
左諭德弘分司東都負其笥來謁泣曰先正司空與
大人為顯交撤懸之前五日所賦詩寄友非他人也
今手澤尚存言之嗚咽長號予為之慟收淚而視分
當編次之始公參大鹵記室以文雄于邊議者謂一

方不足以騁用徵拜于朝累遷儀曹郎乃登西掖入
內署訔謨密勿遂委魁柄斯以文雄於國也嗚呼咫
尺之管文敏者執而運之所知皆合在藩聳萬夫之
觀望立朝賁羣察之頰舌居內成大政之風霆導猷
澮于章奏鼓洪瀾于訓誥筆端膚寸膏潤天下文章
之用極其至矣而又餘力工於篇什古文士所難兼
為昔王珣為晉僕射夢人授大筆如椽覺而謂人曰
此必有大手筆事後孝武哀用文乃珣之詞也公為
宰相奉詔撰憲宗聖神章武孝皇帝哀冊文時稱乾
陵崔文公之比今考之而信故以為首冠尊重事也
其它各以類聚著于篇

唐故尚書主客員外郎盧公集紀

心之精微發而為文文之神妙詠而為詩猶夫孤桐
朗玉自有天律能事具者其名必高名由實生故久
而益大尚書郎盧公諱象字緯卿始以章句振起於
開元中與王維崔顥比肩驥首鼓行於時妍詞一發
樂府傳貴由前進士補秘書省校書郎轉右衛倉曹
掾丞相曲江公方執文衡揣摩後進得公汲黯之擢

為左補闕河南府司錄司勳員外郎名盛氣高少所
卑下為飛語所中左遷齊汾鄭三郡司馬入為膳部
員外郎時大盜起幽陵入洛師東夏衣冠不克歸王
所為虜刼執公墮脇從伍中初謫果州長史又貶永
州司戶移吉州長史天下無事朝廷思用宿舊徵拜
主客員外郎道病留武昌遂不起故相崔太傅時為
右史方在鄂以文誌其墓其一詞曰憶公妙年有聲
振耀當代翱翔雲路不虞矰及則層繳盛名先物易生
癘疵三至即署坐成遺臺蹭蹬江臯棲棲沒齒見知

者恨之公遠祖元魏北齊後周皆為帝師公之叔父
嵩山逸人諫議大夫顥然真隱者也公下世後七十
三年其孫元符捧遺草來乞詞以表之嘗經亂離多
所散落今之存者十有二卷凡若干篇

唐故衡州刺史呂君集紀

五行秀氣得之居多者為俊人其色激濫於顏間其
聲發而為文章天之所與有物來相彼由學而致者
如工人染蓂以視羽畎有生死之殊矣初貞元中天
子之文章煥乎垂光慶霄在上萬物五色天下文人

為氣所召其生乃蕃靈芝^{建蒲}與百果齊坼然煌煌
翹翹出乎其類終為偉人者幾希矣東平呂和叔實
生是時而絕人遠甚始以文學震三川三川守以為
貢士之冠名聲西馳速如羽檄長安中諸生成避其
鋒兩科連中芒^必愈出德宗聞其名自集賢殿校書
郎擢為左拾遺明年大戎請和上問能使絕域者君
以竒表有專對材膺選轉殿內史錫之銀章還拜尚
書戶部員外郎轉司封遷刑部郎中兼侍御史副治
書之職會中執法左遷緣坐道州刺史以^善政聞改衡

州年四十而沒後十年其子安衡泣捧遺草來謁咨
余細之成一家言凡二百篇和叔名溫別字化光祖
考皆以文學至大官蚤聞詩禮於先侍郎又師吳郡
陸質通春秋從梁肅學文章勇於藝能咸有所祖年
益壯志益大遂撥去文學與雋賢交重氣槩^{名實}
歆然以致君及物為大欲每與其徒講疑考要王霸
富彊之術臣子忠孝之道出入上下百千年間詆訶
角逐疊發連注得一善輒盱衡擊節揚袂頓足信容
得^德色舞于眉端以為按是言循是理合乎心而氣將

之昭昭然若揭日月而行孰能闕其勢而爭夫光者
乎嗚呼言可信而時異道甚長而命窄精氣為物其
有所歸乎古之為書者先立言而後體物賈生之書
首過秦而荀卿亦後其賦和叔年少遇君而卒以謫
似賈生能明王道似荀卿故余所先後視二書斷自
入文化成論至諸葛武侯廟記為上篇其它咸有為
而為之始學左氏書故其文微為富艷夫羿之開弓
唯巴蛇九日乃能盡其殼而回注鸚鵡亦要失中於
尋常之間非羿之手弓有能有不能所遇然也後之

遠解者推而廣之知余之素交不相索于文字之內

而已

唐故尚書禮部員外郎柳君集紀

八音與政通而文章與時高下三代之文至戰國而

病涉秦漢復起漢之文至列國而病唐興復起夫政

靡而土裂三光五嶽之氣分扶問大音不完故必混

一而後大振初貞元中上方嚮文章昭回之光下飾

萬物天下文士爭執所長與時而奮聚焉如繁星麗

天而芒寒色正人望而敬者五行而已河東柳子厚

斯人望而敬者歟子厚始以童子有奇名于貞元初
至九年為名進士十有九年為材御史二十有一年
以文章稱首入尚書為禮部員外郎是歲以踈雋少
檢獲訕出牧邵州又謫佐永州居十年詔書徵不用
遂為柳州刺史五歲不得召病且革留書抵其友中
山劉某曰我不幸卒以謫死以遺草累故人某執書
以泣遂編次為三十通行于世子厚之喪昌黎韓退
之誌其墓且以書來弔曰哀哉若人之不淑吾嘗評
其文雄渾雅健似司馬子長崔蔡不足多也安定皇

甫混於文章少所推讓亦以退之之言為然凡子厚
名氏與仕與年暨行己之大方有退之誌若祭文
在今附于第一通之末云

董氏武陵集紀

片言可以明百意坐馳可以役萬景理工於詩者能之
風雅體變而興同古今調殊而理具達於諸詩者能
之工生於才達生於明二者還相為用而後詩道備矣
余常執斯評為公是且衡而度之誠懸乎心默揣群
才鈞銖尋尺隨限而盡如是所閱者百態一旦得董

生之詞杳如搏翠屏浮層瀾視聽所過過非風塵間物
亦猶明金絳羽得于遐裔雖欲勿寶可乎生名挺字
庶中幼嗜屬詩晚而不衰心源為鑪筆端為炭鍛鍊
元本彫警群形糾紛舛錯逐意奔走因故汙濁協為
新聲常所與遊皆青雲之士聞名如盧杜盧員外甫
杜員外甫
高韻如包李李包祭酒佶
李侍即紆迭以章句揚於當時末路寡
徒值余歡甚因相謂曰間身者以廷尉屬為荊州從事
移疾罷去幽卧於武陵迄今四年言未信於世道不
施於人寓其性懷播為吟詠時復蕞筭紛然盈前凡

五十篇因地為目吾子常號知我盍表而志之為生
羽翼余不得讓而著於篇因係之曰詩者其文章之
蘊耶義得而言喪故微而難能境生于象外故精而
寡和千里之謬不容秋毫非有的然之姿可使戶曉
必俟知者然後鼓行於時自建安距永明已還詞人
比肩唱和相蕝有以朔風零雨高視天下蟬噪鳥鳴
蔚在史策國朝因之粲然復興由篇章以躋貴任者
相踵而起兵興已還右武尚功公卿大夫以憂濟為
任不暇器人于文什之間故其風寢息樂府協律不

能足去声新詞以度曲夜諷之職寂寞無紀則董生
之貧卧於裔土也其不得於時者歟其不試故藝者
歟

澈上人文集紀

釋子工為詩尚矣休上人賦別怨約法尚書師哭范
尚書咸為當時才士之所傾歎厥後比有之上人生於
會稽本湯氏子聰察嗜學不肯為凡夫因辭父見出
家號靈澈字源澄雖受經論一心好篇章從越客嚴
維學為詩遂藉有聞去声維卒乃抵吳興與長老詩

僧皎然游講藝益至皎然以書薦于詞人包侍郎佶
包得之大喜又以書致于李侍郎紆是時以文章風
韻主盟于世者曰包李以是上人之名由二公而颺
如雲得風柯葉張王以文章接才子以禪理說高人
風儀甚雅談笑多味貞元中西遊京師名振輦下緇
流疾之造飛語激動中貴人因侵誣得罪徙汀州會
赦歸東越時吳楚間諸侯多賓禮招延之元和十一
年終于宣州開元寺七十有一門人遷之建塔于越
之山陰天柱之峯陰從本教也初上人在吳興居何

山與畫公為侶時皎然字畫行時予方以兩髦執筆硯陪
其吟詠皆曰孺子可教後相遇于京洛與支許之契
為上人沒後十七年予為吳郡其門人秀峯捧先師
之文來乞詞以志且曰師常在吳賦詩僅二千首今
刪取三百篇勒為十卷自大曆至元和凡五十年間
接詞客聞人酬唱別為十卷今也思行乎昭世求一言
羽翼之因為評曰世之言詩僧多出江左靈一導其
源護國襲之清江揚其波法振沿之如么弦孤韻瞥
入人耳非大樂之音獨吳興畫公能備象體畫公後
澈公承之至如芙蓉園新寺詩云經來白馬寺僧到
赤烏年謫汀州云青蠅為吊客黃耳寄家書可謂入
作者闡域豈獨雄于詩僧間耶

劉賓客文集卷第二十

傷我馬詞

口兵戒

猶子蔚適越戒

觀博

觀市

論書

劉氏集略說

名子說

奏記丞相府論學事

澤官詩

魏生兵要述

救沈志

傷我馬詞

馬龍類蓋健而善馳君子之所宜求為畧也故法求

於力或逸而喜駭法求於和或乾而易什由德稱者
鮮焉曩予知善馬之難遭也不求于肆而于其鄉一
旦果得陰山之阿蠖略其形蕭：其鳴長顧遠視順
而能力顧其軀非騫然而偉也雖士得以乘之始予
被皂衣于朝：之人多四三其壯以迭馭予無魚為
水轍之淋漓道途之汪洋結為确犖融為坳堂前有
僨輶後有濡裳我策垂空我鑣方揚振鬣軒昂矯如
飛翔翹：其雄也非力而何烈火之具舉鉤膺之疊
舞一蹊千趾駢比齟齬彥者斯擠悍者斯怒我鞍如

山我轡如組弭毛容與宛若孤處靡：其柔也非羸
而何前日子之獲譴于闕下背商顏趣昭丘日中而
喻舍修門之南非騎所宜夷則沮洳高則嗽巖虎吃
空林戴闐荒燄風雨孤征簡書之威俾予弗顛我馬
焉依屑：其勞也非德而何予至武陵居沅水傍或
踰月未嘗跨焉以故莫能伸其所長跼踖顧望兮頓
其鎖韁飲斲日削兮精耗神傷寒樞騷：兮瘁毛蒼
涼路聞躑躅兮逸氣騰驤朔雲深兮邊草遠意欲徃
兮聲不揚墮然似不得其所而死故其嗟也無常初

玄宗羈大宛而盡有名馬命典牧以時起居泊西幸
蜀徃：民間得其種而蕃為故良毛色者率非中土
類也稽是毛物豈祖於宛歟漢之歌曰龍為友武陵
有水曰龍泉遂歸骨于是川且弔之曰生于磧礪善
馳走萬里南來困丘阜青菰寒菽非適口病聞北風
猶舉首金臺已平骨空朽投之龍淵從爾友

口兵戒

余讀蒙莊書曰兵莫慘于志莫邪為下缺然知志士
之傷夫生也它日讀遠祖中壘壘校尉書曰口者兵也

盡然知言之為兵又慘乎志因博考前載極其兩端
夫志兵之薄人激烈抗憤不過無從容於世耳口兵
之起其刑渥焉繇是知吾祖之言為急作戒以書于
盤盂五月之傷藥之可平一言成病智不能明人或
惟兵道塗奔救投方效技思恐其後人或罹譖比肩
狐疑借有解紛毀輒隨之故曰舌端之孽慘乎楚鈇
夷竈誠謀執戈以驅掩人誠智折筭以詈賢者誨予
信其有旨蕝言之難伸舌猶爾辯為詐媒默為德基
玉櫝不啓為能瑕疵孽麋深居孰為可嗤戒哉我口

之啓爾心之門無為我兵當為我藩以慎為鍵以忍為
閤可以多食勿以多言

猶子蔚適越戒

猶子蔚晨跪于席端曰臣幼承叔父訓始句萌至于
扶疎前日不自意有司以名污賢能書又不自意被
丞相府召為從事重競累媿懼貽叔父羞今當行乞
辭以為戒余曰若知彛器乎始乎斲輪因入規矩剗
中廉外枵然而有容者理膩質堅然後加密石為風
戾日晞不副不聲

五交反

然後青黃之鳥獸之飾乎

瑤金貴在清廟其用也幕以養潔其藏也櫝以養光
苟措非其所一有毫髮傷僵僵然與破甑為伍矣汝之
始成人猶器之作朴是宜力學為龍斲親賢為青黃
睦僚友為瑤金忠所奉為清廟盡敬以為幕慎微以
為櫝去怠以護傷在勤而行之耳設有人思被重霄
而挹顛氣病無階而升有力者揭層梯而倚泰山然
而一舉足而一高非獨揭梯者所能也凡大位未嘗
曠故世多貴人唯天爵并者乃可偉耳夫偉人之一
顧踰乎華章而一非亦慘乎黥刑行矣慎諸吾見垂天

之雲在爾肩腋間矣昔吾友柳儀曹嘗謂吾友文雋而膏味無窮而灸愈出也遲汝到丞相府居一二日褻吾文入謁以取質焉丞相吾友也汝事所從如事諸父借有不如意推起敬之心以奉焉無忽

觀博

客有以博戲自任者速予觀焉初主人執握搦之器寘于廡下曰主進者要約之既揖讓即次有博齒二異乎古之齒其制用骨觚稜四均鏤以朱墨耦而合數取應期月視其轉止依以爭道是制也通行之久矣

莫詳所祖以其用必投擲故以博投詔之是日客抵骨于局且祝之曰其來如趨其去如脫事先趨趨命中無蹉跌無從彼呼無戾我恒分曹適迫自朝至于日中稷穀梁也而率與所祝異焉客視骨如有情焉如或馮焉悉詈之不泄又從而齧齧蹂躪之莫顧其卞目之哈讓也乃曰非予術之不工是朽骼者不予畀也請刷恥于奕碁主人促命燭以續之驚神默計巧竭智匱主進者書勝負之數于牘視其所喪又倍前籍焉觀者日以夫人之褊心亦將詬碁而抵枰矣

既乃恬而不恤赧然有失鵠求身之色人咸異之子
劉子曰先人者制人博投是已從人制于人枯槁是
已二者豈有數乎其間哉但處之勢異耳是知當軸
者易生嫌而退身者易為譽易生之嫌不足貶也易
為之譽不足多也在辨其所處而已

觀市

由命士已上不入於市周禮有焉乃今觀之蓋有因
也元和二年沅南不雨自季春至于六月毛澤將盡
郡守有志于民誠信而穹遂徧山川方社又不雨遂

遷市于城門之遠余得自鹿譙而俯焉肇下令之日
布市籍者咸至夾軌道而分次焉其左右前後班間
錯跣如在闈之制其列題匾榜揭價名物參外夷之
貨馬牛有繹私屬有閤在笥巾者織文及素焉在几
閣者彫彤及質焉在筐筥者白黑巨細焉業于饗者
列饗饕陳筵餌而必然業于酒者舉酒旗滌栝盃而
澤然鼓刀之人設膏俎解豕羊而赫然華實之毛豉
漁之生交蜚走錯水陸群狀夥名八隧而分韞藏而
待價者負挈而求沽者乘射其時者竒贏以遊者坐

賈顛：行賈違：利心中驚貪目不瞬于是質劑之曹較固之倫合彼此而騰躍之冒良苦之巧言數量衡于險手杪忽之差鼓舌僞俾詆欺相高詭態橫出鼓囂譁空烟埃奮羶腥疊巾履嚙而合之異致同歸鷄鳴而爭赴日中而駢闐萬足一心恐人我先交易而退陽光西徂幅員不移徑術如初中無救求隙地俱唯守犬烏鳥樂得腐餘是日倚衡而閱之三感其盈虛之相尋也速故著于篇云

論書

或問曰書足以記姓名而已工與拙何損益于數哉
荅曰此誠有之蓋舉下之說爾非蹈中之說亦猶言居室曰避燥濕而已言衣裳曰適寒燠而已言飲食曰充腹而已言車馬曰代勞而已言祿位曰代耕而已今夫考居室必以閤門豐屋為美筭衣裳必以文章道澤為甲評飲食必以精良海陸為貴第車馬必以華輶絕足為高干祿位必以重侯累封為意是數者皆不行舉下之說奚獨於書也行之邪禮曰士依於德游於藝德者何曰至曰敏曰孝之謂藝者何禮

樂射御書數之謂是則藝居三德之後而士必游之也書居數之上而六藝之一也語曰飽食終日無所用心難矣哉不有博奕者乎為之猶賢乎已是則博奕不得列於藝差愈于飽食無所用心耳吾觀今之人適有面詆之曰子書居下品矣其人必道爾而笑或謦然不屑詆之曰子握槊奕碁居下品矣其人必赧然而媿或艷然而色故是敢以六藝斥人不敢以六博斥人嗟乎衆尚之移人也問者曰然則彼魏晉宋齊間亦嘗尚斯藝矣至有君臣爭名父子不讓何哉

荅曰吾始欲求中道耳子寧以尚之之弊規我歟且夫信者美德也秦繆尚之而賢臣莫贖黃老者至道也竇后尚之而儒臣見刑道德且不可尚矧由道德以下哉者哉所謂中道而言書者何處之文學之下六博之上材鈞而善者得以加譽遇過一作鈞而善者得以以議能所加在乎譽非實也不黷于賞所議在乎過非實也不紊于刑夫如是庶乎六書之學不煙墜而已乎

子劉子曰五達之井百汲而盈科未必涼而甘所處之勢然也人之詞待扣而揚猶井之利汲耳始余為童兒居江湖間喜與屬詞者游謬以為可教視長者所行止必操觚從之及冠舉秀才一幸而中說有司懼不厭于衆函以口譽之長安中多循空言以為誠果有名字益與曹輩略魚于書林宵語途話琴酒調謔一出於文章俄被召為記室參軍會出師淮上恒磨墨于楯鼻或寢止群書中居一二歲由旬服升諸朝凡三進班而所掌猶外府或官課或為人所倩昌言

奏記移讓告諭莫神志葬咸猥并焉及謫于沅湘間為江山風物之所蕩往指事成歌詩或讀書有所感輒立評議窮愁著書古儒者之大同非高冠長劍之比耳前年蒙恩澤授以郡符居海壖多雨慝作適晴喜躬曬書于庭得已書四十通迫爾自哂曰道不加益焉用是空文為真可供醬蒙葉楮耳宅日子婿博陵崔生闕言曰某也鄉游京師偉人多問文人新書幾何且欲取去而某應無有輒媿起于顏間今當復西期有以弭媿者繇是刪去四之一為集略以貽

此即非敢行乎遠也

名子說

魏司空王昶名子制誼咸得立身之要前史是之然則書紳銘器孰若發言必稱之乎今余名爾長子曰咸允字信臣次日同廡字敬臣欲爾於人無賢愚於事無小大成推以信同施以敬俾物從而衆說其庶幾乎夫忠孝之於人如食與衣不可斯須離也豈俟余最哉仁義道德非訓所及可勉而企者故存乎名夫朋友字之非吾職也顧名旨所在遂從而釋之孝

始於親終于事君偕曰臣知終也

奏記丞相府論學事

十一月七日使持節都督夔州諸軍事夔州刺史劉某謹奏記相公閣下凡今能言者皆謂天下少士而不知養材之道鬱堙而不揚非天不生材也亦猶不耕者不歎廩庾之無餘非地不產百穀也伏以貞觀中增築學舍千二百區生徒三千餘人時外夷上疏請遣子弟入附于三雖者五國雖菁菁者莪育材之道不足比也今之膠庠不聞弦歌而室廬圯廢生徒

衰少非學官不欲振學也病無貲財以給其用餼生
今有一見使大學立富幸遇相公在位可以索言之
禮云凡學官春釋奠于其先師斯禮止于辟癰類宮
非及天下也今四海郡縣咸以春秋上丁有事孔子
廟其禮不應于古且非孔子意也炎漢初定群臣皆
起屠販為公卿故孝忠高后之間置原廟于郡國逮
孝元時韋玄成以碩儒為丞相遂建議罷之夫以子
孫尚不敢違禮以饗其祖况後學師先聖之道而首
違之乎祭義曰祭不欲數語云祭神如神在與其煩

於舊饗孰若行其教道今夫子之教日頽靡而以非
禮之祀媚之斯儒者所宜憤排也竊觀歷代無有是
事皇家武德二年詔於國學立周公孔子廟四時致
祭貞觀十一年又詔修宣尼廟於兗州至二十年許
敬宗等奏乃遣天下諸州縣置三獻官其他如方社
敬宗非通儒不能稽典禮開元中玄宗饗學與儒臣
議繇是發德音其罷郡縣釋奠牲牢唯酒脯以薦後
數年定令時王孫林甫為宰相不涉學委御史中丞
王敬從刊之敬從非文儒遂以明衣牲牢編在學令

是首失于敬宗而終失于林甫習以為常罕有敢非之者謹按本州四縣一歲釋奠物之直緡錢十六萬有奇舉天下之群縣當千七百不啻羈縻者不在數中凡歲中所出於經費過四千萬適資三獻官飾衣裳飴妻子而已於尚學之道無有補焉前日詔書許列郡守臣得以上言便事今謹條奏某乞下禮官博士詳議典制罷天下縣邑牲牢衣幣如有生徒春秋依開元敕旨用酒醴服脩膳脯棗示敬其事而州府許如故儀然後籍其資半附麗益所隸州使增學

校其半率歸國庠猶不下萬計築學室具器用豐簞食增掌固以備使令凡儒官各加稍食其紙筆鉛黃所出州率令折入學徒既備明經日課繕書若干紙進士命讐校亦如之則貞觀之風粲然不殊其它郡國皆立程督授級懷璽棧撲華：良可詠矣伏惟相公發迹咸自諸生其尊素王之道儀型四方宜在今日是以小生敢沿故事以奏記于左右姑舉其大較至於證據纖悉條奏具之章下之日乞留神省察不勝大願惶恐拜手稽首

澤宮詩

澤宮送士歲貢也晉昌唐如晦以信誼為良弓大學
為敢矢規爵祿猶衆禽密殼持滿逝風蜚繳者數矣
有措楛之妙而無獲鷁之獲韞弓收視歸究其術繇
是迹愈屈而名愈聞君子益多之彼不由其術一幸
而中者雖懸貆在廷君子未嘗多也歲殫矣告余以
西余為賦澤宮一章庶見子之弓弗再張也已秩秩
澤宮有的維鵠祁：庶士于以干祿彼鵠斯微若止
若翔千里之差起于毫芒我矢既直我弓既良依于

高墉因我不減高墉伊何維器與時視之以心誰謂
鵠微

魏生兵要述

余為書殿學士四年所與居皆鴻生彥士一旦詔下
懷吳郡章而東門下生成惜是行且曰吳中富士必
有知書宜為太守所禮者及下車閱客籍森然三千
有鉅鹿魏生持所著書來謁曰不佞始讀書為文章
凡二十年在貢士中孤鳴甚哀卒無善聽者退而收視
易慮伏北窻下考前言成兵要十編度諸侯未遑是

事將笈而西求一言以生羽翼予取書觀之始自黃
帝伏蚩尤至于隋氏平江南語春秋戰國事最備磅
礪下士上數千年間其攬摭評議無遺策用是以干
握兵符貴人宜有虛己而樂聞者子盍行乎吾知元
侯上舍不獨善鷄鳴歌長鋏王五九九之伎顛之而
已

救沈志

貞元季年夏大水熊武五溪鬪決于沅突舊防毀民
家躋高望之溟滓葩華山腹為坻林端如莎湍道駛

悍不風而怒崩疑前邁浸淫旁掩柔者靡之固者脫
之規者旋環之矩者倒顛之輕而泛浮者破磕之重
而高大者前却之生者力音殪者弛形蔽流而東若
木梯然有僧愀焉誓于路曰浮圖之慈悲救生最大
能援彼于溺我當為魁里中兒願從四三輩皆狎川
勇游者相與乘堅舟挾善器維以修紂杙于崇丘水當
洄湫人易冥力凝矚執用俟可而拯大凡室處之類
穴居之彙在牧之群在豢之馴上羅黔首下逮毛物
投乎洪瀾致諸生地者數十百焉適有擊獸如鷓夷

而前攫持流拚首用不陷隅目傍睨其姿弭然甚如
六擾之附人者其徒將取焉僧趣促訶之曰第無濟
是為目之可里所而不能有所持矣舟中之人曰吾
聞浮圖之數貴空：生普普生慈不求報施之謂空
不擇善惡之謂普不逆困窮之謂慈鄉也生必救而
今也窮見廢無乃計善惡而忘普與慈乎僧曰甚矣
問之迷且妄也吾之教惡乎無善惡哉六塵者在身
之不善也佛以賊視之未伽聲聞者在彼之未寤也
佛以邪目之惡乎無善惡邪音鄉也所援而出死地

者衆矣形乾氣還各復本狀蹄者躑躅然羽者翹蕭
然而言者譏：然隨其所之吾不尸其施也不德吾
則已烏能害為被形之乾髮鬚之姿也彼氣之還暴
悖之用也心足反噬而齒甘最靈是必肉吾屬矣庸
能躑躅譏之之比歟夫虎之不可使知恩猶人之不
可使為虎也非吾自貽患焉爾且將貽患于衆多吾
罪大矣乎劉子曰余聞善人在患不救不祥惡人在
位不去亦不祥僧之言遠矣故志之

劉賓客文集卷第二十一

雜興三十一首

學阮公體三首

少年負志氣信道不從時只言繩自直安知室可欺
百勝難慮敵三折乃良醫人生不失意烏能慕已知
朔風悲老驥秋霜動鷲禽出門有遠道平野多層陰
滅沒馳絕塞振迅拂華林不因感哀節安能激壯心
昔賢多使氣憂國不謀身目覽千載事心交上古人
侯門有仁義靈臺多若辛不學腰如磬徒使甑生塵

偶作二首

終朝對尊酒嗜與非嗜甘終日偶衆人縱言不縱談
世情閒盡見藥性病多諳寄謝嵇中散予無甚不堪
萬卷堆牀書學者識其真萬里長江水征夫度要津
養生非但藥悟佛不因人燕石何須辨逢時即至珍

古調二首

一作
諷古

軒后初冠冕前旒為蔽明安知從複道然後見人情
簿領乃俗士清談信古風吾觀蘇令綽朱墨一何工

寓興二首

常談即至理安事非常情寄語何平叔無為輕老身
世途多禮教鵬鷃各逍遙何事陶彭澤拋官為折腰

昏鏡詞并引

鏡之工列十鏡于賈區發奩而視其一皎如其九霧
如或曰良苦之不侔甚矣工解頥謝曰非不能盡良
也蓋賈之意唯售是念今來市者必歷鑿周睽求與
已宜彼皎者不能隱芒杪之瑕非美容不合是用什
一其數也予感之作昏鏡詞

昏鏡非美金漠然喪其晶陋客多自欺謂若他鏡明

瑕疵既不見妍態隨意生一日四五照自言美傾城
飾帶以文繡裝匣以瓊瑛秦宮豈不重非適乃為輕

養鷺詞并引

途逢少年志在逐絕方呼鷹隼以襲飛走因縱觀之
卒無所獲行人有常從事於斯者曰夫鷺禽飢則為
用今哺之過篤故然也予感之作養鷺詞
養鷺非玩形所資擊鮮力少年昧其理日月哺不息
探雛網黃口旦莫有餘食寧知下韝時翅重飛不得
毳毳止林表狡兔自南北飲啄既已盈安能勞羽翼

武夫詞并引

有武夫過詫余以從軍之樂翌日質于通武之善經
者則曰果有樂也夫威恣而賞勞則樂用威雌而賞
武則樂橫去聲顧其樂安出耳予惕然作是詞
武夫何洗、衣紫襲絳裳借問胡為爾列校在鷹揚
依倚將軍勢交結少年場探丸害公吏袖刃妒名倡
家產既不事顧眄自生光酣歌高樓上袒裼大道傍
昔為編戶人秉耒甘哺糠今來從軍樂躍馬飲持梁
猶思風塵起無種取侯生

賈客詞并引

五方之賈以財相雄而鹽賈尤熾或曰賈雄則農傷
予感之作是詞

賈客無定遊所遊唯利并眩俗雜良苦乘時取重輕心計
析秋毫捶鉤倂懸衡錐力既無棄轉化日已盈徼福
禱波神施財遊化城妻約雕金釧女垂貫珠纓高貲
比封君竒貨通倖鄉趨時鷲鳥思藏鏹盤龍形大觚
浮通川高樓次旗亭行止皆有樂閑梁自無征農夫
何為者辛苦事寒耕

調瑟詞并引

里有富豪翁厚自奉養而嚴督減獲力屈形削然猶
役之無甄極一旦不堪命亡者過半追亡者亦不來
復翁頽沮而追昨非之莫及也予感之作調瑟詞
調瑟在張弦之平音自足朱絲二十五闕一不成曲
美人愛高張瑤軫再三促上弦雖獨嚮下應不相屬
日莫聲未和寂寥一枯木却頽膝上弦流淚難相續

讀張曲江集作并引

世稱張曲江為相建言放臣不宜與善地多徙五溪

不毛之鄉及今讀其文自內職牧始安有瘡癘之歎
自退相守荆門有拘囚之思託諷禽鳥寄詞草樹鬱
然與騷人同風嗟夫身出於遐陬一失意而不能堪矧
華人士族而必致醜地然後快意哉議者以曲江為
良臣識胡雛有反相羞凡器與同列密啟廷爭雖古
哲人不及而燕翼無似終為餒魂豈忮心失恕陰謫
最大雖二美莫贖邪不然何袁公一言明楚獄而鍾
社四葉以是相較神可誣乎予讀其文因為詩以吊
聖言貴忠恕至道重觀身法在何所恨色傷斯為仁

良時難久恃陰謫豈無因寂寞韶陽廟魂歸不見人

庭梅詠寄人

蚤花常犯寒繁實常若酸何事上春日坐令芳意闌
天桃定相笑遊妓肯回看君問調金鼎方知正味難
詠古二首有所寄

車音想鞞、不見綦下塵可憐平陽第歌舞嬌青春
金屋容色在文園詞賦新一朝復得幸應知失意人
寂、照鏡臺遺基古南陽真人昔來遊翠鳳相隨翔
目成在桑野志遂貯椒房豈無三千女初心不可忘

詠史二首

驃騎非無勢，少卿終不去。
世道劇頽波，我心如砥柱。
賈生明王道，衛綰工車戲。
同遇漢文時，何人居貴位。
苦兩行

悠悠飛走情，同樂在陽和。
歲中三百日，常恐風雨多。
天人信遐遠，時節易蹉跎。
洞房有明燭，無乃酣且歌。
萋兮吟

天涯浮雲生，爭蔽日月光。
窮巷秋風起，先摧蘭蕙芳。
萬貨列旗亭，恣心注明璫。
名高毀所集，言巧智難防。

勿謂行大道，斯須成太行。
莫吟萋兮什，徒使君子傷。

經檀道濟壘

萬里長城壞，荒營野草秋。
秣陵多士女，猶唱白符鳩。

史云當時人歌曰可憐
白符鳩枉殺檀江州

題歌噐圖

秦國功成思稅駕，晉臣名遂歎危機。
无因上蔡牽黃犬，願作丹徒一布衣。

聚蚊謠

沈：夏夜閑堂開，飛蚊伺暗聲。
如雷嘈然歔，起初駭

聽殷：若自南山來喧騰鼓舞喜昏黑味者不分聰
者惑露花滴瀝月上天利嘴迎人看不得我軀七尺
爾如芒我孤爾衆能我傷天生有時不可遏為爾設
幄潛匡林清商一來秋日曉羞爾微形飼丹鳥

百舌吟

曉星寥落春雲低初聞百舌間闕啼花樹滿空迷處
所搖動繁英墜紅兩筵黃百轉音韻多黃鸝吞聲燕
無語東方朝日遲々升迎風弄景如自矜數聲不盡
又飛去何許相逢綠楊路絲蠻宛轉似娛人一心百

舌何紛々醜顏俠少停歌聽墜珥妖姬和睡聞可憐
光景何時盡誰能低回避鷹隼廷尉張羅自不閑潘
郎挾彈無情損天生羽族爾何微舌端萬變乘春輝
南方朱鳥一朝見索漠無言蒿下飛

飛鳶操

鳶飛杳々青雲裏鳶鳴蕭々風四起旗尾飄揚勢漸
高箭頭砮劃聲相似長空悠々霽日懸六翮不動凝
飛烟遊羈朔鴈出其下度雲清景相回旋忽聞飢鳥
一噪聚瞥下雲中爭腐鼠騰音厲吻相喧呼仰天大

嚇疑鴛鴦畏人避犬投高處俛吻無聲猶屢頷青鳥
自愛玉山禾仙禽徒貴華亭露撲棟危巢向暮時
毳飽腹蹲枯枝遊童扶彈一麾肘臆碎羽分人不悲
天生衆禽各有類威鳳文章在仁義鷹集儀形蝼蟻
心雖能戾天何足貴

秋螢引

漢陵秦苑遙蒼蒼陳根腐葉秋螢光
夜空寂寥金氣淨千門九陌飛悠揚
紛綸暉映互明滅金鑪星噴鐙
花發露華洗濯清風吹攢昂不定
招搖垂高麗果愚

過珠網斜歷璇題舞羅幌
暴衣樓上拂香帚承露臺
前轉仙掌槐市諸生夜對書
北窓分明辨魯魚行子
東山起征思中郎騎省悲
秋氣銅省人歸自入簾長
門帳開來照淚誰言向晦常自明
童兒走步嬌女爭
天生有光非自衛遠近低昂暗中見
撮蚊袂鳥亦夜
飛翅如車輪人不見

華山詩

洪鑪作高山元氣鼓其橐俄然神功就
峻拔在寥廓
靈蹤露指爪殺氣見稜角凡木不敢生
神仙聿來託

天資帝王宅以我為關鑰能令下國人一見換人骨
高山固無限如此方為嶽丈夫無特達雖貴猶碌

摩鏡篇

流塵翳明鏡歲久看如漆門前負局生為我一摩拂
草開綠池滿暈盡金波溢日照空心圓光走幽室
山神祇氣沮野魅真形出却思未摩時瓦礫來唐突

有懶吟

有懶得嘉魚自謂天見憐先祭不敢食捧鱗望清玄
人立寒沙上心專脰肩肩漁翁以為妖舉塊投其前

荆川太史紙

呼兒貫魚歸與懶同烹煎閔：黃金鷄大翅搖江煙
下見盈尋魚投身擘洪漣攫挈隱嶙去哺雛林岳巔
鷓鴣欲伺隙遙噪莫敢前長居青雲路彈射無由緣
何地無江湖何水無鮪鱸天意不宰割非祭徒虔：
空餘知禮重載在淹中篇

劉賓客文集卷第二十二

五言今體三十首

春日退朝

紫陌夜來雨南山朝下看
戟枝迎日動閣影助松寒
瑞氣卷綃縠遊光泛波瀾
御溝新柳色處處拂歸鞍
經東都安國觀九仙公主舊院作

仙院御溝東今來事不同
門開青草日樓閉綠楊風
將犬昇天路披霓赴月宮
武皇曾駐驛親問主人翁

蜀先主廟

漢末謠黃牛白腹五銖當復

天下英雄氣千秋尚凜然勢分三足鼎業復五銖錢
得相能開國生兒不象賢淒涼蜀故妓來舞魏宮前

觀八陳圖

軒皇傳上略蜀相運神機水落龍蛇出沙平鵝鶴飛
波濤無動勢鱗介避餘威會有知兵者臨流指是非

八月十五日夜玩月

天將今夜月一遍洗寰瀛暑退九霄淨秋澄萬景清
星辰讓光彩風露發晶英能變人間世脩然是玉京

許給事見示哭工部劉尚書詩因命同作

漢室賢王後

從叔望在河間

孔門高第人濟時成國器樂道

任天真特達圭無玷堅貞竹有筠總戎寬得衆市義

貴能貧護塞無南牧馳心拱北辰乞身來闕下賜告

卧漳濱榮耀初題劔清羸已抱紳宮星徒列位隙日

不回輪自昔追飛侶今為侍從臣素弦哀已絕青簡

歎猶新未遂揮金樂空悲撤瑟晨淒涼竹林下無復

見清塵

從叔自渭北節度以疾歸朝
比及拜尚書竟不克中謝

奉和中書崔舍人八月十五日夜玩月二

莫景中秋爽陰靈既望圓騰精浮碧海分照接虞淵
迥見孤輪出高從倚蓋旋二儀含皎澈萬象共澄鮮
整御當西陸舒光麗上玄從星變風雨順日助陶甄
遠近同時望晶熒此夜偏運行調玉燭潔白應金天
曲沼疑瑤鏡通衢若象筵逢人盡冰雪遇境即神仙
引素吞銀漢凝清洗綠烟皋禽警露下鄰杵思風前
水是還珠浦山成種玉田劒沈三尺影鐙罷九枝然
象外行無迹寰中影有遷稍當雲闕正未映斗成懸
靜對揮宸翰閑臨璧彩牋境同牛渚上宿在鳳池邊

典掩尋安道詞勝命仲宣從今紙貴後不復詠陳篇

奉和淮南李相公蚤秋即事寄成都武相公

八柱共承天東西別隱然遠夷爭慕化真相故臨邊

並進夔龍位仍齊龜鶴年相公詩有齊年並進之白也同心丹已

濟造膝璧常聯對領專征寄遙持造物權斗牛添氣

色并絡靜氛烟獻可通三畧分甘出萬錢漢南趨節

制趙北賜山川玉帳觀渝舞虹旌獵楚田步嫌雙綬

重夢入九城偏秋與離情動詩從樂府傳聆音還竊

抃不覺抚么弦李中書自揚州見示詩本因命仰和

元和癸巳歲仲秋詔發江陵偏師問罪蠻
徼後命宣慰釋兵歸降凱旋之辰率爾成
詠寄荆南嚴司空

蠻水阻朝宗兵符下渚宮前籌得上策無戰已成功
漢使星飛入夷心草偃同歡謠開竹棧拜舞擲桑弓
就日知冰釋投人念鳥窮網羅三面解章奏九門通
卉服聯操袂雕題盡鞠躬降幡秋練白驛騎晝塵紅
火號休傳警机橋罷亘空登山不見虜振旆自生風
江遠煙波靜軍回氣色雄佇看聞喜後金石賜元戎

武陵書懷五十韻并引

按天官書武陵當翼軫之分其在春秋及戰國時皆
楚地後為秦惠王所拜置黔中郡漢興更名曰武陵東
徙于今治所常林義陵記云初項籍殺義帝于郴武
林人曰天下憐楚而興今吾王何罪乃見殺郡民縞
素哭于招屈亭高祖問而義之故亦曰義陵今郡城
東南亭舍其所也晉宋齊梁間皆以分王子弟事存
于其書永貞元年余始以尚書外郎出補連山守道
貶為是郡司馬至則以方至所載而質諸其人民願

山川風物皆騷人所賦乃其所聞見而成是詩因自述其出處之所以然故用書懷為目云

西漢開支郡南朝號威藩四封當列宿百雉俯清沅
高岸朝霞合驚湍激箭奔積陰春暗度將霽霧先昏
俗尚東皇祀謠傳義帝冤桃花迷隱迹棟葉慰忠魂
戶筭資漁獵鄉豪恃子孫哭山畬火動蹋月俚歌喧
擁檝舟為市連薨竹覆軒披沙金粟見拾羽翠翹翻
茗拆滄溪秀蘋生枉渚暄滄溪茶為邑人所禽驚格重枉渚近在郭東
磔起魚戲噉喙繁按本草經曰鷓鴣聲如釣輞格磔者是也沈約臺榭故

李衡墟落存隱侯臺木如州並在湘靈悲鼓瑟泉客泣酬恩露

變蕪葭浦星懸橘袖村虎咆空野震鼉作滿川渾隣
里皆遷客兒童習左言炎天無冽井霜月見芳蓀清
白家傳遺詩書志所敦列科叨甲乙從宦出兵樊結
友心多契馳聲氣尚吞士安曾重賦元禮許登門草
檄嫖姚幕巡兵戍已屯築臺先自隗送客獨留髡遂
結王畿綬來觀嚮室尊鳶飛入鷹隼魚目儷璵璠曉
燭羅馳道朝陽闕帝閣王正會夷夏月朔盛旗幡獨
當瑤闕傳訶步紫垣按章清行獄視祭潔蘋蘩

曆昌期遠傳家室祚蕃繇文光夏啟神教畏軒轅內
禪因天性膺圖授化元繼明懸日月出震統乾坤大
孝三朝備洪恩九族悖百川宗渤海五岳輔崑崙何
幸逢休運微班識至尊校緝資筦榷復士奉山園以時
本官判度支監鉄一失貴人意徒聞大學論直廬辭
等兼宗陵使判官錦帳遠守愧朱轡巢幕方猶燕捨榆尚笑鯤遭回過
荆郢流落感涼温旅望花無色愁心醉不昏春江千
里草莫雨一聲猿問卜安冥數看方理病源帶賒衣
改制塵澀劔成痕三秀悲中散二毛傷虎賁來憂禦魑

魁歸願牧雞豚就日秦京遠臨風楚奏煩南登無灞
岸旦夕上高原

經伏波神祠

蒙、篁竹下有路上壺頭漢壘磨艷鬪蠻溪霧雨愁
懷人敬遺像閱世指東流自負霸王略安知恩澤侯
鄉園辭石柱筋力盡炎洲一以功名累翻思馬少遊

聞董評事疾因以書贈董生奉
內典

繁露傳家學青蓮譯梵書火風垂四大文字廢三餘
歎枕晝眠晚折中秋鬢踈武皇恩視草誰許茂陵居

贈澧州高大夫司馬霞寓

前年收錦城馬蹋血泥行千里追戎首三軍許勇名
殘兵疑鶴唳空壘辨烏聲一誤雲中級南游湘水清

宿誠禪師山房題贈二首

宴坐白雲端清江直下看來人望金刹講席繞香壇
虎嘯夜林動鼉鳴秋澗寒衆音徒起滅心在淨中觀
不出孤峯上人間四十秋視身如傳舍閱世甚東流
法為因緣立心從次第修中宵問真偈有住是吾憂

晚泊牛渚

蘆葦晚風起秋江鱗甲生殘霞忽改色遊鴈有餘聲
戍鼓音響絕漁家燈火明無人能詠史獨自月中行

罷郡歸洛陽閑居

十年江外守旦夕有歸心及此西還日空成東武吟
花間數盞酒月下一張琴聞說功名事依前惜寸陰

城東閑遊

借問池臺主多居要路津千金買絕境永日屬閑人
竹逕縈紆入花林委曲巡斜陽衆客散空鎖一園春
罷郡歸洛陽寄友人

遠謫年猶少初歸鬢已衰門閑故吏去室靜老僧期
不見蜘蛛集頻為俚句欺穎微囊未出寒甚谷難吹
渡落唯心在平生有已知商歌夜深後聽者竟為誰
陝州河亭陪常五大夫雪後眺望因以留
別與常有布衣之舊一別二紀經遷貶而

歸

雪霽大陽津城池表裏春河流添馬頰原色動龍鱗
萬里獨歸客一栝逢故人因高向西望閑路正飛塵

途中蚤發

中庭望啟明促々事晨征寒樹鳥初動霜橋人未行
水流白煙起日上彩霞生隱士應高枕無人問姓名

初至長安

時自外郎
再授郎官

左遷凡二紀重見帝城春老大歸朝客平安出嶺人
每行經舊處却想似前身不改南山色其餘事々新
大和戊申歲大有年詔賜百寮出城觀秋
稼謹書盛事以俟采詩者

長安銅雀鳴秋稼與雲平玉燭調寒暑金風報順成
川原呈上瑞恩澤賜閑行欲及重城掩猶聞歌吹聲

蚤秋集賢院即事時為學士

金數已三伏火星正西流樹含秋露曉閣倚碧天秋
灰琯應新律銅壺添夜籌商飈從朔塞爽氣入神州
蕙草香書殿槐花點御溝山明真色見水淨濁煙收
蚤歲忝華省再來成白頭幸依郡王府有路向瀛州

金陵懷古

潮滿冶城渚日斜征虜亭蔡洲新草綠幕府舊煙青
興廢由人事山川空地形後庭花一曲幽怨不堪聽

晝居池上亭獨吟

日午樹陰正獨吟池上亭靜看蜂教誨閑想鶴儀形
法酒調神氣清琴入性靈浩然機已息几杖復何銘

分司東都蒙襄陽李司徒相公書問因以
奉寄

蚤忝金馬客晚為商洛翁知名四海內多病一生中
舉世徃還盡何人心事同幾時登峴首特舊揖三公
奉和吏部楊尚書太常李卿二相公策免
後即事述懷贈答十韻

文雅閔西族衣冠趙北都有聲真漢相無類勝隋珠

當軸龍為友臨池鳳不孤九天開內殿百辟看晨趨
誠滿澄歌器成功別大鑪餘芳在公論積慶是神扶
步武離台席徊翔集帝梧銓村秉秦鏡典樂去齊筭
蕭灑風塵外逢迎詩酒徒唯應待華皓更入萬錢厨
門下相公榮加冊命天下同歡忝沐眷私
輒敢申賀

冊命出宸衷官儀自古崇特膺平土拜光贊格天功
再佩扶陽印常乘鮑氏驄七賢遺老在猶得詠清風

病中一二禪客見問因以謝之

勞動諸賢者同來問病夫添鑪擣雞舌灑水淨龍鬚
身是芭蕉喻行須印竹扶醫王有妙藥能乞一丸無

劉賓客文集卷第二十三

古調十六首

登司馬錯故城

秦昭王命錯征五溪蠻城在武陵沅江南

將軍將秦師西南奠遐服故壘清江上蒼煙晦喬木

登臨值蕭辰周覽壯前躅整平陳葉滿墉高秋蔓綠

廢井抽寒菜毀臺生槽穀耕人得古器宿雨多遺鏃

楚塞鬱重疊蠻溪紛結曲留此數仞基幾人傷遠目

卧病聞常山旋師策勳宥過王澤大洽因

寄李六侍御

寂寂重寂：病夫卧秋齋，夜蟲思幽壁，槁葉鳴空階。
南國異氣候，火旻尚昏霾，瘴烟跼飛羽，沴氣傷百骸。
昨聞凱歌旋，飲至酒如淮，無戰陋丹水，垂仁經藁街。
清廟既策勳，圓丘俟燔柴，車書一以混，幽遠靡不懷。
懷逐客，顛顛久，故鄉雲雨垂，禽魚各有化，予欲問齊諧。

謁枉山會禪師

我本山東人，平生多感槩，弱冠遊咸京，上書金馬外。
結交當世賢，馳聲溢四塞，勉修貴及蚤，狃捷不知退。

錙銖揚芬馨，尋尺招瑕類，淹留郢南鄙，摧積羽翰碎。
安能咎往事，且欲去沈疴，吾師得真如，自在人寰內。
哀我墮名網，有如翮飛輩，瞳：捐智炬，照使出昏昧。
靜見玄閔啟，歆然初心會，夙上一何微，今得信可大。
覺路明證入，便門通懺悔，悟理言自忘，處屯道猶泰。
色身豈吾宝，慧性非形礙，思此靈山期，未來何年載。

善卷壇下作

在枉山上

先生見堯心，相與去九有，斯民既已治，我得安林藪。
道為自然貴，名是無窮壽，瑤壇在此山，識者常回首。

武陵觀火詩

楚鄉祝融分災火常為虞是時直突烟發自晨炊徒
盲風扇其威白晝熏陽烏操纆不暇汲循墻寧避踰
怒如列缺光迅與棼輪俱聯延掩四達赫奕成洪鑪
洵疑雲濤翻颯若鬼神趨當前迎炊艸是物同膏腴
金烏入梵天赤龍遊玄都騰烟透窓戶飛焰生欒櫺
火山推半空星雨灑中衢瑤壇被髹漆寶樹攢珊瑚
花縣與琴焦旗寧無酒濡市人委百貨邑令遺雙鳧
餘勢下隈隩長燂烘舳艫吹熒照水府炙浪愁天吳

災罷雲日晚心驚視聽殊高灰辨廩庾黑土連闔閭
衆燼合星羅遊氛鑠人膚厚地藏宿熱遙林呈驟枯
火德資生人庸可一日無御之失其道猷石彌天隅
晉庫走龍劍吳宮傷燕雛五行有沴氣先哲垂訐謨
宋鄭同日起時當賢大夫無苛自可樂弭患非所圖
賢守恤人瘼臨烟駐驪駒帛傷色慘怛唁失詞劬愉
下令蠲里布指期輕市租開垣適未立苦蓋自相娛
山木行翦伐江泥宜瑾塗魯臣不必葺何用徵越巫
崔元受少府自貶所還遺山薑花以詩之荅

故人博羅尉遺我山薑花彩從碧海上來自謫僊家
雲濤潤孤根陰火照晨葩淨搖扶桑日豔對瀛洲霞
世人愛芳辛攀擷忘幽遐傳名八帝里飛駟辭天涯
王濟本尚味石崇方鬪奢雕盤多不識綺席乃增華
驛馬損筋骨貴人滋齒牙願予藜藿士持此空嘆嗟

途中蚤發

馬躡塵上霜月明岡頭路行人朝氣銳宿鳥相辭去
流水隔遠村縵山多紅樹悠：閑塞內未往無閑步

和董庶中古散調詞贈尹果毅

昔聽東武吟壯年心已悲如何今獲落聞君苦辛辭
言有窮巷士弱齡頗尚竒讀得玄女符生當事邊時
借名遊俠窟結客幽拜兒往來長楸間能帶雙鞬馳
崩騰天寶末塵暗燕南垂燿火入咸陽詔徵神武師
是時占軍募挿羽揚金羈萬夫列轅門觀射中戟支
誓當雪國讐親愛從此辭中霄倚長劔起視蚩尤旗
介馬晨蕭：陳雲竟天涯陰風獵白草旗掣光參差
勇氣貫中腸視身忽如遺曾擒白馬將虜騎不敢追
貴臣上戰功名姓隨意移終歲肌骨苦他人印纍：

謂者既清宮諸侯各罷戲上將賜北第門戟不可窺
昔血下沾襟天高問無期却尋故鄉路孤影空相隨
行逢里中舊樸邀肯所嗤一言合侯王膏佩黃金龜
問我何自苦可憐真數竒遲回顧徒御得色懸雙眉
翻然悞世途抚已昧所宜田園已蕪沒流浪江海湄
鷲禽毛翮摧不見翔雲姿哀容蔽逸氣子子無人知
寂寞草玄徒長吟下書帷為君發哀韻若扣瑶林枝
有客識其真潺湲涕交頤勸爾一杯酒陶然足自怡

望衡山

東南倚蓋卑維嶽資柱石前當祝融居上拂朱鳥翮
青冥結精氣磅礴宣地脉還聞虜寸陰能致彌天澤

遊桃源一百韻

沅江清悠々連山鬱岑寂回流抱絕巘皎鏡含虛碧
昏旦遞明媚烟嵐紛委積香蔓垂綠潭暴龍照孤磧

山下潭名綠蘿磧名暴龍

淵明著前志子驥思遠

子驥事見陶先生本記磧

寂々無何鄉密爾天地隔金行太元歲漁者偶探頤
尋花得幽蹤窺洞穿閣隙依微聞雞犬豁達值阡陌
居人互將迎笑語如平昔廣樂雖交奏海禽心不懌

揮手一來歸故溪無處覓繇：五百載市朝幾遷華
有路在壺中無人知地脉皇家感至道聖祚自天錫金

闕傳本枝玉函留寶曆禁山開祕宇復戶潔靈宅

詔

二十戶免徭藥檢香氣氲醮壇烟幕幕我來塵外躅

瑩若朝醒析崖轉對翠屏水窮留畫鷁三休俯喬木

千級攀峭壁旭日聞撞鐘綵雲迎躡屐遂登最高頂

縱目還楚澤平湖見草青遠岸連霞赤幽尋如夢想

繚思屬空閨寅緣且忘疲耽玩近成癖清猿伺曉發

瑤草陵寒坼祥禽舞葱龍珠樹搖玳瑁羽人顧我笑

勸我稅歸輓霓衣何飄颻童顏潔白哲重巖是藩屏

馴鹿受羈勒樓居邇清霄蘿薦成翠帟仙翁遺竹杖

王母留桃核姹女飛丹沙青童護金液寶氣浮鼎耳

神光生劔脊虛無天樂來憇宰鬼兵役丹丘肅朝禮

玉扎五紬繹枕中淮南方牀下阜鄉烏明鐙坐遙夜

幽籟聽浙瀝因話近世僊聳然心神惕乃言瞿氏子

骨狀非凡格徃事黃先生群兒多侮劇瞿然不屑意

元氣貯肝鬲徃：遊不歸洞中觀博奕言高未易信

猶復加訶責一旦前致辭自云仙期迫言師有道骨

前事嘗被謫如今三山上名字在真籍悠然謝主人
後歲當來覲言畢依庭樹如烟去無迹觀者皆失次
驚追紛絡繹日莫山逕窮松風自蕭槭適逢修蛇見
瞑目光激射如嚴三清居不使恣搜索唯餘步網勢
八趾在沙磔至今東北隅表以壇上石列仙徒有名
世人非目擊如何庭廡際白日振飛翮洞天豈幽遠
得道如咫尺一氣無死生三光自遷易因思人間世
前路何湫窄瞥然此生中善祝期滿百大方播群類
秀氣肖翕闢性靜本同和物牽成阻阨是非闔方寸
葷血昏精魄遂令多天傷猶喜見班白喧々車馬馳
苒々桑榆夕共安緹繡榮不悟泥途適紛吾本孤賤
世業在逢掖九流宗指歸百氏旁擴摭公卿偶慰荐鄉
曲謬推擇居安白社貧志傲玄纁辟功名希自取簪
組俟揚歷書府蚤懷鈇射宮曾發的起草香生帳坐
曹烏集柏賜宴聆簫韶侍詞閱琮璧嘗聞履忠信可
以行巒陌自迷希古心妄恃千時畫巧言忽成錦苦
志徒食蘖平地生峯岫深心有矛戟會波一震盪弱
植果淪溺北渚弔靈均長岑思亭伯禍來味幾兆事

去空歎惜塵累與時深流年隨漏滴才能疑木鴈報
施迷夷跼楚奏繁鍾儀商歌勞甯戚稟生非懸解對
境方感激自從嬰網羅每事問龜策王正降雷雨環
玦賜遷斥儻復夷平人誓將依羽客買山構精舍領
徒開講席冀無身外憂自有閑中益道牙期日就塵
慮乃冰釋且欲遺姓名安能慕竹帛長生尚學致一
漑豈虛擲芝朮資糗糧煙霞拂巾幘黃石履看墮洪
崖肩可拍聊復嗟蟬蟀何頻哀虺蜴青囊既深味瓊
葩亦屢摘縱無西山姿猶免長戚戚

客有為余話登天壇遇雨之狀因以賦之

清晨登天壇半路逢陰晦疾行穿雨過却立視雲背
白日照其上風雷走于內混濛雪海翻槎牙玉山碎
蛟龍露鬣鬣神鬼含變態萬狀互生威百音以繁會
俯觀群動靜始覺宇天大山頂自澂明人間已霧霏
豁然重昏歛渙若春冰潰及照入松門瀑流飛縞帶
遙光泛物色餘韻吟天籟洞府撞仙鍾村墟起夕靄
却見山下侶已如迷世代問我何處來我來雲雨外

有僧言羅浮事因為詩以寫之

君言羅浮上容易見九垓漸高元氣壯洶湧來翼身
夜宿最高峯瞻望浩無鄰海黑天宇曠星辰來逼人
是時當臄魄陰物恣騰振日光吐鯨背劍影開龍鱗
倏若萬馬馳旌旗聳齟淪又如廣樂奏金石含悲辛
疑其有巨靈怪物盡來賓陰陽迭用事乃俾夜作晨
呶喔天雞鳴扶桑色昕々赤波千萬里踴出黃金
下視生物息霏如隙中塵醜雞仰鸞口亦謂雲漢津
世人信耳目方寸度大鈞安知視聽外怪愕不可陳
悠々想大方此來栢水濱知小天地大安能識其真

秋江蚤發

輕陰迎曉日霞霽秋江明草樹含遠思襟懷有餘清
凝睇萬象起朗吟孤憤平渚鴻未矯翼而我已遐征
因思市朝人方聽晨雞鳴昏々恋衾枕安見元氣英
納爽耳目變玩竒筋骨輕滄洲有竒趨浩蕩吾將行

裴祭酒尚書見示春歸城南青松塢別墅

寄王左丞高侍郎之什命同作

蚤宦閱人事晚懷生道機時從學省出獨望郊園歸
野約度春水山花映巖扉石頭解金章林下步綠薇青

松鬱成塢修竹盈尺園吟風起天籟蔽日無炎威危
逕盤羊腸連甍聳翬飛幽谷響樵斧澄潭環釣矧因
高見帝城冠蓋揚光輝白雲難持寄清韻投所希二
公如長離比翼翔太微含情謝林壑酬贈駢珠璣頌
予九卽潛愁寂對芳菲一聞丘中趣再托黃金微

和河南裴尹侍郎宿齋太平寺詣九龍祠

祈雨二十韻

有事九龍廟絜齋梵王祠玉簫何時絕碧樹空涼颺
吏散埃慄息月高庭宇宜重城肅穆閑澗水潺湲時

人稀夜復閑慮靜境亦隨紈懷斷鼇足凝想乘鳶姿
朱明盛農節膏澤方愆期瞻言五靈瑞能救百穀萎
呬喔晨雞鳴門干斗柄垂修容謁神像注意陳正詞
驚颿起泓泉若召雷雨師黑烟聳鱗甲灑漚如棼絲
豐隆震天衢列缺揮火旗炎空忽淒緊高雷懸綆縻
生物已霽霈濕雲稍離披丹霞啟南陸白水含東菑
熙々飛走適藹々草樹滋浮光動宮觀遠思盈川坻
吳公敏于政謝守工為詩商山有病客言賀舒厖眉
冬夜宴河中李相公中堂命箏歌送酒

朗：鷓鴣弦華堂夜多思簾外雪已深坐中人半醉
翠娥發清響曲盡有餘意酌我莫憂狂老來無逸氣

劉賓客文集卷第二十三

劉賓客文集卷第二十四

七言五十六首

西塞山懷古

西晉樓船下益州金陵王氣漠然收
尋鐵鎖洗江底一片降幡出石頭
人世幾回傷往事山形依舊枕寒流
今逢四海為家日故壘蕭蕭蘆荻秋

陽山廟觀賽神

梁松南征至此遂為其神在朗州

漢家都尉舊征蠻血食如今配此山
曲蓋幽深蒼檜下洞蕭愁絕翠屏間
荆巫脉脉傳神語野老婆啟

醉顏日落風生廟門外幾人連蹋竹歌還

漢壽城春望

古荆州刺史治亭其下有子胥廟兼楚王故坟

漢壽城邊野草春荒詞古墓對荆榛田中牧豎燒芻
狗陌上行人看石麟華表半空經霹靂碑文總見滿
埃塵不知何日東瀛變此地還成要路津

後梁宣明二帝碑堂下作

玉馬朝周從此辭園陵寂寞對豐碑千行宰樹荆州
道莫雨蕭蕭聞子規

荆州道懷古

南國山川舊帝畿宋臺梁館尚依稀馬嘶古樹行人
歇麥秀空城澤雉飛風吹落葉填宮井火入荒陵化
寶衣徒使詞臣庾開府咸陽終日苦思歸

朗州竇員外見示與澧州元郎中郡齋贈

荅長句二篇因而繼和

鴛鴦差池出建章綠旗朱戶鬱相望新恩共理犬牙
地昨日同含雞舌香白芷江邊分驛路山桃蹊外接
甘棠應憐一罷金閨籍枉渚逢春十度傷

蚤春對雪奉寄澧州元郎中

新賜魚書墨未乾
賢人暫屈遠人安
朝驅旌旆行時令
夜見星辰憶舊官
梅蘂覆階鈴閣煥
雪峯當戶戟枝寒
寧知楚客思公子
北望長吟澧有蘭

竇朗州見示與澧州元郎中蚤秋贈荅命

同作

鄰境諸侯同舍郎
芷江蘭浦限無柔
秋風門外旌旗動
曉露庭中橘柚香
玉簟微涼宜白晝
金笳入莫應清商
騷人昨夜聞題鵠
不歎流年惜衆芳

澧州徐員外使君遺以縞紵兼竹書箱因

成一篇用荅佳貺

按此郡本自婺州析置徐自台州遷

爛柯山下舊仙郎
列宿來添婺女光
遠放歌聲分白紵
知傳家學與青箱
水朝滄海何時去
蘭在幽林自芳聞
道天台有遺愛
人將琪樹比甘棠

唐秀才贈端州紫石硯以詩荅之

端州石硯人間重
贈我應知正草玄
闕里廟中空舊物
開方竈下豈天然
玉蟠吐水霞光靜
絲翰搖風絳錦鮮
此日慵工記名姓
因君數到墨池前

覽董評事思歸之什因以詩贈

幾年油幕佐征東却泛滄浪狎釣童歌枕醉眠成戲
蝶抱琴閑望送歸鴻文儒自襲膠西相倚伏能齊塞
上翁更說扁舟動鄉思青菰已熟奈秋風

松滋渡望破中

渡頭輕雨灑寒梅雲際溶：雪水來夢渚草長迷楚
望夷陵上黑有秦灰巴人淚應猿聲落蜀客舩從鳥
道回十二碧峯何處所永安宮外是荒臺

楊州春夜李瑞公益張侍御登段侍御平
仲密縣李少府暘秘書張正字復元同會

於水館對酒聯句追刻燭擊銅鉢故事遲
輒舉觥以飲之逮夜艾群公沾醉紛然就
枕余偶獨醒因題詩於段君枕上以志其
事

寂：獨看金燼落紛：只見玉山頽自羞不是高陽
侶一夜星星騎馬回

逢王十二學士入翰林因以詩贈時貞元二十年

王以藍田尉克學士

廐馬翩：禁外逢星槎上漢香難從定知欲報淮南

詔促召王褒八九重

關下口號呈柳儀曹

綵伏神旗獵曉風
雞人一唱鼓蓬蓬
銅壺漏水何時歇
如此相催即老翁

監祠夕月壇書事

其禮周畫

西皞司分晝夜平
羲和亭午太陰生
鏗鏘揖讓秋光裏
觀者如雲出鳳城

戲贈崔子牛

學道深山虛老人
留名萬代不閑身
勸君多買長安

酒南陌東城占取春

元和甲午歲詔書盡徵江湘
逐客余自武陵赴京宿於都亭
有懷續來諸君子

雲雨江湘起卧龍
武陵樵客躡仙蹤
十年楚水楓林下
今夜初聞長樂鍾

江陵嚴司空見示與成都武相公唱和因命同作

南荆西蜀大行臺
幕府旌門相對開
名重三司平水上
威雄八陳役風雷
彩雲朝望青城起
錦浪秋經白

帝來不是郢中清唱發誰當丞相揆天才

徵還京師見舊番官馮叔達

前者忽々襟被行十年顛顛到京城南宮舊吏來相
問何處淹留白髮生

故洛城古牆

粉落椒飛知幾春風吹雨灑旋成塵莫言一片危基
在猶過無窮來往人

元和十一年自朗州承召至京戲贈看花

諸君子

紫陌紅塵拂面來無人不道看花回玄都觀裏桃千
樹盡是劉郎去後栽

再遊玄都觀絕句并引

余貞元二十一年為屯田員外郎時此觀未有花是
歲出牧連州尋貶朗州司馬居十年召至京師人
皆言有道士手植仙桃滿觀如紅霞遂有前篇以志
一時之事旋文出牧今十有四年復為主客郎中重
遊玄都蕩然無復一樹唯兔葵燕來動搖於春風耳
因再題二十八字以俟後遊時大和二年三月

百畝中庭半是苔
桃花淨盡菜花開
種桃道士歸何處
前度劉郎今獨來

望夫石

正對和州郡樓

終日望夫夫不歸
化為孤石苦相思
望來已是幾千載
只似當時初望時

金陵五題

并引

余少為江南客而未遊秣陵
嘗有遺恨後為歷陽守
跂而望之適有客以金陵五題相示
追爾生思歛然
有得他日友人白樂天掉頭苦吟歎賞良久且曰石

頭詩云潮打空城寂寞回
吾知後之詩人不復措詞
矣餘四詠雖不及此亦不孤樂天之言爾

石頭城

山圍故國周遭在
潮打空城寂寞回
淮水東邊舊時月
夜深還過女牆來

烏衣巷

朱雀橋邊野草花
烏衣巷口夕陽斜
舊來王謝堂前
鷺飛入尋常百姓家

臺城

臺城六代競豪華結綺臨春事最奢萬戶千門成野
草只緣一曲後庭花

生公講堂

生公說法鬼神聽身後空堂夜不扃高坐寂寥塵漠
漠一方明月可中庭

江令宅

南朝詞臣北朝客歸來唯見泰淮碧池臺竹樹三畝
餘至今人道江家宅

謝寺雙檜

揚州法雲寺謝鎮
西宅古檜存焉

雙檜蒼然古貌竒含烟吐霧鬱參差晚依禪客當金
殿初對將軍映畫旗龍象界中成寶蓋鴛鴦瓦上出
高枝長明鐙是前朝焰曾照青：年少時

韓信廟

將略兵機命世雄蒼黃鍾室歎良弓遂令後代登壇
者每一尋思怕立功

秋夜安國觀聞笙

織女分明銀漢秋桂枝梧葉共颼颼月露滿庭人寂
寂霓家一曲在高樓

洛中寺北樓見賀監草書題詩

高樓賀監昔曾登壁上筆蹤龍虎騰中國書流讓皇
象北朝文士重徐陵偶因獨見驚空目恨不同時使
伏膺唯恐塵埃轉磨滅再三珍重囑山僧

聞韓賓擢第歸覲以詩美之兼賀韓十五
曹長時韓牧永州

零陵香草滿郊垌丹穴雖飛八翠屏孝若歸來呈畫
讚孟陽別後有山銘蘭陔舊地多纜結桂樹新枝色
更青為報儒林丈人道如今從此鬢星星

寄楊八壽州

風獵紅旗入壽春滿城歌舞向朱輪八公山下清淮
水千騎塵中白面人桂嶺雨餘多鶴迹茗園晴望似
龍鱗聖朝方用敢言者次第應須舊諫臣

李賈二大諫拜命後寄楊八壽州

諫省新登二直臣萬方驚喜捧絲綸則知天子明如
日肯放淮陽高卧人

宣上人遠寄賀禮部王侍郎放榜後詩因
而繼和

禮闈新榜動長安
九陌人走馬看一日
聲名徧天下
滿城桃李屬春官
自吟白雪銓詞賦
指示青雲借羽翰
借問至公誰印可
支郎天眼定中觀

贈東岳張鍊師

東岳真人張鍊師
高情雅澹世間希
堪為烈女書青簡
久事元君住翠微
金縷机中拋錦字
玉清壇上著霓衣
雲衢不要吹簫伴
只擬乘鳶獨自飛

秘書崔少監見示墜馬長句因而和之

麟臺少監舊仙郎
洛水橋邊墜馬傷
塵汙晉間青籃綬
風飄掌上紫遊韁
上車著作應來問
折臂三公定送方
猶賴德全如醉者
不訪吟詠入篇章

寄楊虢州與之舊姻

避地江湖知幾春
今來本郡擁朱輪
阮郎无復里中舊
楊僕却為閨外人
各繫一官難命駕
每懷前好易沾中
玉城山裏多靈藥
擺落切名且養神

秋日題竇負外崇德里新居

竇時荆
度支案

長愛街西風景閑
到君居處暫開顏
清光門外一渠水
秋色牆頭數點山
踈種碧松通月朗
多栽紅藥待

春還莫言堆案無餘地認得詩人在此間

蒙恩轉儀曹即依前充集賢學士舉歸湖
州自代因寄七言

翔鸞闕下謝恩初通籍由來在石渠暫入南宮判祥
瑞還歸內殿閱圖書故人猶在三江外同病凡經二
紀餘今日薦君嗟久滯不唯文體似相如

途次華州陪錢大夫登城北樓春望因覩
李崔令狐三相國唱和之什翰林舊侶繼
踵華城山水清高鸞鳳翔集皆忝夙眷遂

題是詩

城樓四望出風塵見盡關西渭北春百二山河雄上
國一雙旌旆委名臣壁中今日題詩處天上同時草
詔人莫怪老郎呈濫吹官途雖別舊情親

三鄉驛樓伏覩玄宗望女兒山詩小臣斐
然有感

開元天子萬事足唯惜當時光景促三鄉陌上望仙
山歸作霓裳羽衣曲僊心從此在瑤池三清八景相
追隨天上忽乘白雲去世間空有秋風詞

洛下初冬拜表有懷上京故人

鳳樓南面控三條
拜表郎官蚤渡橋
清洛曉光鋪碧
簾上陽霜葉翦紅
綃省門簪組初成列
雲路鴛鸞想
退朝寄謝殷懃九天侶
檉榆水擊各逍遙

尉遲郎中見示自南遷牽復却至洛城東
舊居之作因以和之

曾遭飛語十年謫
新受恩光萬里還
朝服不妨遊洛
浦郊園依舊看
嵩山竹舍天籟清
商樂水遶庭臺碧
玉環留作功成退身地
如今只是暫時閑

洛中酬福建陳判官見贈

潦倒聲名擁腫材
一生多故苦遭迴
南宮舊籍遙相
管東洛閑門晝未開
靜對道流論藥石
偶逢詞客與
瓊瑰怪君近日文
鋒利新向延平看
劒來

始聞秋風

昔看黃菊與君別
今聽玄蟬我却回
五夜颼颼枕前
覺一年顏狀鏡中來
馬思邊草拳毛動
鵬盼青雲睡
眼開天地肅清堪
四望為君扶病上高臺

和蘇十郎中謝病閑居時嚴當侍蕭給事

同過訪歎初有二毛作

清羸隱几望雲空
左掖鴛鴦到室中
一卷素書銷永日
數莖班鬢對秋風
菱花照後容
雖改蒼草占來命
已通莫怪人
驚蚤白緣君合是黑頭翁

訓淮南廖參謀秋夕見過之作
林公昔為揚州從事

參謀從釋子反初服

揚州從事夜相尋
無限新詩月下吟
初服已驚玄髮長
高情猶向碧雲深
語餘時舉一樽酒
坐久方聞數處砧
不逐繁華訪閑散
知君擺落俗人心

題王郎中宣義里新居

愛君新買街西宅
客到如遊鄆杜間
雨後退朝貪種樹
申時出省趁看山
門前巷陌三條近
牆內池亭萬境閑
見擬移居作隣里
不論時節請開關

訓朗州崔員外與任十四兄侍御同過鄙人舊居見懷之什時守吳郡

昔日居鄰招屈亭
楓林橘樹鷓鴣聲
一辭御苑青門去
十見蠻江白芷生
自此曾沾宣室召
如今又守闔閭城
何人萬里能相憶
同舍仙郎與外兄
任侍御子外兄崔員

外南宮
同官

美温尚書鎮定興元以詩寄賀

旌旗入境犬無聲
戮盡鯨鯢漢水清
從此世人開耳目
始知名將出書生

劉駙馬水亭避暑

千竿竹翠數蓮紅
水閣虛涼玉簟空
琥珀瓊冰疑漏酒
水精簾瑩更通風
賜冰滿盃沈朱實
法饌盈盤覆碧籠
盡日逍遙避煩暑
再三珍重主人翁

訓端州吳大夫夜泊湘川見寄一絕

夜泊湘川逐客心
月明猿苦血沾襟
湘妃舊竹痕猶淺
從此因君染更深

述舊賀遷寄陝虢孫常侍

南宮左輔
兩處交代

南宮幸襲芝蘭後
左輔曾交印綬來
多病未離清洛苑
新恩已歷望仙臺
閑頭古塞桃林靜
城下長河竹箭回
聞道隨車有零雨
此時偏動子荆才

劉賓客文集卷第二十五

雜體三十九首

翠微寺有感

吾王昔遊幸離宮雲際開朱旗迎夏畢涼軒避暑來
湯餅賜都尉寒冰頒上才龍顏不可望玉坐生浮埃

連州臘日觀莫徭獵西山

海天殺氣薄蠻軍部伍囂林紅葉盡變原黑草初燒
圍合繫鉦息禽興大旆搖張羅依道口嗾犬上山腰
猜鷹慮奮迅驚麇時躅跳瘴雲四面起臘雪半空銷

箭頭餘鵠血鞍傍見雉翹日莫還城邑金笳發麗譙

觀舞柘枝二首

胡服何葳蕤僊：登綺墀神颯獵紅蕖龍燭然金枝
垂帶覆纖腰安鈿當嫵眉翹袖中繁鼓傾眸遡華棖
燕餘有舊曲淮南多冶詞欲見傾城處君看赴節時
山雞臨清鏡石燕赴遙津何如上客會長袖入華茵
體輕似無骨觀者皆聳神曲盡回身去魯波猶注人

君山懷古

屬車八十一此地阻長風千載威靈盡赭山寒水中

秋江晚泊

長泊起秋色空江涵霽暉莫霞十萬狀賓鴻次第飛
古戍見旗迥荒村聞犬稀軻峨扁上客勸酒夜相依

步出武陵東亭臨江寓望

鷹至感風候霜餘變林麓孤颿帶日來寒江轉沙曲
戍遙旗影動津晚榜聲促月上綵霞收漁歌遠相續

秋日送客至潛水驛

候吏立沙際田家連竹溪神林社日鼓茅屋午時雞
雀噪晚禾地蝶飛秋草畦驛樓宮樹近疲馬再三嘶

晚歲登武陵城顧望承陸悵然有作

星象承鳥翼
蛮陬想犬牙
俚人祠竹節
仙洞開桃花
城基歷漢魏
江源自賓巴
華表廖立基
菜地黃瓊家
霜輕菊秀晚
石淺水文斜
樵音逸故壘
汲路明寒沙
清風稍改葉
盧橘如含葩
野橋鳴驛騎
叢祠發迥笳
跳鱗避舉網
倦鳥寄行查
路塵高出樹
山火遠連霞
夕曛轉赤岸
浮藹起蒼葭
軋：渡溪漿連：赴林鷗
叫閣道非遠
賜環期自賒
孤臣本危涕
喬木在天涯

潮州崔郎中曾長寄三癖詩自言癖在詩

與琴酒其詞逸而高吟詠不足昔柳吳興
亭臯隴首之句王融書之白團扇故為四
韻以謝之

視事畫屏中
自稱三癖翁
管絃泛春渚
旌旆拂晴虹
酒對青山月
琴韻白蘋風
會書團扇上
知君文字工
為郎分司寄上都同舍

藉通金馬門
身在銅駝陌
省闈晝無塵
官樹遠凝碧
荒街淺深轍
古渡潺湲石
唯有嵩丘雲
堪誇蚤朝客
登陝州城北樓卻寄京師親友

獨上百尺樓，目窮思亦愁。
初日徧露草，野田荒悠悠。
塵息長道白，林清宿烟收。
回首雲深處，永懷帝鄉遊。
請告東歸發，灞橋卻寄諸僚友。

征途出灞浹，回首傷如何。
故人雲雨散，滿目山川多。
行車無停軌，流景同迅波。
前歡漸成昔，感歎益勞歌。

秋晚題湖城驛池上亭

烁次池上館，林塘熨南榮。
塵衣紛未解，幽思浩已盈。
風蓮墜故萼，露菊含晚英。
恨為一夕客，愁聽晨雞鳴。

平蔡州三首

蔡州城中衆心死，旆星夜落照壕水。
漢家飛將下天來，馬箠一揮門洞開。
賊徒崩騰望旗拜，有若群螻驚春雷。
狂童面縛登檻車，大帛天矯垂捷書。
相公從容來鎮撫，常侍郊迎負文弩。
四人歸業閭里閑，小兒跳踉健兒舞。

汝南晨雞喔々鳴，城頭鼓角音和平。
路傍老人憶舊事，相與感激皆涕零。
老人收泣前致辭，官軍入城人不知。
忽驚元和十二載，重見天寶承平時。
九衢車馬渾々流，使臣來獻淮西囚。
四夷聞風失匕

筋天子受賀登高楼妖童擢髮不足數血汗城西一
坏土南峯無火楚澤開夜行不鎖穆陵閔策勲禮畢
天下泰猛士按劍看常山時唯常山不庭

平齊行二首

胡塵昔起薊北門河南地屬平盧軍貂裘代馬繞東
岳嶧陽孤桐削為角地形十二虜意驕恩澤含容歷
四朝魯人皆解帶弓箭齊人不復聞簫韶今朝天子
聖神武手握玄符平九土初哀狂童襲故事文告不
來方震怒去秋詔下誅東平官軍四合猶嬰城春來

群鳥噪且驚氣如壞山墮其庭牙門大將有劉生夜
半射落攬槍星帳中虜血流滿地門外三軍舞連臂
駟騎函首過黃河城中無賊天氣和朝庭侍郎來慰
撫耕夫滿野行人歌

泰山沈寇六十年旅祭不饗生愁烟今逢聖君欲封
禪神使陰兵來助戰袂氛埽盡河水清日觀杲々卿
雲見開元皇帝東封時百神受戰爭奔馳千鈞猛簾
順流下洪波涵淡浮熊羆侍臣燕公秉文筆玉檢告
天無愧詞當今獻孫承聖祖岳神望幸河宗舞青門

大道屬車塵共待歲蕤翠華舉

城西行

城西簇：三叛族叛者為誰蔡吳蜀中使提刀出禁
來九衢車馬轟成雷臨刑與酒栝未覆仇家白官先
請肉守吏能然董卓臍饑烏來覘栢玄目城西人散
泰街平雨洗血痕春草生

武昌老人說笛歌

武昌老將七十餘手把瘦令相問書自言少小學吹
笛蚤事曹王曾賞激往年鎮戍到蘄州楚山蕭々笛

竹秋當時買林恣搜索典卻身上烏貂裘古苔蒼々
封老節石上孤生飽風雪高聲五音隨指發水中龍
應行雲絕曾將黃鶴樓上吹一聲占盡秋江月如今
老去語猶遲音韻高低耳不知氣力已無心尚在時
：一曲夢中吹

西山蘭若試茶歌

山僧後檐茶數叢春來映竹抽新茸苑然為客振衣
起自傍芳叢摘鷹觜斯須炒成蒲室香便酌砌下金
沙水驟雨松聲入鼎來白雲滿盃花裴回悠揚噴鼻

宿醒散清峭徹骨煩襟開陽崖陰嶺各殊氣未若竹
下筍苔地炎帝雖嘗未解煎桐君有籙那知味新芽
連拳半未舒自摘至煎俄頃餘木蘭墜露香微似瑤
草臨波色不如僧言靈味宜幽寂采之翹英為嘉客
不辭緘封寄郡齋甄井銅鑪損標格何況蒙山顧渚
春白泥赤印走風塵欲知花乳清冷味須是眠雲跂
石人

廟庭偃松詩并引

侍中後閣前有小松不待年而偃丞相晉公為賦詩

美其猶龍蛇然植于高檐喬木間上嶽旁軋盤蹙傾
亞似不得天和者公以遂物性為意乃加憐焉命畚
土以壯其趾使無歆索絢以牽其榦使不仆盥漱之
餘以潤之顧盼之輝以照之發於仁心感召和氣無
復天閼坐能敷舒鄉之跽蹙化為竒古故雖衰大而
有偃號焉予嘗詣閣白事公為道所以且示以詩竊
感嘉木之逢時斐然成詠

勢軋枝偏根已危高情一見與扶持忽從顛賴有生
意卻為離披無俗姿影入巖廊行樂處韻含天籟宿

齋時謝公莫道東山去待取陰成蒲鳳池

荅東陽于令涵碧圖詩并引

東陽令于興宗丞相燕國公之猶子生綺襦紈袴間
所見皆貴盛而挈然有心如山東書生前年白有司
願為親民官以自效遂補東陽及莅官以簡易為治
故多暇日一旦於縣五里偶得竒境埋沒於翳蒼中
于生自以有特操而生於公侯家由覆廢入仕常忽
歎息恩移是心開挾泉石芟去蘿蒿斧凡村畚息
壤而清溪翠巖森立全來因構亭其端題曰涵碧：

流貫於庭中如青龍蜿蜒冰聲激射人樹石雲霞列
于前昏旦萬狀惜其居地不得有聞於時故圖之來
乞詞既無負尤物予亦久翳蘿蒿者睹之慨然遂賦
七言以貽後之文士

東陽本是佳山水何況曾經沈隱侯化得邦人解吟
詠如今縣令亦風流新開潭洞疑仙境遠寫丹青到
雒州落在尋常畫師手犹能三伏凜生秋

贈致仕滕庶子先輩

時及第人
中最長

朝服歸來畫錦榮登科記上更無名壽觴每使曾孫

獻勝境長携衆妓行
矍鑠據鞍時
騁健殷勤把酒尚
多情陵寒卻向山陰去
衣繡郎君雪裏迎
時令子為御史主務
中在越

詠樹红柿子

曉連星影出晚帶日光懸
本因遺採掇翻自保天年

庭竹

露滌鉛粉節風搖青玉枝
依々似君子無地不相宜

臺城懷古

清江悠々王氣沈
六朝遺事何處尋
宮牆隱嶙圍野

澤鶴鷓夜鳴
秋色深

題壽安甘棠館二首

公館似仙家
池清竹逕斜
山禽忽驚起
衝落半巖花
門前洛陽道
門裏桃源路
塵土與烟霞
其間十餘步
與歌者米嘉榮

唱得涼州意外聲
舊人唯數米嘉榮
近來時世輕先
輩好染頰
須事後生

聽舊宮中樂人穆氏唱歌

魯隨織女渡天河
記得雲間第一歌
休唱貞元供奉

曲當時朝士已無多

渾侍中宅牡丹

徑尺千餘朶人間有此花今朝見顏色更不向諸家
唐郎中宅與諸公同飲酒看牡丹

今日花前飲甘心醉數栝但愁花有語不為老人開
與歌者何戡

二十餘年別帝京重聞天樂不勝情舊人唯有何戡
在更與殷勤唱渭城

與歌童田順郎

天下能歌御史娘花前月底奉君王九重深處無人
見分付新聲與順郎

燕尔館破屏風所畫至精人多歎賞題之
畫時應遇空亡日賣處難逢識別人唯有往來多情
客強將衫袖拂埃塵

賞牡丹

庭前芍藥妖無格池上芙蓉淨少情唯有牡丹真國
色花開時節動京城

寄陝州姚中丞

時分司
東都

八月天地肅二陵風雨收旌旗闕下來雲日閑東爍
禹跡想前事漢臺餘故丘裴回襟帶地左右帝王州
留滯悲昔老思光榮徹侯相思望棠樹一寄商聲謳
奉酬湖州崔郎中見寄五韻
山陽昔相遇灼灼晨葩鮮同遊翰墨場和樂埴麓然
一落名宦途浩如乘風船行當衰莫日卧理淮海壖
猶期謝病後共樂桑榆年

劉賓客文集卷第二十五

劉賓客文集卷第二十六

樂府上

團扇歌

團扇復團扇奉君清暑殿秋風入庭樹從此不相見
上有乘鸞女蒼蒼網蟲遍明年入懷袖別是機中練

荊州歌二首

渚宮楊柳暗麥城朝雉飛可憐謁青伴乘煥著輕衣
今日好南風商旅相催發沙頭檣竿上始見春江濶

紀南歌

風烟紀南城塵土荆門路天寒多獵騎走上樊姬墓
宜城歌

野水繞空城行塵起孤驛荒臺側生樹石碣陽鐫額
靡々度行人溫風吹宿麥

順陽歌

朝辭官軍驛前望順陽路野水齧荒墳秋蟲鏤官樹
曾聞天寶末胡馬西南驚城守魯將軍拔城從此去
馬嵬行

綠野扶風道黃塵馬嵬驛路邊楊貴人墳高三四尺

乃聞問里中兒皆言幸蜀時軍家誅佞倖天子捨妖姬
群吏伏門屏貴人牽帝衣低回轉美目風日為無暉
貴人飲金屑倏忽薨英莫平生服杏丹顏色真如故
屬車塵已遠里巷來窺覩共愛宿妝妍君王畫眉處
履綦無復有履組光采滅不見巖畔人空見陵波襪
郵童愛蹤跡私手解槃結傳看千萬眼縷絕香不歇
指環照骨明首飾敵連城將入咸陽市猶得賈胡驚

視刀環歌

常恨言語淺不如人意深今朝兩相視脉脉萬里心

三閣辭四首吳聲

貴人三閣上日晏未梳頭不應有恨事嬌甚却成愁
珠箔曲瓊鉤子細見揚州北兵那得度浪語判悠悠
沈香帖閣柱金縷畫門楣回首降幡下已見黍離
三人出督井一身登檻車朱門漫臨水不可見鱸魚

更衣曲

博山烟々吐香霧紅燭引至更衣處夜如何其夜漫
漫鄰雞未鳴寒鴈度庭前雪壓松桂叢廊下點々懸
紗籠滿堂醉客爭笑語嘈噴琵琶青幕中

淮陰行五首

古有長干行言三江之事悉矣余嘗阻風淮陰作淮
陰行以禪樂府

簇々淮陰市行樓緣岸上好日起檣竿烏飛驚五兩
金日轉船頭金烏指西北烟波與春草千里同一色
船頭大銅鑲摩挲光陳々蚤晚使風來沙頭一眼認
何物令儂羨々郎船尾燕銜泥趁檣竿宿食長相見
隔浦望行船頭昂尾幟々無奈挑菜時清淮春浪軟

競渡曲

競度始於武陵至今舉楫而相和之
其音咸呼云何在斯招屈之義事見

沅江五月平隄流，邑人相將浮綵舟。靈均何年歌已
 矣，哀謠振楫從此起。揚枹擊節雷闐闐，亂流齊進聲
 轟然。蛟龍得雨鬣鬣動，蟪蛄飲河形影聯。刺史臨流
 褰翠幘，揭竿命爵分雄雌。先鳴餘勇爭鼓舞，未至銜
 枚顏色沮。百勝本自有前期，一飛由來無定所。風俗
 如狂重此時，縱觀雲委江之湄。綵旗夾岸照鮫室，羅
 襪陵波呈水嬉。曲終人散空愁莫，招屈亭前水東注。

隄上行三首

酒旗相望大隄頭，隄下連樯隄上樓。日暮行人呼渡
 急，槳聲幽軋滿中流。
 江南江北望烟波，入夜行人相應歌。枹葉傳情竹枝
 怨，水流無限月明多。
 長隄繚繞水裴回，酒舍旗亭次第開。日晚上簾招估
 客，軻戔大舩落颿來。

采菱行

武陵俗嗜菱，荷歲秋矣，有女郎盛遊于馬湖，薄言采之，歸以御客。古

有采菱曲，罕傳其詞，故賦之以俟采詩者。

白馬湖平秋日光，紫菱如錦綵鴛鴦。翔盪舟遊女滿中

央采菱不顧馬上郎爭多逐勝紛向相向時轉蘭橈
破輕浪長鬟弱袂動參差釵影釧文浮蕩漾笑語哇
咬頰晚暉蓼花綠岸扣船歸、來共到市橋步野蔓
繫船萍滿衣家、竹樓臨廣陌下有連檣多估客攜
觴薦芰夜經過醉蹋大隄相應歌屈平祠下沅江水月
照寒波白烟起一曲南音此地聞長安北望三千里

秋風引

何處秋風至蕭々送鴈群朝來入庭樹孤客最先聞
莫徭歌

莫徭自生長名字無符籍市場雜鮫人婚姻通木客
星居占泉眼火種開山脊夜渡千仞谿含沙不能射

蠻子歌

蠻語鉤輈音啞衣斑爛布熏狸掘沙鼠時節祠盤瓠
忽逢乘馬客恍若驚麕顧腰斧山高山意行無舊路

洞庭秋月行

洞庭秋月生湖心曾波萬頃如鎔金孤輪徐轉光不
定遊風濛々隔寒鏡是時白露三秋中湖平月上天
地空岳陽城頭暮角絕蕩漾已過君山東山城蒼々

夜寂：水月逶迤繞城白，盪漿巴童歌竹枝，連檣估
客吹羌笛，勢高夜久陰力全，金氣肅，開清躔，浮雲
野馬歸，四裔首冠星斗，當中天，雞相呼，曙霞出，歛
影含光，讓朝日，出喧，人不閑，夜來清景非人間

蹋歌詞四首

春江月出大隄平，隄上女郎連袂行，唱盡新詞歡不
見，紅霞映樹鷓鴣鳴

桃蹊柳陌好經過，銙下妝成月下歌，為是襄王故宮
地，至今猶自細腰多

新詞宛轉遞相傳，振袖傾鬟風露前，月落烏蹄雲雨
散，遊童陌人拾花鈿

日暮江南聞竹枝，南人行樂北人悲，自從雪裏唱新
曲，直到三春花盡時

華清詞

日出驪山東，裴回照溫泉，樓臺影玲瓏，稍，開烟白
言昔太上皇，常居此，祈年風中聞清樂，往，來列仙
翠華入五雲，紫氣歸上玄，哀，生人淚泣盡，弓劍前
聖道本自我，凡情徒顛然，小臣感玄化，一望青冥天

步虛詞二首

阿母種桃雲海際
花落子成二千歲
海風吹折最繁
枝
跪捧瓊盤獻天帝

華表千年一鶴歸
疑丹為頂雪為衣
星：仙語人聽
盡却向五雲翻翅飛

桃源行

漁舟可招：浮在武陵水
拖綸擲餌信流去
誤入桃源行數里
清源尋盡花綿綿
蹋花覓徑至洞前
洞門蒼黑烟霧生
暗行數步逢虛明
俗人毛骨驚
仙子爭

來致詞何至此
須臾皆破水
雪顏笑言委曲問人間
因嗟隱身來種玉
不知人世如風燭
筵羞石髓勸客餐
鐙藝松脂留客宿
雞聲犬聲遙相聞
曉光葱籠開五雲
漁人振衣起
出戶滿庭無路花紛紛
翻然恐迷鄉
縣處一息不肯桃源住
桃花滿溪水似鏡
塵心如垢洗不去
仙家一出尋無踪
至今水流山重

魏宮詞二首

日晚長秋簾外報
望陵歌舞在明朝
添爐火欲熏衣
麝憶得分明不忍燒

日映西陵松柏枝下臺相顧一相思朝來樂府長歌
曲唱著君王自作詞

阿嬌怨

望見葳蕤舉翠華試開金屋掃庭花須臾宮女傳來
信言幸平陽公主家

九華山并引

九華山在池州青陽縣西南九峯競秀神采竒異昔
子仰太華以為此外無竒愛女几荆山以為此外無
秀及今見九華始悼前言之容易也惜其地偏且遠

不為世所稱故歌以大之

竒峰一見驚魂魄意想洪鑪始開闢疑是九龍夭矯

欲攀天忽逢霹靂一聲化為石不然何至今悠々億萬

年氣勢不死如騰音騫輕雲含幽兮月添冷日凝

輝兮江漾影結根不得要路津迥秀長在無人境軒

皇封禪登云亭大禹會計臨東溟乘力追反標山行兒不來

廣樂絕獨與猿鳥愁青瑩君不見敬亭之山黃索漠

兀如斷岸無稜角宣城謝守一首詩遂使名聲齊五岳

九華山九華山自是造化一尤物焉能籍甚乎人

間

送春曲

春向晚春晚思悠哉風雲日已改花葉自相催漠漠
空中去何時天際來

春已暮冉冉如人老映葉見殘花連天是青草可憐
桃與李從此同桑棗

春景去此去何時回遊人千萬恨落日高臺寂寞
繁花盡流鶯歸不來

初夏曲三首

銅壺方促夜斗柄暫南回稍嫌單衣重初憐北方開
西園花已盡新月為誰來

時節過繁華陰陰千萬家巢禽命子戲園果墜枝斜
寂寞孤飛蝶窺叢覓晚花

綠水風初暖青林露草晞麥田雉朝雊桑野人暮歸
百舌悲花盡無聲來去飛

柳花詞三首

開從綠條上散逐香風遠故取花落時悠揚占春晚
輕飛不假風輕落不委地撩亂舞晴空發人無限思

晴天黯、雪來送青春暮無意似多情千家萬家去
送春詞

昨來樓上迎春處今日登樓又送歸蘭藥殘妝含露
泣柳條長袖向風揮佳人對鏡容色改楚客臨江心
事遠萬古至今同此恨無如一醉盡忘機

秋詞二首

自古逢秋悲寂寥我言秋日勝春朝晴空一鶴排雲
上便引詩情到碧霄

山明水淨夜來霜數樹深紅出淺黃試上高樓清入

骨豈知春色嗾人狂

劉賓客文集卷之二十七

樂府下

秦娘歌 并引

秦娘本常尚書家主謳者初尚書為吳郡得之命樂工誨之琵琶使之歌且舞。無幾何盡得其術居一二歲攜之以歸京師京師多新聲善工於是又捐去故技以新聲度曲而秦娘名家往。見稱於貴遊之間元和初尚書薨於東京秦娘出居民間久之為蘄州刺史張恣所得其後恣坐事謫居武陵郡恣卒秦

娘無所歸地荒且遠無有能知其容與藝者故日抱
樂器而哭其音焦殺以悲雒客聞之為歌其事以續
于樂府云

秦娘家本閭門西門前綠水環金隄有時妝成好天
氣走上臯橋折花戲風流太守韋尚書路傍忽見停隼
旗斗量明珠烏傳意紺幘迎入專城居長鬟如雲衣
似霧錦茵羅荐承輕步舞學驚鴻水榭春歌撩上客
蘭臺暮從郎西入帝城中貴遊簪組香簾櫳低鬟緩
視抱明月纖指破撥生胡風繁華一旦有消歇題劔

無光履聲絕洛陽舊宅生草萊杜陵蕭々松柏哀妝
奩蟲網厚如繭博山鑪側傾寒灰蘄州刺史張公子
白馬新到銅駝里自言買笑擲黃金月墮雲中從此
始安知鵬鳥坐隅飛寂寞旅魂招不歸秦家嘉鏡有
前時結韞壽香銷故篋衣山城少人江水碧斷鴈哀
猿風雨夕朱絃已絕為知音雲鬢未秋私自惜舉目
風烟非舊時夢尋歸路多參差如何將此千行淚更
灑湘江班竹枝

秋扇詞

莫道恩情無重來人間榮謝遞相催當時初入君懷
袖豈念寒鑪有死灰

搗衣曲

爽砧應秋律繁杵含淒風一一遠相續家々音不同
戶庭凝露清伴侶明月中長裾委襞積輕佩垂璉瓏
汗餘衫更馥鈿移麝半空報寒驚邊鴈促思聞候蟲
天狼正芒角虎落定相攻盈筐寄何處征人如轉蓬
七夕二首

河鼓靈旗動姮娥破鏡斜滿天空是幕徐轉斗為車
機罷猶安石橋成不礙查寧知觀津女竟夕望雲涯
天衢起雲帳神馭上星橋初喜度河漢頻驚轉斗杓
餘霞張錦幃輕電閃紅綃非是人間世還悲後會逢

龍陽縣歌

縣門白日無塵土百姓縣前挽漁罟主人引客登大
隄小人縱觀黃犬怒鷓鴣驚鳴遠籬落橘柚垂芳照
窻方沙草綠見吏稀寂歷斜陽照懸鼓

度桂嶺歌

桂陽嶺下々復高々人稀鳥獸駭地遠草木豪寄言

千金子知余歌者勞

挿田歌并引

連州城下俯接村墟偶登郡樓適有所感遂書其事
為俚歌以俟來詩者

岡頭花草齊燕子東西飛田塍望如線白水光參差
農婦白紵裙農夫綠蓑衣齊唱田中歌嚶嚶如竹枝
但聞怨響音不辨俚語詞時一大笑此必相嘲嗤水
平苗漠漠烟火生虛落黃犬往復還赤雞鳴且啄路傍
誰家郎烏帽衫袖長自言上計吏年初離帝鄉田夫

語計吏君家儂定諳一來長安罷眼大不相參計吏
笑致辭長安真大處省門高軻峨儂入無度數昨來
補衛士唯用筒竹布君看二叁年我作官人去

畬田作

何處好畬田團團縵山腹鑽龜得雨卦上山燒卧木
驚麀走且顧群雉生咿喔紅焰遠成霞輕煤飛入郭
風引上高岑獵獵度青林青林望靡靡赤光低復起
照潭出老蛟爆竹驚山鬼夜色不見山孤明星漢間
如星復如月但逐曉風滅木從猷石光遂致烘天熱

下種煖灰中乘陽斫牙孽蒼々一雨後蒼穎如雲發
巴人拱手吟耕耨不關心由來得地勢徑寸有餘陰

蒲桃歌

野田生蒲桃纏繞一枝蒿移來碧墀下張王日々高
分歧浩繁縟脩蔓蟠詰曲揚翹向庭柯意思如有屬
為之立長架布護當軒綠米液溉其根理踈看滲漉
繁葩組綬結懸寔珠璣蹙馬乳帶輕霜龍鱗躍初旭
有客汾陽至臨堂瞪雙目自言我晉人種此如種玉
釀之成美酒令人飲不足為君博一斗往取涼州牧

鷓鴣吟

朝陽有吟鳳不聞千萬祀鷓鴣催衆芳晨間先入耳
秋風白露晞從是爾啼時如何上春日唧々滿庭飛

牆陰歌

白日左右浮天潢朝晡影入東西牆昔為兒童在陰
戲當時意小覺日長東隣侯家吹笙簧隨陰促々移
象牀西隣田舍乏糟糠就影汲々春黃梁因思九州
四海外家々只占牆陰內莫言牆陰數尺間老却主
人如等閑君看眼前光景促中心莫學太行山

觀雲篇

興雲感陰氣疾走如見機晴來意態行有若功成歸
葱籠含晚景潔白凝秋暉夜深度銀漢漠漠仙人衣

沓潮歌并引

元和十年夏五月終風駕濤南海羨溢南人日沓潮
也率三更歲一有之余為連州客或為言其狀因歌
之附于南越志

屯門積日無回颯滄波不歸成沓潮轉如鞭石砢且
搖亘空欲駕鼉鼉橋驚湍蹙縮悍而驕大陵高岸失

峒堯四邊無阻音響調背負元氣掀重霄介鯨得性
方逍遙仰鼻嚔吸揚朱翹海人狂顧迭相招蜀衣鑿
首聲曉々征南將軍登麗譙赤旗指麾不敢蹶翌日
風回冷氣消歸濤納々景昭々烏泥白沙復滿海々
色不動如青瑤

百花行

長安百花時風景宜輕薄無人不沽酒何處不聞樂
春風連夜動微雨陵曉濯紅焰出牆頭雪光映樓角
繁紫韻松竹遠黃遶籬落臨路不勝愁輕飛去何託

滿庭蕩魂魄照廡成丹渥爛漫嗾顛狂飄零勸行樂
時節易晚清陰覆池閣唯有安石榴當軒慰寂寞

春有情篇

為問遊春侶春情何處尋花含欲語意草有鬪生心
雨頻催發色雲輕不作陰縱令無月夜芳興暗中深

路傍曲

南山宿雨晴春入鳳皇城處聞弦管無非送酒聲

白鷺兒

白鷺兒最高格毛衣新成雪不敵衆禽喧呼獨凝寂

孤眠草草久立潺石前山正無雲飛去入遙碧

壯士行

陰風振寒郊猛虎正咆哮徐行出燒地連吼入黃茅
壯士走馬去鐙前彎玉弣叱之使人立一發如鉞交
悍睛忽星隨飛血濺林梢彪炳為我度羶腥充我庖
里中欣害除賀酒紛號呶明日長橋上傾城看斬蛟

邊風行

邊馬蕭蕭鳴邊風滿磧生暗添弓箭力半上鼓鼙聲
襲月寒暈起吹雲陰陣成將軍占氣候出號夜翻營

畏一作安城號

竹枝詞并引

四方之歌異音而同樂歲正月余未建平里中兒聯歌竹枝吹短笛擊鼓以赴節歌者揚袂睢舞以曲多為賢聆其音中黃鐘之羽卒章激許如吳聲雖儻儻不可分而含思宛轉有淇濮之艷昔屈原居沅湘間其民迎神詞甚鄙陋乃為作九歌到于今荆楚鼓舞之故余亦作竹枝詞九篇俾善歌者颺之附于末後之聆已歛知變風之自焉

白帝城頭春草生白鹽山下蜀江清南人上來歌一曲北人莫上動鄉情

山桃紅花滿上頭蜀江春水拍山流花紅易衰似郎意水流無限似儂愁

江上朱樓新雨晴瀼西春水穀文生橋東橋西好楊柳人來人去唱歌行

日出三竿春霧消江頭蜀客駐蘭橈憑寄狂夫書一紙住在成都萬里橋

兩岸山花似雪開家：春酒滿銀杯昭君坊中多女

伴永安宮外蹋青來
城西門前灩澦堆年々波浪不能摧懊惱人心不如
石少時東去復西來
瞿唐嘈々十二灘此中道路古來難長恨人心不如
水等閑平地起波瀾
巫峽蒼々烟雨時清猿啼在最高枝箇裏愁人腸自
斷由來不是此聲悲
山上層々桃李花雲間烟火是人家銀釧金釵來負
水長刀短笠去燒畬

楊柳枝詞九首

寒北梅花羌笛吹淮南桂樹小山詞請君莫奉前朝
曲聽唱新翻楊柳枝

南陌東城春蚤時相逢何處不依々桃紅李白皆誇
好須發得垂楊相發揮

鳳闕輕遮翡翠幃龍池遙望麴塵絲御溝春水相暉
映狂殺長安年少兒

金谷園中鶯亂飛銅駝陌上好風吹城東桃李須臾
盡爭似垂楊無限時

花萼樓前初種時
美人樓上鬪腰支
如今拋擲長街裏
露葉如啼欲恨誰

煬帝行宮汴水濱
數株殘柳不勝春
晚來風起花如雪
飛入宮牆不見人

御陌青門拂地垂
千條金縷萬條絲
如今縮作同心結
將贈行人知不知

城外春風吹酒旗
行人揮袂日西時
長安陌上無窮樹
唯有垂楊管別離

輕盈嫋娜占年華
舞榭妝樓處
遮春盡絮飛留不

得隨風好去落誰家

浪陶沙詞九首

九曲黃河萬里沙
浪淘風簸自天涯
如今直上黃河去
同到牽牛織女家

洛水橋邊春日斜
碧流輕淺見瓊砂
無端陌上狂風急
驚起鴛鴦出浪沙

汴水東流虎眼文
清淮曉色鴨頭春
君看渡口淘沙處
渡却人間多少人

鸚鵡舟頭浪飈沙
青樓春望日將斜
銜泥燕子爭歸

舍獨自狂夫不憶家

濯錦江邊兩岸花春風吹浪正淘沙女郎剪下鴛鴦
錦將向中流定晚霞

日照澄州江霧開淘金女伴滿江隈美人首飾侯王
印盡是沙中浪底來

八月濤聲吼地來頭高數丈觸山回須臾却入海門
去卷起沙堆似雪堆

莫道讒言如浪深莫言倦客似沙沈千淘萬灑雖辛
苦吹盡狂沙始到金

流水淘沙不暫停前波未滅後波生令人忽憶瀟湘
渚回唱迎神三兩聲

瀟湘神二首

湘水流湘水流九疑雲物至今愁君問二妃何處所
零陵香草露中秋

班竹枝班竹枝淚痕點點寄相思楚客欲聽瑤瑟怨
瀟湘深夜月明時

拋毬樂詞二首

五綵綉團圓登君瑤瑁筵最宜紅燭下偏稱落花前

上客如先起應須贈一船
春蚤見花枝朝：恨發遲及看花落後却憶未開時
幸有拋毬樂一杯君莫辭

楊柳枝詞二首

迎得春光先到來淺黃輕綠映樓臺只緣裊娜多情
思便被春風長請接

巫峽巫山楊柳多朝雲暮雨遠相和因想陽臺無限
事為君回唱竹枝歌

竹枝詞二首

荆川大史紙

楊柳青：江水平聞郎江上唱歌聲東邊日出西邊
雨道是無晴還有晴

楚水巴山江雨多巴人能唱本鄉歌今朝北客思歸
去回入紇那披綠羅

紇那曲詞二首

楊柳鬱青：竹枝無限情周郎一回顧聽唱紇那聲
蹋曲興無窮調同詞不同願郎千萬壽長作主人翁
右已上詞先不入集伏緣播在樂章今附于卷末

劉賓客文集卷第二十七

劉賓客文集卷第二十八

送別四十六首

送工部張侍郎入蕃弔祭

時張兼修史

月窟賓諸夏雲官降九天
飾終隣好重錫命禮容全
水咽猶登隴沙鳴稍極邊
路因乘驛近志為飲冰堅
毳帳差池見鳥旗搖曳前
歸來賜金石榮耀自編年

蚤秋送臺院楊侍御歸朝

兄弟四人遍歷諸科二人同在

仙署棣華春當時已絕倫
今朝丹闕下更入白眉人
重振高陽族分居要路津
一門科第足五府辟書頻

鷲鳥得秋氣法星懸火是聖朝寰海靜所至不埋輪

送工部蕭郎中刑部李郎中並以本官兼

中丞分命充京西京北覆糧使

霜簡映金章相輝同舍郎天威巡虎落星使出駕行

尊俎成全策京坻閱見糧歸來虜塵滅畫地奏明光

送李尚書鎮滑州

自浙西觀察徵拜兵部侍郎月餘有此拜

南徐報政入文昌東郡須才別建章視草名高同蜀

客擁旄年少勝荀郎黃河一曲當城下緹騎千重照

路傍自古相門還出相如今人望在巖廊其後果繼

送渾大夫赴豐州自大鴻臚家承舊勳

鳳啣新詔降恩華又見旌旗出渾家故吏來辭辛屬

國精兵願逐李輕車羶裘君長迎風懼錦領首豪蹋

雪衙其奈明年好春日無人喚看牡丹花

送源中丞充新羅冊立使侍中之孫

相門才子稱華簪持節東行捧德音身帶霜威辭鳳

闕口傳天語到雞林烟開鼇背千尋碧日洛鯨波萬

頃金想見扶桑受恩後一時西拜盡傾心

送陸侍御歸淮南使府五韻用年字

江左重詩篇陸生名久傳鳳城來已熟羊酪不嫌羶
歸路芙蓉府離堂瑤瑁筵秦山呈臘雪隋柳布新年
曾添揚州薦因君達短牋時段丞相鎮揚州嘗辱表薦

送太常蕭博士棄官歸養赴東都時元兄

少師仲兄為即官並分司洛邑

兄弟盡鴛鴦歸心切問安貪榮五采服遂挂兩梁冠
侍膳曾調鼎循陔更握蘭從今別君後長向德星看

送王司馬之陝州自太常丞授工為詩

暫輟清齋出太常空攜詩卷赴甘棠府公既有朝中

舊司馬應容酒後狂案牘來時唯署字風煙入興便
成章兩京大道多遊客每遇詞人戰一場

洛中送楊處厚入閤便遊蜀謁常令公

洛陽秋日正淒淒君去西秦更向西舊學三冬今轉
富曾傷六翮養初齊皇城曉日窺丹鳳蜀路晴天見
碧雞蚤識卧龍應有分不妨從此躡丹梯

洛中送韓七中丞之吳興口號五首

昔年意氣結群英幾度朝回一字行海北天南零落
盡兩人相見洛陽城

自從雲散各東西每日歡娛却慘悽
離別苦多相見少一生心事在書題

今朝無意訖離杯何況清弦急管催
本欲醉中輕遠別不知翻引酒悲來

駱駝橋上蘋風起鸚鵡杯中箸下春水碧
山青知好處開顏一笑向何人

溪中士女出芭籬溪上鴛鴦避畫旗
何處人間似仙境春山攜妓採茶時

送周使君罷渝州歸郢州別墅

君思郢上吟歸去故自渝南擲郡章
野戍岸邊留畫舸綠羅陰下到山莊
池河雨後衣香起庭草春深綬帶長
只恐鳴騶催上道不容待得晚松嘗

登華州留別賈侍御

東簡下延閣買符短驅轅同人惜分袂
結念醉芳樽切切別弦思蕭蕭征騎煩
臨岐無限意相視却忘言

張詩云夫子生知者相期妙理中
遂有忘言之句

奉送家兄歸王屋山隱居二首

據道書王屋山一名

陽洛山

陽洛天壇上依倚似玉京夜分先見日月淨遠聞笙
雲路將雞犬丹臺有姓名古來成道者兄弟亦同行
春來山事好歸去憶逍遙水淨苔沙色露香芝朮苗
登臺吸瑞景飛步翼神飆願薦墳麓曲相將學玉簫
送王師魯協律赴湖南使幕即永穆公之孫
翩、馬上郎驅傳渡三湘橘樹沙洲暗松醪酒肆香
素風傳竹帛高價騁琳瑯楚水多蘭若何人事塞芳

別友人得書因以詩贈後

前時送君去揮手青門橋路轉不相見猶聞馬蕭蕭

今得出關書行塵日已遙春還遲君至共結芳蘭苕

奉送浙西李僕射相公赴鎮奉送至臨泉驛書禮見徵

拙詩時在汝州

建節東遊是舊遊歡聲喜氣滿吳州郡人重得黃丞
相童子爭迎郭細侯詔下初辭温室樹夢中先到景
陽樓自憐不識平津閣遙望旌旗汝水頭

重送浙西李相公頃廉問江南已經七載
後歷滑臺劔南兩鎮遂入相今復領舊地
新加旌旄

江北萬人看玉節江南千騎引金鏡鳳從池上遊滄
海鶴到遼東識舊巢城下清波含百谷窻中遠岫列
三茅碧雞白馬回翔久却憶朱方是樂郊

送華陰尉張茗赴邕府使幕

張即燕公之孫生事除名

昔忝南宮卽往來東觀頻嘗披燕文傳聳若窺三辰
翊聖崇國本保賢正朝倫高視緬今古清風夏無鄰
闌錡照通衢一家十朱輪鄧國嗣侯絕蕙鄉貴業貧
夫子承大名少年振芳塵青袍仙掌下矯首陵煙旻
公治本非罪潘卽一為民風霜苦搖落堅白無緇磷一

旦逢良時天光燭幽淪重為長裾客佐彼觀風臣分
野窮禹盡人煙過虞巡不言此行遠所樂相知新雨
起巫山陽鳥鳴湘水濱離筵出蒼莽別曲多愁辛今
朝一杯酒明日千里人彼此孤舟去悠悠天海春

送湘陽熊判官孺登府罷歸鐘陵因寄呈

江西裴中丞二十三兄

射策志未就從事府云除篋留馬卿賦袖有劉弘書
忽見夏木深帳然憶吾廬復持州民刺歸謁專城居
君家誠易知勝絕傾里閭人言北郭生門有卿相輿

鐘陵藹千里帶郭西江水朱檻照河宮旗亭綠雲裏
前年初缺守慎簡由宸扆臨軒弄郡章得人方付此
是時左馮翊天下第一理貴臣持牙璋優詔發青紙
迎風污吏免先令疲人喜何武効腐儒陳蕃禮高士
昔升君子堂腰下綬猶黃中丞時為汾陰有寶氣赤
莖多竒鉞束簡下曲臺佩鞬來歷陽綺筵陪一笑蘭
室襲餘芳風水忽異勢江湖遂相忘因君儻借問為
話老滄浪中丞為博士製相國柳宜城謚議識者躋
之頃授予以其本厥後牧和州節度使杜
司徒以中丞材譽俱高欲令軍裝以重戎府故授以本
州團練使滿坐觀腰鞬禮成驩甚相視而笑後房燕

樂卜夜縱談予忝司徒之賓時獲末坐初中丞自尚
書屯田負外郎出守踵其武者今給事中穆公代給
事者右丞段公予不佞繼
右丞之後故曰襲餘芳焉

送常秀才道冲赴制舉

驚禽一辭巢棲息無所安秋扇一離手流塵蔽霜紈
故侶不可追涼風日已寒遠逢杜陵士別盡平生歡
逐客無印綬楚江多芷蘭因君時下遊長缺不復彈
閱書南軒霽絙瑟清夜闌萬境身外寂一杯腹中寬
伊昔玄宗朝冬卿冠駕鸞肅穆升內殿從容領儒冠
游夏無措詞陽秋垂不刊至今郡王府學者空縱觀

世人希德門揭若攀峯巒之子向明訓錡如振琅玕
一旦西上書班裳拂征鞍荆臺宿暮雨漢水浮春瀾
君門起天中多士如星攢烟霞覆雙闕拊舞羅千官
清漏滴銅壺仙厨下雕槃熒煌仰金榜錯落飛濡翰
古來長策人所歎遭時難一鳴從此始相望青雲端
送李策秀才還湖南因寄幕中親故兼簡

衡州呂八郎中

深春風日淨爭長幽鳥鳴僕夫前致辭門有白面生
攝衣相問訊解帶坐南榮端志見眉睫苦言發精誠因

出懷中文調孤詞亦清悄如促柱弦掩抑多不平乃
言本蜀士世降岷山靈前人秉懿文高視來上京曳
綬司徒府所從信國楨折薪委空林善響繼難繼聲
何處翳附郭幾人思郾城雲天望喬木風水悲流萃
前與計吏西始列貢士名森然就筆札從試春官卿
帝城岐路多萬足伺晨星茫：風塵中工拙同有營
寒女勞夜織山苗榮寸莖侯門方擊鐘衣褐誰將迎
弱羽果摧頽壯心鬱怍：諒無蟠木容聊復蓬累行
昨日訊靈龜繇言利艱貞當求捨掖中必在審已明誓

將息薄遊焦思窮筆精詩蘭在幽渚安得揚棊馨曰
余摧落者散質負華纓一聆苦辛詞再動伊鬱情身
棄言不重愛才心尚驚恨無羊角風使爾化北溟論
罷情益親涉旬忘歸程日攜邑中客閑眺江上城晝
渴命金壘宵談轉璿衡蕙風香塵尾月露濡桃笙忽
被戒羸驂薄言事南征火雲蔚千里旅思浩已盈湘
江含碧虛衡嶺浮翠晶豈伊山水異適與人事并油幕
似崑丘粲然壘瑤瓊庾樓見清月孔坐多綠醴復有
衡山守本自雲龍庭至和在靈府發越倅咸英一麾

出營陽惠彼咄：氓隼旗辭瀟水居者皆涕零唯昔
與伊人交歡在夙齡一從雲雨散滋我鄙怯萌北渚
不堪愁南音誰復聽離憂若去水浩漾無時停常聞
祝融峯上有神禹銘古石琅玕姿祕文螭虎形聖功
真遠服神物擁休禎賢人在其下仿像疑蓬瀛君行
歷郡齋大袂拂雙旌飾容遇朗鑒肝鬲可以呈昔日
馬相如臨邛坐盡傾勉君刷羽翰蚤取凌青冥

送張盥赴舉 并引

古人以偕受學為同門友今人以偕升名為同年友

其語熟見搢紳者皆道焉余於張盥為丈人由是道也曩吾見爾之始生以老成為祝今吾見爾之成人以未立為憂吾不幸嚮所謂同年友當其盛時聯袂齊鑣亘絕九衢若屏風然今來落之如曙星之相望借日會合不煩異席可長太息哉然而尚書右丞衛大受兵部侍郎武庭碩二君者當時偉人咸萬夫之望足以訂十朋之多也第如京師無騷之爾無忤之爾時秋也吾為若叩商之謳幸有感夫二君爾生始懸弧我作坐上賓引箸舉湯餅祝詞天麒麟

今成一丈夫坎軻愁風塵長裾來謁我自號廬山人道舊與撫孤悄然傷我神依之見眉睫嘿之含悲辛永懷同年友追想出谷晨三十二君子齊飛凌烟旻曲江一會時後會已彫淪况今三十載閱世難重陳盛時一已過來者日之新不如搖落樹重有明年春火後見琮璜霜餘識松筠肅機乃獨秀武部亦絕倫爾今持我詩西見二重臣成賢必念舊保貴在安貧清時為清郎氣力侔陶鈞乞取斗升水因之雲漢津

送裴處士應制舉

晉人裴昌禹讀書數千卷於周官小戴禮尤邃性是古敢言雖侯王不能下故與世相參差凡抵有位以索合行天下凡_反依_反通常歎諸侯莫可遊欲一見天子而未有路會今年詔書徵賢良昌禹大喜以為盡可以豁平生搏髀爵躍日一觀雲龍庭足矣繇是裹三月糧而西徂咨余以七言為西遊之資藉耳

裴生久在風塵裏氣勁言高少知己注書魯學鄭司農歷國多于孔夫子往年訪我到連州無窮絕境終日遊登山雨中試蠟屐入洞夏裏披貂裘白帝城邊

又相遇歛翼三年不飛去忽然結束如秋蓬自稱對策明光宮人言策中說何事掉頭不答看飛鴻彤庭翠松迎曉日鳳啣金榜雲間出中貴腰鞭立傾酒宰臣委佩觀搖筆古稱射策如彎弧一發偶中何時無由來草澤無忌諱努力滿挽當雲衢憶得童年識君處嘉禾驛後聯牆住垂釣闔得王餘魚躡芳共登蘇小墓此事今同夢想間相看一笑且開顏老大希逢舊鄰里為君扶病到方山

和州送錢侍御自宣州幕拜官便於華州

觀省

五綵繡衣裳當年正相称春風舊官路歸去真多興

蘭陔行可採蓮府尤回瞪楊家紺幘迎

侍御即王相公貴壻謝

守瑤華贈

宣州崔相公
有詩贈行

御街草泛灑臺栢烟含凝曾

是平昔遊無因理歸乘

將赴汝州途出浚下留辭李相公

長安舊遊四十載鄂渚一別十四年後來富貴已零
落歲寒松柏尤依然初逢貞元尚文主雲闕天池共
翔舞相看却數六朝臣屈指如今無四五夷門天下

之咽喉昔時往：生瘡疣聯翩舊相來鎮壓四海吐
納皆通流久別凡經幾多事何由說得平生意千思
萬慮盡如空一笑一言真可貴世間何事最殷勤白
頭將相逢故人功成名遂會歸老請向東山為近隣

送令狐相公自僕射出鎮南梁

夏木正陰成戎裝出帝京沾襟辭闕淚回首別鄉情
雲樹襄中路風烟漢上城前旌轉谷去後騎蹋橋聲
久領鴛行重無嫌虎綬輕終當提一筆再入副倉生
送趙中丞自司金外郎轉官參山南令狐

僕射幕府

趙氏兄弟皆僕射門客

綠樹滿襄斜西南蜀路賒驛門臨白社縣道過黃花
相府開油幕門生逐絳紗行者布政後還從入京華

奉送裴司徒令公自東都留守再命太原

本封晉國公兩

任相去十六年

星使出關東兵符賜上公山河歸舊國管籥換離宮
行色旌旗動軍聲鼓角雄愛棠餘故吏騎竹見新童
漢壘三秋靜胡沙萬里空其如天下望旦夕咏清風
奉送李戶部侍郎自河南尹再除本官歸

闕

昔年內署振雄詞今日東都結去思宮女猶傳洞簫
賦國人先詠衮衣詩華星却復文昌位別鶴重歸太
乙池想到金門待通籍一時驚喜見風儀

送蘄州李郎中赴任

楚閩蘄水路非賒東望雲山日夕佳薤葉照人呈夏
簞松花滿盃試新茶樓中飲興因明月江上詩情為
晚霞北地交親長引領蚤將玄鬢到京華

洛中春末送杜錄事赴蘄州

尊前花下長相見，明日忽為千里人。
君過午橋回首望，洛城尤自有殘春。

夜宴福建盧侍御宅因送之鎮

暫駐旌旗洛水隄，綺筵紅燭醉蘭闈。
美人美酒長相逐，莫怕猿聲發建溪。

洛中送崔司業使君扶持赴唐州

綠野方城路，殘春柳絮飛。
風鳴驕驕馬，日照老萊衣。
洛苑魚書至，江村鴈力歸。
相思望淮水，雙鯉不應稀。

送河南皇甫少尹赴絳州

祖帳臨周道，前旌指晉城。
午橋群史散，亥字老人迎。
詩酒同行樂，別離方見情。
從茲洛陽社，吟咏欠書生。

送前進士蔡京赴學究科

時舊相揚尚書掌選

耳聞戰鼓帶經鋤，振發名聲自里閭。
已是世間能賦客，更攻窻下絕編書。
朱門達者誰能識，絳帳諸生盡不如。
幸遇天官舊丞相，知君無翼上空虛。

送唐舍人出鎮閩中

暫辭鴛鷺出蓬瀛，忽擁貔貅鎮粵城。
閩嶺夏雲迎皂蓋，建溪秋樹映紅旌。
山州遠地由來好，富貴當年別

有情了却人間婚嫁事復歸朝右作公卿

送盧處士歸嵩山別業

世業嵩山隱雲深無四隣藥鑪燒姹女酒甕貯賢人
曉日華陰霧秋風函谷塵送君從此去鈴閣少談賓

送李友路秀才赴舉

誰憐相門子不語望秋山生長紈綺內辛勤筆硯間
榮親在名字好學棄官班佇俟明年桂高堂開笑顏

送國子令狐博士赴興元覲省

相門才子高陽族學省清資五品官諫院過時榮棣

萼謝庭歸去蹋芝蘭山頭花帶烟嵐晚棧底江涵雪
水寒伯仲到家人盡賀柳營蓮府遞相歡

送李二十九兄負外赴邠寧使幕

家襲韋平身業文素風清白至今貧南宮通籍新郎
吏西候從戎舊主人城外草黃秋有雪烽頭煙靜虜
無塵鼎門為別霜天晚賸把離觴三五巡

送分司陳郎中祇召直史館重修三聖實

錄

蟬鳴官樹引行車言自成周赴玉除遠取南朝貴公

子重修東觀帝玉書常時載筆窺金匱暇日登樓到
石渠若問舊人劉子政如今頭白在商於

送李中丞赴楚州

緹騎朱旗入楚城士林皆賀振家聲兒童但喜迎賢
守故吏猶應記小名萬頃水田連郭秀四時煙月映
淮清憶君初得崑山玉同向揚州攜手行

送李庶先輩赴選

一家何啻十朱輪諸父雙飛秉大鈞曾脫素衣參幕
客却為精舍讀書人離筵洛水侵杯色征路函閔向

晚塵今日山公舊賓主知君不負帝城春

送廖參謀東遊二首

九陌逢君又別離行雲別鶴本無期望嵩樓上忽相
見看過花開花落時
繁花落盡君辭去綠草垂楊引征路東道諸侯皆故
人留連必是多情處

送從弟郎中赴浙西并引

從弟三復十餘年間凡三為浙右從事往年主公入
相薦歆登朝中復從公鎮南未幾而罷昨以尚書外

郎奉使至洛旋承新命改轅而東三從公皆在舊地
徵諸故事夔無其倫故賦詩贈之亦志異也

銜命出尚書新恩換使車漢庭無右者梁苑重歸與

又食建業水曾依京口居

劉前軍傳云本
莒人世家京口

共經何限

事賓主兩如初

劉賓客文集卷第二十八

劉賓客文集卷第二十九

送僧二十四首

贈別君素上人并引

曩予習禮之中庸至不勉而中不思而得懽然知聖
人之德學以至於無學然而斯言也猶示行者以室
廬之奧耳求其徑術而布武未易得也晚讀佛書見
大雄念物之普級寶山而梯之高揭慧火巧鎔惡見
廣踈便門旁束邪徑其所證入如舟沿川未始念於
前而日遠矣夫何勉而思之邪余知突音窳奧於中庸

啓鍵開於內典會而歸之猶初心也不知予者謂予
困而後援佛謂道有二焉夫悟不因人在心而已其
證也猶啗人之享太牢信知其味而不能形於言以
聞於耳也口耳之間兼寸耳尚不可使聞它人之不
吾知宜矣開士君素偶得予於所親一麻棲草千里
來訪素以道眼視予：以所視：之不由陞級攜手智
地居數日告有得而行乃為詩以見志云
窮巷唯秋草高僧獨扣門相歡如舊識問法到無言
水為風生浪珠非塵可昏云來皆是道此別不銷魂

送深法師遊南岳

上人奉在
資聖寺

師在白雲鄉名登善法堂十方傳句偈八部會壇場
飛錫無定所寶書留舊房唯應啣草鴈相送至衡陽
廣宣上人寄在蜀與韋令公唱和詩卷因
以令公手札答詩示之

碧雲佳句久傳芳曾向成都住草堂振錫常過長者
宅披文猶帶令公香一時風景添詩思八部人天入
道場若許相期同結社吾家本自有紫桑

送僧仲剎東遊兼寄呈靈激上人

釋子道成神氣閑住持曾上清涼山晴空禮拜見真
像金毛五髻卿雲間西遊長安隸僧籍本是門前曲
江碧松間白月照寶書竹下香泉灑瑤席前時學得
經論成奔馳象馬開禪局高筵談柄一麾拂講下聽
徒如醉醒舊聞南方多長老次第來入荆門道荊州
本自重彌天南朝塔廟猶依然宴坐東陽枯樹下經
行居止故臺邊忽憶遺民社中客為我衡陽駐飛錫誦
罷同尋相鶴經閑來共蠟登山屐一旦揚眉望沃州
自言王謝許同遊憑將雜擬三十首寄與江南湯慧

休

送僧元嵩南遊 并引

予策名二十年百慮而無一得然後知世所謂道無
非畏途唯出世間法可盡心耳由是在席硯者多旁
行胡岡四句之書備將迎者皆赤頰白足之侶深入
智地靜通還源客塵觀盡妙氣來宅內視胸中猶煎
鍊然開士元嵩姓陶氏本丹陽居家世有人爵不藉
其資於毗尼禪那極細字之義於中後日習總持之
門妙音奮迅願力昭荅雅聞予事佛而佞亟來相從

或問師隳形之自對曰失怙恃推棘心以求上乘積
四十年有羸老將至而不懈始悲浚泉之有冽今痛
防墓之未遷塗芻莫備薪火恐滅諸相皆離此心長
懸雖萬性歸佛盡為釋種如何入海無復水名然其
一切智者豈遺百行求無量義者寧容斷思今聞南
諸侯雅多大士思扣以苦調而希其未光無容至前
有足悲者予聞是說已力不足而悲有餘因為詩以
送之庶乎踐霜露者聆之有惻
寶書翻譯學初成振錫如飛白足輕彭澤因家凡幾

世靈山預會是前生傳燈已悟無為理濡露猶懷罔
極情從此多逢大居士何人不願解珠璣

送如智法師遊辰州兼寄許評事

前日過蕭寺看師上講筵都人禮白足施者散金錢
方便無非教經行不廢禪還知習居士發論待彌天

贈長沙讚頭陀

外道邪山千萬重真言一發盡摧峯有時明月無人
夜獨向昭潭制惡龍

送慧則法師上都因呈廣宣上人

并引師
精淨名

佛示滅後大弟子演聖言而成經傳心印曰法承法
而能專曰宗由宗而分教曰友坐而攝化者勝義皆
空之宗也行而宣教者摧破邪山之友也釋子慧則
生於像季思濟劫濁乃學於一友開彼群疑迷以為
盡妙理者莫如法門變凡夫者莫如佛土悟無染者
莫如散花故業于淨名深達實相自京師涉漢沔歷
鄔郢登熊湘聽徒百千耳感心化法無住道行而歸願
予有社內之因故言別之日愛緣瞥起時也秋盡咏

江淹雜擬以送之前見宣上人為我多謝

昨日東林看講時都人象馬蹋瑠璃雪山童子因前
世金粟如來是本師一錫言歸九城路三依曾拂萬
年枝休公久別如相問楚客逢秋心更悲

秋日過鴻舉法師寺院便送歸江陵 并引

梵言沙門猶華言去欲也能離欲則方寸地虛而
萬景入、必有所泄乃形乎詞、妙而深者必依于
聲律故自近古而降釋子以詩聞于世者相踵焉者
因定而得境故翛然以清由慧而遣詞故粹然以麗

信禪林之蕪萼而誠河之珠璣耳初鴻舉學詩於荆
郢間私試竊咏發于餘習蓋榛楛之翠羽弋者未之
賄焉今年至武陵二千石始竒之有起予之歎以方
袍親絳紗者十有餘旬由是名稍聞而執愈變閏八
月余步出城東門謁仁祠而鴻舉在焉與之言移時
因告以將去且曰貧道雅聞東諸侯之工為詩者莫
若武陵今幸承其語言如得法印室山之下宜有所
持豈徒衣襪之中衆花而已余聞是說乃叩齒而吟
成一章：八句郡守以坐嘯餘詠激清微而應之師

其行乎足以資一時中之學矣

看畫長廊遍尋僧一徑幽小池兼鶴淨古木帶蟬秋
客主茶煙起禽歸誦席收浮杯明日去相望水悠悠

重送鴻舉赴江陵謁馬逢侍御

西北秋風凋蕙蘭洞庭波上碧雲寒茂陵才子江陵
住乞取新詩合掌看

送僧方及南謁柳員外并引

九江僧方及既出家依斥山一時中頗屬詩以攄思
古詩人暨今號為能賦有輒求其詞吟呻之拳然

多：益嗜影不出山者十年常登最高峰四望天海
冲然有遠遊之志頓錫而言曰神馳而形闕者方內
之徒及吾無方於間於何有者由是耳得必日探之
意行必身隨之雲遊鳥企虛筵無迹而遠予為連州
居無何而方及至出緘中詩一篇以貺予其詞甚富
留一歲觀其行結矩如教益多之一旦以行日來告
且曰雅聞鳥味之下有賢諸侯願躋其門如蹈十地
敢乞詞以抵之予唯而賦之願其有重請之色起於顏
間耳

昔事廬山遠精舍虎溪東朝陽照瀑水樓閣虹霓中
騁望羨游雲振衣若秋蓬舊房閉松月遠思吟江風
古寺歷頭陀竒峰攀祝融南登小桂嶺卻望歸塞鴻
衣緘貯文章自言學雕蟲捨榆念陵厲覆簾圖穹崇
遠郡多暇日有詩訪禪宮石門聳峭絕竹院含空濛
幽響滴巖溜晴芳飄野叢海雲懸颶母山果屬狙公
忽憶吳興郡白蘋正葱蘢願言挹風采邈若窺華嵩
桂水夏瀾急火山宵焰紅三衣濡菌露一錫飛煙空
勿謂翻譯徒不為文雅雄古來賞音者樵爨得孤桐

按狙公宜斥賦芋者而越絕書有猿公張衡賦南都
有猿父長嘯之句古文士又云權父由是而言謂猿
為父
舊矣

贈日本僧智藏

浮杯萬里過滄溟遍禮名山適性靈深夜降龍潭水
黑新秋放鶴野田春青身無彼我那懷土心會真如
不讀經為中華學道者幾人雄猛得寧馨

贈眼醫婆羅門僧

三秋傷望遠終日泣途窮兩目今先暗中年似老翁
看朱漸成碧羞日不禁風師有金篦術如何為發蒙

海陽湖別浩初師并引

瀟湘間無土山無濁水民乘是氣徃々清慧而文長
沙人浩初生既因地而清矣故去葷洗慮剔顛毛而
懷其衣居一都之殷易與士會得執外教盡捐苛禮
自公侯守相必賜其清間耳目灌注習浮於性而里
中兒賢適與浩初比者嬰冠帶豢妻子更得以乘陵
之汨沒天慧不得自奮莫可望浩初之清光於侯門
上坐第自吟羨而已浩初益自多其術尤勇於近達
者而歸之往年之臨賀喧侍郎楊公留歲餘公遺以

七言詩手筆於素前年省柳儀曹于龍城又為賦三
篇皆章書今復來連山以前所得雙南金出於械函
請余賡之按師為詩頗清而奕棋至第三品二道皆
足以取幸於士大夫宜薰餘習以深入也會吳郡以
山水冠世海陽又以竒甲一州師慕道於泉石宜篤
故攜之以嬉及言旋復引與共載於湖上奕於樹石
間以植沃州之因緣且賦詩具道其事

近郭有殊境獨遊常鮮懽逢君駐緇錫觀白稱林岫
湖滿景方霽野香春未闌愛泉移席近聞石輒棋看

風止松猶韻花繁露晚乾橋形出樹曲巖影落池寒
湘東架險凡四橋山下出泉逗崑為池泓別路千嶂
澄可愛者不可遍舉故狀其境以貽好事

裏詩情莫雲端它年買山處似此則隳官

觀碁歌送僕師西遊

長沙男子東林師閑讀藝經工奕棋有時凝思如入
定暗覆一局誰能知今年訪余來小桂方袍袖中貯
新勢山城無事愁日長白晝慵眠匡牀因君臨局
看闔智不覺遲景沈西牆自從山人遇樵子直到開
元王長史前身後身付餘習有變千化無窮已初疑磊

落曙天星次見搏擊三秋兵鴈行布陣衆未曉虎穴
得子人皆驚行盡三湘不逢敵終日饒人損機格自
言臺閣有知音悠然遠起西遊心商山夏木陰寂
好處裴回駐飛錫忽思爭道畫平沙獨笑無言心自
適藹：京城在九天貴遊豪士足華筵此時一行出
人意賭取聲名不要錢

贈別約師并引

荊州人文約市井生而雲鶴性故去葷為浮圖生寤
而證入與南抵六祖姑生之墟得遺教甚悉今年訪

余於連州且日貧道昔浮湘川會柳儀曹謫零陵宅
於佛寺幸聯棟而居者有年由是時人大士得落耳
界夫聞為見因今日之來曩日之因耳時儀曹牧柳州
與八句贈別

師逢吳興守相伴住禪扃春雨同栽樹秋鐙對講經
廬山曾結社桂水遠揚舫詎舊還惆悵天南望柳星

送鴻舉江南并引

始余謫朗州爾時是師振麻衣裴然而前持文篇以
為僧贊啣之而清如蟲吟秋自然之響無有假合有

足佳者故為賦二章以聲之距今年遇于建平赤嶺
益蕃文思益深而有內外學益富既訊已探祕中出
前所與詩閱之紙勞墨瘁與我同來因思夫苒之之
光渾之之輪時而言有初中後之分日而言有今昨
明之稱身而言有幼壯艾之期乃至一謦欬一彈指
中際具皆具何必求三生以異身耶然而視余之文
昔與今有筵楹之別視余之書昔與今有鈞石之懸
視余之仕昔與今乃唯阿之差耳豈有工拙之數存
乎其間哉蓋可勉而進者與日月而至矣彼儻來外

物雖日月無能至焉是歲師告余遊江西復為賦七言
以為遊地爾

禪客學禪無學文出山初似無心雲從風卷舒來處
處繚繞巴山不得去山州古寺好閑居讀盡龍王宮
裏書使君灘頭揀石硯白帝城邊尋野蔬忽然登高
心瞥起又欲浮杯信流水烟波浩淼魚鳥情東去三
千三百里荆門硤斷無盤渦湘平漢濶清光多廬山
霧開見瀑布江西月淨聞漁歌鐘陵八部多名守半
是西方社中友與師相見便談空想得高齋師子吼

送霄韻上人遊天台

曲江僧向松江見，又道天台看石橋。
鶴戀故巢雲戀岫，比君猶自不逍遙。

送義舟師却還黔南并引

黔之鄉在秦楚為爭地，近世人多過言其幽荒。
以談笑聞者，又從而張皇之。猶夫東蕙逐原燎，或近乎語妖。
適有沙門義舟，道黔江而來，能畫地為山川，及條其風俗，纖悉可信。且曰：貧道以一錫遊它方，衆矣至黔，而不知其遠。始遇前節使，而聞今節使益賢而文，故

其佐多才士，摩圍之下曳裾秉筆，彬然與兔園同風。蓄僧以外學嗜篇章，時或攝衣為末至客，其來也約。主人乘秋風而還，今乞詞以颺之。如捧意珠，行住坐卧，知相好耳。余曰：唯命筆為七言以應之。
黔江秋水浸雲霓，獨泛慈航路不迷。
猿狖窺齋林葉動，蛟龍聞呪浪花低。
如蓮半偈心常悟，問菊新詩手自攜。
常說摩圍似靈鷲，却將山屐上丹梯。

送景玄師東歸并引

廬山僧景玄袖詩一軸來謁，往有句輕而道如鶴。

雖襪襪未有六翻而步舒視遠戛然一吸乃非泥滓
間物獻詩已歛衽而辭且曰其來也與故山秋為期
夫丐者僧事也今無他請唯文是求故賦一篇以代
瓔珞耳

東林寺裏一沙彌心愛當時才子詩山下偶隨流水
出秋來卻赴白雲期灘頭攝屐挑沙菜路上停舟讀
古碑想到舊房拋錫杖小松應有過檐枝

送元曉上人歸稽亭

重疊稽亭路山僧歸獨行遠峯斜日影本寺舊鐘聲

徒侶聞新事烟雲含別情應誇乞食處蹋遍鳳凰城
送惟良大并引

以貌窺天者曰乾然健單于然而高以數迎天者曰
其用四十有九天果以有形而不能脫乎數立象以
推筴既成而遺之古所謂神交造物者非空言耳軒
皇受天命其佐皆聖人故得之唯唐繼天德如黃帝
有外臣一行亦聖之徒與刊曆考元書成化去今冊徒
人惟良生而能知非自外求以乾坤之美當十期之
數凝神運指上感躔次視玄黃溟滓無倪有常絕機

泯知獨以神會數起於復之初九音生乎黃鍾之宮
積微本隱言與化合夫天人之數極而含變之而靡
不通神趨鬼懾不足駭也惟良得一行之道故亦慕
其為外臣謬謂余為世間聰明子、來訪初以說合
至于不言、息而理冥復申之以嗟歎曰師其庶幾
乎信神與之而不能測神之所以付信術通之而不
能知術之所以淺哉余聞乎曾井蛙醢雞之不若也
長慶四年冬十一月甲子語至夜艾遂為詩以誌高
齋灑寒水是夕山僧至玄牝無閑鎖瓊書捨文字鐙

明香滿室月午霜凝地語到不言時世間人盡睡

送元簡上人適越

孤雲出岫本無依勝地名山即是歸久向吳門遊好
寺還思越水洗塵機浙江濤驚師子吼稽嶺峯疑靈
鷲飛更入天台石橋路垂珠璀璨拂三衣

送宗密上人歸南山草堂寺因詣河南尹

白侍郎

宿習修來得慧根多聞第一卻忘言自從七祖傳心
印不要三乘入便門東泛滄江尋古跡西歸紫閣出

塵喧河南白尹大檀越好把真經相對翻

劉賓客文集卷第二十九

劉賓客文集卷第三十

哀挽悲傷三十八首

德宗神武孝文皇帝挽歌二首

出震清多難乘時播大鈞操弦調六氣揮翰動三辰
運偶升天日哀深率土人瑤池無輒跡誰見屬車塵
鳳翣擁銘旌威遲異吉行漢儀陳秘器楚挽咽繁聲
駐紼辭清廟凝笳背直城唯應留內傳知是向蓬瀛

敬宗睿武昭愍孝皇帝挽歌三首

寶曆方無限仙期忽有涯事親崇漢禮傳聖法殷家

晚出芙蓉闕春歸棠棣華玉輪今日動不是畫雲車
任賢勞夢寐登位富春秋欵遂東人幸寧虞祀國憂
長楊收羽騎太液泊龍舟唯有衣冠在年々愴水遊
講學金華殿親耕鈎盾田侍臣容諫獵方士信求仙
虹影俄侵日龍顛不上天空餘水銀海長照夜鐙前

文宗元聖昭獻孝皇帝挽歌三首

繼體三才理承顏九族親禹功留海內殷曆付天倫
調露曲長在秋風詞尚新本支方百代先讓棣華春
月落公車動風淒儀仗間路唯贍鳳翥人尚想龍顏

御宇方無事乘雲遂不還聖情悲望處兄日下西山
享國十五載升天千萬年龍鑣仙路遠騎吹禮容全
日下初陵外人悲舊劍前周南有遺老掩淚望秦川
故相國燕國公于司空挽歌二首

彤弓封舊國黑綃繼前功十年鎮南雍九命作司空
池臺樂事盡簫鼓葬儀雄一代英豪氣曉散白揚風
陰山貴公子來葬五陵西前馬悲無主猶帶朔氣嘶漢
水青山郭襄陽白銅蹄至今有遺愛日暮人悽々

元和乙未歲與故人柳子厚臨湘水為別柳浮舟適
柳州余登陸赴連州後五年余從故道出桂嶺至前
別處而君沒於南中因賦詩以投吊

憶昨與故人湘江岸頭別我馬映林嘶君颿轉山滅
馬嘶循故道颿滅如流電千里江離春故人今不見

謫居悼往二首

邑：何邑：長沙地卑濕樓上見春多花前恨風急
猿愁鴈斷叫鶴病翹趾立牛衣獨自眠誰哀仲卿泣
鬱：何鬱：長安遠於日終日念鄉閨燕來鴻復還

潘岳歲寒思屈平顛顛顏殷勤望歸路無雨即登山

哭呂衡州時余方謫居

一夜霜風凋玉芝蒼生望絕士林悲空懷濟世安人
略不見男婚女嫁時遺草一函歸太史旅墳三尺近
要離朔方徙歲行當滿欲為君刊第二碑

遙傷段右丞

江湖舊遊
南宮交代

江海多豪氣朝廷有直聲何言馬蹄下一旦是佳城

傷桃源薛道士

壇邊松在鶴巢空白鹿閑行舊迹中手植紅桃千樹

發滿山無主任春風

王思道碑堂下作

蒼：宰樹起寒烟尚有威名海內傳四府舊聞多故
史幾人垂淚拜碑前

遥傷丘中丞并引

河南丘絳有詞藻與余同升進士科從事鄴下不幸
遇害故為傷詞

鄴下殺才子蒼茫冤氣凝枯楊映漳水野火上西陵
馬鬣今無所龍門昔共登何人為弔客唯是有青蠅

傷獨孤舍人并引

貞元中余以御史監祠事河南獨孤生始仕為奉禮
郎有事宗廟郊時必與之俱繇是甚熟及余謫武陵
九年間獨孤生仕至中書舍人視草禁中上方許以
宰相元和十年春余祇召抵京師次都亭日舍人疾
不起余聞因作傷詞以為弔

昔別一年少今悲喪國華遠來同社燕不見早梅花
途次敷水驛伏觀華州舅氏昔日行縣題
詩處潜然有感

昔日股肱守朱輪茲地遊繁華日已謝章句此空留蔓
草佳城閉故林棠樹秋今來重垂淚不忍過西州

湖南觀察使故相國袁公挽歌

五驅龍虎節一入鳳皇池令尹自無喜羊公人不疑
天歸京兆日葉下洞庭時湘水秋風至淒涼吹素旗
丹旒發江臯人悲鴈亦號湘南罷吏市漢上改詞曹
長墓雙碑立尊名一字褒常聞平楚獄為報里門高
返葬三千里荆衡達帝畿逢人即故吏拜奠盡沾衣
地得青烏相賓驚白鶴飛五公碑尚在今日亦同歸

代靖安佳人怨二首 并引

靖安丞相武公居里名也元和十一年六月公將朝
夜漏未盡三刻騎出里門遇盜薨于墻下初公為郎
余為御史繇是有舊故今守于遠服賤不可以誅又
不得為歌詩聲于楚挽故代作佳人怨以埤于樂府
寶馬鳴珂蹋晚塵魚文七首犯車茵適來行哭里門
外昨夜華堂歌舞人
秉燭朝天遂不回路人彈指望高臺墻東便是傷心
地夜：秋螢飛去來

傷愚溪三首并引

故人柳子厚之謫永州得勝地結茅樹蔬為沼止為
臺榭目曰愚溪柳子沒三年有僧遊零陵告余曰愚
溪無復曩時矣一聞僧言悲不能自勝遂以所聞為
七言以寄恨

溪水悠々春自来草堂無主燕飛回
隔簾唯見中庭一樹山榴依舊開

草聖教行留壁壞木奴千樹屬隣家
唯見里門通德榜殘陽寂寞出樵車

柳門竹巷依々在野草青苔日月多
縱有鄰人解吹笛山陽舊里更誰過

碧澗寺見元九侍御和展上人詩有三生
之句因以和

廊下題詩滿壁塵塔前松樹已鱗皴
古來唯有王文度重見平生竺道人

傷秦妹行并引

河南房開士前為虞部郎中為余語曰
我得善箏人于長安懷遠里其後開士
為赤縣牧容州求國工而

誨之藝工而天今年開士遺予新詩有悼佳人之目
願予知所自也惜其有良妓獲所從而不可久乃為
傷詞以貽開士

長安二月花滿城插花女兒弄銀箏南宮仙郎下朝
晚曲頭駐馬聞新聲馬蹄逶迤心蕩漾高樓已遠猶
頻望此時意重千金輕烏傳消息紺輪迎芳筵鑿一相
見淺笑低鬟初目成蜀弦錚指如玉皇帝弟子常
家曲青牛文梓赤金簧玫瑰宝柱秋鴈行歛蛾收袂
凝清光抽弦緩調怨且長八鸞鏘々渡銀漢九雛威

鳳鳴朝陽曲終韻盡意不足餘思悄絕愁空堂從郎
鎮南別城闕樓船理曲瀟湘月馮夷躡々舞淥波鮫人
出聽停綃梭北池含烟瑤草短萬松亭下清風滿池北

萬松皆容
州勝槩

秦聲一曲此時聞嶺泉鳴咽南雲斷來自

長陵小市東舜華零落瘴江風侍兒掩泣收銀甲鸚
鵡不言愁玉籠博山鑪中香自滅鏡奩塵暗同心結
從此東山非昔遊長嗟人與弦俱絕

夔州賓員外使君見示悼妓詩願余嘗識
之因命同作

前年曾見兩鬟時今日驚吟悼妓詩
鳳管學成知有籍龍媒欲換歎無期
空廊月照常行地後院花開舊折
妓寂寞魚山青草裏何人更立智瓊祠

竇夔州見寄寒食日憶故姬小紅吹笙因

和之

鸞聲窈眇管參差清韻初調衆樂隨
幽院妝成花下弄高樓月好夜深吹
忽驚莫控飄零盡唯有朝雲夢想期
聞道今年寒食日東山舊路獨行遲

傷循州渾尚書

貴人淪落路人哀碧海連天丹旆回
遙想長安此時節朱門深巷百花開

哭龐京兆

少年有俊氣嘗擢制科之首

俊骨英才氣褻然策名飛步冠群賢
逢時已自致高位得疾還因倚少年
天上別歸京兆府人間空歎茂陵阡
今朝總帳哭君處前日見鋪歌舞筵

再傷龐尹

京兆歸何處章臺空暮塵可憐鸞鏡下
哭殺畫眉人

哭王僕射相公

名播時無監鉄暴薨

于侯一日病滕公千載歸門庭颯已變風物慘無輝
郡吏謁新府舊賓沾素衣歌堂忽暮哭賀雀盡驚飛

傷韋賓客續自工部尚書除賓客


韋公八十餘位至六尚書五福唯無富一生誰得如

桂枝攀最久蘭省出仍初海內時流盡何人動素車

故池春又至一到一傷情鴈鴛群猶下蛙續水已生

竹叢身後長臺勢雨來傾六尺孤安在人間未有名

劉賓客文集卷第三十



劉賓客別集

十卷一冊

與劉蘇州書



蘇州書



夢得閣下前者枉手札數幅兼惠荅憶春
草報白君已下五六章發函披文而後喜可知也又覆視書中

有攘臂痛拳之戲笑與朴會甚樂甚樂誰復知之因
有所云續前言之戲耳試為留聽與閣下在長安時
合所著詩數百首題為劉白倡和集卷上下
劉白倡和集解

彭城劉夢得詩豪者也其鋒森然少敢當者予不量
力往犯之夫合應者聲同交爭者力敵一往一復

欲罷不能繇是每制一篇先相視草：竟則興作興
作則文成一二年來日尋筆硯同相贈答不覺滋多
至太和三年春以前紙墨所存者凡一百三十八首
其餘乘興扶醉率然口號者不在此數因命小姪龜
兒編錄勒成兩卷仍寫二本一付龜兒一授夢得小
兒崱郎各令收藏附兩家集子頃以元微之唱和頗
多在人口常戲微之云僕與足下二十年來為文
友詩敵幸也亦不幸也吟咏情性播揚名聲其適遺
形其樂忘老幸也然江南士女語才子者多云元白

以子之故使僕不得獨步於吳越間亦不幸也今垂
老復遇夢得：非重不幸耶夢得夢得文之神妙莫
先於詩若妙與神則吾豈敢如夢得雪裏高山頭白
早海中仙果子生遲沉舟側畔千帆過病樹前頭萬
木春之句之類真謂神妙在處：應當有靈物護之
豈唯兩家子姪祕藏而已已酉歲三月五日樂天解
劉中山文集三十卷別集十卷別集者卷其官連
州時與晚年所作皆在焉中山於唐元和間有雋
名文稍亞於韓柳世謂之劉柳其詩則元白諸人

遠不逮也今四家集盛行於世獨中山闕焉相傳
吳中有錄本然偽舛殊甚詩之梓行者亦僅十之
六七耳至別集雖博雅者亦罕見之唯楊升菴詩
話中數舉其警句亦云未得其全也往嘉靖癸亥
予留滯京師閱於藏書家因就錄之間示同好以
為竒邁而梓其別集以傳蓋力僅能舉之而舊本
脫誤校之泐句始可繕寫其不可臆解者仍其舊
是編湮沒餘二百年而偶得於予物之遇合有時哉
間閱白氏長慶集有與劉蘇州書泊劉白倡和集

解其所舉者具見集中因錄之為卷首而志其鈔
梓歲月

萬曆二年春正月嶺南黎民表書

劉賓客集卷第一

正議大夫檢校禮部尚書兼太子賓客贈兵部尚書劉禹錫

詩

翰林白二十二學士見寄詩一百篇因以

答貺



吟君遺我百篇詩使我獨坐形神馳
玉琴清夜人不語琪樹春朝風正吹
郢人斤斲無痕跡仙人衣裳棄
刀尺世人方內欲相尋行盡四維無處覓

始至雲安寄兵部韓侍郎中書白舍人二

公近曾遠守故有屬焉

天外巴子國山頭白帝城
波清蜀村盡雲散荒臺傾
迅瀨下哮吼兩岸勢爭衡
陰風鬼神過暴雨蛟龍生
硤斷見孤邑江流照飛甍
蠻軍擊嚴鼓笳馬引雙旌
望闕遙拜舞分庭備將迎
銅符一以合文墨紛來縈
暮色四山起愁猿數處聲
重關郡吏散靜室燈明
故人青霞意飛舞集蓬瀛
昔曾在池籞應知魚鳥情

白舍人自杭州寄新詩有柳色春藏蘇小
家之句因而戲酬兼寄浙東元相公

一本作羣

錢塘山水有奇聲暫謫仙官有百城
女妓還聞名小使君誰許喚卿
鼇驚震海風雷起蜃闢嘘天樓閣成
莫道騷人在三楚文星今向斗牛明

春日書懷寄東洛白二十二楊八二庶子

曾向空門學坐禪如今萬事盡忘筌
眼前名利同春夢醉裏風情敵少年
野草芳菲紅錦地遊絲撩亂碧羅天
心知洛下間才子不作詩魔即酒顛

白舍人見酬拙詩因以寄謝

雖陪三品散班中資歷從來事不同
名姓也曾鐫石

柱詩篇未得上屏風
甘陵舊黨凋零盡
魏闕新知禮數崇
烟水五湖如有伴
猶應堪作釣魚翁

白舍人曹長寄新詩有遊宴之盛因以戲

酬

蘇州刺史能詩西掖今來贊左司
二八城門開道路五千兵馬引旌旗
水通山寺笙歌去騎過虹橋劍戟隨
若共吳王闔百草不如應是欠西施

蘇州白舍人寄新詩有歎早白無兒之句

因以贈之

莫嗟華髮與無兒却是人間久遠期
雪裏高山頭白早海中仙果子生遲于公
必有高門慶謝守何煩曉鏡悲幸免如新
分非淺祝君長咏夢熊詩

高山本高
于門使之

高二義殊古
之詩流曉此

和汴州令狐相公到鎮改月偶書所懷二

十二韻

受賑新梁苑和羨舊傳巖援毫動星宿垂釣取韜鈴
赫奕三川至歡呼百姓瞻綠油貔虎擁青紙鳳皇銜
外壘曾無警中厨亦罷監推誠人自服去殺令逾嚴

剗、容皆飾幡、口盡鉗為兄憐度翼選婿得蕭咸
鬱屈咽喉地駢臻水陸魚渡橋鳴紺幘入肆颺雲帆
端月當中氣東風應遠占管弦喧夜景燈燭掩寒蟾
酒每傾三雅書能發百函詞人羞布鼓遠客獻貂檐
歌榭白團扇舞筵金縷衫旌旗遙一簇烏履近相攬
花謝樹當朱閣晴河逼翠簾映鑲窺艷、隔袖見纖爐暖重添

白太守行

聞有白太守拋官歸舊溪蘇州十萬元盡作嬰兒啼

太守駐行舟閭門草萋、揮袂謝啼者依然兩眉低
朱戶非不崇我心如重從華池非不清意在廖廓栖
奉者竊在怪賢者默齊我為太守行題在隱起珪

訓樂天揚州初逢席上見贈

巴山楚水悽涼地二十三年棄置身懷舊空吟聞遂
賦到鄉翻似爛柯人沈舟側畔千帆過病樹前頭萬
木春今日聽君歌一曲暫憑杯酒長精神

同樂天登棲靈寺塔

步、相携不覺難九層雲外倚闌干忽然語笑半天

上無限遊人舉眼看

罷郡歸洛途次山陽留辭郭中丞使君

自到山陽不許辭高齋日夜有佳期管弦正合看書
院語笑方酬各咏詩銀漢雪晴寒翠幕清淮月影落
金卮洛陽歸客明朝去容趣城東花發時

楚州開元寺北院枸杞臨井繁茂可觀群

賢賦詩因以繼和

僧房藥樹依寒井、有香泉樹有靈翠黛葉生籠石
甃殷紅子熟照銅瓶枝繁本是僊人杖眼老新成瑞

犬形上品功能甘露味還知一勺可延齡

和樂天鸚鵡

養來鸚鵡翫初紅宜在朱樓繡幃中頻學喚人緣性
慧偏能識主為情通歛毛嚙足難銷日蹕翅愁時願
見風誰遣聰明好顏色事須安置入深籠

歲杪將發楚州呈樂天

楚澤雪初霽楚城春欲歸清淮變寒色遠樹含清
暉原野已多思風霜潛減威與君同族鴈北向刷毛衣
洛中逢白監同話遊梁之樂因寄宣武令

狐相公

曾經謝病各遊梁今日相逢憶孝王少有一身魚將
相更能四面占文章開顏座內催飛簞回首庭中看
舞槍借問風前魚月下不知何客對胡床

河南王少尹宅燕張常侍白舍人魚呈盧
郎中李員外二副使

將星夜落使星來三省清臣到外臺事重各銜天子
詔禮成同把故人盃捲簾松竹雪初霽滿院池塘春
欲迴第一林亭迎好客殷勤莫惜玉山頽

鶴歎二首

并序

友人白樂天去年罷吳郡挈雙鶴雛以歸余相遇
于楊子津間玩終日翔舞調態一符相書信華
亭之尤物也今年春樂天為秘書監不以鶴隨置
之洛陽第一旦予入門問訊其家人鶴軒然來睨
如記相識徘徊俛仰似含情顧慕填膺而不能言
者因作鶴歎以贈樂天

寂寞一雙鶴主人在西京故巢吳苑樹深院洛陽城
徐引竹間步遠含雲外情誰憐好風月隣舍夜吹笙

東隣即
王家

丹頂宜承日霜翎不染泥愛池能以立看月未成棲
一院春草長三山歸路迷主人朝謁早貪養汝南雞

有所嗟二首

一本作門

庾令樓中初見時武昌春柳似腰肢相逢相笑盡如
夢為雨為雲今不知

鄂渚濛濛烟雨微女郎魂逐暮雲歸只應長在漢陽
渡化作鴛鴦一隻飛

荅樂天臨都驛見贈

北固山邊波浪東都城裏風塵世事不同心事新人
何似故人

再贈樂天

一政、官輒、一年、老駸、身外名何足算別來
詩且同吟

和裴相公傷水閣行

為愛逍遙第一篇時、閒步賞風烟看花臨水心無
事功業成來二十年

和宣武令狐相公郡齋對新竹

新竹修脩韻曉風隔窗依砌尚蒙籠數間素壁初閒
後一段清光入座中歌枕閒看知自適含毫朗咏與
誰同此君若欲長相見政事堂東有舊叢

荅白刑部聞新蟬

蟬聲未發前已自感流年一入淒涼耳如聞續斷絃
晴清露葉晚急畏霞天何事秋卿咏逢時一悄然

和裴相公寄白侍郎求雙鶴

皎：華亭鶴來隨太守白君罷吳郡太守携雙鶴來青雲意長
在滄海到經年留滯清洛院裏回明月天何如鳳池

上雙舞入祥烟

和樂天送崔上襄相公別崔之作

昨日看成送鶴詩高籠提出白雲司朱門乍入應迷
路玉樹容棲莫揀枝雙舞庭中花落處數聲池上月
明時三山碧海不歸去且向人間呈羽儀

終南秋雪

南嶺見秋雪千門生早寒閒時駐馬望高處卷簾看
霧散瓊枝出日斜鉛粉殘偏宜曲江上倒影入清瀾

關下待傳點呈諸同舍

禁漏晨鐘聲欲絕
旌旗組綬影相交
殿含佳氣當龍首
閣倚晴天見鳳巢
山色蔥籠丹檻外
霞光泛灑翠松梢
多慙再入金門籍
不敢為文學解嘲

和樂天早寒

雨引苔侵壁
風驅葉擁堦
久留閒客話
宿請老僧齋
酒甕新陳接
書籤次第排
偷然自有處
搖落不傷懷

和樂天以鏡換酒

把取菱花百鍊鏡
換他竹葉十旬杯
頰眉馱老終難去
蘸甲須歡便到來
妍醜太分迷
忌諱松喬俱傲絕

嫌猜校量功力相
千萬好去從空白
玉臺

同樂天送河南馮尹學士

可憐玉馬風流地
暫輟金貂侍從才
閣上掩書劉向去
門前修刺孔融來
峻陵路靜寒無雨
洛水橋長畫起雷
共羨府中棠棣好
先於城外百花開

同白二十二贈王山人

愛名之世忘名客
多事之時無事身
古老相傳見來久
歲年雖變貌常新
飛章上達三清路
受籙平交五嶽神
笑聽鼓朝暮
鼓只能催得市朝人

題集賢閣

鳳池西畔圖書府
玉樹玲瓏景氣閒
長聽餘風送天
樂時登高閣望人寰
青山雲繞欄干外
紫殿香來步武間
曾是先賢翔集地
每看壁記一慙顏

杏園花下訓樂見贈

二十餘年作逐臣
歸來還見曲江春
遊人莫笑白頭
醉老醉花問有幾人

和令狐相公初歸京國賦詩言懷

凌雲羽翮揆天才
揚歷中樞與外臺
相印昔辭東閣

去將星還拱北辰
來殿庭捧日彩纓
入閣道看山曳履
迴口不言功心自適
吟詩釀酒待花開

曲江春望

鳳城烟雨歇萬象
含佳氣酒後人倒狂
花時天似醉
三春車馬客一代繁華地
何事獨傷懷少年曾得意

和令狐相公春日花有懷白侍郎閣者

芳菲滿雍州鸞鳳許同遊
花逕湏深入時光不少留
色鮮由樹嫩枝亞為房稠
靜對仍持酒高看特上樓

一本晴作時
題誤

晴宜連夜賞雨便一年休共憶秋官處餘霞曲水頭

和樂天南園試小樂

閒步南園煙雨晴遙聞絲竹出墻聲欲拋丹筆三川
去先教清商一部成花木手栽偏有興歌詞自作別
生情多才遇景皆能咏當日人傳滿鳳城

和樂天春詞

新粧冝面下朱樓深鎖春光一院愁行到中庭數花
朶蜻蜓飛上玉搔頭

和嚴給事聞唐昌觀玉蕊花下有游仙二

一本作花兒

絕

玉女來看玉蕊花異香先引七香車攀枝弄雪時迴

顧驚怪人間日易斜

雪蕊瓊絲滿院春衣輕步下不生塵君平簾下徒相

問長伴吹簫別有人

歎水別白二十二

水至清盡羨從一勺至千里利人利物時行時止道

性淨皆然交情淡如此君遊金谷堤上我在石渠

署裏兩心相憶似波潺湲日無窮已

答樂天戲贈

才子聲名白侍郎風流雖老尚難當詩情逸似陶彭

澤齋日多如周太常吃將心求淨法時偷眼看春

光知君技癢思歡讌欲倩天魔破道場

同樂天送令狐相公赴東都留守自戶部尚書拜

尚書劔履出明光居守旌旗赴洛陽世上功名兼將

相人間聲價是文章衙門曉闕分天仗賓幕初開辟

省郎從蒞坡頭向東望春風處有甘棠自華陵至河南皆故

也林

法本作法
似漢

劉賓客外集卷第二

詩

同樂天和微之深春二十首

同用家花
車斜四韻

何處深春好春深萬乘家
宮門皆映柳輦路盡穿花
池色連天漢城形象帝車
旌旗暖風裏獵匕向西斜
何處深春好春深阿母家
瑤池長不夜珠樹正開花
橋峻通星渚樓暄近日車
層城十二闕相對日玉梯斜
何處深春好春深執政家
恩光貪捧日貴重不看花
玉饌堂交印沙隄柱礙車
多門一已閉直道更無斜

何處深春好春深大鎮家前旌光照日後騎蹙成花
節院收衙隊毬塲簇看車廣筵歌舞散書牖夕陽斜
何處深春好春深貴戚家櫪嘶無價馬庭筠有名花
欲進宮人食走先薰命婦車晚歸長帶酒冠蓋甚任傾斜
何處深春好春深恩澤家爐添龍腦炷綬結虎頭花
賓客珠成履嬰狹錦縛車畫堂簾幕外來去燕飛斜
何處深春好春深京兆家人眉新柳葉馬色醉桃花
盜息無鳴鼓朝迴自走車能令帝城外不敢逐由斜
何處深春好春深刺史家夜闌猶命樂雨甚亦尋花

傲客多憑酒新姬苦上車公門吏散後風擺戰衣斜
何處深春好春深羽客家芝田繞舍色杏樹滿山花
雲是淮王宅風為列子車古壇操簡處一逕入林斜
何處深春好春深小隱家芟庭畱野菜撼樹去狂花
醉酒一千日貯書三十車推衾從露體不敢有餘斜
何處深春好春深富室家唯多貯金帛不擬負鶯花
國樂呼聯轡行厨載滿車歸來看理曲燈下寶釵斜
何處深春好春深豪士家多沽味濃酒貴買色深花
已臂鷹隨馬連催妓上車城南踏青處邨落逐原斜

何處深春好春深貴胄家迎呼偏熟客揀選最多花
飲饌開華幄笙歌出鈿車興酣樽易罄連瀉酒瓶斜
何處深春好春深唱第家名傳一紙榜興管九衢花
薦聽諸侯樂來隨計吏車杏園拋曲處揮袖向風斜
何處深春好春深少婦家能偷新禁曲自剪入時花
追逐同遊伴平章貴價車從來不墮馬故遣髻鬟斜
何處深春好春深幼女家雙鬢梳頂髻兩面綉裙花
粧壞頻臨鏡身輕不占車鞦韆爭次第牽拽綵繩斜
何處深春好春深蘭若家當香收**栢**葉養蜜近梨花

野迳宜行樂遊人盡駐車菜園籬落短遙見桔槔斜
何處深春好春深老家小欄圍蕙草高架引藤花
四字香書印三乘壁畫車遲迴聽句偈雙樹晚陰斜
何處深春好春深種蒔家分畦十字水接樹兩般花
櫛**篔**篨比栽籬槿啞啞轉井車可憐高處望綦布不曾斜
何處深春好春深稚子家爭騎一竿竹偷折四隣花
笑擊羊皮鼓行牽犢領車中庭貪夜戲不覺玉繩斜

刑部白侍郎謝病長告改賓客分司以詩

贈別

鼎食華軒到眼前拂衣高坐豈徒然
九霄路上辭朝客四皓叢中作少年
他日卧龍終得雨今朝放鶴且冲天
洛陽舊有衡茆在亦擬抽身伴地仙

遥賀白賓客分司初到洛中戲呈馮尹

西辭望苑去東占洛陽才度嶺無歸思
看山不懊來冥鴻何所慕遼鶴乍飛迴
洗竹通幽逕携琴上舊臺塵埃長者轍
風月故人杯聞道龍門峻還因上客開
和留守令狐相公荅白賓客

蛟龍和風吹樹枝商山逸客出關時
身無拘束起長

晚路足交親行自遲官拂~~纒~~筵終日待
私將雞黍幾人期君來不用飛書報萬戶
先從紙貴知

始聞蟬有懷白賓客去歲白有聞蟬見寄
詩云祇應催我老魚遣報君知之句

蟬韻極清切始聞何處悲人含不平意
景值欲秋時此歲方晚晚誰家無別離
君言催我老已是去年詩

憶樂天

尋常相見意殷勤別後思量夢更頻
每遇登臨好風景羨他天性少~~人情~~

樂天寄洛下新詩，魚喜微之欲到，因以抒懷也。

松間風未起，萬葉不自吟。池上月未來，清輝同夕陰。
宮徵不獨運，墳壠自相尋。一從別樂天，詩思日已沉。
吟君洛中作，精絕百鍊金。乃知孤宦情，月露為知音。
微之從東來，威鳳鳴歸林。羨君先相見，一豁平生心。
月夜憶樂天兼寄微之

今宵帝城月，一望雪相似。遥想洛陽城，清光正如此。
知君當此夕，亦望鏡湖水。展轉相憶心，月明千萬里。

酬鄆州令狐相公官舍言懷見寄，魚呈樂天

詞人各在一涯，居聲味雖同，跡自疎。佳句傳音多，好事尺題稀。為不便書，已通戎畧。逢黃石，仍占星文耀。碧虛聞說朝，天在來歲霸陵春色待來車。

吟白樂天哭崔兒上篇，愴然寄贈

吟君苦調，我沾纓能使無情盡。有情四望車中心，未釋千愁亭下賦。初成庭梧已有棲，離處池崔今無子。和聲從此期君比，瓊樹一枝吹折一枝生。

畧一本作路
似謔

荅樂天所寄咏懷且適其枯樹之嘆

衙前有樂饌常精宅內連池酒甚傾自是官高無狎
客不論年長少歡情驪龍頷被探珠去老蚌胚還應
月生莫羨三春桃與李桂花成實向秋榮

白侍郎大尹自河南寄示池北新葺水齋

即事招賓十四命同作

公府有高政新齋池上開舟吟佳句後一似畫圖來
結構疎林下黃綠曲岸隈綠波穿戶牖碧甃疊瓊瓌
幽異當軒滿清光繞砌迴潭心澄晚鏡渠口起晴雷

一本作烟松

瑤草緣堤種松烟上島栽遊魚驚撥刺浴鷺喜毳毼
為客烹林笋因僧採石苔酒餅常不罄書案任成堆
簷外青雀舫空中鸚鵡杯蒲根抽九節蓮萼捧重臺
芳訊此時到勝游何日陪共譏吳太守自占洛陽才

赴蘇州酬別樂天

吳郡魚書下紫宸長安厩更送朱輪二南風化承遺
愛八咏聲名躡後塵梁氏夫妻為寄客陸家兄弟是
州民江城春日追隨處共憶東歸舊主人

贈樂天

一別舊遊盡相逢俱涕零在人雖晚達於樹似冬青
痛飲連宵醉狂吟滿座聽終朝拋印綬共占少微星

福先寺雪中酬別樂天

龍門賓客會龍宮東去旌旗駐上東二八笙歌雲幕
下三千世界雪花中離堂未暗排紅燭別曲含凄
曉風才子從今一分散便將詩咏向吳儂

醉荅樂天

洛城洛城何日歸故人故人今轉稀莫嗟雪裏暫時別
終擬雲間相逐飛

和樂天耳順吟兼寄敦詩

吟君新什慰蹉跎屈指同登耳順科鄧禹功成三紀
事孔融書就八年多已經將相誰能爾拋却丞郎爭
奈何獨恨長洲數千里且隨魚鳥泛烟波

到郡未浹日登西樓見樂天題詩因即事

以寄

樂天自此郡謝病西歸

湖上收宿雨城中無畫塵樓依新柳貴池帶亂苔春
雲水正一望簿書來繞身烟波洞庭路愧彼扁舟人

早夏郡中書事

水禽渡殘月飛雨灑高城華堂對嘉樹簾廡含曉清
拂鏡整危冠振衣步前楹將吏儼成列簿書紛來縈
言下辨曲直筆端破交爭虛懷詢病苦懷律操剽輕
闕吏告無事歸來解簪纓高簾覆朱閣忽吐聞調笙
虎丘寺見元相公二年前題名愴然有詠
前年滙橋送之武昌

滙水送君、不還見君題字虎丘山因知早貴兼才
子不得多時在世間
寄贈小樊

多一本作名

花面了頭十三四春來綽約向人時終須買取多春
草處、將來步、隨

憶春草

憶春草處、多情洛陽道金谷園中見日遲銅駝陌
上迎春風早河南大尹頻出難只得池塘十步看府
門閉後滿街月幾處遊人草頭歇館娃宮外姑蘇臺鬱
鬱芊芊撥不開無風自偃君知否西子裙裾曾拂來

樂天寄憶舊遊因作報白君以答

報白君別來已渡江南春江南春色何處好燕子雙

官一本作官

飛故官道春城三百七十橋夾岸朱樓隔柳條了頭
小兒蕩畫槳長袂女郎簪翠翹郡齋北軒卷羅幕碧
池逶迤遠畫閣池邊綠竹桃李花下舞筵鋪彩霞
吳娃足情言語點越客有酒巾冠斜座中皆言白大
守不負風光向杯酒：酣饜箋飛逸韻至今傳在人
人口報白君想思空望嵩丘雲其奈錢塘蘇小小憶
君淚點石榴裙白君在城近自洛歸錢唐

和白侍郎送令狐相公鎮太原

十萬天兵貂錦衣晉城風日斗生輝行臺僕射深恩

深一本作新

重從事中郎舊路歸疊鼓蹙成汾水浪閃旗驚斷塞
鴻飛邊庭自無烽火擁節還來坐紫微

秋夕不寐寄樂天

洞戶夜簾卷華堂秋簟清螢飛過池影蛩思遠塔聲
老枕知將雨高句報欲明何人諳此景遠問白先生

冬日晨興寄樂天

庭樹曉禽動郡樓殘照聲燈挑紅燼落酒煖白光生
髮少嫌梳利穎衰恨鏡明獨吟誰應和須寄洛陽城

酬樂天見寄

元君後輩先零落崔相同年不少留華屋坐來能幾
日夜臺歸去便千秋背時猶自居三品川三吳即品同得老終
須卜一丘投老之日願樂天為鄰若便吾徒還早達亦應簫鼓
入松楸

答樂天見憶

與老無期約到來如**等**閒偏傷朋友盡移興子孫間
筆底心無毒盃前**膳**膳不**儼**呼閑反唯憶蘇遺君夢飛過

武關牢關

和樂天誚失婢榜者

把鏡朝猶在添香夜不歸鴛鴦拂瓦去鸚鵡透籠飛
不逐張公子即隨劉武威新知正相樂從此脫青衣

樂天寄重和晚達冬青一篇因成再答

風雲變化饒年少光景蹉跎屬老夫秋隼自能凌汗
漫寒龜飲氣受泥塗東隅有失誰能免北叟之言豈
便無振臂猶堪呼一擲爭知掌下不成盧

河南白尹有喜崔賓客歸洛兼見懷長句

因而繼和

幾年侍從作名臣却向青雲索得身朝士忽為方外

士主人仍是眼中人雙鸞遊處天京好五馬行時海
嶠春遙羨光陰不虛擲肯令絲竹暫生塵

和楊師臯給事傷小姬英英

見學胡琴見藝成今朝追想幾傷情撚弦花下呈新
曲放撥燈前謝改名但是好花皆易落從來尤物不
長生鸞臺夜直衣衾冷雲雨無因入禁城

和樂天洛下醉吟寄太原令狐相公兼見

懷長句

舊相臨戎非稱意詞人作尹本多情從容自使邊塵

靜談笑不聞桴鼓聲章句新添塞下曲風流舊占洛陽
城昨來亦有吳趨咏唯寄東都與北京

郡齋書懷寄江南白尹兼簡分司崔賓客

謾讀圖書三十車年、為郡老天涯一生不得文章
力百口空為飽煖家綺季衣冠稱鬢面吳公政事副
詞華還思謝病今歸去同醉城東桃李花

酬樂天七月一日夜郎事見寄

夜樹風韻清天河雲彩輕故花多露草隔城聞雞鳴
搖落從此始別離含遠情聞君當是夕倚瑟吟商聲

一本城作樹
雞作鷓

外物豈不足中懷
向誰傾秋來念歸去
同聽嵩陽笙
題于家公主舊宅

樹滿荒臺葉滿池
簫聲一絕草蟲悲
鄰家猶學宮人
髻園客爭偷御菓
枝馬埒蓬蒿藏狡兎
鳳棲烟笑雨

愁鷓何郎獨在無
恩澤不似當初傅粉時

吟樂天自問愴然有作

親友關心皆不見
風光滿眼倍傷神
洛陽城裏多池館
幾處花開有主人

八月十五日夜半雲開然後翫月因諫一

時之景寄呈樂天

半夜碧雲收中天
素月流開城邀好客
置酒賞新秋影
透衣香潤光凝歌黛
愁斜暉猶可翫移宴上
新樓

秋日書懷寄白賓客

州遠雄無益年高健亦衰
興情逢酒在筋力上樓知
蟬噪芳意盡鴈來愁望時
南山紫芝客應不向愁悲

訓樂天見貽賀金紫之什

久學文章含白鳳却因政事賜金魚
郡人未識聞遙詠天子知名與詔書
珍重和詩呈錦繡願言歸計並

新本一作西

幾本一作嘯

誦

園廬舊來詞客多無位金紫同遊誰得如

訓樂天初冬早寒見寄

乍起衣猶冷微吟帽半欹霜凝南屋瓦雞唱後園枝

洛水碧雲曉吳宮黃葉時兩傳千里意書札不如詩

樂天見示傷微之敦詩晦叔三君子皆有

深分因成是詩以寄

吟君歎逝雙絕句使我傷懷奏短歌世上空驚故人

少集中唯覺祭文多芳林新葉催陳葉流水前波讓

後波萬古到今同此恨聞琴泪盡欲如何

春池泛舟聯句

鳳池新雨後池上好風光上相公取酒愁春盡留賓

喜日長兵部送柳絲迎畫舸水鏡洗雕梁羣送賈潭洞

迷仙府烟霞認醉鄉籍送張鶯聲隨雨意語行色入

壺觴籍送晚景含澄澈時芳得艷陽尚錫飛鳧拂輕

浪綠柳暗回塘度逸韻追安石高居勝辟疆群杯停

新令舉詩動綵牋忙餽願謂同來客歡遊不可忘籍

杏園聯句

杏園千樹欲隨風一醉同人此暫同醉上老態忽忘

一本作瀉

絲管裏衰顏且解酒杯中絳上白曲江日暮殘紅

在翰苑年深舊事空居易上二十四年流落者故人

相引到花叢禹錫

花下醉中聯句

共醉風光地花飛落酒盃絳送二殘春猶可賞晚景

莫相催禹錫送酒幸年有花應歲開居易送兵

且當金韻擲莫遣玉山頹絳送庾高會弥堪惜良時

不易陪承宣送誰能拉花住爭得換春回禹錫送我

輩尋常有佳人早晚來嗣復送寄言三相府欲散且

裴回居易時戶部

宴興慶池亭送白二十二東歸聯句

東洛言歸去西園告别來白頭青眼客池上手中杯

離瑟殷勤奏仙舟委曲回征輪今欲動賓閣為誰

開禹錫坐弄琉璃水行登綠縹苔花低妝焰影萍散

酒吹醅居易岸蔭新抽竹亭香欲變梅隨遊多笑傲

遇勝且徘徊藉澄澈連天鏡潺湲出地雷林塘難共

賞鞍馬莫相摧庾信及魚還樂機忘鳥不猜晚晴槐

起露新暑石添苔禹錫擬作雲泥別尤思頃刻陪歌

停珠貫斷飲罷王峯居易雖有逍遙志其如磊落

才會當重日用此去肯悠哉藉

西池送白二十二東歸兼寄令狐相公聯

促坐宴回塘送君歸洛陽彼都留上宰為我說中腸

威鳳池邊別冥鴻天際翔披雲見居守望日拜封

章禹錫春盡年華少舟通景氣長送行歡共惜寄遠

意難忘籍東道瞻軒蓋西園醉羽觴謝公深眷眄商

皓信輝光行武舊德推三友新篇代八行

首夏猶清和聯句

記得謝家詩清和即此時居易餘花數種在蜜葉幾

重垂度芳謝人惜陰成處宜禹錫水萍爭點綴

梁燕共追隨行武亂蝶憐踈蕊殘鶯戀好枝藉草香

殊未歇雲勢漸多奇居易單服初寧體新篁已出

籬度與春為別近覺日轉行遲禹錫遶樹風光少侵

階苔蘚滋行武唯思奉懽樂長得在西池

薔薇花聯句

似錦如霞色連春接夏開禹錫波紅分影入風好帶

香來度得地依東閣當階奉上台行武淺深皆有態
次第暗相催禹錫滿地愁英落緣堤惜棹迴度芳穠
濡雨露明麗隔塵埃行武似著燕脂染如經巧婦裁
居易 柰花無別計只有酒殘杯籍

西池洛泉聯句

東閣聽泉落能令野興多行武散時猶帶沫淙處即
跳波度偏洗磷石還驚泛鷺籍色清塵不染光
白月相和居易噴雪紫然竹攢珠濺芰荷禹錫對吟
時合響觸樹更搖柯籍照圃紅分藥侵堦綠浸莎居

易 日斜車馬散餘韻逐鳴珂禹錫

和樂栢枝天

栢枝本出楚王家玉面添嬌舞態奢髮鬢改梳龍鳳
髻新衫別織闔難紗鼓催殘拍腰身軟汗透羅衣雨
點花畫筵曲罷辭歸去便隨王母上烟霞

和樂天題真娘墓

簷蔔林中黃土堆羅縠綉黛已成灰芳魂雖死人不
怕蔓草逢春花自開惜羞向風疑舞袖鏡燈臨曉似
粧臺吳王嬌女墳相近一片行雲應往來

劉賓客外集卷第二

劉賓客外集卷第三

詩

客有話汴州新政書事寄令狐相公

天下咽喉今大寧軍城喜氣徹青冥
庭前劔戟朝迎日筆底文章夜應星
三省壁中題姓字萬人頭上見儀形
汴州忽復承平事正月看燈戶不扃

和令狐相公郡齋對紫薇花

明麗碧天霞
丰茸紫綬花香聞荀令宅
艷入孝王家
幾歲自榮~~格~~高情方嘆嗒
有人移上苑
猶是占年華

令狐相公見示河中楊少尹贈荅魚命繼

之

兩首新詩百字餘朱弦玉磬韻難如
漢家丞相重徵後梁苑仁風一變初
四面諸侯瞻節制八方通貨溢
河渠自從郤縠為元帥大將歸來盡把書

和令狐相公謝太原李侍中寄蒲桃

珍果出西域移根到北方昔年隨漢使今日寄梁王
上相芳緘至行臺綺席張魚鱗含宿潤馬乳帶殘霜
染指鉛粉膩滿喉甘露香醞成十日酒味敵五雲漿

咀嚼停金盞稱嗟響畫堂慙非末至客不得一枝嘗

和令狐相公送趙常盈鍊師與中貴人同

拜嶽及天台投龍畢却赴京師

銀鐺謁者引蛺旌霞帔仙官到赤城白雀迎來天樂
動金龍擲下海神驚元君伏奏歸中禁武帝清齋禮
上清何士夷門請詩送梁王文字上聲名

令狐相公俯贈篇章斐然仰謝

鄂渚臨流別梁園衝雪來族旅愁隨凍釋歡意待花
開城曉鳥頻起池春鴈欲回飲和心自醉何必管絃催

酬令狐相公公贈

越聲長苦有誰聞
老向湘山與楚雲
海嶠新辭永嘉守
夷門重見信陵君
田園松菊今迷路
霄漢鴛鴻久絕群
幸遇甘泉尚詞賦
不知何客薦雄文

酬令狐相公寄賀遷拜之什

遭迴二紀重為郎
洛下遙分列宿光
不見當關呼早起
曾無侍史與焚香
三花秀色通_清幌
十字春波遶
宅墻白首青衫誰
比數相憐只是有
梁王相公昔曾以大僚分司故有同病相憐之句

酬令狐相公早秋見寄

公來第四秋
樂國_無愁軍士遊
書肆商人占酒樓
熊羆交黑稍賓客
滿青油
今日文章主
梁王不姓劉
和令狐相公翫白菊

家；菊盡黃
梁國獨如霜
瑩靜真琪樹
分明對玉堂
仙人披雪鬢
素女不紅粧
粉蝶難來見
麻衣拂更香
向風搖羽扇
含露滴瓊漿
高艷遮銀井
繁枝覆象床
桂叢_並蕙梅
蕊妒先芳
一入瑤池華詠
從茲播樂章

夏日寄宣武令狐相公

長憶梁王逸興多西園花盡興如何近來溽暑侵亭
館應覺清談勝綺羅境入篇章高韻發風穿號令衆
心和承明欲謁先相報願拂朝衣逐曉珂

令狐相公見示贈竹二十韻仍命繼和

高人必愛竹寄興良有以峻節可臨戎虛心宜得士
衆芳信妍媚威鳳難棲止遂於鼓鼙間移植東南美
封以梁國土澆之浚泉水得地色不移凌空勢方起
新青排故葉餘粉籠踈理猶復隔墻藩何因出塵滓
茲辰去前菽永日勞瞪視械、林已成榮、玉相似

親摹起心匠洗滌在頤指曲直既瞭然孤高何卓爾
垂梢覆內屏迸笋侵前祀妓席拂雲鬢賓階塵珠履
抱琴恣閒翫執卷堪斜倚露下懸明璫風來韻清微
堅貞貫四候標格殊百卉歲晚當自知繁華豈云比
古詩無贈竹高唱彼此始一聽清瑤音崢然長在耳

和令狐相公入潼關

寒光照旌節關路曉無塵吏謁前丞相山迎舊主人
東瞻軍府靜西望勅書頻心共黃河水同昇天漢津
和令狐相公尋白閣老見留小飲因贈

南亭看雪上

先有元都見
憶一季首候

抄入後

傲士更逢酒樂天仍對花文章管星曆情興占年華
宦達翻思退名高却不誇唯存浩然氣相共賞烟霞

酬和令狐相公以司空裴相見招南亭看雪

四韻

重門不下關樞務有餘閣上客同看雪高亭盡見山
瑞呈霄漢外興入笑言間知是平陽會人人帶酒還

和令狐相公別牡丹

平章宅裏一欄花臨到開時不在家莫道兩京非遠
別春明門外即天涯

酬令狐留守巡內至集賢院見寄

仙院文房隔舊宮當時盛事盡成空墨池半在頽垣
下書帶猶生蔓草中巡內因經九重苑裁詩又繼
二南風為兄手寫殷勤句遍歷三台各一通

和鄂州令狐相公春晚對花

朱門退公後高興對花枝望闕無窮思看書欲盡時
含芳朝競簇凝豔曉相宜人意殷勤惜狂風豈得知

酬令狐相公春日言懷見寄

一作作晚是
前陪看花處鄰里近王昌今想臨戎地旌旗出汶陽

營飛柳絮雪門耀戟枝寒霜東望清河水心隨艣上郎

和令狐相公言懷寄河中楊少尹

章句慙非第一流世間才子暗陪遊吳宮已嘆芙蓉

死張司業詩云吳宮四面秋邊月空悲蘆管李尚

任向洛陽稱傲吏分司白苦教河上領諸侯天平石

渠甘對圖書老關外楊公安穩不

遙和令狐相公坐中間思帝鄉有感

當初造曲者為誰說得思鄉戀闕時滄海西頭舊丞

相停杯處分不須吹

訓令狐相公見寄

群玉山頭住四年每聞笙鶴看諸仙何時得把浮丘

初白日將昇第九天

途次大梁雪中奉天平令狐相公書問兼

示新什因思曩歲從此拜辭形於短篇以

申仰謝

遠守宦情薄故人書信來共會花下別今獨雪中回

紙尾得新什眉頭還整開此時同鴈鷺池上一徘徊

令狐相公自天平移鎮太原以詩申賀相公

昔為并
州從事

北都留守將天兵出入香街宿禁局
鞀鼓夜聞驚朔
鴈旌旗曉動拂參星
孔璋舊檄家
有叔度新歌處
聽夷落遙知真漢相
爭來屈膝看儀刑

酬令狐相公雪中遊玄都見憶

好雪動高情
心期在玉京
人披鶴氅出
馬躡象筵行
獎耀棲臺變
淋漓松桂清
玄都留五字
使入步虛聲

重酬前寄

邊烽寤盡收
兵宮樹蒼
靜掩高戎錫
歸心如內

地天狼無角
比凡星
新成麗句
開緘後
便入清歌滿
坐聽吳苑晉祠
遙望處
可憐南北
太相形

酬令狐相公秋懷見寄

寂寞蟬聲靜
差池燕羽回
秋鄰多越絕
朔氣想臺駘
相去數千里
無因同一杯
殷勤望飛鴈
新自塞垣來

酬令狐相公六言見寄

已嗟離別太遠
更被光陰苦
催吳苑燕辭人
去沙川
鴈帶書來
愁吟月落
猶望憶
夢天明
未回今日
便令歌
者唱
兄詩送一杯

一本使作便

令狐相公自太原累示新詩因以酬寄

飛蓬卷盡塞雲寒
戰馬閑嘶漢地寬
萬里胡天無警
急一籠烽火報平安
燈前妓樂留賓宴
雪後山河出
獵看玃重新詩遠
相寄風情不似^舊登壇

酬太原令狐相公見寄

書信來天外
瓊瑤滿匣中
衣冠南渡遠
旌節北門雄
鶴唳華亭月
馬嘶榆塞風
山川幾千里
唯有兩心同

酬令狐相公歲暮遠懷見寄

別侶孤鶴怨
冲天威鳳歸
容光一以見
夢想是耶非

見一本作問

芳訊還玃重知音
老更稀不知湖上鴈
北向整毛衣

酬令狐相公親仁郭家花下即事見寄

荀令園林好
山公遊賞頻
豈無花下侶
遠望眼中人
斜日漸移影
落英紛委塵
一吟相思曲
惆悵江南春

酬令狐相公首夏閑居書懷見寄

蕙草芳未歇
綠槐陰已成
金罍唯獨酌
瑤瑟有離聲
翔泳各殊勢
篇章空寄情
應憐三十載
未變使君名

貞元中自郎官出
守至今三十一年

酬令狐相公庭前白菊花謝偶書所懷見

寄

數叢如雪色一旦冒霜開寒蕊差池落清香斷續來
思深含別怨芳謝惜年催千里難同賞看、又早梅
酬令狐相公季冬南郊宿齋見寄

壇下雪初霽南城凍欲生齋心祠上帝高步領名卿
沐浴含芳澤周旋聽佩聲猶憐廣平守寂寞竟如何

守一本作宅

貞元中侍郎舅氏牧華州時余再忝科第
前後由華覲謁陪登伏毒寺屢焉亦曾賦
詩題於梁棟今典馮翊暇日登樓南望三

峯浩然生思追想昔年之事因成篇題舊
寺

曾作關中客頻經伏毒巖晴烟沙苑樹晚日渭川帆
昔是青春貌今悲白雪髯郡樓空一望含意卷高簾
酬令狐相公杏園下飲有懷見寄

年、^{杏園}望花蔟即經過未飲心先醉臨風思倍多

三春看又盡兩地欲如何日望長安道空成勞者歌
和令狐相公春早朝回鹽鐵使院中作

柳動御溝清威遲堤上行城隅日未過山色雨初晴

鶯避傳呼起花臨府署明簿書盈几案要自有高情

令狐相公見示題洋州崔侍郎宅雙木瓜

花頃接待侍郎同舍陪宴樹下吟翫來什輒

成和章

金牛蜀路遠玉樹帝城春榮耀生華館逢迎欠主人

簾前疑小雪墻外麗行塵來去皆回首情深是德鄰

和令狐僕射相公題龍回寺

茲地回鑿日皇家禪聖時路無胡馬跡人識漢官儀

天子旌旗度法王龍象隨知懷去嗟嘆經此益遲遲

相公家本咸陽有喬木之志

和令狐相公晚泛漢江書懷寄洋州崔侍

郎閬州高舍人二曹長

雨過遠山出江澄暮霞生因浮濟川舟遂作適野行

郊樹映緹騎水禽避紅旌田夫捐畝鋪織婦窺紫荆

古岸野花發遙林晚蟬清沿洄方翫境鼓角已登城

部內有良牧望中寄深情臨觴念佳期泛瑟動離聲

寂寞一病士夙昔接群英多謝謫仙侶幾時還玉京

酬令狐相公使宅別齋初栽桂樹見懷之

一本野作夏

作

清淮南岸家山樹黑水東邊第一栽影近畫梁迎曉
日香隨綠酒入金杯根留本土依江潤葉起寒稜映
月開早晚陰成比梧竹九霄還放綵鵬來
因抒短章以寄情悵
軍城臨漢水旌旆起春風遠思見江草歸心看塞鴻
野花沿古道新葉映行宮唯有詩兼酒朝暮兩不同
訓令狐相公見寄

才兼文武播雄名遺愛芳塵滿洛城身在行臺為僕
射書來角里訪先生閒遊占得嵩山色醉卧高聽洛
水聲千里相思難命駕七言詩裏寄深情

令狐相公春思見寄

一紙書封四句詩芳晨對酒遠相思長吟盡日西南
望猶及殘春花落時

令狐相公見示新栽蕙蘭二草之什兼命

同作

上國庭前草移來漢水濤朱門雖易地玉樹有餘陰

艷彩凝還泛清香絕復尋光華童子佩柔軟美人心
惜晚會遠思賞幽空獨吟寄言知音者一奏風中琴

和令狐相公南齋小讌聽阮咸

陋巷久蕪沉四絃有遺音雅聲發蘭室遠思含竹林座
絕衆賓語庭移芳樹陰飛觴助真氣寂聽無流心影
似白團扇調諧朱弦琴一毫不平意幽怨古猶今

和令狐相公詠梔子花

蜀國花已盡越桃今已開色凝瓊樹倚香似玉京來
且賞同心處那憂別葉催佳人如擬詠何必待寒梅

訓令狐相公新蟬見寄

春去三千里聞蟬同此時清吟曉露葉愁噪夕陽枝
忽爾絃斷絕俄聞管參差洛橋碧雲晚西望佳人期

和令狐相公九日對黃白二菊花見懷

素萼迎寒秀金英帶露香繁華照旌鉞榮盛對銀黃
琮璧交輝映衣裳雜彩章晴雲遙蓋覆秋蝶近悠揚
空想逢九日何由陪一觴滿叢佳色在未肯委嚴霜

城內花園頗曾遊翫令公居守亦有素期

適春霜一夕委謝書實以荅令狐相公見

樓下芳園占占占春年：結侶採花頻繁霜一夜相撩
冶不似佳人似老人

令狐僕射與余投分素深縱山川阻峭然
音問相繼今年十一月僕射疾不起聞予
已承訃書寢門長慟後日有使者兩輩持
書并詩計其日時已是卧疾手筆盈幅翰
墨尚新詞一篇音韻彌切收淚握管以成
報章雖廣陵之絃於今絕矣而蓋泉之感

猶庶聞焉焚之總帳之前附于舊編之末
前日寢門慟至今悲有餘已嗟萬化盡方見八行書
滿紙傳相憶裁詩怨索居危絃音有絕哀玉韻曲虛
忽嘆幽明異俄驚歲月除文章雖不朽精魄竟焉如
零淚霑青簡傷心見素車悽涼從此後無復望雙魚

劉賓客外集卷第四

詩

郡內書情獻裴侍中留守

功成頻獻乞身章
擺落襄陽鎮洛陽
萬乘旌旗分一半
八方風雨會中央
兵符今奉黃公略
書殿曾隨翠鳳翔
心寄華亭一雙鶴
日陪高步繞池塘

訓樂天閑卧見寄

散誕向陽眠
將閑敵地仙
詩情茶助爽
藥力酒能宣
風碎竹間日
露明池底天
同年未同隱
綠欠買山錢

風和雨問 訓樂天小亭寒夜有感懷

寒夜陰雲起 疎林宿鳥驚 斜風閃燈影 迸雪打窗聲
竟夕不能寐 同年知此情 漢皇無奈老 何況本書生

鳳賦 奉和裴晉公涼風亭睡覺

驪龍睡後珠元在 仙鶴行時步又輕 方寸瑩然無一事 水聲來似玉琴聲

和樂天開園獨賞八韻前以蜂鶴拙句寄

呈今辱蝸蟻妍詞見答因成小巧以取大

謹實寄大哈

永日無人事 芳園興行陶廬樹可愛 潘宅雨新晴

傳粉琅玕節 薰香菖蒲莖 榴花裙色好 桐子藥丸成

柳蠹枝偏亞 桑閒葉再生 睚眦欲闔雀 索漠不言鶯

動植隨四氣 飛沉含五情 槍榆與水擊 小大強為名

訓樂天衫酒見寄

酒法衆傳吳米好 舞衣偏尚越羅輕 動搖浮蟻香濃

甚裝束 輕鴻意態生 閱曲定知能自適 舉杯應嘆不

同傾終朝相憶終年別 對景臨風無限情

兩如何詩謝裴令公贈別二首

一言一顧重，何如今日陪遊清洛苑。昔年別入承明廬，一東一西別之何如終期大治再鎔鍊。願托扶搖翔碧虛，

將之官留辭裴令公留守

祖帳臨伊水，前旌指渭河。風烟里數少，雲雨別情多。重疊受恩久，遭迴如命何。東山與東閣，終冀再經過。訓喜相遇同州與樂天替代

舊托松心契，新交竹使符。行年同甲子，筋力羨丁夫。

別後詩成，**秩**携來酒滿壺。今朝停五馬，不獨為羅敷。

前章此言春草白君之舞妓也故有此答

奉和裴令公新綠野堂即書

藹、鼎門外澄、洛水灣。堂皇臨綠野，坐卧看青山。

使極却忘貴，功成欲愛閑。官名思管籥，心術去機關。

禁苑凌晨出園花，及露攀池塘。魚撥刺竹，迳鳥綿蠻。

志在安瀟灑，嘗經歷險艱。高情方造適，衆意望徵還。

好客交珠履，華筵舞玉顏。無因隨賀燕，**翔**集畫梁間。

自在左馮歸洛，**下**訓樂天兼呈裴相公

新恩通籍在龍樓分務神都近舊丘自有園公紫芝

侶時賓行四人仍追少傅赤松遊華林霜葉紅霞晚

伊水晴光碧玉秋更接東山文酒會始知江左未風

流王儉云江左風流宰相唯有謝公

秋齊獨坐寄樂天兼呈吳方之大夫

空齊寂寂不生塵藥物方書繞病身纖草數莖勝靜

地幽禽忽至似佳賓世間憂喜雖無定釋氏銷磨盡

有因同向洛陽閑度日莫教風景屬他人

和樂天齊戒月滿夜對道場偶懷詠

常修清靜去繁華人識王城長者家案上香烟鋪貝

葉佛前燭燈透蓮花持齋已滿招閑客理曲先聞命

小娃明日若過方丈室還應問為法來耶

吳方之見示獨酌小醉首篇樂天續有訓

谷皆含戲譁極至風流兩篇之中並蒙見屬

輒呈濫吹益美來章

閑門共寂任張羅靜室同虛養太和塵世歡娛開意

少醉鄉風景獨遊多散金踈傳尋常樂枕翅劉生取

次歌計會雪中爭挈榼鹿裘鶴氅通相過

訓樂天齋滿日裴令公置宴席上戲贈

一本屋作愷 一月道場齋戒滿今朝華屋管弦迎銜盃本自多狂
態事佛無妨有佞名酒力半酣愁已散文鋒未鈍老
猶爭平陽不獨容賓醉聽取喧呼吏舍聲

訓樂天偶題酒瓮見寄

從君勇斷拋名後世路榮枯見幾回門外紅塵人自
走甕頭清酒我初開三冬學任胃中有萬戶侯須骨
上來何宰相招同醉處洛陽城裏好池臺

答裴令公雪中訝白二十二與諸公不相

訪之什

玉樹瓊樓滿眼新的知開閣待諸賓遲：未去非無
意擬作梁園座右人

訓樂天請裴令公開春宴

高名大位能兼有恣意遨遊是特恩二室烟霞成步
障三州風物是家園晨窺苑樹韶光動晚渡河橋春
思繁絃管常調客常滿但逢花處即開樽

樂天示過敦詩舊宅有感一篇吟之泫然
追想昔事因成斷繼和以寄苦懷

淒涼同到故人居門枕寒流古木踈向秀心中嗟棟
宇蕭何身後散圖書本營歸計非無意唯笑生涯尚
有餘忽憶前因更惆悵丁寧相約速懸車敦詩與予
友樂天三
人同甲子平生
相約同休洛中

吳方之見示聽江西故吏朱幼恭歌三篇
頗有懷故林之思吟諷不足因而和之

侯家故吏歌聲發逸處能高怨處低今歲洛中無雨
雪眼前風景是江西

閑坐憶樂天以詩問酒熟未

案頭開縹帙肘後檢青囊唯有達生理應無治老方
減書存眼力省事養心王君酒何時熟相携入醉鄉

和樂天洛城春齊梁體八韻

帝城宜春日遊人喜意長草生季倫谷花出莫愁坊
斷雲發山色輕風漾水光樓前戲馬地樹下鬪雞場
白頭自為侶綠酒亦滿觴潘園觀種植謝墅閱池塘
至閑似隱逸過老不悲傷相問焉功德銀黃遊故鄉

三月三日與樂天及河南李尹奉陪裴令
公泛洛禊飲各賦十二韻

洛下今修禊群賢勝會稽盛筵陪玉鉉通籍盡金閨
波上神仙妓岸傍桃李蹊水嬉如鷺振歌響雜鶯啼
歷覽風光好泓洄意思迷棹歌能儷曲墨客競分題
翠幄連雲起香車向道齊人誇綾步障馬惜錦障泥
塵暗宮墻外霞明苑樹西舟形隨鷓轉橋影與虹低
川色晴猶遠鳥聲暮欲棲唯餘踏青伴待月魏王堤

寄和東川楊尚書慕巢兼寄西川繼之二
公近從弟兄情分偏睦早忝遊舊因成是

詩

太華蓮峰降嶽靈兩川棠樹接郊坰政同兄弟人
樂曲奏墳簾處聽楊葉百穿榮會府芝泥五色耀
天庭各拋筆硯誇旄鉞莫遣文星讓將星

秋中暑退贈樂天

暑服宜秋著清琴入夜彈人情皆向菊風意欲摧蘭
歲稔貧心泰天涼病體安相逢取次第却甚少年歡

和樂天洛中雪中宴集寄汴州李尚書

洛城無事足杯盤風雪相和歲欲闌樹上因依見寒
鳥座中收拾盡閑官笙歌要請頻何爽笑語忘機拙

更歡遙想兔園今日會瓊林滿眼映旂竿

喜遇劉二十八偶書兩韻聯句

病來佳興少老去舊遊稀笑語縱橫作盃觴絡繹飛
度清談如水玉逸韻貫珠璣高位當金鉉虛懷似布
衣禹錫已榮狂取樂仍任醉忘机捨眷將何適留歡
便是歸居易鳳儀常欲附蛟力自知微願假樽壘末
膺門自此依紳

劉二十八自汝赴左馮塗經洛中相見聯

句

不歸丹掖去銅竹漫云：唯喜因過我須知未賀君
度詩聞安石詠香見令公薰欲首函閉路來披緹嶺

雲居易

貂蟬公獨步鴛鴦我同群插羽先飛酒交鋒

便戰文紳鎮嵩知表德定鼎為銘勲顧鄙容商洛微

歡候汝墳禹錫頻年多譴浪此夕任喧紛故態猶應

在行期未要聞度游藩榮已久捧袂惜將分詎敢杯

行疾唯愁日向曛居易窮陰初莽蒼離思漸氤氳殘

雪午槁岸斜陽伊水濱濱紳上謨尊右掖全略靜東

軍萬頃徒稱量滄溟詎有垠禹錫

此首應註明
張令公

度自到洛中與樂天為文酒之會時：構
詠樂不可支則慨然共憶夢得而夢得亦

分司至止懽懽可知因為聯句

成周文酒會吾友勝鄒枚唯憶劉夫子而今又到來

度欲迎先倒屣亦坐便傾盃飲許伯倫右詩推公幹

才並居易久曾聆郢唱重喜上燕臺晝話墻陰轉宵

歡斗柄迴禹錫新聲還共聽故態復相咍遇物皆先

賞從花半未開度起時烏帽側散處玉山頽墨客誼

東閣文星犯上台居易詠吟君稱首踈放我為騁憶

戴何勞訪隨夢得夢得留髡不用猜宴席上老夫暫

動奉觴承麴蘖落筆捧瓊瑰醉并無妨側詞鋒不可

摧此兩韻美令水軒看翡翠石徑踐莓苔童子能騎

竹佳人解詠梅陪遊南宅洛中三可矣鄴下七悠哉

自向風光急不須弦管催度樂觀魚踴躍閑愛鶴排

徊烟柳青凝黛波萍綠撥醅居易春榆初改火律管

又飛灰紅藥多遲蕪碧松宜亂栽禹錫馬嘶馳陌上

鷓泛鳳城隈色：時堪惜夢：病莫推度涸流尋軋

：餘刃轉恢：從此知心伏無因敢自媒禹錫室隨

親客入席許舊寮陪逸興稽將阮交情陳與雷此二句屬
夢得也居易洪爐思哲匠大厦要群材他日登龍路應知
免曝鰓禹錫

洛中早春贈樂天

漠漠復靄靄半晴將半陰春來自何處無迹日以深
韶嫩水後水輕盈烟際林藤生欲有託柳弱不自任
花意已含蕾蕾含蕾鳥言尚沉吟期君當此時與我恣追
尋翻愁爛漫後春暮却傷心

和樂天讌李周美中宅池上賞櫻桃花

櫻桃千萬枝照耀如雪天王孫讌其下隔水疑神仙
宿露發清香初陽動暄妍妖姬滿髻插酒客折枝傳
同此賞芳月幾人有華筵杯行勿遽辭好醉逸三年
和牛相公遊南庄醉後寓言戲贈樂天兼

見示

城外園林初夏天就中野趣在西偏薔薇亂發多臨
水鷓鴣雙遊不避船水底遠山雲似雪橋邊平岸草
草如烟白家唯有盃觴興欲把頭盤打少年

思黯南墅賞牡丹花

偶然相遇人間世合在增城阿姆家有此傾城好顏色
天教晚蕝賽諸花

樂天少傳五月長齋廣延緇徒謝絕文友
坐成睽間因以戲之

五月長齋戒深居絕送迎不離通德里便是法王城
舉目皆僧事全家少俗情精修無上道結念來來生
賓閣緇衣占書堂信鼓鳴戲童為塔象啼鳥學經聲
黍用青菰角葵承玉露烹馬家供蕙苾劉氏餉蕪菁
暗網籠歌扇流塵晦酒鎗不知何次道作佛幾時成

樂天池館夏景方妍白蓮初開綵舟空泊
唯邀緇侶因以戲之

池館今正好主人何寂然白蓮方出水碧樹未鳴蟬
靜室宵聞磬齋厨晚絕烟蕃僧如共載應不是神仙
訓樂天晚夏閑居欲相訪先以詩見貽

池榭堪臨泛翛然散鬱陶步因驅鶴緩吟為聽蟬高
林密添新竹枝低縋晚樾酒醅晴易熟藥圃夏頻薈
老是班行舊閑為鄉里豪經過更何處風景屬吾曹

訓樂天感秋涼見寄

庭晚初辨色林秋微有聲
槿衰猶強笑蓮迥却多情
簷鷺歸心動鞫鷹俊氣生
閑人占閑景酒熟且同傾

樂天以愚相訪沽酒致歡因成七言聊以

奉答

少年曾醉酒旗下同輩黃衣領亦黃
蹴踏青雲尋入仕蕭條白髮且飛觴
今徵古事歡生雅客喚閑人與任狂
猶勝獨居荒草院蟬聲聽盡到寒螿

秋晚新晴夜月如練有懷樂天

雨歇晚霞明風調夜景清
月高微暈散雲薄細鱗生

露草百蟲思秋林千葉聲相望一步地脉、萬重情

和思黯南莊見示

丞相新家伊水頭智囊心匠日增脩
化成池沼無痕跡奔走清波不自由
臺上看山徐舉酒潭中見月慢回舟
從來天下推尤物合屬人家第一流

同留守王僕射各賦春中一物從一韻至

七

鶯能語多情春將半天欲明始逢南陌復集東城林
踈時見影花密但聞聲營中綠催短笛樓上來定哀

箏千門萬戶垂楊裏百轉如簧烟景晴

和樂天春詞依憶江南曲拍為句

春去也多謝洛城人弱柳從風疑舉袂叢蘭挹露似
霜中獨坐亦含嚬

謝樂天聞新蟬見贈

碧樹有蟬後烟雲改容光瑟然引秋氣芳草日夜黃
夾道喧古槐臨池思垂楊離人下憶淚忠士激剛腸
昔聞阻山川今聽同匡牀人情便所遇音韻豈殊常
因之比笙竽送我遊醉鄉

新秋對月寄樂天

月露發光彩此時方見秋夜涼金氣應天靜火星流
蛩響偏依井螢飛直過樓相知盡白首清景復追遊
訓樂天小臺晚坐見憶

小臺堪遠望獨上清秋時有酒無人勸看山祇自知
幽禽轉新竹孤蓮落靜池高門勿遽掩好客無前期
早秋雨後寄樂天

夜雲起河漢朝雨灑高林梧葉先楓落草蟲迎濕吟
簟涼扇恩薄室靜琴思深且喜炎前別安能懷寸陰

和樂天秋涼閑卧

暑退人體輕
雨餘天色改
荷珠貫索斷
竹粉殘粧在
高僧掃室請
逸客登樓待
槐柳漸蕭疎
閑門少光彩

秋晚病中樂天以詩見問力疾奉酬

耳虛多聽遠
展轉晨鷄鳴
一室背燈卧
中夜掃葉聲
蘭芳經雨敗
鶴病得秋輕
肯踏衡門草
唯應是友生

和樂天燒藥不成命酒獨醉

九轉欲成就
百神應主持
鶯啼鼎上去
老貌鏡前悲
却顧空丹竈
回心向酒卮
醺然耳熱後
暫似少年時

訓樂天詠老見示

人誰不願老
去有誰憐
身瘦帶頻減
髮稀冠自偏
廢書緣惜眼
多矣為隨年
經事還諳事
閱人如閱川
細思皆幸矣
下此便翛然
莫道桑榆晚
為霞尚滿天

歲夜詠懷

彌年不得意
新歲又如何
念昔同遊者
而今有幾多
以閑為自在
將壽補蹉跎
春色無情故
幽居亦見過

元日樂天見過因舉酒為賀

漸入有年數
喜逢新歲來
震方天籟動
寅位帝車回

一本冠作帽

門巷掃殘雪林園驚早梅與君同甲子壽酒讓先杯
裴令公見示詞樂天寄奴買馬絕句斐然
仰和且戲樂天
常奴安得似方回爭望追風絕足來若把翠娥酬綠
耳始知天下有奇才

詞思黯代書見戲

官冷如漿病滿身凌寒不易過天津少年留守多情
興請待花時作主人

詞思黯見示小飲四韻

拋却人間第一官俗情驚恠我方安兵符相印無心
戀洛水嵩雲恣意看三足鼎中知味久百尋竿上擲
身難追呼故舊連宵飲直到天明興未闌

詞樂天醉後狂吟十韻

來章有移家
唯醉和之句

散誕人間樂道遙地上仙詩家登逸品釋氏悟真筌
制誥留臺閣歌詞入管弦處身於木鴈任世變桑田
吏隱情兼遂儒玄道兩全八閔齋適罷三雅興尤偏
文墨中年舊松筠晚歲堅魚書曾替代香火有因緣
陸法和云與梁元帝於空
王寺佛前訂香火因緣欲向醉鄉去猶為色界牽

好吹楊柳曲為我舞金鈿

文選中
訓牛相公獨飲偶醉寓言見示

宮漏夜丁三
千門閉霜月華堂列紅燭絲管靜中
歌眉低有思舞體輕無骨主人啓
醜顏酣暢決映肌髮
猶思城外客阡陌不可越春意日夕生深此歡無斷絕

和僕射牛相公春日閑坐見懷

官曹崇重難頻入第宅清閑且獨行
階蟻相逢如偶語園蜂速去恐違程
人於紅藥唯看色鶯到垂楊不
惜聲東洛池臺怨拋擲移文非久會
應成

牛相公見示新什謹依本韻次用以抒下

情

劇韻新篇至因難始有能
雨天龍變化晴日鳳騫騰
遊海驚何極聞韶素不曾
愜心時拊髀擊節自麾肱
符彩添渝墨波瀾起剡藤
揀金光熠々累壁勢層々
珠媚多藏賈花撩欲定僧
封來真寶物寄與媿文朋
已老無時疾時洛中時癘多傷少年長貧望歲登
雀羅秋寂々蟲翅曉甍々羸驥方辭絆
虛舟已絕絙榮華甘死別
健羨亦生憎玉柱瑱瓏韻
金觥電凸稜何時良宴會

促膝對華燈

秋霖即事聯句三十韻

蕭素窮秋月蒼茫苦雨天泄雲生棟上行潦入庭前

居易送苔色侵三徑波聲想五絃井蛙爭入戶輒鮒

上僕射亂歸泉起送上中丞大監高雷愁晨坐空階驚鷺夜眠鶴鳴

猶未已蟻穴亦頻遷禹錫送上少傳侍郎散漫踈還空窳濛斷

又連竹霑青玉潤荷滴白珠圓居易地濕灰蛾滅池

添水馬憐有苗霑霖霖無月弄潺湲起籬菊替開秀

園疏已罷鮮斷行隨鴈翅孤嘯聳鳶肩禹錫橋柱黏黃

茵墻衣點綠錢草荒行藥路沙淀釣魚船居易長者

車猶阻高人榻且懸此思劉君之來也金烏何日見玉爵幾

時傳起近井桐先落當簷石欲穿趁風誠有戀披霧

邈無緣禹錫以荅廩米陳生醜庖薪濕起烟鳴雞潛懸榻之名

報曉急景暗彫年居易蓋洒高松上絲繁細柳邊拂

叢時起蝶墜葉乍驚蟬起巾角皆爭墊裙裾別似湔

人多蒙翠被馬盡着連乾禹錫好客無來者貧家但

悄然寒泥印鶴跡漏壁絡蝸涎居易蚊聚雷侵室鷗

翻浪滿川上樓愁暮遠舍戩濺起律候今秋矣

歡娛久曠焉但令高興在晴後奉周旋禹錫

喜晴聯句

苦雨晴何喜於未雨時氣收雲物變聲落鳥鳥知

居易送蕙泛光風圃蘭開皎月池千峯分遠近九陌

好追隨起送上尚書白日開路天玄陰卷地維餘清在林

薄新照入漣漪禹錫碧樹涼先落青蕪濕更滋曬毛

經浴鶴曳尾居出泥龜居易舞去商羊速飛來野馬

遲柱邊無潤礎臺上有遊絲起橋淨行塵息堤長禁

柳垂宮城開睥睨觀闕麗果愚禹錫洛水澄清鏡嵩

烟展翠幃梁成虹乍見市散蟻初移居易籍草風猶

暖攀條露已晞屋穿添碧瓦墻缺召金鉞起迥澈來

雙目昏煩去四支霞文晚煥爛星影夕參差禹錫爽

助門庭肅寒摧草木衰黃乾向陽菊紅洗得霜梨居

易假蓋閑誰惜彈絃燥更悲散蹄良馬穩炙背野人

宜起洞戶晨揮入空庭宿霧披推牀出書目傾筭上

衣梳禹錫道路行非阻軒居望可期無辭訪圭竇且

願見瓊枝居易山閣蓬萊客古以祕書儲宮羽翼師

此言每優陪麗句何暇覲英姿起以酬圭翫景方搔

首懷人尚歛眉因吟仲文什高興盡於斯禹錫

會昌春連宴即事

元年寒食日上已暮春天鷄黍三家會鶯花二節連
居易光風初淡蕩美景漸暄妍簪組蘭亭上車輿曲
水邊禹錫松聲添奏樂草色坐鋪筵雀舫宜閑泛螺
杯任漫傳起園蔬香帶露厨也柳暗藏烟麗句輕珠玉
清談勝管絃居易陌喧金距闥樹動綵繩懸姹女粧
梳艷遊童衣服鮮禹錫圃香知種蕙池暖憶開蓮恠
石雲疑觸天樵火欲然然起正歡唯恐散雖醉未思眠

嘯傲人間世追隨地上仙居易鷺來雙涎：鴈去累

翩：行樂真吾事尋芳獨我先禹錫滯周慙太史太

公留滯周南今入洛繼先賢此言劉白聲價昔恨多
榮示慙古人矣

分手今歡謔比肩起病猶陪讌飲老更奉周旋望重

青雲客情深白首年居易遍嘗珍饌後許入畫堂前

舞袖翻紅炬歌鬟插寶蟬禹錫斷金多感激倚玉貴

遷延說史吞顏注論詩笑鄭箋起松筠寒不變膠漆

冷彌堅興伴王尋戴謂隨僕射榮同隗在燕居易擲

盧誇使氣刻燭闥成篇實藝皆三捷虛名愧六聯錫禹

興闌猶舉白話靜每思玄更說歸時好亭月正圓
起

敵難降下筆之時輾然自哂支呈僕射兼
我言輒引起題重為聯句疲兵再戰勅

簡尚書

三春今向晚四者昔難并借問低眉坐何如携手行

居易 舊遊多過隙新宴且尋盟鸚鵡林須樂麒麟閣未

成起分陰當愛惜遲景好逢迎林野薰風起樓臺穀

雨晴禹錫墻低山半出池廣水初平橋轉長虹曲舟

回小鷓輕居易殘花猶布繡密竹自聞聲笙欲過芳

菲節難忘宴會情起月輪行似箭時物勢如傾見鴈

隨兄去聽鶯求友聲禹錫蕙長書帶轉菰嫩剪刀生

坐密衣裳暖堂虛絲管清居易峯岫侵碧落草木近

朱明與點非沂水陪膺是洛城白嘗為山川守故云起撥醅爭

綠醕卧酪待朱纓幾處能留客何人喚解醒禹錫舊

儀尊右揆新命寵春卿有喜雀頻語無機鷗不驚居易

青林思小隱白雪仰芳名訪舊殊千里登高賴九城

起鄭侯思管鑰疎傳傲簪纓綸綍曾同掌煙霄即上

征禹錫冊庭常接武書殿忝連衡蘭室春彌馥松心
晚更貞居易琴招翠羽下釣掣紫鱗呈尺願回烏景
誰能避兕觥起方知醉兀兀應勝走營營鳳閣鸞臺
路從他年少爭居易更呈二公

樂天是月長齋鄙夫此時愁卧里閭非遠
雲霧難披因以寄懷遂為聯句所期解悶
烏敢驚禪

五月長齋月苦行心蘭葱不入戶蓂蔔自成林
夢得護戒先辭酒嫌喧亦徹琴塵埃賓位靜香火道

場深樂天我靜馴狂象吾餘施衆禽定知於佛佞豈
復向書淫夢得攔藥凋紅艷庭槐換綠陰風光徒滿
目雲霧未披襟樂天樹為清涼倚池因盥漱臨蘋芳
遭鸞拂蓮折待蜂尋夢得舍下環流水窻中列遠岑
苔班錢剥落石恠玉嶽峯樂天鵲頂迎秋禿鸞喉入
夏瘡柳絲垂色線棘刺露長針夢得散秩身猶幸趨
朝力不任官將才共拙年與病交侵樂天狗樂非時
選忘機似陸沉鑒容稱四皓捫腹有三壬夢得携手
慙連璧同心許斷金紫芝雖繼唱前後各在賓客白雪少知

音樂天憶罷吳門守相逢楚水潯舟中頻曲宴夜後
各加斟夢得濁酒銷殘漏絃聲間遠砧醜顏舞長袖
一密坐接華簪樂天持論峯巒峻戰文矛戟森笑言誠
莫逆造次必相箴夢得往事應如昨餘歡迄至今迎
君常倒屣訪我輒携衾樂天陰魄初離畢將有陽光
正在參五月節待公休一食縱飲共狂吟夢得

劉賓客外集卷第四

六月初三日次公校

劉賓客外集卷第五

雜詩

答張侍御賈喜再登科後自洛赴上都贈
別

又被時人寫姓名春風引路入京城知君憶得前身
事分付嬰鷲花與後生

和武中丞秋日寄懷簡諸僚故

退朝還公府騎吹息繁音吏散秋庭寂鳥啼烟樹深
威生奉白簡道勝外華簪風物清遠目功名懷寸陰

雲衢念前侶，綵翰馮冲襟。涼菊照幽院，敗荷攢碧潯。
感時江海思，報國松筠心。空愧壽陵步，芳塵何處尋。

赴連州途經洛陽諸公置酒相送張員外

賈以詩見贈率爾酬之

謫在三湘最遠州，邊鴻不到水南流。如今覽寄樽前
笑，明日辭君步二愁。

贈元九侍御文石枕以詩獎之

文章似錦氣如虹，**馬**宜薦華簪。綠殿中縱使，真飈生
旦夕，猶堪拂拭愈頭風。

訓元九侍御贈壁州鞭長句

碧玉孤根生在林，美人相贈比雙金。初開郢客緘，封後
想見巴山冰雪深。多節本懷端直性，露青猶有歲寒
心。何時策馬同歸去，關樹扶疎馱鐙吟。

和李六侍御文宣王廟釋奠作

歎息魯先師，生逢周室卑。有心律天道，無位救陵夷。
歷聘不能用，領徒空爾為。儒風正禮樂，旅象入蕃龜。
西狩非其應，中都安足施。**世世**衰由我，賤泣下為人悲。遺
教光文德，興王叶夢期。土田封後胤，冕服飾虛儀。鐘

鼓膠庠薦牲牢郡邑祠聞君喟然嘆偏在上丁時

敬訓徹公見寄二首

淒涼沃州僧悵悴柴桑宰別來二十年唯餘兩心在
越江千里鏡越嶺四時雪中有逍遙人夜深觀水月

訓元九院長自江陵見寄

無事尋花至仙境等閑栽樹比封君金門通籍真多
士黃紙除書每日聞

韓十八侍御見示岳陽樓別竇司直詩因
令屬和重以自述故足成六十二韻

楚江何蒼然曾瀾七百里孤城寄遠目一寫無窮已
蕩漾浮天蓋四環宣地里積漲在三秋混成非一水
冬遊見清淺春望多洲沚雲錦遠沙明風烟青草靡
火星忽南見月魄方東迤雪波西山來隱若長城起
獨專朝宗路駛悍不可止支川讓其威蓄縮至南委
熊武走蠻落溪熊武二瀟湘來與鄙炎蒸動泉源積潦
搜山趾歸往無旦夕包含通遠迹行當白露時眇視
秋光裏曙色未昭晰露華遙斐豐浩爾神骨清如觀
混元始我風忽震盪驚浪迷津溪怒激鼓鏗旬感成

山歸碗鷓鴣疑變化罔象何恢詭嘘吸駕樓臺騰驤
露鬢尾景移群動息波靜繁音弭明月出中央青天
絕纖滓素光淡無際綠靜平如砥空影度鷓鴣秋聲
思蘆葦鮫人弄機杼貝闕駢紅紫珠蛤吐玲瓏文鯨
翔旖旎水鄉吳蜀限地勢東南庠翼軫繁垂精衡巫
屹環峙名雄七澤藪國辨三苗氏唐羿斲修蛇荆王憚
下逆青兕秦狩跡在虞巡路從此軒后奏宮商騷
反詠蘭芷茅嶺潛相應橘洲傍可指郭璞驗幽絳羅
含著前紀觀津戚里族按道侯家子聯袂登高樓臨

軒笑相視假守亦高卧

竇時權領郡事

墨曹正垂耳

韓亦量移江陵

法契潤話涼温壺觴慰遷移徙地偏山水秀客重杯

盤侈紅袖花欲然銀燈晝相似興更抵掌樂極同

啓齒筆鋒不能休藻思一何綺伊余負微尚夙昔慙

知己出入金馬門交結青雲士襲芳踐蘭室學古遊

槐市策慕宗前軍文師漢中壘陋容昧俯仰孤志無

依倚衛足不如葵漏川空歎蟻幸逢萬物泰獨處窮

途否鍛翮重叠傷兢蒐再三禡蘧瑗亦屢化左丘猶

有恥桃源訪仙宮官薛服祠山鬼故人南臺舊一別如

一本荆蠻句
下有失注

絃矢

今朝會荆蠻斗酒相宴喜為余出新什笑拈隨

時禹錫出為連遠至荆南
改武陵司馬和韻於荆

伸紙擘若觀五色歡然臻四美委曲風濤事分明窮

達音洪韻蕙華鐘淒音激清微羊躡要平聲共和江

淹多雜擬徒欲仰高山焉能通追逸軌湘洲路四達

已陵城雉何必顏光祿留詩張內史

訓竇員外使君寒食日途次松滋渡先寄

示四韻

楚鄉寒食橘花時野渡臨風駐綵旗草色連雲人去

住水紋如縠燕差池朱輪尚憶群飛雉青綬初懸左

顧龜非是湓城魚司馬水曹何事與新詩

和竇中丞晚入容江作

漢郡三十六鬱林東南遙人倫選清臣天外頒詔條

桂水步秋浪火山凌霧朝分圻辨風物入境聞謳謠

莎岸見長亭烟林隔麗譙日落舟益駛川平旗自飄

珠浦遠明滅金沙晴動搖一吟道中作離思懸層霄

呂八見寄郡內書懷因而戲和

文苑振金聲循良冠百城不知今史氏何處列君名

寄楊八拾遺

時出為國子主簿分司東都
之十八負外亦轉國子博士

同在洛陽

聞君前日獨庭爭漢帝偏知白馬生忽領簿書遊太
學寧勞侍從厭承明洛陽本自宜才子海內而今有
直聲為謝同寮老博士范雲未歲即公卿

訓竇員外郡齋宴客偶命柘枝因見寄兼

一本多張字

呈張十一院長元九侍郎負外即兼節度判官佐平蠻之
畧張初罷都
已元方從事

分憂餘刃又從公白羽胡林嘯詠中絲筆諭戎矜倚
馬華堂留客看驚鴻渚宮油幕方高步灃浦甘棠有

幾叢若問騷人何處所門臨寒水落江楓

謝竇員外旬休早涼見示詩奉書報言明

新秋十日澣朱衣鈴閣無聲公吏歸風韻漸高梧葉
動露光初重槿花稀四時苒苒催容鬢三爵油忘
是非更報明朝池上酌人知太守字玄暉

和訓楊侍御憑見寄二首

翔鸞闕底謝皇恩纓上滄浪舊水痕踈傳揮金忽相
憶遠擊長句與招魂
十年毛羽催顏一旦天書召回看花時欲到故侯

也好歸來

南海馬大夫見惠著述三通勒成四秩上

自遂古達于國朝采其菁華至簡如富欽

受嘉貺詩以謝之

紅旗閱五兵絳帳領諸生味道輕鼎食退公猶筆耕

清箱傳學遠金匱納書成一瞬見前事九流當抗行

編蒲曾苦思垂竹媿無名今日承芳訊誰言贈袞榮

南海馬大夫遠示著述無訓拙詩輒著微

誠再有長句時蔡戎未弭故見於未篇

漢家旌旆付雄才百越南溟統外臺身在絳紗傳六

藝腰懸青綬亞三台連天浪靜長鯨息映日帆多寶

舶來聞道楚氛猶未滅終須旌旆掃雲雷

和楊侍郎初至彬州紀事書情題郡齋八

韻

旌節下朝臺分圭從北回城頭鶴立處驛樹鳳栖來

蘇耽傳云後化為仙鶴止城東北隅樓上又舊路芳

州北栖鳳麟圖經云常有威鳳降于寒梧也塵在新恩駟騎催里閭風偃草鼓舞抃成雷吏散仙

禽轉庭香夏蕊開郡齋堪四望壁記有三台人訝徵

黃晚文非吊屈哀一吟梁甫曲知是卧龍才

和柳州楊侍郎翫郡齋紫薇花十四韻

幾年丹霄上出入金華省暫別萬年枝看花桂陽嶺
南方足竒樹公府成佳境綠陰交廣除明艷透蕭屏
兩餘人吏散鷺語簾櫳靜懿此含曉芳備然忘簿領
紫茸草垂組縷金樓攢鋒穎露溽暗傳香風輕徐就
影苒弱多意思從容占光景得地在侯家移根近仙井
開罇好凝睇倚瑟仍回頸遊蜂駐絲冠舞鶴迷烟頂
興生紅藥後愛與甘棠並不學夭桃姿浮榮有俄頃

和南海馬大夫聞楊侍郎出守彬州因有

寄上之作

忽驚金印駕朱轡遂別鳴珂聽曉猿碧落仙來雖暫
謫赤泉侯在是深恩玉環慶遠瞻台座銅柱勲高壓
海門一詠瓊瑤百憂散何勞更樹北堂萱

奉和鄭相公以考功十弟山薑花俯賜篇

詠

採擷黃薑藥封題青鎖闈共聞調膳日正是退朝歸
響為纖筵發情隨綠翰飛故將天下寶萬里共光輝

馬大夫見示浙西王侍御贈荅詩因命同

作大夫榮踐舊府又歷交趾桂林南人歌
之列在風什王侍御公易一別歲除寄

末篇以
代札

憶逐羊車凡幾時今來舊府統成師象筵照室會詞

客銅鼓臨軒舞海夷百越酋豪稱故吏十洲風景助

新詩秣陵從事何年別一見瓊章如素期

訓馬大夫登涯口戍見寄

新辭金印拂朝纓臨水登山四體輕猶念天涯未歸

客瘴雲深處守孤城

訓馬大夫以愚獻通菱蕪酒感通拔二字

因而寄別之作

泥沙難振拔誰復問窮通莫訝提壺贈家傳枕麴風

成謠獨酌後深意片言中不進終無已應須荀令公

荅楊八敬之絕句

揚生時亦謫居

飽霜孤竹聲偏切帶火焦桐韻本悲今日知音一留

聽是君心手不平時

鄂渚留別李二十一表臣大夫

高墻起行色促柱動離聲欲問江深淺應知遠別情

答表臣贈別二首

昔為瑤池侶飛舞集蓬萊今作江漢別風雪一徘徊
嘶馬立未還行舟路將轉江頭暝色深揮袖依稀見
始發鄂渚寄表臣二首

祖帳管絃客帆淒風生回車已不見猶聽馬嘶聲
曉發柳林戍遙城聞五鼓憶與故人眠此時猶晤語
出鄂州界懷表臣二首

離席一揮杯別愁今尚醉遲遲有情處却恨江帆駛
夢覺疑連榻舟行忽千里不見黃鶴樓寒沙雪相似

重寄表臣二首

對酒臨流奈別何君今已醉我蹉跎分明記取星
鬢他日相逢應更多

世間人事有何窮過後思量盡是空早晚同歸洛陽
陌卜隣湏近祝雞翁

寄唐州楊八歸厚

淮安古地雍州師畫角金鏡旦夕吹淺草遙迎鷓鴣
馬春風亂颭辟邪旗謫仙年月今應滿戇諫聲名衆
所知何況遷喬舊同伴一雙先入鳳皇池

時徐晦楊嗣復二舍

人與唐川俱
同年及第

重寄絕句

淮西既是平安地
鷓鴣路今無羽檄飛
聞道唐州最清
靜
戰場耕盡野花稀

春日寄楊八唐州二首

淮西春草長
淮水逶迤光
鷺入新村
路人耕舊戰場
可憐行春守
立馬看斜桑

漠漠淮上春
秀苗生故壘
梨花方城路
荻芽蕭陂水
高齋有謫仙
坐嘯清風起

寄朗州溫右史曹長

暫別瑤墀鴛鴦行
綵旗雙引到沅湘
城邊流水桃花
過簾外春風杜若香
史筆枉將書紙尾
朝纓不稱濯
滄浪雲臺公業家
聲在徵詔何時出
建章

和東川王相公新漲驛池八韻

今日池塘上
初移造物權
苞藏成別島
泓濁致清連
變化生言下
蓬瀛落眼前
泛觴驚翠羽
開幕對紅蓮
遠馮風光入
明含氣象全
渚烟籠驛樹
波日漾賓筵
曲岸留緹騎
中流轉綵船
無因接元禮
共載比神仙

訓楊八副使將赴湖南途中見寄一絕
知逐征南冠楚材遠勞書信到陽臺明朝若上君山
上一道巴江自此來

訓楊司業巨源見寄

壁擁流水近靈臺中有詩篇絕世才渤海歸人將集
去梨園弟子請詞來瓊枝未識魂空斷宝匣初臨手
自開莫道專城管雲雨其如心似不燃灰

訓國子崔博士立之見寄

健筆高科早絕倫後來無不揖芳塵遍看今日乘軒

客多是昔年呈卷人胄子執經瞻誦坐郎官共食接
華裊煩君遠寄相思曲慰問天南一逐臣

訓馮十七舍人宿衛贈別五韻

少年為別日隋宮楊柳陰白首相逢處巴江烟浪深
使星三蜀酒春雨霑衣襟王程促速意夜語殷勤心
却歸天上去遺我雲間音

劉賓客外集卷第六

七律詩

唐侍御寄遊道林嶽麓二寺詩并沈中丞

姚員外所和見徵繼作

湘西古刹雙躡躡群峯朝拱如駿奔青松步障深五
里龍宮黯黯神為閣高殿呀然壓蒼嶽俯瞰長江疑
欲吞摘洲泛浮金寶動水郭繚繞朱樓騫語餘百響
入天籟衆竒引步輕翻翻泉清石布博碁子蘿密鳥
韻如簧言回廊架險高且曲新徑穿林明復昏淺流

忽濁山獸過古木半空天火痕星使雙飛出禁垣元
侯餞之遊石門紫髯翼從紅袖舞竹風松雪香温磨
遠持青瑣照巫峽一憂驚斷三聲猿靈山會中身不
預吟想峭絕愁精魂恨無黃金千萬餅布地買取為
丘園

遥和韓睦州元相公二君子

玉人紫綬相輝映却要霜髯一两莖其奈無成空老
去每臨明鏡若為情

張郎中籍遠寄長句開緘之日已及新秋

因舉目前仰酬高韻

南宮詞客寄新篇清似湘靈促柱絃京邑舊遊勞夢
想歷陽秋色正澄鮮雲銜日脚成山雨風駕潮頭入
渚田對此獨吟還獨酌知音不見思蒼然

訓湖州崔郎中見寄

風箏吟秋空不肖指爪聲高人靈府間律呂伴成英
昔年與兄遊文似馬長卿今來寄新詩乃類陶淵明
磨礮老益智吟咏閑弥精豈非山水鄉蕩漾神機清
渚烟蕙蘭動溪雨虹蜺生馮君虛上舍待余乘興行

訓揚八庶子喜韓吳興與余同遷見贈本
韻次用

早遇聖明朝雁行登九霄吳興與余中外兄弟文輕傳武仲酒

逼蓋寬饒捨矢同瞻鵠當筵共賽梟吳興與余同琢年判入等第

磨三益重唱和五音調臺柏烟常起池荷香暗飄吳興與余同

與余同為御臺門外有蓮池也星文辭北極旗影度東遼吳興自度

為行軍司馬所從即范僕射昔范明友為度遠將軍直道由來黜浮名豈敢要

三湘與百越兩散又雲搖遠守慙侯籍微還荷詔條

額容唯舌在別恨幾魂銷滿眼悲陳事逢人少舊僚

烟霞為老伴蒲柳任先凋虎綬懸新印龍舸理去橈

斷腸天北即攜手洛陽橋幢蓋今雖貴弓旌會見招

其如草玄客空宇久寥寥

秋日書懷寄河南王尹

公府想無事西池秋水清去年為狎客永日奉高情

况有臺上月如聞雲外笙不知桑落酒今歲與誰傾

浙東元相公書嘆梅雨鬱蒸之候因寄

言

稽山自與岐山別何事連年鶯鷺飛百辟商量舊相

入九天祇候**遠**臣歸平湖晚泛窺清鏡高閣晨開掃
翠微今日看書最惆悵為聞梅雨損朝衣

酬嚴給事賀加五品兼簡同制水部李郎

中

九天雨露傳青詔八舍即官換綠衣初佩銀魚隨仗
入宜乘白馬退朝歸**離**盤賀喜開瑶席綵筆題詩出
鎖闥聞道水曹偏得意霞朝霧夕有光輝

裴相公大學士見示荅張秘書謝馬詩并

群公屬和因命追作

草玄門戶少塵埃丞相并州寄馬來初自塞垣銜首
宿忽行幽徑破莓苔尋花緩轡威遲去帶酒垂鞭蹀
躞回不與王侯與詞客知輕富貴重清才

奉和司空裴相公中書即事通簡舊僚之

作

談笑在巖廊人人盡所長儀形見山立文字動星光
日運丹青筆時看赤白囊佇聞戎馬息入賀領篤行

微之鎮武昌中路見寄藍橋懷舊之作悽

然繼和兼寄安平

今日油幢引他年黃紙追同為三楚客獨有九霄期
宿草恨長在傷禽飛尚遲武昌應已到新柳映紅旗

奉和裴侍中將赴漢南留別座上諸公

金貂晚出鳳池頭玉節前臨南雍州暫輟洪鑪觀劍
戟還將大筆注春秋管絃席上留高韻山水途中入
勝遊峴首風烟看未足便應重拜富人侯

和兵部鄭侍郎省中四松詩十韻松是中書相公

任侍郎曰手栽

右相歷中臺移松武庫栽紫茸抽組綬青實長玫瑰

便有干霄勢看成構厦材數分天柱半影逐日輪迴
舊賞台階去新知谷口來息陰常仰望翫境幾徘徊
翠粒晴懸露蒼鱗兩起苔凝音助瑤瑟飄葉泛金壘
月桂花遙燭星榆半對開終須似鷄樹榮茂近昭回

和蘇郎中尋豐安里舊居寄主客張郎中

漳濱卧起恣閑遊宣室微還未白頭舊隱來尋通德
里新篇寫出畔年愁池看科斗成文字鳥聽提壺憶
獻酬同學同年又同舍許君雲路並華翰

將赴蘓州途出洛陽留守李相公累申宴

餞寵行話舊形於篇章謹抒下情以申仰

謝

歲抄風物動雪餘宮苑晴兔園賓客至金谷管絃聲
洛水故人別吳宮新燕迎越即憂不淺懷袖有瓊英

吳興敬即中見惠班竹杖魚示一絕聊以

謝之

一莖烟炯琅玕色數節重重玳瑁文柱到高山未登
處青雲路上願逢君

和浙西王尚書聞常州揚給事製新樓因

寄之作

文昌星象盡東來油幕朱門次第開且上新樓看風
月會乘雲雨一時回尚書在南宮為左丞給事與禹錫皆是即吏

訓浙東李侍郎越州春晚即事長句

越中藹藹繁華地秦望峯前禹穴西湖州初生邊雁

去山花半謝杜鵑啼青油畫卷臨高閣紅旆晴翻繞

古隄明日漢庭徵舊德老人爭出若耶溪後漢劉寵為會稽人

治及徵還山陰忽有五六老叟自若耶山谷間出人
費百錢以送寵寵勞之答曰自明府下車民不見吏年

老遇值聖明故自扶奉送寵
為人選一大錢受之也

訓淮南牛相公述舊見貽

少年曾忝漢庭臣晚歲空餘晚病身初見相如成賦

日尋為丞相掃門人追思往事咨嗟久喜奉清光咲

語頻猶有登朝舊冠冕待公三入拂埃塵

訓鄭州權舍人見寄十一二韻

朱户凌晨啟碧梧含早涼人從桔橈至書到漆沮傍

拈會因佳句情深取斷章愜心同笑語入耳勝笙簧

憶昔三條路居隣數仞墻福舍人舊宅光學堂青玉案

綵服紫羅囊麟角看成就龍駒見抑揚毅中飛一箭

雲際落雙鶴舍人一舉登科旬邑叨前列天臺媿後

行鄙人為渭南主簿十年舍人方尉其邑及罹譴鯉

庭傳事業鷄樹遂翱翔書殿連鳴鵲神池接鳳皇追

遊蒙尚齒惠好結中腸鄙人在集賢與西掖接近日

微駟方擢舉危根易損傷一麾憐弃置五字借恩光

鄙人出牧姑汝海崆峒秀溱流芍藥芳風能行偃草

境靜不爭桑鄙人轉臨汝轉旆趨関右頌條西渭陽

病吟猶有思老醉已無狂塵滿鴻溝道沙鷺白狄鄉

停聞黃紙詔從名紫微郎

奉和裴令公夜宴

天下蒼生望不休
東山雖有但時遊
從來海上仙桃樹
肯逐人間風露秋

洛濱病卧李侍即見惠藥物
詭以文星之句

隱几支頤對落暉
故人書信到柴扉
周南留滯商山老
星象如今屬少微

訓留守牛相公宮城早秋
寓言見寄

曉月映宮樹
秋光起天津
涼風稍動葉
宿露未生塵

景氣尚芳麗
曠望感心神
揮毫成逸韻
開閣遲來賓
擺去將相印
漸為逍遙身
如招後房宴
却要白頭人

牛相公留守見示城外新墅有溪竹秋月

親情多往宿
遊恨不得去
因成四韻
兼簡洛中親故之什
兼命同作

別墅洛城外
月明村墅_徑通
光輝滿地上
絲管發舟中
堤艷菊花露
島涼松葉風
高情限清禁
寒漏滴深宮

和僕射牛相公追感帝裝六相登庸皆四十餘未五十薨歿豈早榮早枯之義今年

將六十猶粗強健因親故勸酒率然尔成篇
并見寄之作

坐鎮清朝獨殷然閑徵故事數前賢用材同踐鈞衡
地稟氣終分大小年威鳳本池思泛泳仙查舊路望
回旋猶憐綺季深山裏唯有松風與石田

和僕射牛相公以離闕庭七年班行親故

亡歿十無一人再覩龍顏喜慶雖極感嘆

風燭能不愴然因成四韻并示集賢中書

二相公所和

久辭龍闕擁紅旗喜見天顏拜赤墀三省英察非舊
侶萬年芳樹長新枝交朋接武居仙院幕客追風入
鳳池雲母屏風即施設可憐榮耀冠當時

和僕射牛相公見示長句

靜得天和興自濃不緣宦達性靈慵大鵬六月有閑
意仙鶴千年無躁容流輩盡來多嘆息官班高後少
過從唯應加築露臺上贖見終南雲外峯

和牛相公雨後寓懷見示

金火交爭正抑揚蕭蕭飛雨助清商曉看紈扇恩情

薄夜覺紗燈刻數長樹上早蟬纔發響庭中百州已
無光當年富貴亦惆悵何況悲翁髮似霜

牛相公林亭雨後偶成

飛雨過池閣浮光生艸樹新竹開粉奩初蓮藝香注
野花無時節水鳥自來去若問知境人人間第一處

和牛相公題姑蘓所寄太湖石兼寄李蘓

州

震澤生竒石沉潜得地靈初辭水府出猶帶龍宮腥
發自江湖國來榮卿相庭從風夏雲勢上漢古樵形

拂拭魚鱗見鏗鏘玉韻聆烟波含宿潤苔蘚助新青
嵌穴胡鵠貌纖鉗蟲篆銘孱顏傲林薄飛動向雷霆
煩熱近還散餘醒見便醒凡禽不敢息浮瑤莫能停
靜稱垂松蓋鮮宜映雀翎忘憂常日擊素尚與心冥
眇小欺相鷺團圓笑落星徒然想融結安可測年齡
採取詢御羞搜求按舊經垂鈎入空隙隔浪動晶熒
有獲人爭賀歡謠衆共聽一州驚閱寶千里遠揚舲
覩物洛陽陌懷人吳御亭寄言垂天翼早晚起滄溟

和陳許王尚書酬白少傅侍郎長句因通

簡汝洛舊遊之什

廓廓高翔不可追風雲失路暫相隨方同洛下書生
詠又見軍前大將旗雪裏命賓開玉帳飲中請號駐
金危竹林一自王戎去嵇阮雖貧興未衰

和僕射牛相公寓言二首

兩度竿頭立定誇誇回眸舉袖拂青霞盡拋今日貴人
樣復振前朝名相家御史定來休直宿尚書依舊趁
叅衙具瞻尊重誠無敵猶憶洛陽千樹花

心如止水鑒常明見盡人間萬物情鵬鷃騰空猶逞
俊驂馱齒足自無驚時來未覺推為崇貴了方知退
是榮只恐重重世緣在事三度副蒼生

和牛相公南溪醉歌見寄

脫履將相守冲謙唯於山水獨不廉枕伊背洛得勝
地鳴臯少室來軒簷相去教形面勢默指畫言下變
化隨傾瞻清池曲榭人所致野趣幽芳天與添有時
轉入潭島間瓊木如帷藤為簾忽然便有江湖思沙
磔平淺草纖纖怪石釣出大湖底珠樹移自天台尖
崇蘭迎風綠泛艷圻蓮含露紅襦襜修廊架空遠岫

入弱柳覆檻流波霑渚蒲抽英劍脊動岸荻迸笋錐
頭銛携觴命侶極永日此會雖數心無厭人皆置庄
身不到富貴難與逍遙兼唯公出處得自在決就放
曠辭炎炎座賓盡歡恣談謔愧我掉頭還奮髯能令
商於多病客亦覺自適非沉潜

訓僕射牛相公晉國池上別後至甘棠館
忽夢同遊因成口號見寄

已知池上別魂驚忽報夢中携手行此夜獨歸還乞
夢老人無睡到天明

裴侍郎大尹雪中遺酒一壺兼示喜眼疾
平一絕有閑行把酒之句斐然仰訓

卷盡輕雲月更明金篦不用且閑行若傾家釀招來
客何必池塘春草生

訓太原狄尚書見寄

家聲烜赫冠前賢時望穹崇鎮北邊身上官銜如座
主幕中談笑取同年幽并俠少趨鞭弭燕趙佳人奉
管絃仍把天兵書號筆遠題長句寄山川

訓宣州崔大夫見寄

白衣曾拜漢尚書今日恩光到敝廬
再入龍樓稱綺季應緣狗監說相如
中郎南鎮推方重史內高齋興有餘
遙想敬亭春欲暮百花飛盡柳花初

訓皇甫十少尹暮秋久雨喜晴有懷見示

雨餘獨坐卷簾帷便得詩人喜霽詩
搖落從來長年感慘舒偏是病身知
掃開雲霧呈光景流盡潢汙見路岐
何況菊香新酒熟神州司馬好狂時

劉夢得外集卷第六

六月廿日校

劉賓客外集卷第七

律詩

己巳六月移榻舊山樓後校

和浙西李大夫霜夜對月聽小童吹觱篥

三字一本作雙行

歌依本韻

海門雙青暮烟歇萬頃金波湧明月
侯家小兒能觴策對此清光天性發
長江凝練樹無風瀏慄一敲霄漢中
涵胡畫角怨邊州簫瑟清蟬吟野叢
冲融頓挫心使指雄吼如風轉如水
思婦多情珠淚垂仙禽欲舞双翅起
郡人寐聽衣滿霜江城月斜樓影長
纔驚

指下繁韻息已見樹杪明星光謝公高齋吟激楚戀
闕心同在羈旅一奏荆人白雪歌如聞雒客扶風馭塢
吳門水驛接山陰文字殷勤寄意深欲識陽陶能絕
處少年榮貴道傷心

浙西李大夫述夢四十韻并浙東元相公

訓和斐然繼啟

位是才能取時因際會遭羽儀呈鸞鷲鉉又試豪曹
洛下推年少山東許地高門承金鉉鼎家有玉璜韜
嗣侯伯海浪扶鵬翅天風引驥髦便知蓬閣闕不識魯

衣褒興發春塘艸魂交益部刀形開猶抱膝燭盡遽
揮毫昔仕當初筮逢時詠載橐懷鈿辨蟲蠹染素學

鵝毛車騎方休汝歸來欲效陶大夫罷太原南臺資

蹇諤內署選風騷羽化如乘鯉棲居舊冠鼇美香焚

濕麝名菓賜乾荀議赦蠅棲筆邀敬蟻泛醪代言無

所戲謝表自稱叨蘭焰凝芳澤芝泥瑩玉膏對頻啟

價出直久夢魂勞草詔令歸馬批章吞獻葵幽冀歸閣西戎

乞盟事並銀花懸院榜翠羽映簾條諷諫欣然納竒

觚率爾操禁中時諤諤天下免切切右顧龜成印雙

飛鵠織袍謝賓緣地密潔已是心豪五日思歸沐三
春羨衆邀茶爐依綠笋碁局就紅桃漠海桑潛變陰
陽炭暗熬仙成脫履去臣戀捧弓號建節薛烏栢宣
風看鷺濤土山京口峻鐵瓮郡城牢舊說潤州城如
鐵瓮事事見歸
浣南征記曲島花千樹官池水一篙鷺來和綠管雁起拂
麾旄宛轉傾羅扇回旋墮玉搔罰籌長豎纛觥盞樣
如舳山是千重障江為四面濠卧龍曾得雨浙東孤
雀尚鳴臯浙西劍用雄開匣二公弓閑蟄受矇謂鳳
姿嘗在竹二公鷄羽不離蒿自謂吳越分雙鎮東西

接萬艘今朝比潘陸江海更滔滔

和浙西李大夫晚下北固山喜徑松成陰

悵然懷古偶題臨江亭并浙東元相公所

和依本韻一本作雙行

一辭溫室樹幾見武昌柳荀謝年何少帝平望已久
種松夾石道紆組臨沙阜目覽帝王州心存股肱守
葉動驚綵翰波澄見頽首晉宋齊梁都千山萬江口
烟散隋宮出濤來海門吼風俗秦伯餘衣冠永嘉後
江長天作限山固壤無朽自古稱佳麗非賢誰奄有

八元和族盛萬石門風厚天柱揭東漢文星照北斗
高亭一騁望舉酒共為壽因賦詠懷詩遠寄同心友
禁中晨夜直江左東西偶筆手握兵符儒晉盤貴綬
頌條風有自立事言無苟農野聞讓耕軍人不使酒
用材當構厦知道寧窺牖誰為青雲高鵬飛終背負
和浙西李大夫伊川卜居

早入八元數嘗承三接恩飛鳴天上路鎮壓海西門
清望寰中許高情物外存時來誠不讓歸去每形言
洛下思招隱江干厭作藩按經修道具依樣買山村

馬膏堂為御史大夫時置宅命畫開鑿隨人化幽陰
工圖其狀戒所使曰依此樣求之開鑿隨人化幽陰
為律曠遠移難得樹立變舊荒園絕塞通潛徑平泉

占上原烟霞遙在想簿領益為繁丹禁虛東閣蒼生
望北轅徒令雙白雀五里自翩翹

和滑州李尚書上巳憶江南禊事

白馬津頭春日遲沙州歸雁拂旌旗柳營唯有軍中
戲不似江南三月時

訓滑州李尚書秋日見寄

一入石渠署三聞宮樹蟬丹霄未得路白髮又添年

雙節外臺貴洞簫中禁傳徵黃在旦夕早晚發南燕

吐綬鳥詞 并序

序一本字不低

滑州牧尚書李公以吐綬鳥詞見示兼命繼

殺蓋尚書前為御史時所作有翰林二學士

同賦之今所為追和也鳥之所異具于首篇

越山有鳥翔寥廓嗟中天綬光若若越人偶見而奇

之因名吐綬江南知四明天姥神仙地朱鳥呈精鐘

異氣赤玉凋彪炳毛成紅綃剪出玲瓏翅湖烟始開

山日高迎風吐綬盤花條臨波似染瑯琊艸映葉疑

開阿母桃花紅艸綠人間事未若靈禽自然貴雀吐

明珠暫報恩鵲銜金印空為瑞春和秋霽野花開玩

景尋芳處處來翠幕雕籠非所慕珠丸拓彈莫相猜

樓月啼烟凌縹緲高林先見金霞曉三山仙路寄遙

情刷羽揚翹欲上征不學碧鷄依井絡願隨青鳥向

層城太液池中有黃鵠憐君長向高枝宿如何一借

羊角風來聽簫韶九成曲水榭之幽室山丘之

和西川李尚書漢州微月遊房太尉西湖

木落漢川夜西湖懸玉鈎旌旗環水次舟楫泛中流

目極想前事神交如共遊瑤琴久已絕松韻自悲秋

和重題

林端重照盡湖上遠嵐清水榭芝蘭室仙舟魚鳥情

人琴久寂寞烟月若平生一泛釣璜處再吟鏘玉轂

尚有竹間路永無棊下塵一聞流水曲重憶食霞人

西川李尚書知愚與元武昌有舊遠示二

篇吟之泫然因以繼和二首

來詩云元公

蜀琴將以為寄而武昌

之計聞因陳生會

如何贈琴日已是絕絃時無復双金報空餘掛劍悲

寶匣從此閑朱絃誰復調祇應隨玉樹同向土中銷

和西川李尚書傷帝令孔雀及薛濤之什

玉兒已逐金環葬翠羽先隨秋草萎唯見芙蓉含曉

露數行紅滴清池

後魏元樹南陽王

之子南奔到建業數年後

北歸愛姬朱玉兒脫金指環為贈樹至魏却以

指環寄玉兒

訓李相善歸鄉國自鞏縣夜泛洛水見寄

鞏樹烟月上清光含碧流且無三已色猶泛五湖舟

鵬息風還起鳳歸林正秋雖攀小仙桂此地不淹留

和李相公平泉潭上喜見初月

家山見初月林壑悄無塵幽境此何夕清光如為人
潭空破鏡□風動翠娥頻會向瑣窓望追思伊洛濱

和李相公初歸平泉過龍門南嶺遙望山

居即事

暫別明庭去初隨優詔還曾為鵬鳥賦喜過鑿龍山
新墅烟火起野程泉石間巖廊人望在只得片時閑

和李公以平泉新墅獲方外之名因為詩

以報洛中士君子兼見寄之什

業繼常平後家依崑閬間恩華辭北第蕭洒愛東山
滿室圖書在入門松菊閑華天雖暫息一舉出人寰

訓柳柳州家鷄之贈

日日臨池弄小雛還思寫論付官奴柳家新樣元和
脚且畫薑牙劍手徒

荅前篇

小兒弄筆不能嗔沈壁書窓且當勤聞彼夢熊猶未
兆女中誰是衛夫人

答後篇

昔日慵工記姓名遠勞辛苦寫西京
近來漸有臨池興為報元常欲抗行

再授連州至衡陽酬柳柳州贈別

去國十年同赴召渡湘千里又分歧
重臨事異黃丞相三黜名慚柳士師
歸日併隨回雁盡愁腸正遇斷猿時
挂江東過連山下相望長吟有所思

重別

二十年来萬事同今朝岐路忽西東
皇恩若許歸田

去歲晚當為隣舍翁

三贈

信書誠自誤經事漸知非今日臨湘別何年休汝歸

題淳于髡墓

生為齊贅壻死作楚先賢應以客鄉塋故臨官道邊
寓言本多興放意能合摧我有一石酒置君墳樹前

懷妓四首

玉釵重合兩無緣魚在深潭雀在天
得意紫鸞休舞鏡能言青鳥罷銜
菱金盆已覆難收水玉軫長拖拋不

續絃若向縻蕪山下過，遙將紅淚洒窮泉。
鸞飛遠樹栖何處，鳳得新巢已去心紅壁尚留香。漠
漠碧雲初斷信，沉沉情知點污投。泥玉猶自經營買，
笑金從此山頭似人石。丈夫形狀淚痕深，
因舊曾行處遍尋看。雖似生離死一般，買笑樹邊花已
老。画眉窓下月猶殘，雲藏巫峽音容斷。路隔星橋過
往難，莫怪詩成無淚滴。盡傾東海也須乾。
三山不見海沉沉，豈有仙蹤更可尋。青鳥去時雲路
斷，姮娥歸處月宮深。紗窓遙想春相憶，書幌誰憐夜

獨吟料得夜來天上鏡，只應偏照兩人心。

登清暉樓送前四句為江州

潯陽江色潮添滿，彭蠡秋聲雁送來。南望廬山千萬
仞，共誇新出棟樑材。

省試風光草際浮

熙熙春景霽，草綠春光麗。的歷亂相鮮，歲華互虧蔽。
乍疑芊綿裏，稍動丰茸際。影碎翻宗蘭，浮香轉叢蕙。
含烟絢碧絲，帶露如珠綴。幸因採掇日，况此臨芳歲。
赴和州於武昌縣舟遇毛仙翁十八兄因

成一絕

武昌山下蜀江東重向仙舟見葛洪又得**紫**前親禮

拜大羅天訣玉函封

劉夢得外集卷第七

劉賓客外集卷第八

律詩

王封部寄毗陵楊給事三首

揮毫起制來東省躡足修名謁外臺好看橐韃莫惆
悵出文入武是全才

曾主魚書輕刺史今朝自請左魚來青雲直上無多
地却要斜飛取勢回
東城南陌昔同遊坐上無人第二流屈指如今已零
落且須歡喜作鄰州

巫山神女廟

山一本作峯

巫山十二鬱蒼蒼
片石亭亭號女郎
曉霧乍開疑卷幔
山花欲謝似殘粧
星河好夜聞清佩
雲雨歸時帶異香
何事神仙九天上
人間來就楚襄王

柳絮全下

飄颻南陌起東隣
漠漠濛濛好度春
花巷暖隨輕舞蝶
玉樓晴拂艷粧人
縈迴謝女題詩筆
點綴陶公漉酒巾
何處好風徧似雪
隋河隄上古江津

陪崔大尚書及諸閣老宴杏園

更將何面上春臺
百事無成老又催
唯有落花無俗態

態不嫌憔悴

滿頭來

曾劉

大絃嘈噴小絃清
噴雪含風意思生
一聽曾劉彈薄媚
人生不合出京城

發蘓州後登武邱寺望梅樓

獨宿望梅樓
夜深瓊木冷
僧房已閉戶
山月方出嶺

碧池涵劍彩
寶剝搖星影
却憶郡齋中
虛眠此時景

別蘇州二首

三載為吳郡臨期祖帳開雖非謝樂黠且為一裴回
流水閭門外秋風吹柳條從來送客處今日自堯銷

松江送處州奚使君

吳越古今路滄波朝夕流從來別離地能使管絃愁
江草帶烟暮海雲含雨秋知君五陵客不樂石門遊

題報恩寺

雲外支硎寺名聲敵虎丘石文留馬跡峯勢聳牛頭
泉眼潛通海松門預帶秋遲回好風景王謝昔曾遊

罷郡姑蘇北歸渡楊子津

幾歲悲南國今朝賦北征歸心渡江勇病體得秋輕
海澗石門小城高粉堞明金山舊遊寺過岸聽鐘聲
館娃宮在舊郡西南硯石山上前瞰姑蘇
臺傍有采香徑梁天監中置佛寺曰靈岳
即故宮也信為絕境因賦二章

宮館貯嬌娃當時意太誇艷傾吳國盡笑入楚王家
月殿移柵壁天花代舜華唯餘采香徑一帶入山斜
姑蘇臺

故國荒臺在前臨震澤波綺羅隨世盡麋鹿古時多

築用金鉞力推囚石鼠窠昔年雕輦路唯有采樵歌

贈同年陳長史員外石

明州長史外臺即憶昔同年翰墨場一自分襟多歲
月相逢滿眼是淒涼推賢有愧韓安國論舊唯存盛
孝章所嘆謬遊東閣下看君無計出恓惶

寄湖州韓中丞

老即日日憂蒼髮遠守年年歎白蘋終日相思不相
見長頭相見是何人

有感

死且不自覺其餘安可論昨宵鳳池客今日雀羅門

騎吏塵未息銘旌風已翻平生紅粉愛惟解哭黃昏

揚柳枝

揚子江頭烟景迷隋家宮樹拂金堤
羨我猶是當時

色半蘸波中水鳥棲

海陽十咏

元次山始作海陽湖後之人或立亭榭率無

指名及余而大倫每疏鑿構置必揣稱以標

之人咸曰有旨異日遷官裴侍御為十咏以

示余頗明麗而不虛美因拈拾裴詩所未道
者從而和之

一云余為吏隱亭述言海陽之所從來詳矣異日下與此同

吏隱亭

結構得奇勢朱門交碧潯外來始一望寫盡平生心
日軒漾波影月砌鏤松陰幾度欲歸去回眸情更深
迥破林烟出俯窺石潭空波搖杏梁日松韻碧窻風
隔水生別島帶橋如斷虹九疑南面事盡入寸眸中

一本玄覽在雲英下

玄覽亭

瀟灑青林際
黃緣碧潭隈
淙流冒石下
輕波逐砌回
香風逼人度
幽花覆水開
故令無四壁
晴夜月光來

雲英潭

芳帷覆雲屏
石奩開碧鏡
支流日飛洒
深處身疑瑩
潛去不見迹
清音常滿聽
有時病朝醒
來此心神醒

裴溪

時御史已過新恩

楚客憶關中
疏溪想汾水
紫紵非一曲
意態如千里
到影羅文動
微波笑顏起
君今賜環歸
何人承玉趾

飛練瀑

晶晶擲巖端潔光如可把瓊枝曲不折雪片晴猶下
石堅激清響葉動承餘洒前時明月中見是銀河馮

蒙池

滌滄幽壁下深淨如無力風起不成文月來同一色
地靈草木瘦人遠烟霞逼往往疑列仙園碁在巖側

琴絲瀑

飛流透嵌隙噴洒如絲琴含暈迎初旭翻光破夕曛
餘波遠石去碎響隔溪聞却望瓊沙際逶迤見脈分

雙溪

流水遶雙島碧溪相並深浮花擁曲處遠影落中心
閑鷺久獨立曝龜驚復沉蘋風有時起滿谷簫韶音

月窟

濺濺激幽石注入團圓處有如常滿盃承彼清夜露
巖曲月斜照林寒春晚煦遊人不敢觸恐有蛟龍護

送周魯儒赴舉詩 并引

晝居外次晨門曰有九疑生持一刺來謁立
西階以須生危冠方袂淺拱舒拜且前致辭
稱贊其文頗涉獵前言居五六日復裹來益

引古事以相劇切與之言能言其得姓因家之所自暨縣道鄉亭之風俗望山名水之繫狀羅含所未記朱贛之未條咸得之於生由是始列於賓籍臨觴而司斟觀博而竄言有日矣初邑中人聞有生來而二千石客之駢然來觀遷客裴御史遇生於坐抵掌曰人固有貌類而族殊者周生疑羅玠也衆咸輟然而熟視生疑也愈甚夫形似古所有也優孟似赫敖而楚君欲以為相人殊而貌肖猶或

欲用之玠生於衡山而生生於九疑其似誠匹也無乃躡其武昇俊造仕甸服佐君藩為御史乎古之人無避事即有而書之尚實也行李之既則徵夫詩曰

宋日營陽內史孫因家占得九疑村童心便有愛書癖手指今餘把筆痕自握地球辭白屋欲憑鷄卜謁金門若逢廣知問羊酪從此知名在一言

送曹璩歸越中舊隱詩

余為連州諸生以進士書刺者浩不可紀獨

曾生崖然自稱為山夫及與語以徵其實則
曰所嗜者名嘗遠遊以索之抗喉舌眩眩晦
以干東諸侯見之日率莞然曰秀才者天下
是不禮庸何傷今方依名山以揚其聲將掛
憤於南嶽生之言未及休余遽曰在已不在
山若子之言依山而為高是練神叩寂捐日
月而不顧名聞而老至持是為用生聞言愀
然如悔色見於眉睫因留止道士院從余求
書以觀居三時而功倍一歲讀史書自皇帝

至吳魏問班班能言之然而絕口不敢言衡
山知山夫不販而贏也十一月告余歸隱於
會稽且曰知求名之自矣乞詞以發之遂賦
七言詩以鑒其志詩曰
行盡瀟湘萬里餘少逢知己憶吾廬
數間茅屋閒臨水一盞秋燈夜讀書
地遠何當隨計吏策名終自詣
公車剡中若問連州事唯有千山畫不如

尋汪道士不遇

仙子東南秀冷然善馭風笙歌五雲裏
天地一壺中

受錄金華洞焚香玉帝宮我來君閉戶應是向崆峒

八月十五日夜桃源翫月

塵中見月心亦閒况是清秋仙府間
凝光悠悠寒露墜此時云在最高山
碧虛無雲風不起山上長松山下
水羣動翛然一領中天高地平千萬
里少君引我昇玉壇禮空遙請真仙
官雲駢欲下星斗動天樂一殺肌骨
寒金霞昕昕漸東上輪歌影促猶頻
望絕景良時難再并他年此日應惆
悵

林父元和中故取昔事為桃源行後貶官武

陵復為玩月作並題於觀壁爾來暑紀丹

周既牽故此郡仰見文字闕缺伏慮他年

轉將塵沒故鐫在貞石以期不朽太和四

年既謹記

罷和州遊建康令要故事且自始語自意

秋水清無力寒山暮多思官閑不計程徧向上南朝寺

田順即歌

清歌不是世間音玉殿嘗聞稱主心
唯有順即全學得一轂飛出九重深

昔一錄乘米嘉榮

一別嘉榮三十載忽聞舊曲尚依然如今世俗輕前
輩好染髭鬚事少年

自江陵沿流道中國不信難向由陳

三千三百西江水自古如今要路津月夜歌謠有漁
父風天氣色屬商人沙村好處多逢寺山葉紅時覺
勝春行到江南征戰地古來名將盡為神

別夔州官吏

三年楚國巴城守一去揚州揚子津青帳聯延喧驛

步白頭俯偃到江濱巫山暮色常含雨峽水秋來不
恐人唯有九歌詞數首里中留與賽蠻神

夜聞商人船中箏

大編高船一百尺新箏促柱十三絃揚州市裏高人
女來占江西明月天

聞道士彈思歸引

仙公一奏思歸引逐客初聞自泫然莫怪殷勤悲此
曲越箴長苦已三年

喜康將軍見訪

謫居愁寂似幽棲
百艸當門茅舍低
夜月將軍忽相訪
鷓鴣驚起繞籬啼

贈劉景擢第

湘中才子是劉郎
望在長沙住桂陽
昨日洪都新上第
五陵年少讓清光

赴連山途次德宗山陵寄張員外

常時並冕奉天顏
委佩佺簪彩仗間
今日獨來張樂地
萬重雲水望橋山

嘗茶

生拍芳叢鷹背牙
老郎封寄謫仙家
今宵更有湘江月
照出霏霏滿盃花

梁國祠

梁國三郎威德尊
女巫簫鼓走鄉村
萬家長見空山上
兩氣蒼茫生廟門

九日登高

世路山河險
君門烟霧深
年年上高處
未省不傷心

謝柳子厚寄疊石硯

常時同硯席
寄此感離群
清越敲寒玉
參差疊碧雲

烟嵐餘斐疊水墨兩氛氲好與陶貞白松白寫紫文

元日感懷

振蟄春潛至湘南人未歸身加一日長心覺去年非
燎火委虛燼兒童銜彩衣異香無舊職車馬到門稀
謝宣州崔相公賜馬

浮雲金絡膝昨日別朱輪銜草如懷戀嘶風尚意頻
曾將比君子不是換佳人從此西歸路應容躡後塵

南中書來

君書問風俗此地接炎州淫祀多青鬼居人少白頭

旅情偏在在鄉思豈唯秋每羨朝宗水門前盡日流

題招隱寺

隱士遺塵在高僧精舍開地形臨嶺斷江勢觸山迴
楚野花多思向禽散例衰殷勒最高頂閑却望鄉來

思歸寄山中友人

蕭條對秋色相憶在雲泉木落病身死潮平歸思懸
涼鐘山頂寺暝火渡頭船此地非吾土閒留又一年

望洞庭

湖光秋月兩相和潭面無風鏡未磨遙望洞庭山翠

水白雲盤裏一青螺

魚復江中

扁舟盡室貧相逐白髮藏冠鱗更加遠水自澄終日
綠晴林長落過春花客情浩蕩逢鄉語詩意留連重
物華風穡好住貧程去斜日青帘背酒家

歷陽書事七十韻

長慶四年八月余自夔州轉歷陽浮岷山觀
洞庭歷夏口涉潯陽而友人崔敦詩罷丞相
鎮宛陵緘書來抵曰必我覲而之藩木十日

飲不置子故余自池州道宛陵如其素敦詩
出祖于敬亭祠下由姑孰西渡江乃吾園也
至則考圖經參見事為之詩俟采之夜諷者
一夕為湖地千年列郡名霸王迷路處亞父所封城
漢置東南尉梁分肘膺兵本吳風俗剽蕪楚語音信
沸井今無湧烏江舊有名土臺遊柱史石室隱彭鏗
老君遺楚有臺在烏彭鏗石室在含山縣曹操祠猶在濡湏塢未平海潮
隨月大江水應春生一昨深山裏終朝看火耕奠書
來北闕鷓首下南荆雲雨巫山暗蕙蘭湘水清章華

樹已失鄂諸草來迎廬

嶺香爐

出溢城粉堞明雁飛彭

蠡草鳴噪大雷晴平野分風使恬和趁夜程貴池登

陸峻春穀渡橋鳴駱驛主人問悲歡故舊情幾年方

一面卜晝便三更助善杯盤盛忘機笑語司管清疑

警雀絃巧似嬌鶯熾炭烘導獸華_禍織闌鯨回裾飄

霧雨急節墮瓊英欽黛疑愁色_口鈿耀翠晶容華本

南國粧梳學西京日落方收鼓天寒更炙笙促筵交

履烏痛飲倒簪纓譁浪容優孟嬌憐許智瓊蔽明添

翠帝命燭拄金莖坐久羅衣皺盃傾粉面醉興來從

請曲意隨即飛觥令急重湏改歡馮醉盡呈詰朝還

選勝來日又尋盟道別殷勤惜邀筵次第爭唯聞嗟

短景不復有餘醒衆散高朱戶相携話素誠昭言猶

疊疊殘漏自丁丁出祖千夫推行厨五熟烹離亭臨

野水別思入哀箏按境人情洽方冬饌具精中流為

界道隔岸數飛甍沙浦王渾鎮滄洲謝_逸二望夫人

化石夢帝日環營半渡趨津吏綠堤簇_即場黃堆

晚稻籬碧見冬菁里社爭來獻壺漿各自擎鴉夷傾

底烏糗救闕成_口采石風傳拆新林暮擊鉦繭綸牽

撥刺犀焰照澄泓露冕觀原野前驅抗旆旌分庭展
賓主望闕拜恩榮比屋惇婆輩連年水旱并遐思常
後已下令必先庾遠岫低屏列支流曲帶索湖魚香
勝肉官酒重於飴憶惜泉源變斯瀕地軸傾鷄籠為
石顆龜眼入泥坑事繫人風重官從物論輕江春俄
澹蕩樓月幾虧盈柳長千絲宛田塍一線緝遊魚將
婢從野雉見媒驚波淨攢鳧鵲洲香發杜蘅一鐘菰
葑米千里水葵羹受譴時方久分憂政未成比瓊雖
碌碌於鉄尚錚錚早忝曹三署曹聞奏六英無能甘
負弩不慎在騎衡口語成中違毛衣阻上征時聞關
利鈍智亦有靜旨昔媿山東妙今慙海內兄後來登
甲乙早已在蓬瀛心托秦明鏡才非楚白珩齒衰親
藥物宦薄傲公卿捧日皆元老宣風盡大彭好今朝
集使結束赴新正

劉賓客外集卷第九

雜著

一本目作雙排

論西戎表

謝上連州刺史表

含輝洞述

吏隱亭述

傳信方述

彭陽唱和集引

彭陽唱和集後引

吳蜀集引

汝洛集引

子劉子自傳

王公神道碑

劉賓客外集卷第九

雜著

為淮南杜相公論西戎表

臣字應列
在側

臣某言臣一辭闕庭已僅二載官當重任身受重恩
既懷子牟戀闕之心又負臧文竊位之責思所以歌
頌聖德裨補歲規塵露至微不任懇迫臣遠祖詩顯
名漢代出牧南陽謹言善策隨事獻納忠醇之至聞
于中外遺風可襲有激愚衷臣是以輒竭聞見粗陳
梗槩雖不盡陛下聖明萬分之一然臣子之心有直

必獻伏唯皇帝陛下德合天地道濟文武弛張普博
事法陰陽氣均生成人需亭育凡是氛沴覆以春和
銷除容納皆如聖意寬宥肆赦實賴皇明河中誅鋤
不勞兵革淮右底定不戮一人慶決萬邦事出千古
近又西戎背約寇犯王師陛下弘貸豺狼矜其兇悍
布以恩澤果此知慙功因德成不以兵制故詩云獫
狁孔熾書稱蠻夷猾夏臣觀自古帝王不忍小忿貽
大患故竭耗中國盡力邊陲至如滅昆明之城平大
宛之種豈是發輝皇猷增榮簡冊故聖哲之論薄衛

霍之功陛下鏡歷代無益之端修大君文德之教遂
得北狄深藏五城晏閑百蠻嚮化四海無虞惟此小
蕃尚迷教教陛下示之大信弘以舊恩雖閑防暨驚
而烽燧旋罷臣負恩方鎮初惧寇戎正于憂迫之時
果聞仁聖之諭攘却兇孽不勞干戈臣靜思遠圖久
計莫若存信施惠以愧其心歲通玉帛待以客禮昭
宣聖德擇奉誼之臣恢拓皇威選謹邊之將積粟塞
下坐甲關中以逸待勞以高御下重其金玉之贈結
以^易錫之歡小來則慰安大至則嚴備明其斥候不

挽不侵則戎狄為可封之人沙場無戰死之骨若天
下無事人安歲稔然後訓兵命將破虜摧衝原州營
田靈武盡復舊地通使安西國家長筭悉在于此計
熟事定舉必有功苟未可圖豈宜容易此皆陛下朝
夕倦談之事前後立驗之謀臣質性頑疎籌畫庸近
受恩非據敢忘獻忠犬馬之心實所罄盡謹遣某官
某奉表

謝上連州刺史表

臣某言伏奉去三月七日制授臣使持節連州刺史
恭承睿旨跪奉詔書皇恩重于邱山聖澤深于雨露
抃舞失次神兔再揚臣其中謝臣性愚拙謬學文詞
幸遇休明累登科第出身入仕並不因人德宗臨御
之時臣忝御史陛下龍飛之日臣忝即官恭守章程
勤修職業推臣奏用蓋聞虛名實非曲求可以覆視
跡卑易枉無路自明亦緣臣有微才所以嫉臣者衆
競生口語廣肆加誣伏賴陛下至仁時從寬典舉以
緣坐貶佐遐藩屢變星霜頻經恩赦犬馬懷戀寢興
匪寧唯讀佛經願延聖壽昨蒙詔命追赴上都隨例

授官俾居遠郡在臣之分榮幸已多伏荷陛下孝理
弘深皇明炤燭哀臣老母羸疾憫臣一身零丁特降
所恩得移善部光荣廣被母子再生凡在人臣皆感
聖德凡為人子皆荷聖慈豈唯賤臣獨受恩造不覺
喜極至于涕零昔殷王俯念于前禽且聞解網漢帝
有感于少女爰命罷刑方之聖朝不足多尚感名和
氣慰安群生非臣隕越所能上報伏以南方厲疾多
在夏中臣自發柳州便染瘴癘扶策在道不敢停留
即以今月十一日到州上訖謹宣聖旨以示遠人恭

述詔條所期富庶無任云

述詔條所期富庶無任云

述詔條所期富庶無任云

河東薛公景晦以文無害為尚書刑部郎中以訕為
道州刺史居郡大理至于無事清機羨溢畫付山水
一旦以書來誇曰吾得異境于近郊自城西門並南
山俯江水有石竅然如夏屋其左右前後又如回廊
曲房藻繡彫彤之象雲生日入恠狀迭發水石卉木
香非人象意其當為食霞御氣者之所遊息委蛻而
去不知其幾千百年逮今得諸黃冠野夫及請而往

因名其地曰含輝洞蓋詩家流所謂山水含清輝者是已吾子常以詞雄于世蓋為我誌焉愚得書退而深惟若薛公者少居江湖間遊名山東探禹穴止四明句曲金華陽羨南過九江薄匡廬以涉鼓蠡天下山水之籍存乎胸中茅其高下銖兩不失及是而口舌不能名頽謂竒信矣若江華者九疑三湘之佳麗地也前此二千石御史中執法河南元次山諫大夫北平陽亢宗司刑大夫東平呂和琳皆頽人也考盤招隱之致怕汲汲然卒使茲境貴于異日豈地愛其

寶有時而發耶頽謂異信矣夫物之有作俟言而遠故述焉以書于洞陰曰
營陽鬱鬱山水第一洞有含輝遊人忘歸曰孔樂請言其略先是斯境翳于榛薄天姿孤絕凡目所忽閱其清光有待而發公之來思探異翫竒羨野憇林而民悅之既悅其至益知其所嗜捫陁歷峴來造公志偶得奇絕聿來告公駕言從之谷岸溟濛有石如門又如垣墉摶蔓交木似綸似組乃莛乃治乃可布武伸脰掉臂空洞無阻左右回環儼若廊廡飛泉出竇練

緇花吐觸石吹沙珮搖絃撫側迳魚緣豁然見天有
石如堂度之五筵東西二門與日明昏奧者如室宣
者如軒因其高下爰構亭榭匠生于心隨指如化開
山剪木後以私屬結構暨茨子來嬉嬉無事而就邦
人不知淋漓之衣休澣之時雅步幅巾琴壺以隨前
無俗人與白雲期年日盡造形神不羈元氣顯然觀
吾朶願遵渚之鴻有時而飛石門之下可以棲遲此
谷而盈彼邱而夷維公之——跡永在斯

吏隱亭述

元和十五年再牧于連州作吏隱亭海陽湖壩入自
外間不知歲山歷級東望悅非人寰前有四榭隔水
相鮮凝藹蒼蒼深流布懸架險通蹊有梁如蛻輕涼
徐轉有舟如翰登霞漾月若在天漢視被廣輪千畝
之半翠麗于是與世殊貫激明峭絕藿靡葱蒨炎景
有宜昏旦迭變疑昔神鰲負山而抃摧其別島置此
高岸海陽之名自元先生先生元結有銘其碣元維
假符予維左遷其間相距十五餘年封境服人其猶
比肩天下山水非無美人地偏人遠空樂魚鳥謝公

開山涉月忘還豈曰無娛伊險且艱溪山風物城池
為伍却倚佛寺左聯仙府勢拱臺殿光含廂廡窈如
壺中別見天宇石堅不老水流不腐不知何人為今
為古終堅烏終口流焉終竭不知何時再融再結

傳信方述

余為連州四年江華守河東薛景晦以所著古今集
驗方十通為贈其志在于拯物予故申之以書異日
景晦復寄教相謝且咨所以補前方之闕臣拯道貴
庸庸可以學淺為辭遂于篋中得已試者五十餘方

用塞長者之問皆有所自故以傳信為目云元和十
三年六月八日中山劉禹錫述

彭陽唱和集引

丞相彭陽公始由貢士以文章為羽翼怒飛于冥冥
及貴為元老以篇詠佐琴壺取適乎閒讌鏘然如朱
絃玉磬故名聞于世間鄙人少時亦嘗以詞藝掇而
航之中途見險流落不試而胸中之氣伊鬱蜿蜒泄
為章句以遣愁沮悽然如雉桐孤竹亦名聞于世間
雖窮達異趣而音莫同域故相遇甚歡其會面必抒

懷其離居必寄興重酬累贈體備今古好事者多傳
布之今年公在并州余守吳門相去迴遠而音徽如
近且有書來抵曰三川守白君編錄與吾子贈荅緘
縹囊以遺余白君為詞以冠其前號曰劉白集悠悠
思與所賦亦盈于巾箱盍次第之以塞三川之請于
是緝綴凡百有餘篇以彭陽唱和集為目勒成兩軸
尔後繼賦附于左方大和七年二月五日中山劉禹
錫述

彭陽唱和集後引

貞元中余為御史彭陽公從事于太原以文章相往
來有日矣無何余受譴南遷十餘年間公登用至宰
相出為衡州方獲會面輸寫蘊積相視泫然尔後或
雜賦詩贈荅編成兩軸太和五年余領吳郡公鎮太
原常發函寓書必有章句絡繹于數千里內無曠旬
時八年公為吏部尚書予牧臨汝有詩歎七年之別
署其後云集卷自此為第三末幾余轉左馮公登左
揆每恨近而不見形于詠言開成元年公鎮南梁余
以太子賓客分司東都新韻繼至率云三軸成矣二

年冬忽寄一章詞調悽切似有永訣之旨伸紙悽嘆
居數日果承訃書嗚呼聆風相悅者四十年會面交
歡者十九年以詩見投凡七十九首勒成三卷以副
平生之言
吳蜀集引章曰
長慶四年余為歷陽守今丞相趙郡李公時鎮南徐
州每賦詩飛函相示且命同作爾後出處乘遠亦如
隣封凡酬唱始于江南而終于劍外故以吳蜀為目

云云

汝洛集引

大和八年予自姑蘇轉臨汝樂天罷三川守復以賓
客分司東都未幾有詔領馮翊辭不拜職受太子少
傅分務以遂其高時予代居左馮明年予罷郡以賓
客入洛日以章句交惟因而編之命為汝洛集

子劉子自傳

子劉子名禹錫字夢得其先漢景帝賈夫人子勝封
中山王謚曰靖子孫因封為中山人也七代祖亮事
北朝為冀州刺史散騎常侍遇遷都洛陽為北部都

昌里人世為儒而仕墳墓在洛陽北山其後也隱不
可依乃塋滎陽之檀山原田大五父已還一昭一穆
如平生曾祖凱官至博州刺史祖鏗由洛陽主簿察
視行馬外事歲滿轉殿中丞侍御史贈尚書祠部郎
中父諱緒亦以儒學天寶末應進士遂及大亂舉族
東遷以違患難因為東諸侯所用後為浙西從事本
府就加鹽鉄副使遂轉殿中主務于埤橋其後罷歸
浙右至揚州遇疾不諱小子承夙訓稟遺教眇然一
身奉尊夫人不敢殞滅後忝登朝或領郡蒙恩澤先

府君累贈至吏部尚書先太君盧氏由彭城縣太君
贈至范陽郡太夫人初禹錫既冠舉進士一幸而中
試間歲又以文登吏部取士科授太子校書官司閤門
曠得以請告奉溫清是時年少名浮于實士林榮之
及丁先尚書憂迫禮不死因成痼疾既免喪相國揚
州節度使杜公領徐泗素相知遂請為掌書記捧檄
入告太夫人曰吾不樂江淮間汝宜謀之于始因白
丞相以請曰諾居數月而罷徐泗而河路猶艱難遂
改為揚州掌書記涉二年而道無虞前約乃行調補

京兆渭南主簿明年冬擢為監察御史貞元二十一年春德宗新棄天下東宮即位時有寒雋王琳文以善奕慕得通籍博望因間隙得言及時事上大奇之如是者積久衆未知之至是起蘄州掾超拜起居舍人充翰林學士遂陰薦丞相杜公為度支鹽鉄等使翊日琳文以本官及內職兼充副使未幾特遷戶部侍郎賜紫貴振一時愚前已為杜丞相奏署宗陵使判官居月餘日至是改屯田員外郎判度支鹽鉄等按初琳文北海人自言猛之後有遠祖風唯東平呂

温隴西李景儉河東柳宗元以為言然三子者皆與余厚善日夕過言其能琳文實工言治道能以口辨移人既得用自春至秋其所施為人以為當非時上素被疾至自尤劇詔下內禪自為太上皇後謚曰順宗東宮即皇帝位是時太上久寢疾宰臣及用事者都不得召對宮掖事祕而建桓立順功歸貴臣于是琳文首貶渝州後命終死宰相貶崖州余出為連州途至荆南又貶明州司馬居九年詔徵復授連州自連歷夔和二郡又除主客郎中分司東都明年追

入充集賢殿學士轉蘓州刺史賜金紫移汝州兼御史丞又遷同州充本州防禦長春官使後被足疾改太子賓客分司東都又改秘書監分司一年加檢校禮部尚書兼太子賓客行年七十有一身病之日自為銘曰不夭不賤天之棋兮重屯累厄數之奇兮天與所長不使施于人或加訕心無疵兮寢于北牖盡所期兮葬近大墓如生時兮魂無不之庸詎知兮

唐故監察御史贈尚書右僕射王公神道
碑

公諱凌字真長其先葉黃帝夫聖人之後與庶姓不同如河出崑崙潛于厚地歟烏振起奮為

自天非衆川也故自黃帝八代而生舜武王克殷求有媯之胤滿封于陳是為胡公十三葉生完自以公子國難不得立乃挹樂器奔齊桓公以卿禮接之下又十一葉和以久為政陰決于人遂有齊國三代稱主至建為秦所滅項羽入秦封建孫安為濟北王漢興失國齊人謂之王家因以為氏安子消仕漢為鎮東將軍青州牧封劇縣伯自消至彤凡一十九代兩

漢公卿牧守如家謀然十代祖猛字景略符秦尚書
令佐秦成霸業與孔明佐蜀同功故時人謂之王葛
史云北海劇人遂著為族望九代祖休儀曾尚書八
代祖鎮惡佐命宋長安擒姚弘至北齊五代祖斲七
兵尚書兄弟九人時號王氏九龍于齊史有傳高祖
顛字君粹北齊著作即燕郡太守曾祖敬忠成州刺
史大父上客高宗封嶽進士及第歷侍御史靈州都
督朔方道總管見職官儀及衣闕烈考瞰宣州宣城
縣令贈工部郎中娶河東裴氏乃生僕射季睦餘力

兵部金吾衛將軍冀州刺史

宋密兵部員外郎累遷

工為文始以崇文生應深謀祕策考入上第拜監察
御史天之賦子莫能兩大既敷令名而不以景福享
齡五十五葬于河南府偃師縣亳邑鄉後以子貴累
贈禮部尚書至右僕射夫人江夏李氏祔焉李門多
奇才父暄起居舍人暄子鄘門下侍郎平章事高琳
祖善蘭臺郎崇文館學士注文選行於時善子邕北
海郡太守有重名四方之士求為碑誌者傾天下故
夫人于盛宗禮範可法累贈至江夏郡夫人僕射有
三子長子早終次子處玄少嬰沉恙慕道士養生之

術高尚其趣強仕而歿積善不試後來果大焉季子
考威字子美始以五經登甲科歷太常博士祠部員
外郎遷屯田郎中轉戶部司封並充禮儀使判官弘
文館學士京兆尹少諫議大夫史館修撰以直諫出
為河南少尹入為少府監司農卿改淄青節度使徵
拜戶部侍郎判度支勢逼生患出為衛尉卿分司東
都尋起為陳許節度使檢校禮部尚書充汴宋亳等
州節度觀察處置等使北海縣開國子食邑五百戶
娶潁川韓氏主客員外郎衢之女國子祭酒揚頊之

外孫夫人有三弟皆材無子早謝已如禮祔塋于亳
邑原僕射厚德覆露之尚書丕承之以蚤孤銳意嚮
學嘗閱詩至蓼莪篇感激流涕故其志如及始泮及
學成立朝為鴻儒入用為能臣叅定儀制財成經費
起書生擁旌節今又領全師鎮上游握神符垂三組
皆嚮時感發之所激也志就而學成名聞而身達欲
報無所外榮中悲人子之孝在乎揚其先德以耀于
遠乃俾古學者書本系所自且銘于龜趺螭首云銘
曰

山積而高澤積而長聖人之後必大而昌由聖與賢
或為霸強建不克嗣濟北疏疆齊人得之其族稱王
佐于符秦北海重光僕射之生負材而起策于萬乘
擢為御史同時條對千目仰視桂林一枝拾芥相似
名動海內夫豈不偉種德而芽廼生令子出入昂貴
理財統師流根之澤密印纍纍峻其追崇幽顯有輝
孝嗣之志歎然弗怡春露秋霜感傷履之時久能慕
祿豐益悲明發不寢寐永懷孝思攄之無窮曷若豐碑
景毫之原佳城在斯乃金石刻揭于道陲松耶柏耶

有洛之湄過者必下來觀信辭

劉賓客外集卷第十

墓誌祭文

故董府君墓誌

絕編生墓表

祭柳員外文

重祭柳員外文

代人祭柳員外文

祭韓吏部文

祭李司空文

代祭李司空文

代祭王相國文

祭桂尚書文

祭揚庶子文

劉賓客外集卷第十

墓誌祭文

故荆南節度推官董府君墓誌

元和七年夏四月某日前荆州部從事董府君以疾
終于故府私第年若干其孤泣書前人之爵里耿光
求我以銘于幽且先志也故重為之董姓出于秦龍
氏至辛有而分在晉為良史在趙佐簡子為能臣項
羽主盟為翟王高皇帝舉兵漢中劫其兵眾不克其
土後裔遂為隴西人凡稱事不稱名不待事而彰也

始予謫于武陵人多中之賢有董生為守令客既而
以士相見之禮成與之言能言墳典數旁摺百氏之
學弱年嗜屬詩工奕棋用是索合于貴游多所慰
中年奉浮圖說三乘用是貢誠于清賢多被辟書脫
巾為弘文館校書郎再選至大理評事咸視真秩而
不累其章職繫于外故也晚節尚道故投効于幕府
治扁舟浮江泛洞庭登熊耳訪浮邱以探異賦狂
渚以寄傲居數歲投老于南荆迷邦繼性委和從化
逮夫寢巨室也自舍襪至于卜窆皆仁人之賻焉是

歲五月十二日卜塋于龍山之某岡外姻至矣君名
佖字庶中大父曰思簡位至汝南太守父承祖歿于
試守太子舍人始為君求婦于鄭之里生嗣子夏卿
既立而天今未之從其後又娶于閩氏生二子曰周
卿雲卿嬖也總裳髻首有正家之道嗚呼道愈富而
家愈貧志甚修而知甚寡士以隴西為貴將在令名
歟銘曰

學待問而文藻身藝不試兮名孰聞大道甚夷兮此
我辰何生不茂兮非我春修門之達兮連岡撫撫莫

卓如 予新墳若芥于嗟董生予於烏終古

絕編生墓表

頌豕吳郡人食力于武陵沅水上以讀易聞病且死
飭其子曰吾年十有五而授易于師積六十三年于
茲未嘗一日不吟乎繫象里中兒從吾讀其文多矣
死則必葬我于黨庠之側尚其有知且聞吾書君子
曰若豕者可謂志篤于學矣因以絕編生謚之且表
其墓後之讀功令者或采焉予既謫居是邦始至之
日問能道古語可與言者邑子以生為對既而執贄

請見之生危冠大袂闊視雅拜及門知讓候肅而后
入又肅而濟階心存聖言潤徹眉睫有野態而無苟
容問其所執曰幼學易老而尤嗜問安學曰始聞于
師晚熟于心自尼父兼三才絀八索繫辭焉以通微
言與伏羲文王並行猶天三辰同麗太極秦晚大患
完文顯行漢之田丁京劉而東京有馬鄭魏之何荀
兩王而吳有常陸前者導源後者洒之渾融混合百
派犇湊唐興沙門一行方洩天幾以探古人神效造
物智斟人事制動也有托變道也無方嚮之支流委

輸于我其他紬繹祖述三十有餘家朱藍之撲劉之
為羽翼為鼓吹疇咨天人之際旁魄上下驚精于攝
揅賈巧于穿鑿猶制氏之於樂鏗鏘而已徐氏之于
礼善容而已然而前修之盡心也得以味腴拳芳焉
手抵于運管目聵于臨燭而氣耗于咏呻家居無嘗
不能與計偕地偏且遠無有能晤語者心愈苦而跡
愈寒平膚噉腹以至于羸若微夫子之問持是安施乎
他日子造其室廬瓢箪在左汙尊在右有龜枵然有
莫甚澤余撒耆指骨而訊之曰是疊疊者曾不余欺

乎生攸爾而對云古先聖人知道之妙不可搏而得
也故設象以致意梯有以取無取當其粗用當其精
夫推衡所以揣輕重不為揣鈞者設也尋尺所以商
遠邇不為運斤者設也龜策所以決群疑不為知幾
者設也幾存乎人是則以天時為卦體以地理為爻
位外附人事以象為內取諸身以象為得樞于囊中
迎教于象外自然之理不知其然雖欲強名措說無
地彼枯莖朽殼安能與于此乎今夫探之以至利灼
之以殆盡徒與夫蚩蚩者問歟穰占熊虺起訟需食

上羊喪牛之間耳資其握粟以餬于口烏足為夫子
道哉余以斯言邃于易故書之噫國有大學學有館
以延**學**門若生者苦形後志如其**學**也茹經于腹
湮滅糞壤壁水湯湯不聞其聲推藏**襟**邀與山水同
朽豈地遠然耶彼文甲絳毛剝筋壽草嶺嶠之華實
矣溟之蜃蠃飛芑駢籬所至而貴夫豈貴通也哉悅
者衆故也生之死在元和七年秋七月由死之日推
而上求直治生之辰得四百有七十甲子壑在征渚
西**石**磯上其墳可隱東望里塾尚行其志云

祭柳員外文

維元和十五年歲次庚子正月戊戌朔日孤子劉禹
錫銜哀扶力謹遣所使黃孟萇具清酌庶羞之奠敬
祭于上友柳君之靈嗚呼子厚我有一言君其聞否
惟君平昔聰明絕人今雖化去夫豈無物意君所死
乃形質耳魂氣何托聽余哀詞嗚呼痛哉嗟余不天
甫遭閔凶未離所部三使來乎憂我衰病諭以苦言
情深禮至款密重複期以中路更申願言途次衡陽
云有柳使謂復前約忽承訃書驚號大叫如得狂病

良久問故百哀攻中滄淺逆落魂魄震越伸紙窮竟
得君遺書絕絃之音悽愴徹骨初託遺嗣知其不孤
末言歸輅從祔先域凡此數事職在吾徒永言素交
索居多遠鄂渚差近表臣分深想其聞訃必勇于義
已命所使持書徑行友道尚終當必加厚退之承命
改牧宜陽亦馳一函候于便道勒石垂後屬于伊人
安平宣英會有還使悉已如礼形于其書嗚呼子厚
此是何事朋友凋落從古所悲不圖此言乃為君發
自君失意沉伏遠郡近遇國士方伸眉頭亦見遺草

恭辭舊府志氣相感必踰常倫顧余負釁營奉萬
猶冀前路望君銘旌古之達人朋友製服今有所厭
其礼莫申朝脯臨後出就別次南望桂水哭我故人
孰云宿草此慟何極嗚呼子厚卿真死矣終我此生
無相見矣何人不達使君終否何人不老使君天死
皇天后土胡寧忍此知悲無益奈恨無已舒之不聞
余心不理含酸執筆輒復中止誓使周六同于已子
魂兮來思知我深旨嗚呼哀哉尚饗

嗚呼自君之沒行已八月每一念至忽忽猶疑今以
喪來使我臨哭安知世上真有此事既不可贖翻哀
獨生嗚呼出人之才竟無施為炯炯之氣戢于一本
形與人等今既如斯識與人殊今復何託生有高名
沒為衆悲異服同志異音同歡唯我之哭非吊非傷
來與君言不成言哭千哀萬恨寄以一椀唯識真者
乃相知耳庶幾儻聞君儻聞乎嗚呼痛哉君有遺美
其事多梗桂林舊府感激生持俾君內弟得以義勝
平昔所念今則無違旅魂克歸崔生實主幼穉角上

故人撫之敷詩退之各展其分安平來疇禮成而歸
其他赴告咸復于素一以誠告君儻聞乎嗚呼痛哉
君為已矣余為苟生何以言別長號數聲異乎異日
展我哀誠嗚呼痛哉

為鄂州李大府祭柳員外文

嗚呼至人以在生為傳舍以軒冕為儻來達于理者
未嘗惑此昔余與君論之詳熟孔氏四科罕能相備
惟公特立秀出幾于全器才之何豐運之何否大川
未濟乃失巨艦長途始半而喪良驥播紳之倫孰不

墮淚昔者與君交臂相傳得一言一笑未始有極馳教
日下驚名天衢射策差池高科齋驅携手書殿分曹
藍曲心志諧同追歡相續或秋月銜觴或春日馳轂
旬服載暮同升憲府察視之列斯烏接武君遷外郎
予侍內闈出處雖間音塵不虧勢變時移遭罹多故
中復賜環上京良遇曾不踰月君又卽路遠持卽符
柳江之壖居陋行道疲人歌烏予來夏口忽復三年
離索則久音既屢傳篋盈草隸架滿文篇鍾索繼美
班揚差肩賈誼賦鵬屈原問天自古有死奚論後先

痛君未老美志莫宣遭回世路奄忽下泉嗚呼哀哉
令妻早謝稚子四歲天喪斯文而君永逝翩翩丹旌
來自遼裔聞君旅櫬既及岳陽寢門一慟貫裂衷腸
執紼禮乖出疆路阻故人莫觴莫克親舉馳神假夢
冀獲寤語平生密懷願君遣吐遺孤之才與不才敢
回已子之相許嗚呼哀哉尚饗

蘇轍祭韓吏部文

高山無窮太華削成人文無窮夫子挺生典訓為徒
百家抗行當特勅者皆出其下古人中求為敵蓋寡

貞元之中帝鼓薰琴奕奕金馬文章如林君自幽谷
升于高岑鸞鳳一鳴蝸蟾草音手持文柄高視衆海
摧衡低昂瞻我所三十餘年教名塞天公鼎侯碑
志隧表阡一字之價輦金如山推豪來侮人虎我鼠
然諾洞開人金我灰親親尚舊丹其壽考天人之學
可與論道二者不至至者其誰豈天與人好惡背馳
昔遇夫子聰明勇奮常操利刃開我混沌子長在筆
余長在論持矛舉楯卒不能困時惟子厚竄言其間
贊詞愉愉 顏顏磅礴上下義農以還會于有極

服之言 逸數字

岐

應勇行

山威鳳不復鳴華亭別雀中夜驚畏簡書兮拘印綬
思臨慟兮志莫就生芻一束酒一盃故人故人歆此
來

祭興元李司空文

維太和四年月日禮部郎中集賢殿直學士劉禹錫
謹以清酌之奠敬祭于故相國山南西道節度使贈
司空李公之靈嗚呼龜靈而剗龍知而屠古今同之
天不可呼公之挺生德與位并如瞻日月豈贊其明

何以致之姑話平生追懷周旋弥四十年射策校文
接武聯翩旬服同邑明庭比肩公乘迅颯凌厲非烟
愚觸駭機逆落深泉一持化推一謫海壖本同末異
如矢別絃雲龍井蛙勢不相見二紀迴泊一朝會面
公為故相愚似悲翁契闊相遇淒涼萬重復以即吏
交歡上公披襟道舊劇談小酒清洛泛舟鑿龍携手
公入西閔愚亦徵還削去苛礼招邀清閑廣陌聯鑣
高臺看山尋春造野醉舞花間忽復登壇搃戎于外
子午危棧巴梁古岸夷風儻儻猿俗懼害陰謀密備

光黨千輩如族群犬以逼駟虞如緦炎火以焚瑾瑜
時即命耶不慮不圖物理神道安知有無嗚呼痛哉
玄天甚高上訴何時長夜無曉斯烏永歸風淒日昏
鼓咽簫悲沉埋玉樹誰不沾衣平生故人零落已稀
委花而盡然猶怨咨如何國損有此遭罹挺災賦命
孰主張之有看有在筵有酒盈卮神其來歆已矣長辭
尚饗

代裴相祭李司空文

四年日月特進守司空兼門下侍郎平章事裴度謹

以清酌少牢之奠敬祭故相國魏郡公之靈曰嗚呼
玉貞而折不能瓦合鸞鑿而萎不同鷄群生兮若浮
守道不屈惟公之生福自維萬金石高韻珪璋德容
元和之初左右憲宗以才視草以望登庸振起直聲
激揚清風實有正氣號為名公名成身退猶係人望
入為羽儀出領藩方既師百辟又副丞相道冠搢紳
事叅翼亮某與公遊四十餘年風期合契祿位相充
某忝司言公持化推應同宮徵馥若蘭荃猥以姓名
稱于上前發迹從微芳 獲宣某為免相待罪梁山

公拜右揆來從東川極其歡娛著在詩篇某忝三入
公東亦還里門相適賓閣常閑退朝休澣道舊開顏
嗟乎山川間之忽在旦夕豈意倉卒遂成今昔衣冠
喪氣風物含戚強魂訴天冤血成碧嗚呼哀哉某在
病中訃書始至無力以哭不言垂淚今聞襚輜首路
而歸隱几臨風其心孔悲嘉肴百籩旨酒一庖寄此
情素神其來思嗚呼哀哉

代諸郎中祭王相國文

維太和四年月日某官等敬祭于故相國贈太尉太

國
原王公之靈嗚呼天以和氣鍾於貴人含光不曜煦物如春
發自貢士驟為庭臣鴻雁聯行其凌青雲

公拜右揆來從東川極其歡娛著在詩篇某忝三入
公亦東還里門相邇賓閣常閑退朝休澣道舊開顏
嗟乎山川間之忽在旦夕豈意倉卒遂成今昔衣冠
喪氣風物含戚強魂訴天冤血成碧嗚呼哀哉某在
病中訃書始至無力以哭不言垂淚今聞袞輅首路
而歸隱凡臨風其心孔悲嘉肴百籩旨酒一卮寄此
情素神其來思嗚呼哀哉

代諸郎中祭王相國文

維太和四年月日某官等敬祭於故相國贈太尉太

原王公之靈嗚呼天以和氣鍾於貴人含光不曜煦
物如春發自貢士驟為庭臣鴻雁聯行其凌青雲既
操利摧兼秉國鈞食祿甚厚奉身如貧井絡之隅益
部為大斗牛之下揚州繫會受社臨戎油幢曲蓋印
綬重疊恩華滂霈簿領如山處之若閑推覺之權往
而復還炎焯焯出入二紀未曾傷物屢有薦士急難
友弟謹厚訓子顏間熙熙不形愠喜處已無咎得君
如此若木方高商飆欵起三台之氣變現在時五福
之來盛哀有期曉下黃閣車騎威遲夕歸華堂言笑
嘻怡詰朝愀然有志求醫未撤琴瑟俄懸素旂宸衷
震悼朝右悽悲詔下褒崇恩殊等夷靈輜既駕真宅
將歸笳蕭咽而復揚風日慘而無輝玄亮等或早挹
清塵或晚承汎愛惜昔修禮於門閭今纏悲於祖載
幽顯雖異音徽未昧神之格思歆此誠酌尚饗

祭福建桂尚書文

維太和六年月日蘇州刺史劉禹錫謹以清酌之奠
敬祭於故福建團練使桂公之靈鷗化鵬征擘波冲
天士逢其時捨笈乘軒始識尚書貞元李羊詣我南

省袖文一編便座接語其容溫然星歲未幾鄙夫南
遷滯留江湘魚鳥周旋尚書遇知變化如蟬秉憲朝
右剖符江壩交趾化行容州續宣凡日循吏莫居我
先太和之初再遂良觀分務東洛門里同陌予復郎
位公為賓客蔚然貴臣綬紫鬚白俄俱西還列於清
班來訪書殿登樓看山見領八屯循街九關賀遷閩
越紅旆雙殷克有淑聲搢紳之間惇琴鼓舞強悍低
銓延平古津峭壁孱顏豈意龍劍沉晶不還復魄侯
堂歸舟建浦雙表何在虎叩之下恭承嘉命來牧吾

三

土言念昔遊忽成千古哀哀孝嗣率禮無違言奉几
席歸乎洛師敬陳奠筵泣對靈帷平生不忘歆此一
卮嗚呼哀哉

祭虢州楊庶子文

維太和六年月日蘇州刺史劉禹錫謹遣軍吏某乙
具少牢清酌之奠敬祭於故虢州楊公之靈嗚呼利
劍多缺真玉喜折後人不壽為氣所嚙子之少孤率
性自然早有名字結交世賢席勢馳聲龍秋為企試
文再售毛翮愈鮮歷佐侯藩拾遺君前伏閣論事侵

內權克揚直聲不愠左遷一斥於外君門邈然五
剖竹符皆有聲績南湘潛化巴人啞啞比陽布和戰
地盡闢壽春武斷姦吏奪魄榮波砥平士庶同遁朝
典陟明俾臨本州錫以貴綬腰金晝遊輿疾而來風
烟為愁靜治三載卧分主憂直氣潛銷頽几不留九
天難問萬化同休嗚呼惜哉與君交歡已過三紀維
私之愛與眾無比乃命長嗣為君半子誰無外姻君
實知己昔與君遊俱為壯年怒人言命笑人言天閱
事未多信書太堅方階尺木已墜九泉誦易年深潛

〇

病難痊不見南楚方知北軒嗚呼嗟哉見幾不早追
悔已晚猶希耆老容或宣展以閑相期以晦相勉一
邛可樂萬累皆遣翫圖散快娑娑京輦天命不長願
言莫展嗚呼痛哉君卧宏農予來姑蘇飛書要約言
念鼎湖我車載脂為子疾驅入境聞寂唯逢素書發
函驚視翰不自濡相去一舍豈無肩輿君為病嬰我
為吏拘兩不如意嗟哉命夫君今往矣無復可道我
今泛然一委立造平生親友零落太早無望拔茅盡
悲宿州到郡浹辰君不起聞寢門一慟哀如焚彭

彭輅車來葵洛濱敬脩賻禮泣送行人萬夫之羞薦
君明魂三赤之版寫予哀文淒涼山河慘淡風雲已
矣長別嗟哉楊君

祭王相國文下此本已闕借李升蘭孝廉
藏本屬性木徑鈔補之時同治己巳夏宵

次公記

劉賓客外集卷第十

祭楊庶子文

靜治三載卧分主憂直氣潛銷頽兀不留九
天難問萬化同休嗚呼惜哉與君交歡已過三紀維
私之愛與衆無比乃命長嗣為君半子誰無外姻君
實知己昔與君遊俱為壯年怒人言命笑人言天閱
事未多信書太堅方階尺木已墜九泉誦羊易深潛

病難痊不見南楚方知北軒嗚呼嗟哉見幾不早追
悔已晚猶希苟若容或宣展以閑相期以晦相勉一
卽可樂萬累皆遣翫圖散秩婆娑京輦天命不長願
言莫展嗚呼痛哉君卧弘農余來姑蘇飛書要約言
念鼎湖我車載脂為子疾驅入境闌寂唯逢素書發
函驚視翰不自濡相去一舍豈無肩輿君為病嬰我
為吏拘兩不如意嗟哉命夫君今往矣無復可道我
今泛然一委玄造平生親友零落太早無望拔茅畫
悲宿草到即浹辰君不起聞寢門一慟 哀如焚彭

彭輅車來奠洛濱敬修賻禮泣送行人萬夫之羞薦
君明魂三赤之板馮余哀文淒涼山河慘淡風雲已
矣長別嗟哉揚君

